



# 中國學 思 (六)

錢

穆著

#### 介簡容內

附此書,可為研治吾國之變。理學與藝術一文 隱發微,道前賢所未當 養庭,或意篾新朝,怯 庭,或意蔑新朝,怯於進而勇於退,殊叢,不另成書,以便觀省。讀明初開國箏、吳草廬三家學述,敍朱學之流衍,本書為中國學術思想史論叢第六册, 吾國 文, 藝 專學繪畫一事,元代四 一事,元代四大家亦在其内,故事命之號召。作者由文論吏,扶章明初從龍諸臣,或心存文,以證明初從龍諸臣,或心存不成為研朱餘署之三篇,今幷入本《一代,以迄明初。其黃東發、王《

## 叢論史想思術學國中



滄 海

叢刋

(六)

著穆 錢

行印司公書圖大東

號七九一〇第字業臺版局證記登局聞新院政行

必 翻 所 版 宪 印 有 槽

印總出發著

中國學術思想史論叢(六)

刷經版行作所銷者人者 

貳元伍角

中華民國六十七年十一月出版

中華

民國

六十七年七月錢穆自識於外雙溪之素書樓,時年八十

有四

0

序

册 有 明 册 養病於臺中 元明清三代,共得幾二十人。後又決意彙此論叢 共 初 0 元 最近 收 開 自余成朱子新學案, 代 黄東 國 病 諸 , 臣集 市, 大率 E 發、王深寧、 , 讀雜部 不 盡 0 能 及遷居臺北,又續成讀楊維植東維子集以下各篇,可見元末學術思想之大概 此 識字 0 明 又 即有意續撰研朱餘 人筆記 加 吳草廬三家,可見元初學術 , 舊作 此 册 付印 金元 , 乃 統 知 明 則 治 不復再 下 初 之新 諸 瀒 人 , 道教 即朱學流衍 自 ,皆不忘元廷 ,遂持研朱 親 思想之 校 篇及、 , 因 來臺後 考 亦 大 餘 無所 概 瀋 ,無意出仕 , 納 起自元初黃東發 0 又 改 所 入 講理 民四 定 ,不另成書 十一年在 學與藝術 0 越 數年 , , 以 臺 追於清: , 篇, 在 北 便 香 觀 傷 共成 港成 末 省 腦 部 0 , 讀 此 歷 此

#### — / — 錄 目 四 三

序

# 中國學術思想史論叢(六)目錄

			四	Ξ		=	
巨 讀高青丘集	口 讀劉文成集	→ 讀宋學士集	讀明初開國諸臣詩文集	吳草廬學述	(附) 讀羅璧識遺	王深寧學述	黄東發學述
		······七八	詩文集七七		選四七	······	

#### 叢論史想思術學國中 ─ 2 ─

理學與藝術	七
金元統治下之新道教二〇一	六
台 讀葉子奇草木子一九四	
□ 讀趙汸東山存稿一八〇	
<ul><li>→ 讀楊維楨東維子集一七二</li></ul>	
讀明初開國諸臣詩文集續篇一七二	五
仍 讀方正學集 ······一六四	
出 讀九靈山房集一五五	
<b>岗 讀胡仲子集一四六</b>	
田 讀具清江集 ······一四〇	
回 讀蘇平伸集一三七	

未及

0

# 黃東發學述

案。竊謂後儒治朱學,能深得朱子奧旨者,殆莫踰於黃氏。爰草斯篇,以見梗槪 增想慕。然其書日鈔頗難得。中歲遊北平,始獲一部,方別有撰述, 子新學案,稱引黃氏語亦僅據謝山 少時讀顧亭林日知錄, 即知黃震東發其人而好之。及讀全謝山宋元學案稱引黃氏語益多,益 。及學案成書,始抽暇通體玩誦日鈔,復稍摭其 未暇細加籀誦 ,並以補謝 一二條增入學 。年來草爲朱 Щ 所

宋, 卷 見其生平讀書治學之廣大。其外二十九卷則爲其文集 。諸儒書兩宋二十家共十三卷。諸子類自家語孔氏書以下凡五十一家五卷。史類自史記下迄兩 正雜史凡十五種九卷 謂黃氏深得朱學奧旨者,在其學博而能醕 。文集韓柳歐蘇曾王涪翁浮溪石湖水心共十家十卷。合共六十八卷。可 0 日鈔分類百卷,今行者九十七卷 。經類三十一

朱子之敎而 異 東發以 其研 來 精 理學大儒 文史 0 然於朱子成說 , 用 力之勤 , 觀其 八日鈔 亦時 , ĦĴ 有糾正 謂 ,經史子集罔不搜羅 理學家中之又 , 不娖娖! 姝姝務墨守, 異 , 0 蓋東發之學, 可謂繁夥矣 此則尤值 , 然獨 專崇朱子 重視 無語錄 0 朱子論 , 其學 此 學極的 爲 博 理 寧家 卽 承

程,亦時於二程有糾正。東發之能糾正朱子,乃正見其善學也

鈔讀 卽 多糾 論 日 語 正 鈔引黄勉 語 河 一 0 卷 如有子孝弟章 濟書 , 著墨. , 朱先 無多 生 , , 日 而 部 鈔 日 餘則 日 論 語 盡 在 直 集註 解 到 矣 死 0 0 此其崇奉朱子集註之意可見 東發亦自言 , 終身讀 論 語 , 古 今 0 然此 \_\_\_ 晦 卷 牽 0 日

發 性 言 論 七精 而 語首章言學 爲仁以孝弟爲本,論性則以仁爲孝弟之本。性中只有仁 最 親 0 實則 者 此 孟子之道天性 ,次章卽言孝弟 語爲婉而 切 似當收置 而其說微覺求多於本文之外 , 聖門之敎人,莫切於孝弟矣 集註 , 使學者知孝卽仁之事 0 一義禮智 晦 。此章象山 菴或 問 , , 中 曷嘗有孝弟來 而 仁 云: 斥其爲支離 刨 孝弟 性之有可 則 固 其說 也 程子

## 叉曰:

孔子說仁 拘 釋有子之說 且 岳子雖分仁義禮智! 媚 0 其言. , 又多與 爾 仁 一義 有子時 智 1對說 爲 亦未嘗 四 , 端 未 0 至孟子方說 不根於孝弟 有 , 他日 四者之說 豆嘗說. 0 亦未專 仁之實事 義禮智四 故孔子嘗曰: 主於說性 F親是也 者 0 程子謂品 夫言豈一 0 聖賢 孝爲仁之本, 曷嘗有孝 淵 (立論 而 已 惟 弟 , 夫各有 理脈固 理是務 蓋以 所當也 自 亚 亦未嘗 子之說 渾

象

有孝弟來 子說以見 引朱子他 程 氏 乙言性· 一語 處語 程說之無當 中那有孝弟來, , 9 備受詬 惜其未收置 1。辨析 病。惜乎朱子未能矯正在前, 朱子亦謂其是一險語 集註· 精確,是誠深有得於朱子之讀書法者 中 ,實是 本朱三 語 , 別科程氏 然朱子註此章 而東發則固已糾之矣。至其不取象 。而謂程氏 , 實未能擺脫程氏語之經縛 0 乃以孟子說釋有子,又別 厥後至於晚明 ,程氏 山說 性中曷嘗 0 東發 , 則

## 又曾子三省章 , 日鈔曰

可

無待深論

東發謂孔門無專用心於內之學,其說亦本朱子。朱子又謂自 Ш 0 然集註 來 有專用心於內之說也 集註首載尹氏 自 稱得不傳之學,凡皆源於謝氏之說。使晦菴集註於今日 其後愈遠而愈失其真。獨曾子之學,專用心於內,惜其嘉言善行不盡傳。竊意孔門未 其學不傳 此章 ,終自並收尹謝兩家之說 (日:: 。諸子是外面入去,今傳於世,皆外入之學, 曾子守約 0 用心於內,近世禪學之說耳 , 故動 必求諸 , 東發加以糾彈 身,語意已足 0 ,可謂 謝上蔡一轉而爲張無垢 後有象山,因謂曾子之學是裏面 0 次 , 謝氏之說不知亦收 非孔子之眞 載 的切之至 激跃 曰 : 諸子之學皆出 。遂於論語之外 載 再轉而 否 出

又子路曾晳冉有公西華侍坐章 ,日鈔日

妙 夫子以行道 0 甚至謝上蔡 )救世 爲 , 心 以曾哲想像之言爲實有暮春俗沂之事 後世談虛好高之習勝 單 撫 與 點 數 , 語 云三子爲曾晳獨對春風冷眼 而張皇之, 遺落 世 指 看

與聖人之志同,便是堯舜氣象。此語微過於形容,上蔡因之而遂失也 破 0 但欲推之使高 ,而不知陷於談禪, 是蓋學於程子而失之者也 。程子曰: 孔子與 點 ,

蓋

叉曰:

其適者也。曾晳固未得與堯舜比,豈得與夫子比。而形容之過如此,不合於其分量而 老安少懷之志,天覆地載之心也,適人之適者也。浴沂詠歸之樂, 吟風弄月之趣也 審之 自適

矣。

意 此以下 說 論 語與點一 ,乃與宋明理學相終始 , 而 終未能 直迄晚明 歎 痛快抉破程氏之樊籠。後惟 ,程子識其與聖人之志同,便是堯舜氣象。集註爲程氏此番話束縛 , 與點一 , 是誠大可詫惜也 歎,終自爲理學家所樂道 東發爲能指 出 , 論 而又張皇之不已 語此章本旨,而咎程氏 0 明道曾點堯舜氣象之 形容之過 , 雖前後屢變其 然循

又性相近章,日鈔曰:

之聖賢,下察之庶衆 專以性善爲說 故夫子一言以蔽之曰性相近也 性 者,人得之於天以生者也 自聖賢而衆庶,皆不能不少殊。言性之說至本朝而精,以善者爲天地之性,以不能盡 0 由今觀之, , 無一不合,信乎其爲相近也。謂性爲皆善,則自己而人 謂性爲相近 。其性之所自來 。至孟子,當人欲橫流之時,特推其所本然者以曉當 ,則驗之身,稽之人,參之往古,考之當 ,固無有 不善 0 而旣屬於人,則 不能 今, 以 自 盏 世 上採 古而 同 故 0

者 性 精 善者爲氣質之性 性 中 也 下 而 不敢 生而知 而夫子之言性何其粗耶 言性只此一語,何今世學者言性之多也 四之下,性之及之,先覺後覺,人品亦各各不同,終歸於夫子相近之說。夫子未嘗言 亦指此而已耳。本朝之言性,特因孟子性善之說,揆之人而不能盡合,故推測其已上 推性之所從來也 以完其義耳。言性豈有加於夫子之一語哉。夫子言性相近,他日言中人以上,中人以 明言其爲非 , 學而知,人品節節不同 此說既 0 則曰性相近是指氣質而言,若曲爲之回護者 所謂氣質之性,是指既屬諸人而言也,斯其謂之性者也 出 ,始足以完孟子性善之說 。竊意天命之謂性 ,皆與相近之言無戾。孟子專言性善 ,所謂天地之性, 。世之學者, 乃因此 o 是推天命流行之初 然則孟子之言性何 陰陋吾夫子之說 他日言二之 。夫子之言 而

#### 叉曰:

孟子言忍性,是性不能皆善,而忍亦習之義

也

辨 之上。 與天命 判辨天地之性與氣質之性 風氣變之有漸而不易。而欲尋求朱子學之流衍,則必於此三人者,乃可得其真血脈真傳統所在 實亦無逃於如東發所指陳。惜乎此風扇蕩,終難驟返 東發亭林桴亭三人,皆善學朱子。朱子本人翻此窠臼未盡 而陸桴亭著思辨錄 ,亦宋明理學家一大事。陸王學者少言性 , 其論性大旨,乃一 如東發,引孔子性相近之語以上駕乎孟子道性 。直至晚明,顧亭林始力言論語 至三人始逐步翻出 ,程朱學者則鮮不言性 可 見學術 不言性 而 善 所

此

難 確 指 , 貴於心知 其意者之能 微 窺 而 見 也

又讀尚· 書舜典· 人 心 惟 危 一章, 日 鈔 日

皆於此 能 明 學者借以爲據 後進 道 近世喜言心學 此 而 言曰:古之聖人,將以天下與人,未嘗不以治之之法而並傳之,可謂深得此章之本旨 白 不 遁 驗於事物 0 此 襲用其語 洞 解 蓋陷於禪學而不自知其去堯舜禹授受天下之本旨遠矣 乎判 達 書傳於朝者 , 付之不可 ,人人所 0 0 禪學 心者,所以統宗此 , 。愚案:心不待傳也 故僭 捨此 同 以 究詰云耳 ,乃因以三聖傳心爲說 書 理 0 章全章本旨 其所見如此 歷千 爲障 載 0 , 而獨 聖賢之學 , 越宇宙 理 , 指 , 0 而 而 流行天地間 其 獨論人心道心 心 , 別白其是非。人之賢否,事之得失,天下之治 , 有不期 由 。世之學者,遂指此 , 曰:不立文字,單傳 心而達之天下國家之用 而 , 貫徹古今而 同 。甚者單摭道心二字 , 何傳之云。俗說浸淫 。蔡九峯作書傳 書十六字爲傳心之要, 無不同者理 心印 。 此 無非至理之流 , 蓋 也 , 嘗 不欲言理 而 9 0 理具於吾心 雖 賢 者 述朱文公之 直 謂 卽 或不 而 亂 行 , 0 心

其

禪

爲

是

此 不 書集傳序單 傳心之說,朱子已先二陸鵝湖寺詩言之。東發 鮾 義者之終尠其 貽害學術 拈 Ü 學以 人也 爲發 淺 鮮 揮 0 東發之辨 實失師 門宗旨 , 不僅以辨 0 而 陸王 意尊朱,文集斑斑 所 謂 虞 亦所以辨程朱 書十六字傳心訣者 可考, , 可謂 東發寧有 草絕 乃直 而 至 特 晚 不知 出 明 惜 猶 惟 噪 蔡沈

膫

傳

朱子詩集傳不采詩序,日鈔論之曰:

意未能法 謂 中 王 i 辭之簡 治 甫 非 , 則 誠 序 田 其說 大 遽 亦 莫知 潔 田 難 實出 諸篇 事 其 讀之使人瞭然,亦孰有加於晦 , 0 然其 則以 於國 皆非 所 自 刺詩 語 指 作 諸 家參之, 桑中溱洧爲鄭衞之音 0 , 亦文義之曉然者。其餘改易固 去之千載之下 ,自今讀之,皆藹然治世之音。若謂 庶乎得之矣 欲 菴之詩傳者 , 0 則其辭曉然,諸儒安得回 旦 盡 去自昔 不 。學者當以 可 相 傳之說 成 盡知 王不 晦 9 菴詩傳爲 敢康之, 一護 若其發理之精到 別 求 而 其說於茫冥之 謂之雅音 主 成王爲周 間 有 。岩 於 成

鈎 此 論 異者,復旁搜於齊魯韓三家 可 朱子治易 懸爲後人治詩一 兼取 伊 方針  $\H$ 康節 0 惜乎清儒不勝其門戶之私見,必欲盡返之於毛傳鄭箋以 ,使詩學重困 東發則深以 爲 於叢榛宿莽中, 不然 0 日 鈔 日 不能復 出 ,亦可 惬 也 爲 快

獵

奇

之言數 菴 先生作易本義易啓蒙 自能 不 我朝理學大明 包 , 信乎其復舊 避 |X 伊 得之李挺之穆伯長陳希夷 Ĵ۱۱ 而 言理 從吉 , 伊 , 學數者 而理者人心之所同 ĬII 且 程先生始作易傳 ,乃兼二說 備 爣 也 不 0 康節所謂先天之說 明理 0 0 , 愚按:易誠爲卜筮而作, 窮理而為 必至舍人 0 , 康節言數 時則有若康節邵先生 精 而 , 則可修 言天 ,則易之書本無有 , 而數者康節之所獨 0 伊川 己治人, 之言理 ,又別求易於辭之外 考之經傳無有不合 有補 0 , 當世。 易於理與數 本之文王孔 0 明理 言數 者雖 而 子 不 易至 精 固 晦 知 康節 [無所 數 菴 晦 朱

過尋流逐末 流爲技術 0 康節 大儒 , 以 易言數 雖 超出漢人之上 , 然學者亦: 未 易 躐 等 若

以 易言 理 則 日 用 常 行 , 無往 非 易 , 此 宜 審 所當 務 也

東發不阿守朱子一 家言 , 觀此 處更可 見

日 鈔又言之, 日

謂易本卜筮, 謂詩: 非美刺 , 謂春秋初不以字爲褒貶, 皆曠 世未聞之高論, 而實皆追復古始

之正 說 0 作見駭: 然 , 熟輙、 心 靡 0 卓 識 雄辨 , 萬古莫儔

其推崇朱子,洵可謂更莫有加矣。 抑其融會義理考據而一視之,絕不存芥蒂於胸 中 , 此 層 更值 重

視 0 若使此下 學術界 , 能沿 此蹊徑 , 續此 軌 轍 , 則 何來有漢宋之門戶

東發治學,

旣一

本朱子

,其於羣經大義

幾乎一依朱子爲從違

0

偶

有矯挽

皆其

X 蜂 学 大

者

春秋 已略 凡七 引 如上。故日鈔於讀論 卷 讀 戴禮 凡 十六卷 孟 詩書周易 論議 一較多, , 皆各得一卷, 則 因 朱子於此 因朱子皆有成書 未有 成書 並亦較少 , 不煩多立 闡 也 0 日 鈔 讀

,

說

彻

也

肅

日 1鈔於讀 本朝諸 儒理學書 朱子外極 推 濂溪 謂

,

襟莊 本朝 理 誦之爲快 學, 闡幽 於周子 何 啻 蟬 蜺 , 集成於晦 塵 涴 而 鵬 運 翁 青 太極之圖 冥哉 , 易通之書 微晦翁 萬世莫能明

然其 論 尋孔 顏 《樂處 節 乃曰

顏子之樂, 周子於通書固嘗言之,曰: 見其大而忘其小焉爾。大者 ,性命之源,道德之至

處 通書者 尊 子 國 足 至貴 所樂之處,實吾心固 民 以至於六合之外 , , 小 又顯著若此 小 則 國 爲 所謂芥視軒冕, 相 显 , 0 有 則周子高明而博學,窮極造化,自然造詣 显 後世有能篤信而自得之,其樂豈有異乎哉 。天地所安之處 必於有行之爲滯累耳 塵視 金玉者也。夫然, , 於人 0 (事無) 周程之相與領會 故吟風弄月 關 0 , , , 學者未宜過 其大若此 自然不勝其樂 0 若其極 論 , 而 而 天 其部! 地 問 0 不 所 也 安之 見大 示於

此 方 濂 此 極 圖 面 溪所舉孔 辨 0 日 不多傳 義旨深微。 似是 遺書 未害也 東發是朱非 鈔 世 明 讀朱子語類 後據 而 述 , 顏樂處道路有歧 撥亂 非者 以明道學之正傳者如此 流於高 通 。濂洛言道學 微朱子 書 尋孔顏樂處,乃是濂溪傳授二程理學大 如彼 反正 陸 , , 空 加以發明,此二也。至於造化陰陽,東發似少詳究 如仰觀造化之大,莫知所措辭 如此 , , 豈足喻勞烈之萬 使道學之源不差 則 則太極 ; 此 一 恐無復可返之期 而 ,後來者借以談禪, 止 0 論性則寧從論語 也。濂溪爲學,窮極造化 圖之精奧閎深,將使後世莫能明 0 窮極釋氏之作用是性 ,而夫子之道復明 哉 , 誤 人未央也。今朱子解剝濂溪之圖象 則其害深矣。此無他 • 。然嘗詳之,夫子作六經 論易則頗不喜康節 (血脈) 所在 ,曾與二程極論天地 此其有功於天下萬世 辨詰諸老之流入禪學 , 顧 , 後來程謝特提曾點 , 然所謂 。象山貽書朱子 , 凡近者猶 其讀朱子語類 , 後來者溺於詁 孔 ,顏樂處 所安,二程於此 可進 以明其 較之施於用 裒列二程之 而 則 極論· 則 殊 至 則 訓 不 顯 日

太

與

此

乃東發自

i己學術·

立

•

切近

人事

,

落

高

,

凡

日

鈔

育當:

注

分辨

年羣所 會通 伊 自 學 又必 以述 則 乎後之治理學 未 也 ĴΠ 成於門庭之內,兄弟之間 何 經 貴於程 程 伯 朱 注 東發 0 不傳而了 既爲 仲之間 故僅以 陸 意 , 闡 對 , 程 門諸大弟子 風 立 加 論 者 朱陸異同 氣所 不煩復 己有獨得之秘乎 北 以 , 0 亦猶 宋理 然朱子年 剖 , 限 必 說 如象 闡朱 學諸 場 日 0 亦 程 外 夫 所 是識解 朱陸 觀點衡量朱子, Щ 事 謂 。朱子在宋代理學 , 儒 在 與晦 ·學歷 更多生一 , 朱子學本二程 , 然豈絕無所聞 尤所 王 。二陸之學亦時復有得於程門 有 菴之相水火乎?若謂象 , 先於二陸 蔽 圃 辨 朱子 治經 析 故 入 學者 則決不足以包舉朱子爲學之大全。 細 相 不 0 , 中之地: 見濡 率 抑 此 者 0 陷 鵝湖之會 且 固 , , 三染 於 時 同 又 朱 無可 此 空 乃在分別指出 樊囿 位 必分漢學宋學 學卽程學,朱子僅是程門 疑者 , 賢 究 Щ , 讀 莫能脫 , 已在朱子成學之後 如何乎。 0 而果謂 然若 , 承 惟 一程與朱子之有 明道 出 象 謂 , 後 惟 朱子 Щ 其崛然拔起於孟子以後千 0 人稱述 惟東發: 求門 喜明道 , 則又當置 意此 於傳述二程外 /戶之明 於此 不喜伊: 而 理 0 傳人, 學 相歧 朱子不 且二陸之學 朱子 顯 , ĬП 乃益見其卓 必 處 也 於何 爲 程 則 不 更 , 貴道 然豈 反 述 無 此 朱 地 朱郎 陸 建 騈 層 明 五 術 5 雖 舉. 從 而 樹 道 惜 之 百 所 來 有 日

#### 日 鈔 有 日

識

,

爲前

後諸

儒

所莫逮

也

,

,

議 自 孔 論 之正 孟 歿 0 異端紛 迨二程得周子之傳 擾 者千 四百 年 , 然後有以窮極性 0 中 間 惟 董 仲 舒 命 正誼 之根柢 明 道 , 發揮義理之精微 與 韓 文公原 道 0 議者謂: 篇 比 爲 漢

大抵孔

後 簡 而 人言朱學 摯,苟非深入兩宋理學閫奧,能眞有得於朱子論學之淵旨者,則鮮能道及於此 之踐履之實 所未發 唐諸 孰與 識心 性以上不可說處, (教止。嗚呼危哉。故二程固大有功於聖門 儒 , 而見性者雖所出異源 率多注重於其辨象山 說 0 特推拉 得向上一 , 固 其旨 可 其意固 垂萬世 層 , 要不越於孔孟云耳。然孔子於性理 0 愚謂豈特視! 將指義理之所從來,以歸諸講學之實用 而無弊。自心性天等說,一詳於孟子,至濂溪窮思力索, , 而 少能注重及其所加於程門之挽救 同湍激之衝。故二程甫沒,門人高弟多陷溺焉 漢唐爲 然。 風氣日 , 而晦翁尤大有功於程子 開 , , 舉其端子 議論 日 。東發此 精,濂溪之言, 而不盡言,或言之, 適不幸與禪學之遁辭言 條 • 言婉 0 不有晦 雖孔 而 極 切

必要

而

盂

亦

日鈔又曰

之毫釐 逸訪遺 程氏發明孔孟正學於千四百年無傳之後 0 及考其所編之全書,乃稱伊 ,始克成 則其謬將有不可勝言者。 編 。其尤切於日用者 川自謂 然則學者之讀遺書全編,其又可不謹乎 , ,微言奧旨,特散見於門人之集錄,賴朱子起而 ,惟李籲得其意,故以爲首篇 已類而爲近思錄。然朱子必丁寧學者 。且反覆詳 , 更求之全 論

此 處卽本朱子意 ,謂讀二程遺書不可以不謹。此下遂歷舉遺書多條 而 日

售莊列之說, 蕩以高虛 孟之學, 大中至正之極 舉世生長習熟於其間而不自知。 而二程之學,正 以發明孔 , 孟之言 聞程子之說,稍不加審 不幸世之黠者

借

佛

東發固 謂 耳 則 子 堯舜文王爲他道 憶 也 目 動 條 其 o 濂洛之言, , 0 所錄 第二 必 惟 師 謂 何 陷 平 其 莊 日 條 生形容 入 與 居 日之言 於 四 處 言切 以 彼 海 蔦 亦 恭 有 困 脈 飛 道體之語 0 0 , 程門 執 「窮天祿 愚亦謂 魚躍爲活 亦粉澤於其所學自成 孔 事敬 第三 孟 高弟 所 一條言 爲儘 未 永終之戒異也 , , 合於孔 而 發 觀鷄雛 才莫過於謝 好 孟 , 子亦以 然要當不越於孔孟 , , 孟者 謂老氏 活潑潑何等語 , 側隱爲 而 , 一家之後矣 0 皆指: |谷神| 顯 謂與善人處壞了人, 程錄之眞 道 仁之端石 不 以 0 爲仁 其 死 , 所 求之孔門 0 0 錄 章爲最為 異於孔孟者 楊子雲有言 耳 治二程之學者 0 切 程說之可 0 謂堯舜之事 脈 觀 佳 鷄 惟見其云君子之道造端 何其與毋友不如己者之意殊 0 此殆其· 疑 • , , 殆 適堯舜文王 程錄之誤 , 既惟 ,如太虛· 於機 亦莫多於謝 本心之形見 有窺 觸 中 神 爲 悟 點浮 顯 正 0

道

非

而

求

夫婦

雲過

道

٥ 第

言 爲 而 王 治 遺 理學 書中 其當 不知於程朱間 爲門 所言 治程朱學者一 人之誤記 , 乃於孔 亦當 有辨 絕大當究心之問 孟有合有異 可 知 批 0 此 大辨 0 二程自言所學, 題 論 0 實亦發自 惜乎東發以外 朱子 既不欲與孔孟樹異 , 惟 鮮 有 朱子所辨 人 能 其此 猶 識 未 則遺 解 盡 書中 僅 東發繼之 知 之於遺 凡異孔 辨 朱與 , 孟之 書 此

誠

日 鈔 卷 九 + 有 跋尹 和 靖 家 傳 文 謂

之功固· 和 靖 每 天 謂 和 錄 靖 不 親見之事尤的 可 至 晦 菴 集程錄 。今程 錄 , 反有! 中門人竄 疑於和 入禪語者頗多, 靖 而學者 多從晦 和 靖之說 奄 0 其可 廢 晦 也

和靖之說不可廢,卽是讀遺書必加謹也。然而又曰

此又見讀遺書必 上蔡語錄雖多異於程門 加謹 , 而終不可置之不讀,和靖之說不可廢 ,而程門兄弟之格言多載焉,朱呂二先生已取之入近思錄矣 ,而朱子之說亦同爲不可廢 0 故謂

朱

## 日鈔又云:

子後善學朱子者,莫東發若也

不同 也 其言矣。故曰:道有君子有小人,德有凶有吉,而道德爲虚位 人之道, 而德乃凶德。其立辭之精, 措意之工, 剖析是非之要切, 老子貴道德而賤仁義,吾儒卽仁義而爲道德 。程錄非之,豈亦門人之誤歟,合俟知者而請焉 0 儒者以仁義而居之,則道爲君子之道而德爲吉德。老子舍仁義而欲居之,則道乃小 ,此毫芒疑似之間 ,韓子欲辭而闢之,亦難 。若曰道德之名一也 似未有過於虛位之說 <u>响</u> 實 平

此條 也 無誤乎。惟東發下語和緩 0 所舉 然日鈔他處 • 似 亦不得認爲皆由門人之粉澤。然則遺書中,縱是二程本人語 , 亦有暢論竭言不加婉辭者 ,而曰合俟知者而請焉。 0 其言曰 理則已明 , 辭則已遜,確乎乃理學酯儒之吐 所記無誤 ,亦豈便 盡

異端熾 附程錄 自昔聖 帝明王 ,千有餘年而後得原道之書辭而闢之,昭如矣。奈何溺於異端之士,吹毛 欲 陰爲異端 , 所以措生民於理,使其得自別於夷狄禽獸者,備於原道之書矣。 報仇 耶 0 程錄嘗謂 愛主情 而言 仁者愛人,此正吾夫子之言, 水釁 孔 豊可 孟 沒 因 竊

之道 爲異說 彼此之分者,上蔡之言也 上 子傳之孟子 以 一蔡謝 博 甚 愛爲仁 麼 而 及 天下平 備見於原 E 氏之門歟 , 以爲 亦上蔡之言也。 心 非 所謂 原 此 而 贵 道 道 必 0 不 不 有 傳 必 及 0 致 程 以 書 盡 所 者 愛爲仁 録嘗以 見 知 及致知格物之條 , , 凡今所 豈復· 前 格 0 0 岩無所[ 載 後 物 僧 , 有 相 虚位之說 , 如異端 議 而以覺g 此 人總老之言 承之名也 殆程 見 原道三說 , 爲仁 爲非 所謂 所謂 日 子 , 0 非 原 時 傳 , , , 不立文字 , 此決 往往類此 謂默而識之是識箇甚麼 上蔡之言也 者 他 道 偶然之言也 日:堯以是傳之舜禹 有 , 傳 非程氏之言 面 個 , 相授受之密傳也 單 甚 , 愚故<sup>2</sup> 麼 傳心印之傳哉 。孔子言脩己以 0 謂 0 堯舜禹湯 意其爲上蔡謝 有 0 程 不二法門 信錄又載日 湯 , 0 無入 託 文武 文武 。 或 安百 附 昌 [黎言治] 者 氏之門 而 周 周 而 程 公孔 此 公孔 錄者 姓 言 不 自 類 道 得是 子 孟 多 無精 或 孟 出 子言 乃 平 依 相 , 孔 天 得 於 傳 發 粗

而託於程錄也。

儒 之門 非 下 北 此 在 宋 逮 朱 儒 伊 秦漢 所 一祭以 學復 浴 子 依 託 以 而 覺 晚 興 下 下 爲仁 歳親 則 理 , 學 赡 似 未 未見有 僡 不 有 不 校 奠 統 可 韓 臻 依 韓 集 斯 中 確 理 洵 據 於昌黎可 如此之類 刊 直至二 謂 則昌 未 有 黎之不當 程 之創 謂偏 , 而 E 其說始 有 舉 加 所嗜 也 辨 被 指 析 0 變 然東發亦 數 0 0 至 然亦每譏 , 伊 東發乃始暢發之, 乃及遺書之於原道 Ш 謂其兄明道 未遽謂二程貶 韓公爲文人 幾乎依 抑原道 ]屢有: 乃孟子死後千 。惟於原 非 (據原) 貶 特 道博愛爲 , 謂 亦 道 四 其 非 固 出 議 其 於 遺 宜 謝氏 書 不 矣 眞 H

#### 日 1鈔又 條云:

指 無偏 精,得氣質之性與天地之性對說,而後孟子專指性善之說 1-原性 本源 智下愚不移中來,於理無毫髮之背。至伊洛添氣質說,又較精微 。此於孟子之說有功,而於孔子之說無傷。實則孔子言性,包舉大體,孟子之說 論 ,而言性無出於孔子者矣。奈何三品之說本於上智下愚之說,而後進喜聞伊洛近日 與生俱生,而其所以爲性者五,仁義禮智信,最爲端的 ,舉以屬之天地之性 。性有三品之說 。蓋風氣日 開 • 正 , 其說 議 一從孔子 方始 論日

特

崇道貶文,尊伊洛而詆昌黎,已成理學界中傳統風氣,無足恠者。而東發之辨,乃彌見可珍 之說 , 或至攻詆昌黎耶

#### 日 鈔又曰

其抱負以自達於進退人才者 警以天下未治 上宰相三書,世多譏其自鬻。然生爲大丈夫,正蘄爲天下國家用。孔子嘗歷聘列國 亦嘗游說諸侯矣。如公才氣,千古一人,亦同流俗,困於科舉,而不得少見於世。故直 ,光範門雖尊 ,公直與之肝膈無間 0 始則曉以古者成就人才之道,次則動以 。然則公之抱負者爲何. 一己飢寒之迫 如 ,而可譏其自鬻 **,** 孟 終則 攄

#### 又曰:

哉

公之三上宰相書, 豈階權勢求富貴。宰相人才所由進。磊落明白以告之,公之本心,如青

叉曰 符讀 天白 書城 南 世多議 其以

富貴誘子

,

是固

然矣

• 然亦人情

誘小兒讀書之常

愈於後世之

日

0

偽者

示兒詩以 有屋 自慰 , 與符讀書詩正 相 終 始

理學家鄙視文藝, 符讀書城南詩等, **遂乃高懸** 於是更爲彈射之目標,而東發一一爲之平反,此等情懷識趣 種 不近人情之標格 肆所譏評。昌黎尤是文家冠冕 求之一 其三上 宰相

學家 中實爲難 得

書

,

日 鈔又日

昌黎與馮宿論文, 而違其訓 過野人議璧,隨和稱好。 公方能得公之文於殘弃而發撝之,否者終於湮沒 0 人誰 不讀韓歐之文,至執筆則往往 謂 稱意者人以為恠,下筆令人慚 **真知公之文者,又幾何人哉。人誰不講孔孟之學,至遇事** 而 0 非 其體 自歐陽公以來 則 人 0 (以爲) 人莫不飲食 好 蝇 0 歷 日家藏而 數 鮮能知其味 百 年至· 本 人誦 朝 則 往往 不心 殆 歐 不

誠求之, 是眞 八無益哉

此以韓歐之文與孔孟之道相提 人玩 物而喪志也 東發此等處,蓋皆深有得於朱學之傳統 並論 欲人心誠求之,以知其味, 0 竊謂 岩繩: 宋明理學家若 以 理學 家之偏 均能循 狹 此門 是 脈 不 啻教 游

心文藝, 日 鈔又盛讚蘇東坡韓文公廟碑 則其 學思所至 , 必將遠異於如今之所見 , 謂非東坡不能爲 , 而 惜乎具此識解 非文公不足當 , 備此工力者之不多觀也 ,謂是千古奇觀 叉曰

其偽 吏部 臨川王 論之公矣。 人 口 憐 王氏來, , 實愛其文, 無補費 侍 矣 郎 氏 0 昌黎本以 今附 此 亦豈其然乎。又世傳昌黎嘗與大顚書, 嘗爲詩以譏昌黎 精 可 神 此詩 獨 知其爲僞尤明 0 刑部 以其未免詩酒浮華, 晦菴先生校昌黎文,乃取此詩附其後。愚觀晦菴平日 , 侍郎 則所未曉 到 , 潮 日 0 晦菴亦以其書爲眞而錄於後 州還朝 0 ,紛紛易盡 且 枉 費精神之說 志在利祿 , 久之, 百年身 乃遷吏部 ,而微有嘆息之辭。瑕瑜 其文陋甚,昌黎集無之。 ,陸象. , 舉世 Ш 無人識道眞 0 歐陽公所得大顛 正以此譏晦 ,亦所未曉 , 力去陳言誇末 菴 不 , 書 而 東坡先生 於昌黎實敬 柏 :其說| 石 揜 本 , 己 正 嘗 自 乃 極 俗 稱 辨 臨 其

此 朱子學者之所 條若 掩去其作者與書名 言 0 義 理 考 據 , 使 , 實 人讀之,將更不料其乃一 事 求是 , 文道兼 盡 , 本末俱到 理學大儒所言 , 非眞有得於朱子學之傳統者 ,又是在 理學 中 汐 意專崇 , 亦

日鈔讀柳文有曰:

宜

不能

沒有此言·

也

六卷七卷 也 也 0 律 律 出 者嚴潔其身 於 皆浮屠家 佛 其 (徒憚而小之。禪不出於佛, , 碑 佛所教人之本旨。禪之說創於達摩 銘 惟 南 嶽大明二碑 , 其徒張而大之。世之言佛者 明 白 可 誦 0 蓋 自 二碑所言者律 稱 教外別傳 , 將 佛 , 書 安從乎 而 初 餘 無 多言禪 此

朱子竭意闢 禪 東發承之。然謂 禪不出於佛 • 則東發自抒己見 , 非自朱子來

又柳文送僧浩初序, 專闢退之闢佛 。東發評之云:退之言仁義, 而子厚異端 。退之行 忠

直

而子厚邪黨。尚不知愧而反操戈。又並論其文云:

等作 章者 志人 柳以文與韓並 厚放浪之久,自寫胸臆 也 物以寄其嘲 亦老筆與 。故愚於韓文無擇 稱 駡 俳 語 相 半 0 柳之達於上聽者皆諛辭 模寫山 , 不事諛 0 , 於柳 間 水以 及經旨義理 , 舒其抑鬱 不無擇焉 不求哀 , 0 , , , 致於公卿大臣者皆罪謫後羞縮無聊之語 歐陽子論 不關經義 則峻潔精奇 則是非多謬於聖人, 文, ,又皆晚年之作 ,如明珠夜光 亦不屑稱韓 凡皆 不根 柳 , , 見輙奪! 所謂· 而 於道 稱 韓李 大肆 目 故 其力於文 也 , 此 此 碑 惟紀 蓋子 指 碣 李

鄒。

後 宋人論文者 , 文體 異 同 , 皆已韓柳並 , 指 陳利 病 稱,東發獨區以 而 歸於作者之心術與學業 別之,又引歐陽 0 氏言以自張 此 亦淵源於朱子文道 0 其於 柳 集 貫之旨推闡 分別其年代 先 來

其論歐陽文之本論則曰

也

佛 就昌黎改易新說 以 法害政 泄 其實 , , 昌黎之說盡之。 石徂 徠之怪說盡之。 而 適以消剛 佛教 爲柔, 会害人心 歐陽公所謂上續昌黎斯文之傳者,正以 如閉關息兵,惟敵之縱 ,晦菴之說 盡之。不能明言其所以 0 嗚呼 ! 殆所謂於 闢 害而 佛 能 事 使疾聲大呼 言距楊 然 不 墨 過

者,皆聖人之徒歟。

### 叉曰:

耳 歐公雖亦闢異端 0 故求義理者必於伊洛,言文章者必於歐蘇。盛哉我朝,諸儒輩出,學者惟其所之焉 ,視韓文公恐不同 。蘇公以公繼韓 ,上達孔孟 ,此則其一門之授受所見然

特不必指此爲彼爾。

彼,莫如惟其所之。東發之意偉矣,朱子後,能爲此言者殆惟東發也 得於義理 未必卽得於文章。得於文章,亦未必卽得於義理 。二者苟不能合一,亦不當據此 廢

章宗師 發日鈔雖不廢集部, 東發又引歐陽言 東坡先生所尊事,昌黎公以來一人而已。所言猶若是,後之欲爲文者可以觀矣。是則東 要其意亦非欲以爲文人而已 (見讀史本朝名臣言行錄) ,文學止於潤身,政事可 ,此則亦當辨者 以及物 而日 :公一代文

其讀蘇文上劉侍讀書,謂:

見才於後世 言天下之所少者,非才也 之才者氣也 也,其所以 敗者, , 0 而不見才於古人也。 才氣雖異名,二之亦不可。今以才爲敗,是見才於流弊,而不見才於本原 其才也 , , **愚謂此立論之過,幾於偏** 氣也。愚謂人才以氣爲主,此論得之。又言凡所以成者 矣 0 其實成天下之事者才也 遂吾身 其氣

又讀思堂記,謂:

坡 心 意 德 才高 盛仁 之官則 0 自 [得之趣 熟 識 思 敏 不 , 自 事 必 思 旣 古 不 者 立 未 可 聞 以 就 也 訓 無思之說 如 而 又習用道家之說 朋從 爾思 天下 , 思而 何思 何 , 不 ·學之類 以 慮 愛惜 言 精 理 , 有自 則 神 爲 戒 人之過 心 然 , , 故 不 ·待思· 創 於思 言 無思 也 也 思 不 0 非 不 思 孔 可 而 孟 無 敎 0 , 東

泛濫 覽 廣 固 子 以 孤 歸 此 讀 皆 之一 而 而 理學之途 , 讀 就 觀 後 書 而 已 , 遂使: 文章 成 書 線 於 來遊朱子之門者亦終 門 終 日 此 程 嫌 辨 而 初 路 則 乃東發善 鈔 蘇門下海 後定 勢將橫 太狹 太 義 所 闢 狹 羅 理 有 列 0 , , 0 朱子始以博學廣 其 承 不 斜 終於分裂 伊 義 得 文 心 軼 ĴП 理 朱子 集 不 枯 出 無窮 並 不 莊 如 燥 0 朱子 門 能 乃 此 列亦 , , 要亦 有以 者 則 其 於二程傳統 , 韓柳 言 不 文 0 **鷺**教 然孔 導之。 集 種 寓目 由雙方讀書風氣之相冰 , 學 亦 新學 以 問 孟 下 人 0 何 和 可 風之展開 大 而 孤 下 , , 道 痛 乃象 靖 則 凡 程 不 門敬字 來 易 得 究 快 , 治得解: 十 究非 程門 山又議之曰支離 入禪 0 伊 家 大値 蠶 . 半 年 放 Ш , , 0 程門一 叢棧 於此 亦 東發於此 0 炭 東發專崇朱子 以 注意大堪欣賞 , 道之比 乃益見其重要。 僅 讀 下 0 得 書 惟 梢 都 爲 讀 看 , い書少 蓋莫不 此見當 大學 格物 入禪 0 故二 | 者 窮 , , 西 竟體 時 此 銘 理 程之爲道 正 極 0 理學門 之 惜乎 此 亦 心 斥 0 文章 循 象山 因其視 無放 在二程當 端 東 玩 之士 發以 處 戶 , , 然 其 非 必 義 , 讀 固 時 理 而 程 後 聊 至 愛於 門

諸

史者

則更少之又少

0

又

何

論

於詩

文末技

0

而

從

事

詩

文者

,

亦尠能

味道之腴

,

而

惟

雕

章

琢

旬

是

風

終

於

不

揚

治

理

學

者

仍惟

奉

語

錄

爲

主

,

能

上

探

經

籍

者

E

少

能

旁及百家者更

少

,

又能

縱

恣及

於

書之

資

此

於

朱

已

深

者

太

,

殆

必

欲

敎

務 苑 此 類又復距之益 固 限於其人之才,抑· 遠 此 則讀東發之書 亦囿於風氣 ,而學術之各有門戶,乃不僅道學與儒林分而 所由1 益增其嚮往之私 也 不合 而 文

日鈔又言曰:

精微 廊崇高之地 **涕漢廷之風** 能文之士,莫之能 東坡之文,如長江大河,一瀉千里。至其混浩流轉,曲折變化之妙, , 則當 求之伊洛之書 0 及既懲創王氏 如親見閻閻哀痛之情。有不能不惻然感動者。真可垂訓萬世矣 尚 也 0 而 尤長於指陳世 ,一意忠厚,思與天下休息。 事 , 述敍 民 生疾苦。 其言切中民隱 方其年少氣銳 則無復 , 發越 。然至義理之 可 以名 懇到 有賈 太 狀 傅 使巖 0

得也 人讀 朱子於東坡 蘇 集 愛其文辭 ,辨義理 |則嚴| 則 尠不增其排拒理學之氣燄 斥之,論文章則深與之。東發承其意 0 於以知心 胸 , 廣大 其於評騭蘇文又加翔實焉 , **識趣明允,之於學者** 0

其讀曾南豐文則曰·

密 略 言治皆 南豐與荆公俱以文學名當 相 漢 似 公網之疏 纖悉於制度而 特遇: 於世 其 (效亦可 者 主周 不 同 覩矣 禮 耶 世 0 荆公更官制 抑 最 0 南豐之文多精覈,而荆公之文多澹靜 聞古人有言 相 好 , 且 相 , 南豐多爲擬 延 有治· 譽 0 人, 其論 無治法。詳於法必略於人 學皆 制誥以發之。豈公與 主考 古 其 0 荆公之文多佛語 師 奠 荆 皆 公 主 揚 抱 秦法之 雄 負 0 其

此

0

而 南 豐之文多闢佛 ,此又二公之不同者

亦將 有此 遇南豐荆公集 歷代之治道,宋初之政制 朱子極喜南豐文,少嘗慕效之,日鈔此條 魄力與 無話說得到 此識見。因經史治道,本當爲性理大儒所潛心探索也 ,亦將有無話可說之憾。而一輩以絺章繡句爲盡文學之能事者 ,又及於周官一 書之不可 ,無論 南豐荆公,論其文,又論其人、其學 '信用 0 皆是卓見獨 。若限於以談心說性爲理 出 0 荷非 ,雖日抱曾王兩: 性 理大儒 0 並 一縱及於 學 固 集 不能 則

類 皆聖人之所謂文。謂論文至此 書云:文者務於有補於世而已 無不一一爲之考覈其所論之是非得失, 其讀 則和公集,於荆公上仁宗皇帝書,言方今患在不知法制 ,不其盛矣乎。此皆於荆公集有所取 0 與祖擇之書 而於老子辯 ,謂二帝三王引而被之天下之民 , 則深喜之, ,其他如伯夷論三聖人論周公論之 謂當寫出 , 熟讀 孔子孟子書之策 0 又曰 …上人

#### 又曰:

理者 老杜 者 其文率曖昧 文人不護細 辨析 , 必欲棄 記誌 義 理之精微 而 行 極其精彩 仁與智而又通乎命 不彰 ,是有是言矣。亦孰知博學能文,其淸修苦節有如荆公者乎。公之文,有論 迂弱 經綸 髣髴昌黎,雖有作者,莫之能及。公其文人之護細行者乎 而 不振 治道之大要,固有待於致知之眞儒 0 未見其有犂然當人心 有論治者 必欲 養士 教士取士,然後以更天下之法度 , 使 人心開! 耶 0 目明 惟律詩出 誦詠不忘者 於自然 。 或

亦

如

排

達 謂 而 其論治 又恰 各得其當 東發 切 評 講 不 移 理之文, 荆公乃文人而 ,洵非 0 又謂: 與題詠記 性 其 理 因 大儒 護細 細 行 則 碣之文如 行 而 漢能. 致大 ,評其 用 如 是也 文, 出 , 並引蜀· 兩 謂 手 未能使人心開 , 《人某氏》 不 當例 言 觀 0 , 此 人雖 目 等皆是 明 誤 , 威 誦 論 詠 , 文則 不忘 人 論 ククラス 事 所評: 論 學 , 謂 論 皆 文 是 迥 確 不 平 猶 論 正 人 0

因

明

內

#### 其讀 Щ 谷 集 則 曰

學 風 拒 此 少 不變 文章 之論 注意 望 品 公欲 集 目 涪翁孝友忠信 最 乏。 0 , 0 0 蓋東發 則眞 誠 讀 挽 不 不 高 所 愚熟考其書 加 涪 兪 合於周孔 , 學 翁之書 謂 理 謂 濇 實見 程伯 生時 老削 會 義理考據辭章 , , 髮半 湻 , 於是東發此等 不 而 者 篤行君子人也 終亦 爲外 淑 不於其本心之正大不可泯沒者求之,不 爲平生所欣慕。 , 其論 Щ , 其書流· 甚 集 , 難豁 著雖先莊子而 , 三 者 棄 盡 0 涪翁亦嘗諫止。此其天資高明,不緇不磷 其 然而 議 布 0 旣 論 世 方蘇程門徒相 出 己 但 , 也 七 雖 不 見其嗜佛 ,豈止爲涪翁 廣 百 後語る 尊荆公而 年來 ,又文章之士不 孟 老 , , 眞如古調 詆 遺 至 , 一晚年自 程子 工 一人辨白而 , 獨涪翁超然其間 嘲 詠 , 之獨彈 足知 讀 至他 列其文, , 善品 性 已乎 治翁 理 日議論 書 藻書 無有 則 0 , 硏 亦 , 惜乎東發 畫 欲以合於周 人物 豈蘇門 過 心 恐 無 , 性 遂以 而 自 , 聽之者 號 語 則 誤 蘇門? 理學 此 謂 雷 時 孔 辨 口 周 者 諸 者爲 茂 學 0 0 信 方荆 叔 後 人可 土 , 又 知 例

〈讀汪〉 浮溪集則 日

-24

理學之外不能無詞章 浮溪之文,明徹 烈丈夫之氣。至其行責 詞 章 0 詞章陋習,滅沒人才,一 ,而詞章終亦不能背棄理學, 高爽 ,歐蘇之外,邈焉寡儔 詞 , 則痛 至此甚 詆 李綱 。不然,公之成就 草麻 以自成爲文章。 0 艱難扈從之際 制 , 則力褒秦檜 , 贵止 學術失其正 , 敷陳指斥,尤多痛快 0 平居議 如今日所見而 論 其害至於滅沒人 , 則鄙 已哉 經 學 , 殆有 而

才 0 東發之寄慨者深矣 ,又豈僅爲汪氏一人而發 0

其讀范石湖集有曰

非人存則政舉, 自 昔士大夫建明 而有國有家者,常宜以得 ,多爛: 然於高文大册之間 人爲急務哉 , 而 至今小民疾苦 0 終蹙然於窮簷敗壁之下 0

皆能關 文開闢 人爲首 府 東發以石湖擬東坡, 福 痛暢 務 **祿過之,流風遺韻** 心 民瘼 此 ,又放 則 , 、其論治重人過於重法之一貫主張 東發以士大夫之高文大册與窮簷敗壁間之小民疾苦相 浪 資海 謂兩人皆踪跡遍天下,審知 , , 亦易消歇。其所較量於兩 四方人士爲之扼腕 , 也 四方風俗, 故身益困 人者, 而名益彰 所至登覽嘯詠 可謂深摯。然蘇范皆文章之士, 0 提並論 石湖文簡樸 ,爲世欣慕 而 公無華 主爲政者宜 ,又致: 0 然又謂蘇 以 位 而 得 亦

兩

其讀葉水 心 集有 日

支離 乾淳間 直 謂卽 諸儒 心是道 彬彬輩 出 0 陳同 晦 甫修皇帝五霸之學 翁 本大學致 知 格物 以 欲前承後續 極 於治 國平天下 , 力拄 乾坤 工 夫細 , 成事業而 密 而 象 不 山 問純 斥

駁 高 下 0 難 陳傅良則又精史學,欲專修漢唐制度吏治之功。其餘紛紛 齊 而皆能自 白 其說 ,皆足以使 人易知 0 獨 水 心混: 然於四者之間 ,大要不出此四者 , 總 言統 0 雖 精

粗

嘗明言統緒果爲何物,令人曉然易知。

## 又曰:

字 水心: 而 論兵財習俗 玩索莫曉 , \_\_ , 明白 何甚 I 貫 徹 也 , 筆端 有 П , 何 奇 也 0 其論皇極大學中 庸 , 但 見其 班 班

#### 叉曰:

獨於其戲者。水心之傳世者僅此 獨其銘誌序跋筆力橫肆 以至於弱 水心能力排老莊 乃欲割 , 乃並譏伊 兩 淮江 爾 南 0 近 荆 Ш 世 湖 0 自號得水心文法者 能力主恢復 , 棄諸人,以免養兵, 而學之者又辱之, ,乃反斥張魏公。能力<br />
武本朝兵財靡做 , 獨以兩 且關學者心 乃以陰寓譏駡 浙 爲守 術 爲能 0 , 故爲之辨 水心之克稱於世者 0 不於其橫 天下 而 ,

凡其 /辨水心 學術 政事 、文章三項,一一 精覈 , 後世論者莫能及 0

則理學終成偏 以 上 |備引日鈔讀文集十家,以見理學家中能游心文苑 枯 0 而東發於朱子文,則尤極崇揚 。茲引其一 , 節以殿 朱子以下 , 日 ,當首 推 東發 0 此 途 不 闢

晦 其窮詰邪說之隱遁 菴 先生天才卓絕 , 學 則神搜霆擊 力宏肆 0 落筆成章 0 其感慨忠義 , 殆於天造 發明 離騷 0 其剖 , 則苦雨淒風之變態 析 性 理 之精微 則 日 其泛 精 月 應人 明

蓋東發所抱文道一體之理想境界,卽以朱子一集爲其具體之實例也 事 遊 戲 翰 墨 則行雲流水之自 然。究而言之,皆此道之流行 , **猶化工之妙** 

日鈔於子部,上自老莊,下迄當代,一一爲之別眞僞,判是非,用力亦甚勤。 如 日

於正 事 莊子以不覊之才,肆跌宕之說 論者, 用以眇末宇宙,戲薄聖賢,走弄百出,茫無定踪,固千萬世詼諧小說之祖 所見反過老子。老子不過卑退自全,莊子往往明白中 創爲不必有之人,設爲不必有之物 節 , 造爲天下所 然時有出 必 無之

## 又曰:

莊子可錄者過於老子,然其悖理則尤甚於老子

# 又論荀子主性惡曰:

後世以日 說遂墮一偏 彼所謂僞,人爲之名,非詐僞之謂 爲諂 。又古今字義漸變不同 荀子所謂僞 , 殆類中庸之所謂矯。擇言不精 。若曰人性本惡,修爲斯善,其意專主習而 0 如古以媚爲深愛,而後世以爲邪。古以佞爲能 ,遂犯衆駡 不 主 性 , , 其 而

# 其論管子,謂·

斷隱語 其書不出一人之手。 重之篇殆傅會 以爲怪。管子之情見於牧民大匡輕重之篇。牧民之篇最簡明 大抵其別有五 0 心術內業等篇 影附道家以爲高 , 大匡之篇頗粉飾 ,侈靡 宙合等篇 , 輕

其論列子, 謂:

其靜退似老聃 。老聃用隱術 ,而列子無之。其誕謾似莊周 。莊周侮前聖,而列子無之。其

學類楊朱。故其書有楊朱篇 0 張湛序其書,謂往往與佛經相參,則晉人好佛 , 因列子多

誕 , 寄影其間

其論公孫龍 曰 :

其略有四 ,一曰白馬: 非馬 ,二日物莫非指 , 三 日 雞 三足 , 几 曰 [堅白石 0 臧三耳之辨,

亦出

公孫龍 孔叢子呂氏春秋載之,此書不及

其論淮南子,曰:

售 自周衰,天下亂 ,諸侯王之好事而不知體要者稍稍收之。淮南王安不幸貴盛而多材 ,諸子蜂起,爭立異說 漢興 , 切掃除 ,歸之忠厚 ,慷慨而喜事 諸子之餘黨無所 , 起而

招集散亡,於是戰國以來諸子遺毒餘禍皆萃於安。

叉目

集, 古語有之,君子道其常,小人道其變,諸子之所語者變而已。莊列以來無一 一卷以爲伯餘 大率此類 十九卷以爲胡曹 而於其紛然類集之中,乃有自反其說 , 此則集衆爲書 , 不相參照之弊 ,足以明天下之常者 。始作衣者,十 不然 ,鴻烈所

論陸賈新語

,

賈本旨謂天下可以馬上得,不可以馬上治之意,十二篇咸無焉,此書似非陸賈之本真

# 其論春秋繁露曰:

能 舒仁義三策, 隋 唐國. 高其論以明聖人之道 一初繁露 炳炳萬世 ,未必皆董仲舒之舊。中興後繁露,又非隋唐國初之繁露 。仲舒純儒,歐公文人,此文學者所宜審也 , 曾謂仲舒之繁露而有是乎?歐陽公讀繁露不言其非真, 0 。漢世之儒 而譏其不 ,惟仲

## 其論論衡曰:

說 惜其初心發於怨憤,持論失於過激,失理之平,正與自名論衡之意相背。 彼此 自相背馳 0 至其隨事各主

# 其論申鑒,曰:

喜於立論 ,而當理者殊少, 文亦頗卑弱,與其所著漢紀頗不類 ,未知果悅之眞否?

# 近世蔡季通學博而不免於雜

,嘗留意此書,晦翁與之游,因爲校正,其書頗行,然求其義

則終無之。

其論參同契,

日

其論孫子,曰:

右所引摘, 孫子之書,兵家之祖 不足日鈔所論刋四之一,又每書僅摭其數語 ,亦庶幾乎立言之君子。諸子自荀揚外 ,特以見東發讀書 ,其餘浮辭橫議者莫與 , 義理考據辭章無 比

也

不 游 心 C 小 至於 事 一物 , 大至於世運隆汚,宇宙 道要 , 學 博 丽 能酯 , 與 盡屏文史百家 , 專 務

條語錄,談心說性,而自謂理學者乃絕不相似也。

書 以 誦 與 讀 , 日 撮 東發 其綱 鈔 則 於史學 合讀 日 領 鈔 讀 , , 採 可見東發治史之大概 史諸卷應 , 其粹語 亦見博 洽 在 , 而 前 , 主要一歸於人物, , 日鈔以外,復有古今紀要十九卷,上起 同 時 又 0 但不知 加 整理 兩 , 書先後 博綜條貫,細大並包 乃成紀要也 0 竊疑既已遍及古今諸史 , 左國 兼 附 ,下訖北宋 評 論 9 , 當是 簡約 扼 要 專 時 就 循 , 取 史 次

日 鈔 無東漢書 , 僅 有 條附 西漢書 末 , 间 紀要後漢占一 卷 , 首尾無缺 0 則日鈔必是本有

而

俄

空也。其僅有之一條云:

世之功 東漢 鵙 漢 大 以則忠信 夫未嘗得一 呼 人才 悲夫。天子之職 , 篤厚之士十居八九。自光武初 忠信者可與語 , 類過 日之權· 西 漢 也 0 9 古 在 西 0 以是事 漢 人之道 論 如董生王陽以道出處者,不過一二人。其他類皆才智之士 相 ,歸臺閣 0 , 然東漢卒不古若者 而 可 興 因 ,又歸外戚,又歸宦 , \_\_\_ 咽 廢 時 食 也 驅 哉 馳 介胄者 , 世 祖鑒新莽之弊 官 , 已莫不然。 , 而 道義之士卒殲於黨錮 , 終東漢之世 才智者可與 集 , 士 東 ,

此 條 東發論 而要言不煩 政 常主 有治· 切盡歸之於光武創制之不善。此見高賢大儒之讀書 人 無治法。 故其讀 史 , 亦 備 詳 人物 而 不 過重於制 其所爲終異於常人 度 0 惟 東漢 書 僅 存

其 論三國 志云:

有改 旣盟 蜀 帝纍纍南渡 人之姓 , 地之名 同 討魏 氏 , 賊 世 而 筆之書 非 亦謂之晉 , 國名 彼小人兮,歸 也 , 則亦未 0 0 昭 未聞 烈以漢名 何所據 有改 以其居吳而謂之吳也 人之國 而以蜀名之。國之有稱號 , 未嘗以蜀名。 號而筆之史者。 0 不特昭 史氏 實錄 劉淵 烈 自 , 調漢 將以 雖孫氏之盟亦 猶人之有姓氏 示信萬世 人猶謂· 之漢 日 自古未 從 漢吳 而蜀 , 元

紀要亦曰

,

之,

何歟

此一 檢舉 陳壽何人,一 陳壽 以來發其覆者不多。 旦 滅 《漢之號》 而私以 朱子 、蜀爲稱 以 通鑑 0 習熟既久, 承三 國 B 志書蜀 。 甚 至通 入寇 鑑 **遂**起 亦仍其舊 意欲 爲 綱

國 號 爲漢非 蜀 , 竟亦未能 辨正 東發始發此 正名之議 , 然此 下 魏蜀吳三國 稱號 , 竟亦莫之能改

目

然於

昭

烈

陳壽私舉 遂成歷史定案,亦可怪也

意。全謝山宋元學案,始別爲深寧學案,其言曰:

# 王深寧學述

尚有王應麟,字伯厚,自號深寧居士,學者稱爲厚齋先生,其學亦承朱子

江貝瓊之言曰:

黄東發同

時

,

是元儒固謂東發伯厚,其學同歸。黃梨洲宋元學案原稿,以深寧傳附眞西山學案, 弊。然則四名之學,以朱而變陸者 人學術旣同歸矣,而其倡和之言不可得聞,何也。厚齋著書之法,則在西山眞爲肖子矣。 自厚齋尚書倡學者以考亭朱子之說,一時從之而變 ,同時凡三人矣。史果齋也,黃東發也 0 故今粹然皆出於正, , 王伯 亦承貝清江之 無陸氏偏駁之 厚也。三

氏,從樓迂齋以接呂氏,又嘗與湯東澗遊。東澗亦兼治朱呂陸之學者也。和齊斟酌,不名 四名之學多陸氏,深寧之父,亦師史獨善以接陸學。而深寧紹其家訓。又從王子文以接朱

師

又爲同谷三先生書院記,其言曰

氏,實自詹公元善之門。 而又頗疑呂學未免和光同塵之失,則子之推爲呂氏世嫡也 王尚書深寧, 獨得呂學之大宗。或曰: 深寧之學,得之王氏埜,徐氏鳳 ,王徐得之西 Ш

歟。曰:深寧論學,蓋亦兼取諸家。然其綜羅文獻,實師法東萊。況深寧少師迂齋

則固

何

眞

明招之傳也

又爲宋王尚書畫像記 ,亦曰

先生之學,私淑 東萊 , 而兼綜建安江右永嘉之傳

竊謂謝山學案,於史學有貢獻,而於理學爲皮外。並深受李穆堂影響,於朱子更持偏見。

伯厚困學紀聞

孺廬見之,嗟賞以爲在二家之上。萬孺廬亦如李穆堂,由陸氏而尊荆公, 其偏! 見亦特深 故 謝

,又繼閻百詩何義門兩人之後,爲之箋注,其重視此書可知

。其序有曰:江西

萬丈

其

於王

於深寧,決不承其學出朱子,然此實自元以下學術界之公論。袁桷序困學紀聞有曰

手, 禮部尚書王先生出 面牆背芒,滔滔 相承 知濂洛之學,淑於吾徒之功至溥。然簡便日趨 ,恬不以爲耻。於是爲困學紀聞二十卷, 具訓! **偸薄固** 以警

陋

膛

目

拱

謝 Ш . 評之曰:淸容絕不知學

今考袁桷於深寧六十五歲時來受業,時宋亡已十二年。桷亦年十二,自稱在門下十年 淸

+ 得呂王之傳者,特指其早年詞科之學言。深寧之從學於王埜 集有陳志仲墓誌 知在何年。要之皆早歲之事 -年親炙 ,其言寧不可信,乃可以絕不知學四字輕加棄斥乎 , 有云:宋季詞科 0 清容從學於深寧則在深寧之晚歲 , 呂成公眞文忠傳諸徐鳳 ,在十九歲時 徐鳳傳諸王公應鳞 0 困 I學紀聞7 乃深寧晚 。其從學於徐鳳 0 S 歳 著 作 則 前 人謂 , , 淸 則 深

不

寧

四庫全書困學紀聞提要有曰

舍晝夜舍字之音,孟子註曹交曹君之弟,及謂大戴禮爲鄭康成註之類,皆考證是 應鱗博洽多聞 , 在宋代罕其倫比 。雖淵源亦出朱子, 然書中辨 正朱子語數條 , 如 非 論 語 , 不相 註

不

阿附

此 亦明 何害東發之一宗朱子乎?又案紀聞卷六云:楚辭辨證云:洪引顏師古曰:舍止息也。屋舍次舍皆 義 條 謂深寧之學淵源朱子。至其舉辨正朱子語 0 乃是卽以朱子正朱子也 論語不舍晝夜,謂曉夕不息耳。今人或音捨者非是 ,皆屬小節 0 , 辨正乃朱子晚歲之書 遠不能與東發之駁朱子者相 ,當從之。 比 , 則 然又

此

今請證之以紀聞之本書。 紀聞卷十五 有日

止 | 齋謂本朝名節自范文正公, 議論文章自歐陽子 , 道學自周子 。三君子皆萃於東南 殆有

又曰: 天意 0

周元公生於道州,二程子生於明道元二間,天所以續斯道之緒也

## 又卷五有曰:

說 細 朱文公答項平父書云:子思以來,教人之法,惟以尊德性道問學兩事爲用力之耍。子靜 , 0 專是尊德性 而某自覺於爲己爲人多不得力 事 而某平日所論問學上多。 0 今當反身用力,去短集長 所以爲彼學者, 多持守可觀 , 庶幾不墮 , 邊 而 0 看 義理 卽 此

所

觀

之,文公未嘗不取陸氏之所長也。太極之書豈好辯哉

觀此 學相擬, 三條 東萊之學甚正,而優柔細密之中,似有和光同塵之弊,象山之學雖偏 乃亦不欲歸之於朱,乃謂其棄取朱陸,而獨得呂學之大宗。然考紀聞卷十五引李維之云: , 知上引袁清容貝清江以及四 庫館臣之言皆不虛。全謝山 亦知紀聞援引奧博 而 猛 厲 粗 , 非 略之外 可 以 陸

卻無枉尺直尋之意。

若以 迂 謝 齋 Ш 此 謂 , 深 從 條會合上引三條同看 寧少 東萊於婺。李悅齋學士, 師 迂齋, 證其爲明 ,深寧之於朱呂陸三家 招之傳 王厚齋尚書 , 此亦誤不足 其高江 , 豈誠如謝 據 弟 也 0 謝 0 王梓材案云: Ш Ш 宋元學案麗澤諸 所謂 和齊斟酌 儒學案 9 不名 , 樓 師 乎 昉 0 , 號 至

李悅齋爲紹熙庚戌進士 , 厚齋尚書以嘉定癸未生,相去三十四年。且其父溫州 已是幼從

迂齋,尚書未必再及樓門。

則謝山之誤顯然矣。

又考深寧四明文獻集卷一詩考語略序有曰:

書 詩 辭 過 儆 者 漢言詩者 向 章句, 鄭箋孤行 萃爲 笙詩. 獨朱文公集傳,閎意眇 則取韓詩序 昊天有成 洗末師專己守殘之陋。學者諷泳涵濡而自得之,躍如也。文公語門人,文選註 嘗欲寫出 有聲無詩 四 編 家 0 命 韓僅存外傳 , , 以 師 0 扶微學 異 不可休思, 是用不就, 。應麟竊觀傳記所述三家緒言,尚多有之。網羅遺軼, , 道成王之德,則取國語。陟降庭止 則取 指 殊 儀禮 9 。賈逵撰齊魯韓與毛氏異同 , 廣異義,亦文公之意云爾 指,卓然千載之上。言關雎則取康衡。柏舟婦 而齊魯詩亡久矣。諸儒說書,一 0 上天甚神 彼岨者岐,皆從韓詩 則取戰國策 0 , 梁崔靈恩采三家本爲集註 集傳者或有 0 則取漢書註 何 以 以毛鄭爲宗 恤 。禹敷下土方,又證 我 考於 , 0 則取 斯 賓之初筵 , 傅以說文爾雅 左氏傳 人之詩 未有參考三 0 飮 則 抑 今惟 多韓 諸 酒 取 戒 楚 悔 自 劉 毛

又同卷跋袁潔齋答舒和仲書有曰:

觀於此序

知厚齋之治詩

,

與其治經

之宗師所在矣

之要言。蓋尊德性實根 古今,務爲高論 爲用力之要。陸子靜所言 右潔齋袁先生答廣平舒 , 不在書策者 先 本 生和: 於學 ,專是尊德性。潔齋先生之學,陸子之學也 問 仲 , 箴末俗之膏肓, 書 未嘗失於一 。昔子朱子有 偏,是亦朱子之意也 至深至切 言 ,子思教人之法 。所謂古人多識前 0 , 所謂 以 0 觀 拿 其 但 德 言往 慕 尺 性 高 櫝 道 行 遠 問 皆勉 學 , 不 日 兩 覽 課

此亦所謂以朱變陸之一 經 史 , 斯言· 也 證 也 學者當書紳銘 几 畫誦 夜思 尊所 聞 行所知

,

,

,

可

不

勉歟

又紀聞 卷 有 曰

召平董公四皓魯兩生之流 , 士不以秦而賤也。伏生浮丘伯之徒 , 經不以秦而亡也 0 萬石君

之家,俗不以秦而 漢也。 : 剝之終日碩果不食 ,陽非陰之所能剝

深寧紀聞之書成於元代 0 袁淸容集言, 深寧當元初 嘗爲俗吏所窘 , 惟 杜門用 晦 而 已 0 久之, 始

。謝山以紀聞此條爲深寧有感於身世之言,

是

也

四 明叢書有深寧文鈔 遊無餘編 , 卷一 有 戴氏 桃 源世 一譜序 , 有曰 有稍

稍致敬於深寧者,然深寧杜門如故

彼黍離離 申公高堂生之經學,士不以 ,故家與 國 升降 0 秦而賤 雖然 , 義理在· 。萬石君家之孝謹,魯兩 人心 ,萬古不磨 0 綱常在宇宙 生之節操 ,俗不以秦而 億世 不泯 0 伏生

薄

0

言

良貴者不以 人爵 , 言不朽者不以世祿 , 修 其在我而 已

亡, 知此 匹夫有責 意深寧乃屢言之,其有感於身世者至深矣 , 此 即深 寧修其在我之意也 0 明 遺民顧亭林有亡國亡天下之辨 , 叉曰: 天下 與

紀聞又曰

天地未嘗 日 「無陽 , 亦未嘗一日無君子。故十月爲陽 純坤 稱

龍

易於蠱 終則 有始 0 於剝 消息盈虚 0 於復 反復其道。皆曰天行 也 0 然則無豫於人事

與?曰:聖人以天自處,扶陽抑陰, 盡人事以回天運,而天在我矣。

卷三叉曰:

戒。聖賢心學,守而勿失。中夏雖亡,而義理未嘗亡。世道雖壞,而本心未嘗壞。君子修 凡百君子,各敬爾身。胡不相畏,不畏於天 。 詩云:宗周旣滅,哀痛深矣 

身以俟命而已。

意,乃在彼而不在此 序深望於故家文獻之嬗續 如深寧亭林皆值亡國之餘 也 ,痛忧於亡天下之將臨,而修身以俟,盡人事以回天運者也 並引及呂成公語,亭林作裴村記,亦由此寄慨 0 然固不得謂王顧之 。桃源世譜

紀聞卷一又云:

廉恥,國之脈也。廉恥泯則國從之。

卷二又云:

在風 民,不肯從晉。及其末也 畢命一篇 史之亂爲鑒。謂先王之道消 俗 四維不張而秦歷促 ,以風俗爲本 ,周民東亡而不肯事秦。王化之入人深矣。唐賈止: 殷民既化,其效見於東遷之後。盟向之民 ,則小人之道長。小人之道長,則亂臣賊子生焉。蓋國之存亡 **恥尚失所而晉祚覆,止其知本之言哉** 不肯歸鄭 議取士 ,陽樊之 ,以安

又曰:

先伯夷而後及禹稷 乃命三后 。先儒 目 0 此說得孔子去食,孟子正人心之意。小雅盡廢 人心 示正 , 則 入於夷狄 禽獸 雖有· 土不 -得而 居 , 雖 其禍 有 穀 烈於洚水 不 · 得 而 食 四 0 故

不張,其害憯於阻饑

此條 於朱呂兩人之輕重 引先儒 乃呂東萊書說 ,卽此小節可見,亦可見謝山言之無證也 。深寧引朱子,必稱文公,又曰子朱子 0 其於東萊 則或稱先儒 0 其

又卷二十有日

顧亭林特以博學於文行己有恥八字教人。 尚志謂之士,行己有恥謂之士,否則何以異乎工商 其爲日知錄,極近困學紀聞 博學於文

,

兩

固

極相

似 其重視風俗 ,而以行己有恥四字自律 ,實亦紀聞之書先啓之也

又紀聞卷十三有曰:

曲禮少儀之敎廢,幼不肯事長,不肖不肯事賢 0 東都之季, 風 化何其美也 魏 昭 請 於 郭

泰 願在左右 ,供給灑掃 0 荀爽謁李膺 , 因爲其知 御 。范滂之歸, 鄉 人殷陶黃穆侍 衞 於旁

應對賓客 。闕里氣象 ,不過是矣

又卷二十有 日 亭林

日知錄特標

風

俗

卷

而最稱美東漢

其意亦自紀聞啓之。

羣居終日 ,言不及義,而險薄之習成焉 。飽食終日 無所用心,而非僻之心生焉 。故曰:

民勞則思,思則善心生。寤寐無爲,澤陂之詩所以刺也。

亭林日知錄卽以論 語此 兩語分說南北風俗之病,方樸山已謂其卽本之紀聞

紀聞卷七又云:

風遠韻 沮溺荷蓧之行 如鸞鵠之高翔,玉雪之不汙,視世俗徇利亡恥,饗榮苟得者 ,雖未能合乎中,陳仲子之操,雖未能充其類 ,然惟 孔 , 猶腐鼠糞壤 孟可以議之。 斯人清 也 。小

人無忌憚,自以爲中庸,而逸民清士,乃在譏評之列,學者其審之。

不汙,異世同情 謝山云:此言亦必有感於當時之爲孔光馮道者。今按亭林託言其母 , 亦猶深寧之在元世也。 ,矢志不仕 0 鸞鵠高翔

玉雪

又卷六有云:

公山不狃曰:君子違不適讐國 , 所託也則隱。斯言也,蓋有聞於君子矣。背君父以覆宗國

者,不狃之罪人也。

轉變夷夏大反覆者 謝山 即不足以與論深寧亭林兩人之爲人與爲學 日: 斯言也,爲呂文煥劉整范文虎諸人言之。故凡其心不在宋元之際以及明清之際之天地大 即不足以讀困學紀聞與日知錄 0 亦可謂凡其心不在民族文化絕續興亡之大

深寧文鈔摭餘編卷一又有諸經通義序,有曰者,卽不足以與論深寧亭林兩人之爲人與爲學。

聖人作經載道,學者因經明道。學博而不詳說之,無以發羣獻之眇指。說詳而不反約 , 無

徒務

博雅考證

,

雖不爲漢儒之紛紛

,

亦以

成此下淸儒之拘拘

,

也

析 羣言之殺亂 0 經學至於通 而 止 , 漢儒之說 , 何 其紛 紛 也

深 苟 非 寧 淵 言 源 作 朱子, 經 載道 又豈呂陸 , 因 經 明道 之傳乎? , 亦 可 清儒 謂 即是亭林經學即理 如閻 .潜邱 全謝 Ш 學之先聲 固 亦 極 重 0 此 深 寧 種 在經學上之見解 , 然僅 知 重 其 博 雅 與 抱 於 負 深

寧 明道求通之意 , 固 一無所知 0 惟 在 彼 兩 人 尚未有漢宋壁壘之見 此亦學術史上一至可惋憾之事 , 而終無免於漢宋壁壘之繼 起

又同 卷小學紺珠 序 有 日

小 學者, 大學之基 也 o 見末. 知 本 , 因 [略致詳 誦數以貫之, 倫類以 通之, 博不雜 約不

陋 , 可 謂善學也 矣

深 次寧注 重 小 學 顯亦淵 源朱子 0 然非清儒乾嘉以下之所謂 小學 也

又四 旧明叢書· |有陳 餘 Щ 輯深寧年譜 , 引浚儀遺民自誌 文, 乃深 寧先期自爲墓志

有

日

制 稿 才弱 , 文不 逮 古 0 嗜學老 不 倦 , 爲 困 學 元紀聞 0 彙次之書 , 有詩考 詩 地 理 考 漢藝文

志 考 , 通 鑑 地 理 考 地 理 通釋 , 通 鑑答問 , 集解 踐 作篇 , 補 注急就篇 王會篇 輯古今言行

爲 家訓 其文稿 日 「深寧集 , 然不 足傳 也

提 此 以 其詞 及者 乃深 一等自然 科 習 則爲其嗜學老不 氣未 道其畢生治 盡 固 學 何 厭 爲 於早年詞 而 而 必 所爲之困 作 此言乎?至於深寧自 科 本不 學紀聞 自 滿 其書經 0 而 謝 史湛深 謂彙次諸書 Ш 深寧學案則 明道經: , 亦非深寧所 曰:予之微嫌於深 世 , 此下 重 惟 亭 林 深 寧者 日 寧 所 知 錄 鄭 , 足 重 正

,

書 以 可謂 謝山宋元學案 之學之別有其淵源 山之爲學案 , 媲美,而謝山又必以爲深寧獨得呂學之大宗 , 其無所得於深寧與亭林。然其爲學之精神 論 其精 神 乃是其經史學之一種表現 ,其綜羅文獻之功,謂其師法東萊則可,其注意明清之際之鄕邦文獻 皿 脈 , , 則謝 究與東萊爲學有甚深之類似 Щ 所不知 也 0 而謝山之經史學, Ш 。又曰:其綜羅文獻 脈 否 0 , 抑亦可謂厥後亭林之學,亦復師法東萊否 則固 與深寧亭林不可相提 乃淵源於深寧亭林 實師 法 東萊 並 0 論矣 而深寧亭林經 0 , 在當時 不 0 今可 知 紀 , 不 聞

史

0

卒, 識 奇遇 亦私淑 子之學者 親炙者亦 使後世並 孟子生後孔子百有餘歲,時移世易, 蓋以學術之傳 恐亦於孔子之道未能別有所發明 山之眞面 昔孟子論學,有親炙與私淑艾之別 0 然既 也 有徒 一稱日 。下及東發深寧,則 0 朱子及門親炙之徒亦盛矣,然朱子歿,其徒亦尊所聞行所知而 生 孔 値同 目 矣 ,非久無以見其變 孟 。孔子惟讚顏回爲好學 ,然必至朱子而 時 ,則私淑之與親炙 ,能尊所聞 亦三傳四傳幾達百年之久矣 後二程之說獲以大明。朱子之於二程,亦已在百年四傳之後 行所知則止,若求別有闡發,其事則難。抑且 非變無以見其通 , 雖自日 0 何者, 固雖異而並不異也 。孔子以聖師垂教 , 因顏子於孔子,所識特深。然使顏子獲壽 私淑艾,若有異於及門之親炙,然能發明孔子之道 時代不相異 ,非通亦無以大其傳。朱子之學,傳至於東發 0 。二程傳道於伊洛之間 , 則其立言傳教 余今考論 七十弟子及門親炙 朱學流 止 ,自亦無可大相異 衎 , 無有能大發明於朱 身在廬 斯誠曠: 首舉東發深 謝楊游尹及門 , 後孔子而 Щ 中 世 難 親之 也 不易 , 是

深 寧 若面 貌 全非 , 然其精 神 Ú. 脈 9 則 固不失爲朱子之嫡 傳 也

吾道 性道 文, 其小 曾子 無不 也 明道曰:先生生乎千四百年之後 在於博文。不 0 0 是知孔子之教 ·賢識小者之存在乎!子貢又曰:夫子之文章,可得而聞也。夫子之言性與天道 今縱 約我以禮 者。莫不有文武之道焉。夫子焉不學, 朱子之學 以貫之也 卽在博文中見約禮 偏於性道與約禮 謂伊川之言可信,然子貢有言 ,知兼 知孔子固曰:吾無隱乎爾, , 大率可分兩途 ,固兼有性與天道與文章之兩途 兩 。子游子夏,偏於文章與博文。故孔子旣以告子貢,復以告曾子 者而爲學。子貢則曰 而子貢不之知,故有孔子少言性與天道之疑 0 ,得不傳之學於遺經 日性理之學 ,文武之道,未墜於地 吾無行而不與二三子者是丘也 而亦何常師之有 ,回也聞一以知十,賜也聞一以知二, • ---日經史之學 0 , 孔子前輩弟子中 以興起斯文爲己任 0 則豈可謂孟子以下千 ,在人 0 性理之學, 。賢者識其大者 。孔子後輩弟子中 0 惟顏子能 此乃孔子 ,蓋自 上接二程 孟子之後 ·四百年 是其著意已僅 即在文章 ,不可 言夫子博 , 0 不賢者 伊 , 得而 皆曰: 川之稱 人而 有子 中見 我 乃 聞 並

唐 之可見乎?朱子言性理 至宋 固 而有程子。然文章之傳 m. 不得謂孔門無此文章一脈也 子似偏於性道 面 推尊其傳自程子 荀子則偏於文章 , 則固千四百年未嘗絕 。亦不得謂此文章一脈 0 而其經史之學 一面 。今縱謂性道之學,自孟子後千四 0 亦豈可謂此千四百年文章之傳 ,乃絕無當於性道也 則跨越二 程 直溯北宋 0 象 諸儒 山疑朱子爲支 ,乃絕 百年無傳 以 上 無性 一接漢 道

離 , 卽 指其經史博文之一面 ू गा 自謂 直承孟子。惟亦於明道無間 言 。此亦不得謂其非孔門約禮之

一路。然於博文之敎,則終無相當。

不名一 博文之學 偏 於經史。 東發深寧二人,乃於朱學流 師 , 然雖 自可 此 或可謂乃謝 兼 畸 輕畸 深並: 納 重 山之自道 , , 各 而 求 謝 衍 Щ 中 以貫之, 必謂其綜羅文獻 , 而豈眞知深寧爲學之精神 , 能兼得博文約禮之二者 固非 偏 於此 , 兼 取 而絕於彼 諸 家 0 血 , 惟東發似 於朱呂陸三家之學 脈所自乎 。以深寧較之東萊與 稍偏於性道 , 象山 和齊 深 寧似 斟 深寧 酌

文章, 東林 亦其 邊 虧 0 高顧 於是而有白沙陽明之崛起 心可諒 何 東發深寧以下 重性 論 約禮 道 力欲挽王返朱,然其於經史博文之學,則亦終隔 , 而繩之以朱學之正傳 , 0 於是有 故 如吳草廬 ,元儒之於朱學, 如康齋敬齋 ,亦僅能 0 白沙 , 終不能 算朱 月川 則終不能與東發深寧相 肆意於博文,然亦尚知理學淵源 敬 ,陽明崇陸, 不偏於博文一途 軒整菴諸 人, 要之其薄經史博文之學而 其於: 擬 0 間 朱學 0 既已仕於元爲異族之臣 明 儒 , 繼起 皆重性 ,乃轉爲朱陸和會之說 , 理 懲元之弊,又轉而 輕經 不爲 史 則 , 大 偏 節 向 也 是 已 薄

之於朱 學於文,行己有恥 言。 出 亭林! 處去就辭受取與之辨 桴亭 而二人之爲學亦各有 身爲晚明遺民 0 蓋其與深寧身世同 ,孔子孟子之所恒言 偏 , 激於民族大義 。亭林持論 , 故感慨亦同 , 謂 , <sup>忧</sup>於亡國亡天下之深痛 性 ,而今之君子所罕言 也 命也天也,夫子之所罕言,而今之君子 。日知錄之成書 , o 愚所謂聖人之道 乃若最與困學紀 , 其抱道爲學 聞相 欲 目 所 力 似 博 反

0

其言:

I格物

遵二

O

故言

,

卽於考亭

亦

不敢

0

吅

於其偏河 較之陸稼書之徒則勝矣 也 在闡發性 輕偏 理 , 白 重間之差別得失而 田 重 |在考證經史,亦復各有所偏輕偏重 0 若論學術地位 判 0 至如呂晚村專以民 則桴亭之於性理與經史,約禮與博文 , 所關者大,晚村尚不能比梨洲 田朱湘淘二人之學,雖亦同尊朱子, 族大義闡朱,雖亦不 。凡此諸家之有得於朱學之深淺 以貫之之意, 此則 , 失 爲 一 , · 似偏 固 可 不能僅以 以上 遺民之知耻 重在 承 前 然湘 東發 , 則 路 節 者 淘 而 要 定 重 寧 可

時移 承記 然以漢學宋學顯分爲二, 世 淸 易, 儒 又爲宋學淵源記 之專治漢學 要之於滿 :清爲順| , 則 即不啻以性理約禮之學與經史博文顯分爲二矣 始於元和惠氏 兩記所收 民 縱縱 人人物 不當以深寧亭林知恥之義相責,縱不能以亡天下之大任 0 , 惠半農手書楹帖 乃絕然各別 。尤可異者 , 曰:六經 尊服 鄭 , 淵源記中 0 於是江鄭堂既爲漢 有朱澤澐 , 百行法程朱 即湘 繩之, 既已 學師 淘

明

道將絕

豈不顯而易見乎

異者 深寧亦 又曰:E 之後 此乎? 之褒然居 豈能 學, 乃蕺 加 發蛙蠅之怒 更不是 皆深入宋儒之室 Щ 入 僅 特 之學,矯良知之弊 見王白 而江氏書 儒林之傳哉 尚自負東林之黨人, 甲申乙酉之變 1首者 知文章 知崇重 , 奮螳螂之臂, , 田 則 乃以黃宗羲顧 0 殆爲白 未通性道 故爲 日 0 閻 江氏之論 , 紀聞 若 但以漢學爲不可廢耳 璩 田 ,以實踐爲主。亭林乃文淸之裔,辨陸王之非 君策名於波浪礪灘之上 以經史考證途徑治朱子, 胡 猶效西臺之慟哭。雖前 以烏合之衆,當王者之師 , 特 炎武雨· 於約禮 渭 加 如 箋 此 0 閻 注 , 知恥 氏顯然尊崇朱子,其爲古文尚 固 人抑· 。其於亭林日知錄 無當於平章學術 在漢學之卷末, 節 。此見其多騎牆之見,依違之言,豈眞知灼見者哉 , 則有虧矣 ,竄身於榛莽窮谷之中 朝之遺老 故擯不得納入於漢宋之兩壁 , 未有不敗者矣。逮夫故土焦原 , , 又以黃宗義居一 。江 曾改正數事 而亡國之餘 , 實周室之頑民 氏所謂漢學宋學之辨 書辨 ,此其不 , 僞 ; 不 必繼之以亡天下。 顧炎武之前 , 以朱子爲宗 順天命 重視亭林 卽 0 當名編 承 朱子 壨 郠 , , 0 ·豈亦僅 強挽 亦 而 0 而 熏胥之條 0 , 横 故 而 可 來 曰 學術 流 知 師 兩 人 0 家之 梨洲 承記 毒 於 在 於 所 王 浪 0 0

又學 理 也 無 術 關 0 故 沿漢學 必 流 一由字 身世 衍 趨 勢所 以通 無關 則 其辭 必 必 至也 反宋 與 出 9 由 學 處去就辭受取 0 鄭堂引戴氏之言曰: 辭以通其道 ,尤必反朱子, 與亦無關 • 乃可得之。 而 元 六經之至者道也 和 0 惠氏不足當其任 然後異族順民 於是所謂 道者 0 9 所以 乃始可以承當大道 仍 乃只存字辭之訓 明 必以休寧戴氏 (道者辭 也 0 為之魁 所 釋 以 成 無玷 始 辭 與 0 性 此 無

必 娘 以 0 此 許 又元清兩代學術流衍所必有之趨勢 叔 重之說文解字爲 小 學 而 學 術亦 重歸 , 所深值後人之警惕者 於 途 0 而 後 清 儒崇漢學 治六經

,

乃

豈是· 其儔 又奈 僅 亦並 六 藝 據 能 , , 匹 此 表其惋惜之情 與 而 鄭堂又論江愼 何 本 故 明 永 孟子 不知乎?又且 不 非 以 道 知 論 溢 辨 乎 無 明 孟 經 美之辭 在兩漢 關 朱子 0 豊 終老於家 , 修有 亦 而 , , <u></u>遗亦 以 愼修之禮書綱 而 鄭堂猶謂其志與天地擬 0 非屬 然所著鄉黨圖考, /戴氏 皆不得列 日 :考永學行 尔 0 ·知推尊 譏 豈傳所謂志與天地擬者 言 諷之辭乎 博士 , 乃不 孟子乃出宋學, 目 , , 乃 明與 得 明承朱子 0 四 不 抑論語之在 代通 書典 (五經有) 列之漢學之壁壘中乎?抑 ,豈鄭堂亦知明道之功 林 儒 而 非漢學乎? 來 别 帖括之士 戴君爲作 兩 , 0 其人不祥歟 漢 尊四 其爲近思錄集注 |書與五 列於小宮 一竊其 行狀 ? 經並 學 哑 , 慎修此 四 餘 稱其學自漢 且 9 孟 書猶當在 東原之孟子字 其事 取 又明 子則 兩書 高 第 為尊朱之作 始於程朱 入 信 經 五 , 亦僅 掇魏 經之上乎 師 家 康 義疏 科 不 用 成 , 者 後 豊 鄭 堂 得 力 證 於考 附 數 鄭堂 , 0 , 罕 又 亦 百 於

錄 切 蔚 自 居 然 0 乾 鄭堂於竹 然竹 嘉諸 代 然東原之學 儒 汀 宗也 儒中 固 汀則 不非 0 求其著書能略與深寧困學紀聞 以 日 , 薄 漢儒 以 宋儒與 肄 戴編修震嘗謂: 擬之, 經 爲宗 一理學 在高密之下 , 不 抑於朱子有極深之推奪 ·讀漢以 人曰:當代學者,吾以曉徵爲第二人 後書 刨 賈逵 顧 0 若先生 **亭林** 服 虔 日 「知錄相以 學究天· , 亦瞠乎後矣 是固 擬 人 不當 者 , , 博綜 僅 惟 況 有 以漢學與 0 蓋東原 錢 羣籍 不及賈服 竹 汀之十 /考據 毅 自 然以 者哉 開 國 駕 第 齋 以 是鄭 養 其 來 人 新

則亦惟 據江氏之書,亦可見其荒謬之何所至矣 堂之重博文,似亦知非治經 高密賈服 而 止 0 似 乎上下千古學術之大與富,亦惟有此諸人。乾嘉以下 \_\_\_ 途可 盡 亦似知: 竹汀之爲學 未必卽在東原之後 , 0 然而 學術 分漢宋 其 所 議

刨

此 代之科學方法。然如深寧之困學紀聞,亭林之日知錄 後之代表作 如黃全兩學案,亦有網羅考據之功,乃亦棄置不顧。乾嘉以下之專經著述, 則待後人有作中國學術史者所當爲之重加論 乃下迄民國 , 乃亦未嘗厝心 ,學者猶循守漢宋壁壘, 。蓋今人之治考據 並 羣認宋學義理爲空疏 列 , 復 也 非 清儒 ,其考據皆俱甚深義旨 標榜爲漢學之考據 ,清儒 考據 此乃淸儒高抬漢學 , , , 則謂. 固已漫不理會 加 別自 有合於西 有其 淵 方近

以

卽

#### 附一 讀 羅 壁 識 遺

庫全書子部雜家有羅璧識遺十卷 ,提要云:

匹

發明 定, 十五 **壁字子**蒼 命之空談 然後 年而 孔孟 祚移 , 故其議会 號 便覺歐蘇氣燄不長 出於正云云 哩 則其成書在宋亡以後,其人蓋宗仰程朱之學者。如謂宋文章多粹 耕 論 新安 往往精博可 其本指 人。宋史無傳。 又謂夫子之道,至晦翁而集大成。諸家經解 可見 取 。然其所說 據書 中 引 則多引經述史 陳 傳 寒在 五更頭之選 ,考訂異同 稱第一 , 而 Ŧi. 自 庚 不屑爲性 自 晦 申 翁 伊洛

斷

又

今按: 寒在不 五. 更頭 條 , 見本 書 卷十 , 謂 宋 以 庚申 起運 , 將及 第 五 庚 申 , 而 己 未警於江 , 叉 五 年

, + 年 祚 移是 也

末有 隆 慶改 元三礼 姑 蘇 方 山吳岫 識 謂

考據 確 而 精 論 斷 審 而 正 宋元著述家多援引之 0 然傳 寫日 久 , 間 有亥豕脫亡 , 欲借 善

是

書

本訂之,遍索 海 內 無 有 應 0 故藏於篋中六十年 餘 , 亦 不輕以 借 人

別有 凡羅 補遺有之, 羅 氏 壁 爲人與其書之可考見者 字 入四十九卷晦翁學案補遺朱學續傳 仲玉 鎭江 人 0 從朱禩孫 , 僅 此 而 入蜀 已 。全謝山宋元學案無其 仕 , 然僅 至 都 水 據四 監 庫提要 , 如 此 人 而 , 別無其 已 0 王 梓 他發現 材馮雲濠 0 所編 惟 謂 考元史 宋 元學案

今按: 識遺卷二有擔頭上 看 花 條 , 謂

,

`

,

魏 鶴 Ш 云:人須將三代以 前 競模在: 胸次 從聖經看來 , 庶親 到 地 位 。若只在諸

儒

脚

下

盤旋 終不 濟事 0 緣擔 頭 上 看 花 , 終不若樹 枝 頭天然活精 神 也 0 此 語 蓋 爲 含六經 泥 訓 詁 者

發 0 朱文公亦謂 詩易之類 多爲先儒穿鑿所壞, 使人不見當時 立言本意 、須是も 虚 心 平

氣 , 於本文之下不要留一字 , 惟 本文本意是求 , 則聖賢之指 得矣

是羅 氏 治學 實 有跨越諸儒 直 探六經之意。 其書中 治經 , 皆 能 本 此 意態 , 故 每 有 創 見 0 加 卷 成 書

得書 難 條有一 云:

漢 武 至前晉幾五百餘 年 間 歆 向 父子披羣書甚 精 , 不 ·應孔書的 皆 不 傅 直 逮晉始得之, 故或

者亦疑梅賾之僞。

此雖非有精密之考據,然敢疑僞孔,其言當尚在吳草廬之前

又卷三左傳非丘明條云:

左氏端為戰國時人。當戰國 時, 齊有鄒衍著書, 推五德之運,以符應爲驗 0 昭 九年哀九年

云云,皆與鄒子 同意 。三家分晉後,十二次之說行,昭十一年襄二十八年云云皆與之合

宮之奇曰虞不臘,及秦不更女父秦庶長鮑,皆出春秋後

此皆淸儒辨左氏非丘明之證,而本書亦已早發之。

又如鄭人對晉曰嘗酎

,

又卷五秦後六經條有云:

漢儒 林傳敍諸經 各有傳授,周禮獨無之。孔子於禮多從周

切切於梠宋求夏商 遺禮 。與夫逆爲繼周損益之辭。又左傳論語皆晚周 書 ٥ 胡俱 無 語援周

,使周公禮書如此

周詳

,

當不

禮。

此疑周禮 , 引司馬溫公胡致堂胡五峯蘇潁濱晁說之洪容齋諸家, 實宋儒除李泰伯王荆公以外之共

同意見也。

又卷五泮水辟廱條有云:

築城作豐事

亦於學無預。又上章曰:

泮水 一詩 , 釋者 例以學校明之,其說實肇於漢儒 王制 文王有聲言鎬京辟 雍 詩 中 ·述文王

皇王維辟

辟爲君無疑

0

釋者例以辟雍爲學

皆誤

然,

於漢儒王制 也

50

朱子亦以辟雍說學校 ,羅氏極尊朱子, 而其說辟雍,別出新解, 亦證其能不拘拘守一先生之言

又卷五漢儒言禮條 ,言:

漢儒言禮 多不近人情。若夫養老詩述成王養老乞言之禮 , 日肆筵授几,酒醴惟 醹 又不

饋 執爵而酳,着冕持干而立,此直委巷之談,宜乎後世行之惟艱 也

厚其祿賜,如孟子,欲有謀焉則就之,足矣。今記曰:躬親侍膳

袒

而

割牲

此條四庫館臣譏之爲無稽。實則確有見地,羅氏之敢於疑經,宜非尋常拘儒所及矣

卷八經解條有曰:

六經之道,至夫子而集大成。夫子之道,至晦翁而集大成 。諸家經解

前後不一,

自

於晦翁,然後一出於正。後學儻非經指授,則泛濫諸家 其誰適從

是羅氏膽敢疑經 ,而終奉朱子爲依歸,諸家異說據以斷定。所以雖於經義多所駁難辨正 要自與

泛濫橫決者不同

又卷六有闕疑條 · 謂 :

謬

正其訛 宋儒釋經 高出前古者,以不襲漢晉以來訓詁 析之以理 然亦有過處 。寥寥千古 舊脚迹,及溺於讖緯巫怪之說 焚於秦,雜於漢 。所謂 六經皆未全之書是 考其同 異

也 III 必證三代之是 ,則幾於鑿。獨朱文公嘗著闕疑之說。朱文公於易有疑 ,亦謂上無聞

於義理之本原 ,下無資於人事之訓戒,何必苦心極力以求之,斯言足警談玄索怪者矣

羅氏 尚考訂而 知闕疑 此又其傑出處也。又同卷有讀書致用條 謂

學貴知要,不在貪多。用貴適時,不專泥古。然後爲善讀書。若近時理學諸賢,於心性切

此條 主讀書貴適時致用 , 不泥古,不沉溺常滯於同時理學心性之談 , 亦見其爲學非追逐時尚之

與記誦詞章均爲

《無補。:

故書益多

效益

寡

類。又同卷有迂闊條,謂:

切究論

,又未免有芻狗事爲之弊。儻不經世,

儒 本六經言,往往張皇於安平之日。及事至而爲之圖 ,必推迹禍原亂 本之所在 察其端

而 圖之,而舍經行權,又所不屑。故見儒之迂闊,乃大遠之謀謨,深長之思慮也。 余謂

君世主,倉卒名知務者 ,閒暇多迂闊 。儒者倉卒似迂闊 , 而閒暇則知務 也

此條持論尤具深識。 會讀上引三條,約略可 知羅氏治學之大要。其他尚可與此三條之旨相發者

如卷四有識其大者條,謂:

昔人論治必首三代,論人必希聖賢,論文必本六經,非過於矯亢也 0

又卷一有孔門多才條,謂:

胡氏謂伊洛發明,然後人知孔孟可學而至。視漢晉以來儒者有間矣,至紫陽,集諸家之大

成 其精: 本之義理 ,其粗究之經濟 嘗書儲才之說 0 物有不求 未有無物之歲

用,未有無才之時。特無敎無孔子,而取之之說又不大公爾。

此 理 則 條見羅氏雖不切 重 六 經經 尙 經濟 切究論 則 重羣 心 性 史 0 , 圃 故本書多引經述史之言, 於理學大宗旨所在實未忽視 可謂知以經學史學並 。凡本書論學, 大致如上引 重 者 尙

又卷二有三大處置 條 謂

漢初 之。 建收其精兵制其錢穀之計, 樞 密使召之, 病於諸侯強大, 但 偃普忠謀 由是兵權去手 檜則姦謀 至父偃建分王諸侯子弟之說,諸侯遂弱 藩鎭遂消 也 0 偃之說 0 , 宋南渡息兵 賈誼發之。 普之說 , 張韓劉 , 鳥重胤發之。 岳 o 唐衰 擁 兵 方 病於藩鎭跋 面 檜之策 不釋 , 扈 秦 范 檜 趙

同

各

普

此條 可證本書論 史, 實能 於經濟義理

兼

顧 並

重

也

0

卷 史筆條有云

勸懲之意因 敍列人物 也 舒傳不載其和親之疏 功一 不載其謀撓楚權之繆 論 蘇 秦日 其 , 寓焉 傳褒之者贊貶之。 [其智過· 廢之,是塞人自新之路 0 蘇 兆泉曰: , 丽 而載之留侯傳 , 載之匈 論北宮伯子愛人長者 馬遷廉 贊稱美者傳 奴傳 頗 0 0 , 傳 而堅其肆惡之心。懲要不已甚乎。後之讀者 周勃傳不載其汗出沾背之恥 四臣若功十而過 無載 , 不 載 0 蓋 其議閼與之失 班固 人非堯舜, 贊張湯曰 , 不 安能 [推賢] · 欲 因 , 而 盡美 揚 見於趙奢傳 , 善 以 而 疵十 載之王 0 諸 作史之道 人者 乃與 一陵傳 酈 過十 善之意 當 食 0 董仲 ( 其 傳 爾

識哉

此 .條亦見本書論史,時時不忘義理之證。而其言實發前人所未道 0

正 如王 史,故於理學中乃獨尊朱子。不及北宋周張二程四家。竊謂其學應與王伯厚困學紀聞 **蹟無考**, 不長 非夏正改朔條 |氏之博大,又王氏入元久,其著書深寓亡國遺民之痛,羅氏則似入元未久卽卒,又或其年壽 其 他 其書當大部成於宋代未亡前危殆之際,故不能如王氏之宏通而深沉也。惜其名字湮沉 如卷八辨軒轅非黃帝條,卷一辨孔子不師老聃條,卷六辨蜡臘異祭條,其他又如卷二寅 姑爲鈎稽其書之要略如二。 凡以史事證經義者極多,益知羅氏之學實承理學來 惟不喜談心性,專治經 相似 0 惟 , 事

不

# 吳草廬學述

[世儀桴亭。此三人雖所詣各不同,要爲能得朱子學之大體及精旨所在。然元代有吳澄草廬 朱子後闡揚朱學,於學術史上有貢獻者 宋末必舉黃震東發,明代必舉羅允升整庵

是亦不可以無述

選擇之精審

讀者其無觀焉可也

當時有北許南吳之稱

0

許衡先仕於元,提倡朱學,亦不爲無功。然論學問著述

,

惟草廬堪

稱

巨

清

初必

舉陸

**黄氏采摭殆盡。前儒讀書謹密,** 宋元學案有草廬學案,黃梓材謂是卷多仍黃氏之舊。余嘗徧繙草廬全集一 卽此可見。本文自抒觀點,稱引多出黃氏外 ,然不害黃氏此 百卷 , 其中要 義 案

卒於宋亡後一年。 草廬生宋理宗淳祐九年己酉, 劉因靜修程文海鉅夫,皆與草廬同年生。靜修風節峻邈 (西元一二四九) 距朱子卒四十九年,下距南宋亡三十年 , 似非草廬所及 0 然鉅 東發

學一 趨 夫始強起草廬於元廷,草廬卽以母老辭歸。後雖屢經屈仕 據 過 虞 集道園學古錄草廬行狀 如是者三年。次第讀論語孟子中庸 ,草廬十歲 , 得朱子大學等書讀之, , 專勤亦如之。是草廬幼年爲學,乃從朱子四書入 ,草廬意終不屬 恍然 知爲學之要 。其與魯齋出處終是異 必 日

天生豪桀之士不數也門。年十九,有與人書曰:

年而: 天生豪傑之士不數也 於俗儒之陋習,淫於老佛之異敎,至於周 願學孔子,而卒得其傳 朱子集數子之大成 0 戰國之時 ,則中興之豪傑也 。當斯時 也 ,孔子徒黨盡矣,楊墨之徒又滔滔 , 曠古一 程張邵一時迭出 0 人而已,真豪傑之士也 以紹朱子之統自任者,果有其人乎 ,非豪傑其孰能與於斯乎。 , 而 。孟子沒千有餘年 孟子生乎其時 又百 溺 獨

### 又著說曰:

其 也 也 道之大原出於天,聖神 貞乎?中古之統 。濂洛關 程張 其亨也, 閩 其貞也 朱子其利也 ,仲尼其元,顏曾其亨,子思其利 繼之。堯舜而上,道之元也。堯舜而下,其亨也 。分而言之,上古則羲皇其元 , 孰爲今日之貞乎? ,孟子其貞乎。近古之統,周子其元 , 堯舜其亨乎。禹湯其利 0 洙泗 魯鄒 文武 周 其 利

野日 大變 道園 多, 日 余讀草廬集 然凡所交接,或公或私, 是時先生方弱冠 頗多應酬文字 , 而有志自任如此 朋徒門人 。孔子曰 :我非斯人之徒與而 , 0 切琢 此後歲星一周 討論 則莫非以道義學術爲主 ,宋室遽亡 誰與, 朱子生平 。天翻地轉 0 在朝日 故其文集 社 會 少少 情 百 在

衰

關

於時

運

0

知

人論!

世

,

此

未

代後 所 二十 庵 水 糊 歧 相 口 卷 背景皆遠 視 地 0 , 不爲 卽 , , , 此 卽 息 良 風 時 影 應 不如 讀 酬 乃特盛於江西 相 田 書人 遠 , 即著述 爲 。陸桴亭在 , 良醫 凡 , 所 相率寄情吟咏,以詩歌爲逋 交接 • 0 亦以 而 0 草廬縱 清 當於草廬 朱子學之宏博 , 救世 見於文集者 初 , 其時江 以上承 0 又次 致慨 八則琴· 精 歎 南理學風 朱子學統自任 , 約 深 也 士 略 , 逃藪 及其 畫 分別 氣亦 師 與 , , , 亦爲不: 年 尚盛, 乃至方外道 , 則曰 傎 然時代已非 進之概 失風 處境亦非草廬 詩 人 土 雅 0 胥 蓋 , 相 0 前 次則爲醫生 元 可 土 1 擬之東發 於是覩之 初未有科 - 者之流 所能 企 及 , 0 後 更次 草 挾 歧 學 擬 南 廬 之整 黄 術 則 自 風 易 術 更 興

性 聞 道 講 問問 學 草廬之生 學記有 止 0 於訓 即謝枋得文天祥 話之精 日 , 理學未絕 , 講說之密,如北 , , 亦未參講席 而 講學之風則已 溪之陳 。草廬早年亦多致力於記 衰, ,雙峯之饒 故 東發以下如王伯厚,胡 , 與彼記 誦 誦 , 詞 不見師友之會講 章之偽學相 身之, 皆從 去 何 事 嘗爲<sub></sub> 博 能 讀 以 ,

聖學大明於宋代 末 精 饒爲未密 也 , 而 0 踵其 墮此 後者 科臼之中 如 此 , , 垂 印 歎 四 已 7 年 0 而 澄 始覺其 也 鑽研 非 於文義 0 毫分縷析 , 每 猶 以 陳 寸

草廬 雖 遊朱學 , 而 菲 薄 陳 饒 , 可 覘 其爲學之一 面 0 其語要又 曰

子 通天 游 地 戲詞 日 林 儒 不 物 可 '無諸集 不 知 , 旁通多識 事 不 能 , 恥 不可 也 0 無紀錄 洞 觀 時 變 0 而 其要· 不 可 在聖人之經 無經 廣 求名 。聖人之經 理 不可 非

0

此 氏 經 元之淫威 日鈔於文史兩業之致力, 可 牆雖立 o 窺草廬爲學之又一 其於文史, 如 史子文集雜記雜錄之供涉獵而已。必飲而醉其醇 ,宮室未美, ,其能寄亡國之痛 則曰游 戲 面 而遽爲時代所摧折 詞 0 即伯厚,身之,其史學成就,皆在宋亡之前 林 , 草廬雖能擺脫朱學末流文義纏繞之科曰,然其於四部 抒麥苗之思者,蓋亦尠有 , 旁通多識 o ,似乎未得朱子論學本末內外體用無賅之精 其未能接跡前修 。草廬年方 亦可 憫 而 立 不可責也 。至於文章詩詞 , 即遭易: 世 書 , , 故 義 則 其爲學 經歷! 歸 不 論 重 胡 黃 在

,

食而飽其哉

,斯可

孝經章句 廬 0 此 據行狀,宋末, 數年中所潛心致力者 校定易詩書春秋 草廬奉親避地 , 直迄於老,終成五經纂言。爲草廬一生治學之大業績 修正 , 儀禮及大小戴記。至元世祖至元二十年 弗寧厥居,得樂安鄉貢進士鄭松之招,隱居布水谷 , 始目 布 。黃百家主 水谷還居草 o 乃注 釋

可及 朱子門人多習成說 深通 經術者甚少 0 草盧五 經纂言 , 有功經術 , 接武 建陽 非 北

溪諸.

人

評

竊意主 秋 未臻成書而卒 自譬爲鷄肋 0 於書則云 二此評 0 多不可解 。草廬論之曰 , 於春秋 實未深 ,既言大旨可見 允。蓋由未能深窺朱子論學淵旨 於禮 , 晚年作儀禮經傳通解, 無難曉 0 又云:難看 自爲發凡起例,乃羣弟子衆力纂輯 。朱子於五經 無理會處 自爲易本義與 朱子從不勸 詩 集傳 人讀 o 並 , 而 亦

爲之惋:

經

傳通

解

,

乃其

編

類

が 草 藁

將俟喪祭禮畢

而

筆

工削焉

0

無祿:

弗逮

**遂**爲

萬

世

缺

典

每伏

而

#### 又日

與 藁 缺 五. 超之中 本 左氏傳之附春秋經者 , 而 則 已 編 類 , 0 若執藁本爲定, 之初 其未爲諸 , 不得不 儒 所 , 有 以 以 儀 而 《異乎。 以後記述 禮 , 爲綱 惟二禮經 易詩書春秋之四 補傳分隸於其 而 各疏其 0 然三百三千,不存蓋十之八九矣 下 0 左 脫藁之後, 經 , 既幸 與象象傳之附易經 而 必將有 正 , 而 儀禮 所 科 者 别 經 , 0 朱子 有 決 , 又不 以 不 異乎 補 但 其 如 潰 0

謂 此 也 之相 [評實自· 只是 遺 略 經 存古之制 有見。惟朱子治禮 , 其 間 區 度 別 , 使後 判 然甚 人自 , 不 去減 顯 貴 泥古 殺 , , 求其 求通. 今 可 行者 , 謂 卽 而 且從 已 0 則 俗 朱子之集禮書 , 亦 無甚 害 0 故 , 其 日 (意決) 今所 不 如草 集 禮 廬

書

所

亂

是豈朱子之所以

相

遺經

者哉

考 人 以 書 語 集 0 研 孟 注 抑 故 當 壆 章 且 玩 朱子 庸 時 几 句 最 書 四 門 書 功力之流 所 , 上齊 每 用 師 有 弟 力 子講學 所 五. 注於 疑 經 而 論 、五經者 屢 中 而 語 集注 心 有 敎 間 人治學 , 更爲畢: 實 辨 , 偏 每以考據爲多 0 重在 朱子 , 上 生精· 則 必 亦 四 先四 力所萃 鸖 於 (其所) 0 書 及朱子 0 爲集注 而 0 О 惟 大學 發揮 身後 四 書之學 章 章 義 理 旬 旬 門 , 第子是 則 屢 則 貴能 重 爲 有 其 遵承 修 在 、晚年 四 正 躬 師 修 書 0 實踐 愜意之作 見於 旨 0 朱子 語 除蔡沈 0 當時 撰 類 沭 朱子 班 朱 子 惟 門 旣 四 可

此 鑽 爲書傳外 自後人之見, 研 文義毫分縷析 , 蓋皆於五經 不得以草廬之孜孜窮經 不滿 於 致 力 爲· 於朱門, 少 此 0 亦宜然 然求能: ,卽謂是接武建陽 於朱子四 0 而 黄百家乃以朱子門人多習成說深通經術者少爲病 書 [集注章] 也 句 更有 補 元闡 揚 事 非 草 廬以

黄氏 漸 回 增美之處。姑舉一例說之。 趨 衰 日 南 1鈔說 歇 宋末季, 0 若專就文義鑽研 此 往日諸先輩喫緊爲 謂 則面! 如論語集注於與點一 目 人 [依然 , 注意躬修實踐 , 而 器精神已: 章 , 非。亦於朱子敎人治四書之精神 , 每拈 屢經改易 四 書語句爲羣居討論講學之風 , 而終未達於圓滿 無憾之境 ,甚難 旣 有 0

釋

此 日 條 言,若有獨契於浮海 夫子以行道救世爲心 闡說孔子當年心事 居夷之志,飲水 , , 最爲精愜 而時不我與,方與二三子相講明於寂寞之濱 , 爲朱子集注所未及 曲肱之樂, 故不覺喟然而歎 。草廬亦曾闡此章 0 蓋其意之所感者深 0 而忽聞 , 其宋沂字說篇有 曾點浴沂之

予觀 疏飲 爲 事 須臾之停。苟有見乎是, 水之中 期所期於後 其知曾點之樂者與 四子言志 顏子之樂 , 而 , 未若安所安於今也 聖人獨與曾點 。凡人皆當志於聖,遜第一等而爲第二等,比於自暴自棄 , 雖 算 瓢 則出王游衍皆天也 陋 , 巷而 何哉 0 夫此道之體 不 。三子皆言他日之所能爲 改 也 0 素其位 。邵子曰 , 充滿無毫毛之缺 而 行 在朝廷 , 無所願乎 行朝廷事 , 而曾點但言今日之所得 外 0 此道之用 。夫子之樂 在林下行林 , 流逝. 在 無 飯

認

在

林

下

,

之正 當 深 此 後 時 世 年 感 事 所 , 闡 固 日 不 解 0 草 :下行: 番 若 非 說 不 0 ·當於草 廬 東發早 安所 行道救世之心 0 非 說 然 林 無 安於今, 此 東 **、一般** 一般 事卽 章, 廬 生 理 一於草 據 致深 究 爲第 , 乃深賞 然於論 情 廬近 在 責 , 要爲, 何 , 0 年 則 四 等之聖學 惟 有一 語 草 + 不発已冲 康節在林下行林下事之語。論其出處 , - 盧言: 雖 年 本章喟然歎曰 番行道救世之心。 不 0 几 可 金之亡, 考 則 淡 人當志於聖, 決 , , 非明道論學之士所許 要是在宋社既屋之後 而專尋孔子之樂於飯疏: 東發已生二十二年 四字之神情 遜第 時 不我與,故 , 終欠拍 等而爲第二 0 也 , 在東發之世 於此章夫子喟 合 方絕意仕 飮 固不失爲 0 水中 等 故必以東發所言爲 比 進 後之學者 於自暴 , 賢者 然之一 固 已 故 國 自 日 期 歎 然於 運 棄 知 得 所 日 , 0 若 孔子 能 本 人論 期 頹 果 有 於

梁父 朱子 者 統 之姿 有用 口 尋 不 吟 亦 世 如 朱子表彰 0 T之想: 循之以 其 重 其於所 日 (次為 浩 進 誦 步 也 歌 儿 學 史學 辺 出 治史。 書 0 其闡 書 不 師 , 縦 , 以 意 表 , 爲文學 奉孔 其修 易義 是涵 漸 越 0 程 進 四 於 養未深 禮 孟 年 鉅 , 似 書 以爲明道 明 而 夫 , 皆有志從事於明道救世之業者所 知 不 宋 道 , 其意 則特略 如其 邊亡 救世之抱負 丽 闡 救世之本 感受已厚 , , 草廬 濂 **遂題其居日** 存古禮以 溪太 適 0 極 年三 在其二十七 , 0 淵 備後起之參考 圖 十 [草廬 說與 源 日. 遭 所自 横 此 0 一歲時 是草 山崩 渠正蒙之用 , 乃北宋之周 海 廬 不 0 嘗作草? 在當 惟 往 竭 可 忽 四 日梁 書最 力 形 時 o 張二程 父吟 一屋數椽 勢全 草 o , 其 為切 已 廬 於 知宋室 出 非 以 實 而 尙 師 0 +朱子 草 而 書 題 鹶 表之意興 蔣亡 春 廬以 其 幼 미 論 秋 依 膈 童 學 幼 曰 曉 則 慧 刨 而 暢 勸 重 至 敏 尙 抱 知 學 傳 拿 而 勤 自 膝

苦 而 殆不復存在。斯其所影響於草廬之內心深處者又當何如 草 廬此 陸沉之悲, 下之學術轉變 字裏行 間 , 則 ,似乎亦渺 仍可縱跡 不可得。 而 求 其所以爲含茹消 。乃今讀其文集 化之經過 · , 固 國之痛 非異世之所能 , 生 民 塗 炭 之

其爲靜淵說,已當草廬八十之晚年。乃曰:

魯國顏子,汝南周子,河南程子,予在幼弱,志在晞三子,然謂注言。正常,加入一次明然,之上

歲, 近 想 此 周子程伯子氣象以 與其 熙熙乎其似春, 見朱子訓子帖, 而別有一番體 解釋論語 與點一 自勉 悟 有勤謹二字,如得面命而服行之,作勤謹二銘。又作敬銘 而不知手之舞足之蹈 0 及遭世變,乃於此更深尋 歎 。常自言曰:讀和銘 , 豈不見草廬在元代時之心情, 。是草廬早年 , 心 神怡曠 也 , , 萬境皆融 於濂溪明道之爲學與爲人 固已昭然若揭乎 , 有弄月吟 0 風 考行狀 ,又作和 情 殆是性氣所 有 草廬十五 傍花 銘 , 極 隨 柳

又曾為敬義齋說,曰:

予之愚騃,自少妄有志於程子之學。

又爲敬堂說,曰:

嘗有志於程學。

道園行狀又曰:

元貞元年八月游豫章 元明善見 9 先生使讀程氏遺書近思錄 , 明善反復玩味 9 他 日見先

是年,草廬年四十七,元興已十六年。草廬當時固是標程學以教人 生 , 曰:先生之學,程子之學也,願爲弟子受業終其身 學者亦以程學名之。

,

又爲姜河道原字說, 有曰

近世程子,受學於周子。太極 誰是眞知實行之人 之及。寧非有深慮乎?朱子演繹推明之後, 。蓋有不勝之弊者矣 一圖,道之大原也。程子之所手受, 此圖家傳人誦。 宋末之儒 而終身秘藏 , 高談性 命者 語 比 曾莫

知實行 卽 見, 學者不深考 道園行述又曰:先生方弱冠,有志自任以朱學之統, 勝之弊。其言之洵有當於事實與否可不論,而其內心之鬱痛,意態之劇變,則正可於此 此 其言多有病之言, 可見草廬以身歷巨變 朱子之演繹 每目草廬爲朱學。不 推明 然不忍棄去 , , 懲創之深。回念前塵 有轉不如程子之秘藏 知深究有宋一 , 錄 而 藏之,則晚年所進自此可 不語者 代之理學者 , 感愴無限 而其後嘗識此兩文之後 。故在程則謂之有深慮 。宋末諸儒 , 必知程朱之間亦有相異 考云云。 , 尚多高談性命 兩文已見上引。 , 曰:其見多未定之 在 朱則 ,不當混倂 推之。故 謂 , 而 其 後之 有 少眞

而 一言之也

抑草廬之學 康節邵子偉然爲 實別· 百代 有 淵源 人豪 0 , 則爲邵 予每尚友其人,尊之之至,慕之之深,而 康節 , 此 當稍 加 揭 發 。其爲約齋記 有 不能自己 日

又爲明經書院記有曰

必共城邵子, 必春: I 陵 周子 , 必關西張子, 必河南二 一程子,一 而 後爲眞儒之明經 0 嗣 邵 周 張 程

者,新安朱子也。

草廬 於邵 年輩 作 以 此 紹 神 以 在十 朱子: 朱子統自 子之學 道 碑 固 九歲 上 是 , 謂 康 承 , 深有 卽 任 深 邵 節早生七年 作皇極 造 周 所會悟: 張程五 而 極 品品 叉  $\Xi$ 經 , 一人之後 也 猶莫尚: 世 , 然據 續 )。此皆 書 於邵子 慣 ,語氣間 0 [草廬] 是證草廬幼年爲學之別 例 則 同 0 草 而 時人於草廬有 ,於朱子不見有特殊之推崇 道園 廬 此 處之盛 行狀則謂草廬以 深知 尊 康節 淵 , 源 故能云此 可 邵子爲孔子以來 0 上引 謂 , 迥 而 其弱 不 0 而 尋 躋康節於濂溪之上 冠前 常 危素爲草 0 與 故 人 人 揭 書 廬 而 奚斯爲 年 , 毅 譜 蓋其 草 0 , 欲 記

澄之龆 齔 惟大父家庭之訓 是聞 0 及知聖賢之學,而又欲推之以堯舜其君民而 後已 0 實 用

其 力 於斯 , 豁 然似 有 所見 , 坦 然 知 其易行 , 而力小 任 重 , 固 未敢自以 爲是

書 豈料 天文星曆之學, 0 纔十 此 (後大局) 稔之轉變 已變 寛厚 , , 草廬 而 亦 屑 所謂坦然知其易行者, 細 於康節之學乃更所究心 務 0 疑鐸之爲學 ,必有得於康節 固已大謬而 。故道園行述 不然 , , 0 故草廬早歲 又稱草廬尤有得於邵子之學 草廬大父鐸 , , 卽 危素年譜稱 留 ì 皇 極 經 其 也 精 世之 通

又稱,大德元年,草廬辭元廷之召,有書致廷臣曰:

夫子勸· 勉 繼 以邵子之詩 漆 雕 開 仕 , 對 9 日 以吾斯之未 幸 逢堯舜爲眞主 能 信 , 而 , 夫子說之者深 且放巢由 作外臣 0 澄 敢 0 澄雖不敏 不 以 古賢 人之所以 願自 附 於前 自 處 者 自

則草廬當時之深有意乎康節 ,固別自有其身世之隱痛,亦居然可見矣。是年, 草廬經敦迫

終未

### 一至京師。

康節 館 , 轉來 與門人論及老子莊子太玄等書之本旨 又據行狀 , 亦自於其身世 , 大德九年,校定邵子之書,十年十月出仕 有不可暢言之隱痛 , 因正 , 而 姑寄焉以爲說 其訛僞而 著其說 。十一年正 也 0 0 曾為 虚· 草廬於老莊皆· **戸**朔, **舟說** 即以 有 疾辭 有 日 深 去 品品 0 留 此 淸 都

之於當: 全謝 此欲: 許 種名 , 遠 Щ 以 於劉 I理深談 莊老以 世 爲書後 孔孟會莊老 , 亦 , 而草 有心 無心待物,聖人以公心應物。 , , 考其所以 則何足以當 廬 , • 以公心 亦無心 不 ·自諱 指 卽 匿 許 知 轉無心。當知在草廬 0 其 魯 人論學之任乎! 由於身世 深治老莊 齋 0 然魯齋立言固 一隱痛 , 此 其心公,雖曰 , 同 亦其爲人爲學之俊偉光明 而 逼 心 時劉靜修爲退齋記 出 中, 在程朱 此 實 有 番 蘊 , 心 有 義 不及老莊 理 , 番深苦 亦若 。後人 , 謂 無 0 處 草廬之出仕 世 心 不能設身處 , 也 有挾老子之術 曲 折 以達於自 地 , 其行: 徒認! 安 以 往 跡 近 草 者 爲 廬 於 是 0

# 其爲太玄章句則曰:

太玄之書

,

其文艱深

,讀之者少

。然邵子於其數

,

實

有

取

焉

則其治太玄,亦自 康節轉 來 0 然草廬之所抱以終身者 則終自與莊老子雲三人爲不同 尙 論 之

# 士,於此當明辨也。

朱子爲六先生畫像贊 , 於周 張二程外 復增 康節與 司 ,馬溫1 公, 此見朱子論學塗轍之廣大 其

程 不 爲伊洛淵 然。 演 周 朱子爲易 經 源錄無康節 ,象數義理 本義 ,分疏兼包。東發推尊朱子,乃於朱子之易學獨所不契,分別伊川 , ,此因康節與二程學術究不同 又續爲易啓蒙,更深取於康 節 。而朱子又深不以二程之不向康節問 , 而尤 尊信康節之先天圖 , 所謂邵 '求數學爲 康節 傳 , 而

主以 伊川 爲歸 。草廬治易,則承朱子意而更爲發揮, 故 日

世儒 誦 習 而讀者莫之察也。至宋邵子,始得而發揮之,於是人乃知有羲皇之易,而學易 知有周易 而 已。羲皇之圖 ,鮮獲傳授 ,而淪沒於方技家 。雖其說具見於夫子之

者不斷自文王周公始

繋解說針

好學之士之微辨而默會 然草廬於康節 終是別有會 也 心 o 其治易 , 雖亦本諸朱子 而要自與朱子用心又不同 。此 貴乎深心

危素年譜 則曰

公潛心邵子之書 每病夫昧者流爲術數之末,遂以先天六十四卦分配一元之數 ,

推治亂相

禪之由而爲皇極經世續書,兵火後散 軼 不存 0

今其 書既不傳 自亦無可 深 論 然既在推治亂相 禪 , 則與其欲以紹朱子學統自任之意亦可 相 通 o

逮其校定邵子書, 危素年譜有 日

公嘗謂邵子著書 • — 本於易 , 直可上接羲文周孔之傳 非術數之比 。其能前知 , 在 人不在

在心不 在數

其

微意可

說者

草

廬

語要有日

66 此

則

推

尊

康

節

益

爲

深

至

0

欲

以

爲

孔

子後

人

,

自

不

宜以

術

數範

圍

也

纂言外 書 其 在 有 元 草 貞 :功於世紀 翼 廬之潛 元年游豫章 , 在 I無猶 其 心 易學 八十 小 之年。 吾於易 自亦 郝文明迎 與 其 則其潛心易學, , 入城 有 尊崇康節 功 於 , 請 世 爲 學易 有 關 最 正在 大 ,是時草 0 0 草廬嘗自言 宋 道 元易代 園 ·盧 固 行狀 自 , 吾於易書用 謂草廬 以 避地隱居之中 治易名世矣 **燃於易**, 功至久 學之五· 0 而草 亦居 0 廬 + 可 叉曰 治易 知 餘 年 行 吾於 尙 成 自 易

時之爲時 同 而 i 質其時 也 0 萬變 始於 與時 無窮 莫備於易 乾之乾 義時用之大。一 , 面 終於未濟之未濟 吾之所以 0 程子謂之隨時 佳 時其時者 時 變易以 , , 則四千· 則六十三 則 從道 而 九十六時各有 四 時 已 0 夫子傳六十 不 同 也 ° 所 値 爻 四 彖 , 引 時 , 獨 而 則三 於十二卦發 伸 , 觸 百 類 + 而 其 長 四 凡 時

時

不

此 不可 其 孔 朱之 未 抱 有 孟 條語 所爲 無經 之時 確證 膝梁父吟 之百千 , 最見草 其意乃 亦 要可 此 非 草 浩歌 濂 微 廬 /尤重: 廬 溪 窺 所 K 横渠 治 出 而 以 易要旨 於指 師 知 自 外期道伊: 表之時 者 入 易 元 而 以 , 川之時 與 言之 來 0 其 而草廬之所以 獨於 入 元 故 以後 復亦 知草 易之 廬 非 五 二之治五年 書 十 時其時者 朱子之時 年 爲致 來爲學之苦 經 力 勤 , , , 在 乃是於易之一 並 而 彼自 亦 用 非其弱 心 心 謂 密詣 切 冠 固 故 經連帶引 前 草 其語要又謂 無異於文周 以朱子之統 廬 之時 伸 孔 則 而 洞 自 來 孟 旣 觀 非 周 任 時 張 此 文周 變

程

雖

與

草廬之爲五 經纂言 , 實其畢 生精力所萃,至於晚年卒歲而 始有 成書 0 有云:

其於易學 大旨宗乎 周 邵 , 而 義 理 則 本諸 程傳 0 其校定用東萊呂氏之本, m 修正 行

誤 0 其纂言則纂古今人之言,大概因朱子象占之說 , 而 益 廣其精微

義例。

是草廬治易,

實

亦

滙

通兩宋理學,

與後來清儒治經用意判然有別

。草廬復作外翼

乃以詳纂言之

0

爲僞 其 公既沒之後 書學之貢獻也 其 於書 實以草 ,門人語錄未萃以前, 定以伏生所傳自爲一卷,不以所謂古文者雜之。則因吳才老朱子所疑 廬 爲首 0 後 人 稱其見之卓。集中並 或不無遺漏放失之憾。而 有駁正蔡沈集傳之文。金仁山 草廬則指出 蔡傳之明背朱子處 示謂 , , 蔡傳 確然以· 成於文 ,

其於詩 其於春秋 , 則 , 則取 以 爲朱子傳其七 近代儒者特見之明, 八 , 其 有 餘論 以破往昔諸家傳註穿鑿之陋 , 則門 人傳其言 , 未及: 集 0 其 錄 序 說 故無纂言之作 有

專 漢儒專門 以 左氏 爲 守殘護缺,不合不公。唐趙氏所定三傳異同 主 0 爣義 有不 然 , 則 從其是 ,予奪未能 悉當 。今則如朱 氏 意

其於禮,序說有曰:

儀禮十 重 複 名 七 日 篇 [朱氏記 並 加 鄭 而 氏 本 與二戴爲三。 更不間 以 苟非其· 他篇 朱子所! 人 禮 不 輯 ·虚行 及黄氏 , 下學而上達 喪 禮 楊 氏 祭禮 , 多學 參伍 而 貫 以 去 , 其 以

綜觀 本 . 朱子。: 上 引 其畢 草 生爲學, 廬 禹湯文武周孔之心 經 學 , 依然是朱子精 明 承兩宋理學 俾吾朱子之學,末流不至爲漢儒 神 與此下清儒治 , 亦可 於是覘· 之。 經 有 其所 辨 0 以退 而 其 五 四 經 書 學者 纂言之規 而 進 事 五. 經 也 模 , 若與 與 綱 朱 宗 實 所論

,

#### 行狀 又 日日

軒

輊 倒

轉

,

則

所

處

時

代

相異,而爲學之心情有不同

耳

釋之末 之。 法 者言 公自中書出爲祭酒 非 武宗至大元年, 許 0 於是六館諸 久之,寖失其 氏尊信朱子之義。然爲之辭耳, 朱子 果如陸子靜所言矣。今學者當以尊德性爲 道問 除從仕 學工夫多 生 一知所 舊 , 始以 0 先生既 趨 郎國子監丞 所得朱子小學躬尊信之以訓授弟子 向 , 陸子靜學 0 至 四年,武皇賓天,仁宗卽位 , 深閔乎學者之日就荒唐 卻以尊德性爲 , 朝命行省敦遣。二年六月到官。先是世 初亦莫知朱陸之爲何 主 本 0 間 , 學 庶幾得之。 亦 而 如 , 尙 也 本於德性 徒從事於利誘也 , 繼之者多其門人 書省罷 0 議 先生。 者遂 , 則其 以 先生 弊 蓋 ·祖時 , 思 偏 先 |為陸| 有以 於言語 生嘗爲學 猶 能 許 作 守其

### 又曰

子 其 嗚 逈 呼 0 出千 旦 有 孟子殁千五 餘 古 年間 則 又有邵子焉 師弟子之言 百年 而 周 0 奈何 子 折衷無復遺憾 出 世 , 河南兩 運 衰微 程子得其 求之書 民 生寡 傳 佑 , 蓋所謂 0 時 而 亂 則 集大成者 亡隨之。 有若張子 斯 0 時 精 道之南 則 思以 有若陸子 致其道 又得 朱

後世

論學者

,乃以草廬爲調和

朱陸

,

或竟以爲陸學,則殆所謂

皮相之見也

節

多涵

重

艱

道園此 蓄 0 要之可謂得草廬之心志,亦略見當時 於邊境 文,敍述兩宋道學統緒 勸 縷析 氏超然有得於孟子先立乎其大者之旨,其於斯文,互有發明, 難 齔 用 也 講 避 大臣薦 , 內廷 地 狀異常人。 , 日 而二家門人區區 垂十 伏讀而深信之,持其說以事世祖皇帝,儒者之道不廢 以 , /增盛 誠意深遠。 出 數年。歷觀近代進學之勇,其孰能過之。南北未 處久速 盛年英邁,自任以天下斯文之重 ,曾不足少救偽學利欲之禍,而宋遂亡矣。先生之生,炎運垂息 ,道義以之。稽其立 與大議,論大事,雖可概見,而無悠久浹洽之功者,非 異同相勝之淺見,蓋無足論 , 與 夫草廬畢生志學之經過 輩儒生同所內蘊之幽情 朝之日 , 未嘗有三年淹 蓋不可禦也 ,以及其出 。朱子以來又將百年,爲其學者 0 I處大概 學者於焉可以見其全體 而 ,許公實啓之。先生自 0 ,許文正公先得朱子之書 摧折窮山 其 0 施敎成均 中 涉及朱陸異同 , 辭不 , 壯 暢 志莫逐 師 竭 人之所能爲 道 , , 自 語 尊 [布衣 毫分 大用 其髫

草廬: 仙 城本、 心樓記有 日

哉 廓 人之生也 也 而 0 自堯湯文武 孔子教人, 以天地之氣凝聚而有形 未嘗直言心體。操舍存亡惟心之謂,孔子之言也, 周公傳之以至於孔子 。以天地之理付畀而有心。心也者 , 其道同 。道之爲道具於心 , 而其言不見於論 豈有外<sup>×</sup> 形之主宰, 心 而 性之郛 求 道

湯文武 曰 : 失其本心 者何如,是本心二字,徒習聞其名,而未究竟其實也。以心而學,非特陸子爲然,堯舜 是以生也。今人談陸子之學,往往曰以本心爲學,而問其所以 學所從出也。孟子言心而謂之本心者,以爲萬理之所根,猶草木之有本,而苗莖枝葉皆 言曰:仁人心也 而 人之道者也 得於孟子之傳。孟子傳孔子之道,而患學者之失其本心也,於是始明指本心以敎 耳目之官不思而蔽於物,心之官則思,先立乎其大者,則其小者不能奪也。此陸子之 周孔顏曾思孟以逮周程張邵諸子,莫不皆然。故獨指陸子之學爲本心 非專離去事物,寂然不動,以固守其心而已也 。應接酬酢千變萬化 0 放其心而不知求,哀哉。又曰:學問之道無他 無一而非本心之發見。於此而見天理之當然,是之謂不 ,則莫能知陸子之所以爲學 , 求其 放 學者 心 而 己 非 人 。其 知 禹

其 數朱子,然本文首尾 異於自古之道統與學統矣 此文以堯舜孔 意可微窺 而 知 孟. 也 周 程張 , 皆朱子所已言而 邵 相傳 。舉北 , 宋諸儒必及康節,此證草廬之獨有會心 皆爲心學,不得獨指陸子爲心學 常言, 故知乃以泯門戶, 矯時 , 則治象山 弊 0 非 舉歷古道 I 學者 以 以辨是非 統 卽 • 學 不得自然 寓 統 貶 逃自 而 不

## 草廬又言曰:

學孰爲要 日 純心要矣 孰 。張子曰:心淸時視明聽聰 至 心 是已 孟子始 直 指 而 四肢不待覊束而自然恭敬。程子曰:聖賢千言 言先立乎其大者 邵 子曰 心 為太 周

,只是欲人將已放之心約之使入身來,此皆得孟子之正傳者也

此皆主儒學理學卽心學,不待別分門戶。則草廬自居爲北宋之理學,非自居爲陸 | 學明

叉曰:

接孟氏之傳。 夫子生知安行之聖,未嘗不思。思而弗得弗措者,子思所以繼聖統也。子思傳之孟子、以 心官之能思而先立乎其大,實發前聖不傳之秘。至汝南周氏 而關西之張,河南之程,其學不約而同,可見其眞得孔聖傳心之印 ,直指思爲聖功之本,有以上

此 處特指思字爲傳心之印。厥後羅整菴專以此意斥象山,然亦朱子先言之。

草廬又曰:

著, 嗚呼甚矣,道之無傳 朱陸二師之爲敎,一也。而二家庸劣之門人,各立標榜,互相詆訾,至於今,學者猶惑 雖微而浸著,雖著而浸微,盛衰興衰,亦何常之有。惟自立之爲貴 而人之易惑難曉也。爲人子孫者,思自立而已矣 0 族姓之或微或 0

當元之世,斯人斯道,正微而殆至於滅矣。草廬之言,亦在教人自立,而何朱陸門戶之足競乎?

草廬又曰:

教人之法不如是 今不就身上實學,卻就文字上鑽刺,言某人言性如何,某人言性如何,非善學者也。 見其官闕是如何 。如欲去燕京者,觀其行程節次 街道是如何 , 風沙如何 , 習俗如何 卽 日 ,並皆了然,不待問人。今不求到 雇船買馬 起程 兩月之間 可 到 孔孟 則

世

立

敎

而

顏習齋所論

尤慨切

還視

草

廬

此

條

可

·謂異世

而

同

感矣

恥

蓋 京 不 親 卻 到 但 將 其 曾 地 到 人 而 所 但 憑人之言 記 錄 逐 , 去探究 則 愈 求 而 參互比較 愈不得其眞 見 矣 他 所 記 說錄者有一 不同 惑亂

亂 已 深 浮議猶囂 談心 說性 , 而 不 躬 履 實踐 明室之亡 , 顧亭林只 以 博學於文行己有

## 草廬又曰·

每 人之說 砭 自 避 許 过去朱子! 其 魯 實踐爲1 齋 用心之苦 在 則 讀 口 當時 研 雖 耳 四 在 [書有法 应 精 元 列 前 書 人羣 誠 已 初 以 提倡: 不 俗 意之誠在 9 0 0 學利欲· 豈在爲 談 物既 朱子嘗謂 朱 亦獸 必究竟其理而 子 格 故謂其論 之心 朱陸 愼 者 也 , 元 獨 讀 一爭門戶 廷重 號爲讀 夢醒 大學 , 苟 學 四 能是 仍 有二關 興 有實悟 書 而 爲 科 爲覺 。至大元年 四 , 是不 述朱 舉 書 始可爲眞 0 ·僅爲 否則 格物 非 而 已若 世 徒 未 、離乎夢 (雖當覺) 者 四 方競務於讀 誦習文句 草廬 儒 不 書 , 然 罪 夢覺之關 在國子監 可 時 0 人 , 然謂: 以 而 未乎冤獸者蓋 朱 範 說 亦 已 朱 其 子之四 俗 夢 轉 子之罪 也 誠意者 必敦 有題 在 可 0 謹 祖 書 以 意 陸 四 垂世 其 旣 人 不 [書後 草廬 也 鮮 誠 行 人獸之關 而 則尤更失之。 者 , 而草 乃即 百代之師 可 有實 轉 不 廬 以 懼 獸 踐 實悟 提 朱 當 哉 而 時 出 非 子 爲 忚 能設 物 几 言 爲 徒 人 乃 格 出 施

罪

箴

否

草廬又爲劉氏中庸簡明傳序有曰

處

地

瞭

解草

廬

之時

代

乃始可

)與論草

廬之學

術

也

則裂 朱子著章句或問 0 其 粲然者多則 擇之精,語之詳矣。惟精之又精鄰於巧,詳之又詳流於多。 惑 0 雖然, 此其疵之小也 ,不害其爲大醇 其渾 巧

益著 心 朱子常 力於治經 然而 以儒 明道救世,終不能束書游談 者說經多巧語爲戒 然其精 語又曰 , 而草廬即以諍朱子。在朱子猶不免,後人法朱子而 。草廬砭朱學末流之失,而卒亦不歸於陸學,於是乃萃其 說四 書

病

沔

若徒: 求之五經 ,而不反之吾心,是買櫝而棄珠 也。不肖一生切切然惟恐墮 此

多知哉 之學 以及 外也 而 其流入於異端也 聞見雖得於外 不 要其表裏真妄之實然,是以識愈多而. 身窮理爲 今立眞 固 。記誦之徒,雖有聞有見,而實未嘗有知也 非如 主 誦 知多知之目 記之徒 而 聖門一 丽 所聞? 必究其本末是非之極 , 所見之理 博覽於外, 則日多學,二則日多識 ,而外聞 ,則具於心 見之知於德性之知, 而無得於內 心愈窒 致 , 。故外之物格 是以 。亦非如釋氏之徒,專求於內 鄙孤陋寡聞 知愈博而 。昔朱子於大學或問嘗言之矣,曰 是欲矯記誦者務外之失 則 心 愈明 ,而賢以多問寡 內之知致 0 彼以徇外誇多爲 此 儒 者 曷嘗 而 而 內 外 無事 不 自 不欲 此 知 於

德性 學實確然仍爲朱子之學統。其少談文史, 之知與聞見之知,其辨始於程子。 此則專拈朱子發明大學格物致知之義爲學的 少談四書 專標心學二字而一意於五經 , 則在草廬 可 知草 廬之 自 有

苦心 知人論 世之士 。貴能於此 細參 。然要之論朱學傳統之正而大 , 則草盧· 亦自 不 如 東發 也 頻近

平 康 節 與草 則草廬 廬 同 時 名世者有劉 靜修兩人 静 , 意態亦多相 修 兩 人出處雖異 合。 靜修敍學有曰 而論學要旨 , 時 有 相合 0 劉 蕺 Ш 日 靜 修

乎? 經語 耳 不 以反說約也。聖賢以是爲終 之全得乎?三代之學 先秦三代之學,六經 可 0 六經 強解 所謂顏狀未離乎嬰孩 孟耳。世人以語 既畢 優游諷誦 , 反而 語 求 ,涵泳 孟爲問學之始,而不知語孟,聖賢之成終者。 之, 大小之次第 孟爲大。 , 胸中 高談已及於性命者也 自得之矣 學者以是爲始,未說聖賢之詳,遽說聖賢之約 世變旣下, , , 雖不明了,以爲先入之主可也 先後之品節 風 俗日壞,學者與世俯仰 。雖然, 雖有餘緒 句讀訓詁 竟亦莫. 0 所謂博學而 不可不通 必欲明之,不鑿則 知 ,莫之致力。 適從 0 , 不亦背 詳說之 惟當熟 惟 當 欲其: 致 讀 方六 將 材 馳

鑿與 亦仍啓爭 二十 也 孔 而終無救於陸沈魚爛之禍 孟 惑且 八卷 惟 豊 有 不爲萬世之師 端 既畢 益 此 甚 0 六經 惟 與草廬著述不及 明初 顧亭林深嘗亡國 然後1 表 襲 , 然而世變俗壞 反而 元 。於無可奈何之際,靜修乃主語孟惟 轍 (四書有 求之 |慘痛 以四 此 書大全取士 不同 與草廬· 乃唱經學卽 ,顏狀未離嬰孩 0 惟 之論 懲羹吹齏 0 理 學之論 時 實 所重 爲 ,高談已及性命 要非 同 , 當熟讀 苦心 然其經學 四書亦仍過 正 辦 0 0 捨孔 抑靜 , 中 而 , 於五 修亦 論 亦 孟 不可強解 卽 而 孟 經 先治六 包 自 亦遂爲游談之資 四 , 有 而 書 辺 經 [書集義: 此 朱陸 惟 爲入門說 門 恐 制 其 戶 精 舉 為 利 ,

酿 世明道之心情 乃幾乎能越東發而上 至今,仍待潛 , 時文八股 , 心探索以開此下之新趨 體悟 乃不得爲經學耳。至其是朱非陸之見, 儕朱子 闡發 0 , 然而 皆疏 此下 0 此乃宋元明清四代全部學術思想史中一大起伏 0 ·淸儒 故筆而出之,固 , 乃羣務治 則持之益堅,其所爲日知錄 經 【非僅於爲草廬一人之學術有 , 陸王程: 朱 , 並 廢 兼 棄 , ·所衡論· 而 , , 讀 究於孔 大問 書之博 也 孟 題 0 救 0

元年 + 成 出 0 0 時 文宗天曆 至治二年, , 行狀又曰 草盧爲河 年八十五 **元年** 經筵講官主講經學。是年七月, 易纂言成書。時年七十四 仁宗延祐三年,草廬 。是年六月寢疾不起。是月, , 春秋纂言成 。二年,易纂言外翼成 深 入宜 。三年, 黄 順 草廬卽告退歸里 Ш 帝即位 中五 拜翰林? 峯 僧 ,卽元室之末一帝也 0 學士 時年八十一 舍 , 修易纂言 , , 知制 時年七 誥 0 寧宗至順 + 0 , 同 五年修書纂言 七 修 0 國史 此 後 四 年 。泰定帝 意纂述 , 禮 0 時 記 泰定 不復 年 Ł

道園既爲其行狀,又有祭文,略曰

哀哀先生 , 早勇進道 0 方圓直平,步趨惟 程 。縷析條分,朱之治經 0 信 其 有爲

葛 。宋熄其炎 , 歛而! 退藏 。玩心神明, 天人妙契。時行物生, 獨據 其會

於草 廬之治學用心 , H 謂 深 有契會 。後之讀者玩其辭 , 亦可 以 興異世之悲矣。 然明遺 民 王 船 山之

# 讀通鑑論則曰:

鬻詩書禮 不忘也奚待 樂於夷類之廷者 0 虞 集危素, 祗益蒙古之亡,而爲儒者之耻 , 其國之妖也 其迹似 其理 逆 0 姚樞許衡 其文詭 其說淫 實先之矣 0 相 帥 以 嬉

是雖不及於草廬,而草廬之不能逃其賣亦顯矣。趙宏毅,字仁鄉,從草廬遊。元亡,歎曰:但有

一死報國。與妻解氏皆自縊。則君子之出處,固不得謂其無影響於後世也

# 讀明初開國諸臣詩文集

當時 蘊 歡欣 制 以 筆記之類, 祖 (論其時) 以平民崛起爲天子, 行政之多所 鼓 ?諸家之詩文集而後其情事乃大見。本文亦僅偶舉例證 乃有大不如後人讀史者之所想像 本文作 舞之情當如何? 代內蘊之心 所論 意 劇變, , 不 以史事爲主 在 情 論 而 而夷考其實 爲漢高以下所僅有 中 。 胡 詩 國全境淪 文, 元入主,最爲中 0 而 或據文章著作以論一 在藉詩文以論 於異族統治之下 , 當時 0 加 欲 羣士大夫之心情 ,讀史者豈不曰 國史上驚心動魄一大變 加 史。 以 块發, 時 論 ,亦爲前 代人之思想及其議 史者多據正 國 1驅除胡 史野乘 ,然雖 , 乃及 史所未遇 虜 一史紀傳志表 鱗片爪 旁見散: 時 ,元人用兵得國之殘 , 從龍 重光中華, 0 未及百分 論意見。 出 佐 命 而大體可 , 旁及裨乘野 年 未詳 諸 此文則在 其在當時 名臣 亂者四 未 想矣 備 暴 其 語 語· 史小 必參考 內 起 , 上 其立 心 所 文 下 明

#### 讀宋 學 士 集

清嘉慶十五年吳縣嚴榮彙刻明宋濂文憲公全集, 序 曰

公文甚富 海陵徐氏之刻 生前 ,又十五年 未 有 雕 本 , 公沒百三十四年 而後有高淳韓氏之刻 而 後 有 太原張氏之刻,又二十二年 而

後

# 其凡例又云:

卷 革木八編 文憲公集初刻於明正 稿五卷,凡八集七十五卷, 百二十四題 ,徐刻仍爲八卷, 凡八卷,共一百四十三題。彙刻於嘉靖三十年高淳韓叔陽 其爲張徐二本所已刻者七百十題 韓刻爲補輯八卷,凡五十卷,一千二百六十題 德 九年太原張 共 九百有六題 縉 , 爲鑾坡前後續 0 續刻於嘉靖十五年海陵徐嵩 ,其未刻者二百十四題 別 各十卷 芝園前: 0 , 凡三十二卷 今並張刻爲三十 後續各十卷 ,爲金石絲竹 共 匏土 朝京 九 儿

治 也 本 十三年永康胡鳳 0 爲景濂 今景濂集之重印 爲 商 集之最完備 務叢書集成本 丹 流傳者亦有三本 0 其祖. 者 采自金華 本即嘉靖之韓刻本也。又一爲中華書局四部備要本,即據嚴榮校刻足 叢書 0 爲商 此 務印書館 集始刊於清 四 部叢 康熙四十八年南陽彭 刋影印明 江德本 始摶 卽 嚴 又 氏 續 所 刻於同 稱 張

刻

明 史藝文志

宋 濂 潛溪文集三十卷 , 皆 元 時 作 0 潛溪文粹十卷 劉基選。 續文粹十卷 方孝儒

選 宋學士文集七十 Ė. 卷 , 又詩 集 Ŧ. 卷

今按: 收 於正 一德本之內 宋學士文集七十五 , 嘉靖 徐 卷 刻 本收之未盡 , 卽 正德張刻本,是為景濂入明以後之著作 , 韓 刻本續 有新收 0 今據嚴本凡 0 例 潛溪 集在 徐刻 有 元 時 作 百 四 均 不

題 韓刻又有二百十四 題 , 共三百五十七題 ,皆采自潛溪集也

叉按四 庫提要:宋學士全集三十六卷,又有宋景濂未! 雷禮刋宋學士全集序謂 刻集二卷 , 謂 濂集重刻於嘉靖 中 行 世

久

此

亦

指

,韓刻言

0

舊 先 以己見集者 生 舊 一有朝京 稿 今知 凝道記 浦 江 事 , 潛溪翰苑鑾坡芝園 韓叔陽萃爲一編,共三十六卷, 集, 龍門子 九百六十七篇 浦陽人物記 然各集出 題日宋學士全

時

故

集 (見嚴本卷首韓刻原序)

陽 嚴 書名卷數皆與提要相 氏 人物記二卷韓刻 凡 例 叉 謂 龍門子 作 , 凝道記 :評浦! 同 , 陽 可證 人物 三卷 四 , , 庫所 作 諸 刻皆. 收卽是韓刻本也 卷 無之, , 則適符三十六卷之數 或嘉靖 0 韓刻原本有此三卷 惟嚴本稱韓刻僅三十二卷 0 姑 識所 疑於此 , 則合爲三十 不 卷 知 何 故 而 浦

之, 刻矣 凡三十 兀 惟提要謂 庫 所 七 收 未 篇 刻集 未刻共三十八篇 嚴 本 • 乃 凡 例 康熙三年金壇 謂 細 校之韓刻 檢 其 分中二十· 蔣虎臣 -·七篇 得文徵明家藏 篇皆今本所已 已見於徐刻 本於景濂 載 十篇已見於韓 其餘二十七篇則實 裔 孫既庭 刻 , 授金華 則 並 屬 陳 無所 佚 國 文 珍 刻 未

與 嚴 本 凡 例 所 言 差 篇 0 惟 四 庫 館 臣 實 未 見徐 刻 故 謂 一十七篇 實 爲 佚 文矣

嚴 序 |文謂| 景濂文生 前 未有 雕 本 , 初 刻於正統 德張 氏 , 此 亦誤 0 洪武 十四年 - 鄭楷: 作 行 狀

謂

先 生所著文 , 有 潛 溪集 四 + 卷 , 蘿山 集 五. 卷 , 龍門子三卷 , 浦 陽 人物記 二卷 , 傅

者

此 景 濂 在 元 時 作 早有 刻 (本行: 世 0 正 德 本張 序 謂

其 時 集久 杭 本八帙頗多 且 漸 湮 9 雖 , 而 有 潛溪前 爲人率妄去取 後 集文粹出於鄭氏 , 猶未刻: 也 所輯 0 初公存日 , 及蜀 本 , 手定八編 衢 本 外 國 , 本 凡若 , 皆 干 略 首 而 未完 , 以 細 近 眼

方 格 命子璲繕錄精 整 , 首簡猶 公手筆 0 其 本予 購得之。 因按 本翻 錄 入刻

卒 西曆 嚴本卷首及金華叢書本附錄所載 紀元一三一〇)至順帝至正十九年己亥(一三五九) 其 在 元時 己負文學重望 一。當時 摘錄 所刻 一二略論 各集 , **棄觀** 先後諸家之序 始至建 康 , 見 明 亦 祖 可 以 年 徵 已 五十 人心 , 至七十二 覘 世 變 二而 0

如

次

0

陳 派 旅 之 序· 有 曰

就

則

IE

德張刻之八編,

乃經潛溪手定,

而其先未有刻本

O

今按:景濂生於元武宗至大三年庚

戌

茲

文不 山 觀 可 0 無淵 我國家混 源 西 以來 京 而 下 光嶽之氣不分 睢 唐 代為 盛 <del>非</del>婚 中 統至元間 不 論 , 以 姚鉉所聚唐文觀之, 豪傑之士布列詞垣 獨韓 固 難以

卿 數 而 天曆: 已 。二公之所指授 以 來 , 海 內之所宗者 , 其必有異於庸常哉 , 惟 雍 虞 公伯 生 0 設以韓愈氏方之二公,則濂 , 豫章揭公曼碩 , 及 金華柳公道傳 當在李翺 , 黄 皇 公晉 甫 湜

又

文

之列 也也

字 鄭 羣 社 此 遽屋 初爲 渙序 雄 序 割 不 在至正· 知年I 據 人知 , 當時士大夫似未夢想及之, 四 月 , 故陳氏F 海 十六年, , 鼎沸 以下引王緯序在至正十五年正月推之,陳序當約略同時 乃以 而 而陳氏方以爲元之文章可 唐之翱湜擬之。 云昔陳公爲序 亦可 ,又曰 恠 然是年韓林兒 也 以 嗣是有作 軼宋跨唐而 稱 帝 , 當爲後集以 駸 明 駸乎媲美於西漢 祖 亦渡 傳 江 , 所序蓋 而 , 亦 南 可 證 潛溪 明 。不二十年 年後 0 前 其 分時 取 集 景濂 也 金 婈 , 元 0

復 有 歐陽 元 序 , 謂

於古 文龐以 代 , 丽 日 0 蔚 下 富月繁,意將超 南渡以還 , 元貞大德之文暢 文章 唯西京爲盛 , 其衰又益: **)唐宋|** 甚 而 而 0 逮及東都 腴 矣 至西 , 0 京 我元 至大延祐之文麗 矣 龍 0 興 其氣寖衰 , 以 渾 而貞 厚之氣變之, 。至李唐復盛 , 泰定天曆之文瞻而 而至文生焉 。不有天下百年 0 雄 中 0 統 , 始 至 涵 元之 漸 育 旣 復

其言尤見誇滿 自喜之情 0 又有劉基 序 謂

漢唐宋之盛 氣 宜其精粹卓拔不可及也 則 有賈馬 湯班李 杜韓柳歐蘇曾王諸公 國家混一七八十年 名儒鉅公接武而出 是皆生於四海 統時 , 其可以 挹 進配古人 光嶽之全

者 固 不 爲少 0 然而 老成 凋 喪之後 , 盛 極 則 衰 , 理 固 然耳 0 今得宋君景 濂 潛 溪 集觀之 然

後知造物之不喪斯文,而光嶽之氣猶有所鍾也。

知當 矣 0 此 恃 於歐劉之序 士 大夫 , 方以元之一 而 可 見 0 劉序 統與漢唐宋爭盛 今不 收於誠意伯 , 至於其 集 , 蓋入明 (為胡 虜 後諱 入 主 而 , 棄之也 非 我族 類 則 似 渾

又有孔克仁一序,謂:

亦 公品題之重 華宋景 謂 辭 韻 濂先 風 裁 , 生 可 , 謂 類 , E無餘蘊<sup>2</sup> 夫柳 鄉先生柳公道傳 黄二公。 矣。 先 廬陵歐陽 生來金陵 稱 其 (雄渾 公元亦謂 , 氣老志堅而文益 可 愛 , 黄公晉卿許 神思氣韻 多, 飄逸 其 乃命 溫 而 雅 沈 余序其後 雄 俊 逸 0 先 生之文 莆 集 田 陳 0 顧 公 衆 經 余不 仲 四

敏。敢縱言論以齒四公之末哉**?** 

景 之興亡 亦 皆 中 必 若 尙 濂 已 元 身仕 無事 在 人 至 至正十一 建 也 與民族夷夏之判 然 康 新 朝 見 是皆敵國之臣 故 九 明 年以後 祖 下筆 而 其 , 爲文 心 在 中 至正十九年己亥(二三五 龍飛 筆下 , 亦 轉 而 曾不 虎躍 瞬 不 其言文章 見有其蹤 則亡國之大夫也 <del>·</del> 及 , 此 何時乎 , 則又僅 豊 跡 不 0 可 孔 , 九 而 氏 恠之甚乎? 知 0 此 乃當 有元之傳統而 下此 時士大夫集居金陵 序之所鄭重稱 時金陵諸 八年而 元亡 儒 已 崇 若 0 不知新朝 , 孔 自 僅 , 所謂: 知有 氏 謂 〈序景〉 不 將興 文章 敢 從 齒其 龍 濂之潛溪 郊運 , 宋之四 抑 不 者 且 知 此 有 後 , 其心 諸 公 集 國 儒

又有趙汸一序,謂:

間 名 終 潛 世 溪 宋公以 者哉? 莫善於文獻 前 集 凡 書來 十卷 **衆仲嘗學於虞公,而景濂父黃公之徒也。 二公之所指授** 黄公。 俾法 冠 以 序其意 景濂父生呂公之鄉 陳 公衆 仲 0 序 迺爲序曰: 浦 陽 , 義 尙 而久游於黃公之門, 塾 論浙東君子, 旣 刻 而 傳之 0 必以東萊呂公爲歸 後集筆 別集之行,豈徒 , 稿 信乎有異於他門 日 新 而 欲 卷 以 帙 百 文辭 餘 未 年 有

哉 。

及之。 列 楚望 在目 當 東學術文章之傳 朝 時 前 諸 詩 , 集小 彼 儒 以治春秋名, 且 輩之意態 爲 |諸儒| 傳 景濂 稱 文作序 己 , , 身仕新 楚藩睦 如緯之序其前集, , 究不, 洪武二年召修元史,不願仕 , 辭旨似 ·知將 朝 樑敍元遺民堅守臣節與伯 , 縱 置其親身所在之新朝 不 不 然 出 ,亦已 及此序之盛推浙東君子自東萊呂公以來是也 兩 途 О 在其號令統治之下,親爲其疆域之子民 則誇元之文統 而 於何地 乞還, 顔子 中 同 後人奉以爲明代儒 ,事之可恠有如是 傳 , 如此 , 則 其 序言虞公黄公是 人 可 知 林第 0 趙汸 。世運 一人 師 也 , 而 事 0 0 天 更無 惟 九 江 變 則 .黄 溯 , 迫 浙

又有王晉一序,謂:

集二十 然者 愼 潛 許 溪 續 町 0 卷 集十二 方在宋時 獨稱先: 門人既刻梓以傳 卷 , 金華宋先生景濂之所著也 , 言文章大家者 生之才具衆長 , 而 , 識邁千 先生復以續 廬陵歐陽文忠公,南豐曾文定公,臨川王文公,皆相望 古 0 今年夏 集俾予爲之序 近時大江 , 得識先生於金陵 以 南 。予誦先生之文, 人焉 0 誠 可 0 謂 承旨 知 不能 歐陽 言 0 潛 公 不爲之嘅 溪 於 前 後

源之所

自

又俾夫末學者得

續未絕之緒於將來

,

則先生之文之所沾被者亦既廣

矣

。至於盛

極

而

衰

,

亦其

理也。

今幸獲與先生邂逅數千里外,

讀先生之文,

旣

知道

依

承

0

豊 昔 者

如彼其

盛

,

而今遽若是寥寥哉!古稱文章與時高下

,

抑道之興

廢

繋乎

臨

沠

危公素

,

亦皆以

文章著

稱西河

江

, 亦

不云乏人矣

О

夫何

喪

來

淪

籍

殆

後學

在

數郡

間

,

何

其

盛

也

0

元興

若廣平程公鉅夫,青城虞公集

,豫章

揭公傒斯

,

淸

江

范

公

於當 王晉自 抑 前之世亂 此序乃 稱 且. 序乃爲潛溪續 尤 前 有進者 鄕 以喪 而 貢 進 道將 士 ,上引 亂 集作 廢者 以來 出 身雖 陳旅歐陽 四 , [字致其] 幾已情見乎辭 雖不能定其年月 微 , (骶) 要之言必稱 元劉基諸序 , 又謂 矣 , 本 ,皆自著其在元之官銜職名 道之興廢繫乎時之治亂,言下之意,若 然其距元室覆亡之期必愈近 朝 , 而其 本 朝 則 胡 元 也 0 彼輩 0 , 而 新朝 之重 趙汸 龍 自 視 稱 昭 不勝其嗟惜 興之象必 歙 諸

生

諸 在 儒之短 朝 化 定 其 更可 者 視 「無二致 異 也 者 , 元 , 社 則何其於亡元之崇重 既屋 元鼎 旣 移 , 而 , 當 而 於興明之輕蔑 時 土 大夫之殷頑 0 心 而 情 且其亡 則 依 其亡, 然 如昔 繋於 0 楊 <sup>八</sup>苞桑 維 楨 序 則 景 又何 乃與 濂 翰

苑 集 有曰 客有: 持 子宋子 潛 溪諸 集 來 者 日 某帙 宋 子三十年 Ш 【林之文· 也 某帙 宋子 近 著 館 閣

文也

其氣貌聲音隨

以 其 願 治

晦之地

不

·同者

吾子當有以

評之。

維楨

日

昔之隱諸

山

林

者

奕

乎其 心印 虎豹煙霞也。今之顯諸館閣者,燦乎其鳳凰日星也,果有隱顯易地之殊哉!三十年之 萬萬 口之定價,於斯見矣,客何以山林館閣歧宋子之文而求之哉?客韙吾言,

言爲宋子潛溪新集序

之, 若厭 滌 大 所宗 此 植作傳, 大夫所 序 , 不罪 天地清平,諸儒視之若膜外。所不忘情者,乃景濂一 作於洪武三年庚戌 胡元入主,其屠殺之兇殘慘烈, 此爲何等胸 知 彼固 也 , 而 o 明史褒然列維楨於文苑傳之首 舊朝 以老客婦自況 已覆 懷 何等意態乎?維楨爲明祖敦迫, 。自今言之,明室之興,乃吾中華自唐、虞、三代以來,衣冠文物傳統之 , 新朝已興,在當時士大夫心中 ,則毋寧以列名元史歸案元儒爲得其素懷矣 其統治之昏愚淫暴,縱皆不論 , 全祖望則歸之宋元學案艮齋學案中,新元史亦爲維 , 至金陵 人之隱顯,又且揚 亦似乎茫然不知,漠然無動 , 作老客婦謠見意 , 夷夏大防 山林而 縱謂: 抑館 明 閣 非 0 祖 乾 當 笑 , 若 坤 時 而 洗

足矣 **父志** 臣 日 實不可 吾得至此 余又讀 萬 終 ·可謂 勿仕 身勿 傅 維 仕 不寬· o , 鱗明書 克恭之所謂 豈非天哉 於明 大 廷 , 而當時· 滕克恭傳 0 嗚呼 。人民非故 人民非故 士大夫之忘其爲華裔 ! 可謂志節 , 克恭避地 , , 天地自. 謂其非復爲大元之子民 皎然矣。抑 錢塘 如 , , 足以老矣。壽百餘歲終於家,謂 與楊廉夫相友善,及明兵定河 ,僅知曾食元祿 ,未聞明廷之加以罪責與強迫也。是明 也 О 彼能踰百歲以壽終 ,亦可見世風士行之一斑矣 南 以其子禮 歸 其 子 祖 故 日 之待元 里 能 耕 歎

又有揭汯一序,謂:

- 86 -

功銘 耶 ? 代之興 余聞景濂之名 德之作 有 。若景濂平日之所著 代之制 , 蓋二十 作 0 年矣 以景 濂之雄文與學 , 0 近始 則 有 會於 前後 續別 金陵 四 丽 , 然此 集 不 獲 , 類 特 已 盛行於世 所 庸 觀新集者 於 前 朝 , , 及流傳: 豈非 而 已 天之所 於海外 皆應 制 代 實 學者 有 紀 在

又當兼取而博觀之。

著 元祚 佐 武六年卒 此 此 集之首頁,又不特 命大臣 序 , , 前 已 與 所 楊 謂 盡 後 續 新 0 氏意見無異 , , 然觀此 而 何 別 集 序末自领 以 辺 , \必求勝F 集 卽 序 注 翰 , 指潛溪: 苑集 稱 一元字 0 中 汯傒 國遺老爲其翰苑代言之集作序 則

法實

赴 順 , 斯子 集, 故謂 大夫秘書少監 , 豈亦所謂 作在1 其皆應制代言紀功銘德之作 金陵也。 , 新元 元 史有 時 不 要之法之與 知有漢乎? ,此乃仕元之官階 , 卽 傳 楊 o 序 謂 所謂 明 維植 兵入燕 , 其意亦良可 山林之文也 , 皆爲無意屈 ,凡仕 , 此 何以書 卽 楊序 恠 者 , 法之所重 於新朝 例 0 所謂館 又汯 (徙南 節於明廷者 翊 序 京 運 明 閣之文也 , 大臣 汯 其意: 稱 前 稱 0 景濂 翰 疾不 亦 朝 苑 在 平 彼 代 則 乃 往 日 新 不 其 洪 在 所 時 朝

又有貝瓊一序,曰·

其居 而 翰 文公爲之序 林 青蘿山 :侍講學· 元 初 士 所 金華 作者 而 姚文公以許氏之學振於北 翰 苑 日 宋公景濂 潛溪集 集復萃記 0 自少以· 其 序 在 碑 銘 朝 所作 文雄 傳 雜 方 說 者 時 日 釐 下至天曆至正問 翰苑集 爲 , 人不 前 後 遠數千 續 0 潛 别 四 溪集凡若干卷 集 里求之, , 云 又有蜀 学 殆 嘗 虞文靖公金華黄 讀 徧 , 故 於 而 好之 翰 中 林 國 承 四 乃 旨 夷 撫 矣 歐 文 陽

公屬 獻公 凡大 制 重熙 , 亦若: 作 累治 大號 韓子之在唐 令 , 所 , 修飾潤 以 黼 黻 , 歐陽子之在宋矣 色 軼三五,豈不爲難乎? 代之盛 , 莫不: 曲 者爲易 虚其 體 0 0 或 今國家肇 0 朝龍 實 與 虞 興 走之時 , 公以布衣登侍從之選 黄二公相後先已 , 將昭 武 认 功 而 雖 宣 文德 然 歷 , 干 虞 , 以 餘 黄二 年 新 几

以

芝園 清江 必謂景流 謂 景 朝 必 元 固 序 心 連 其堪 故字 濂 所 非 史 重 瓊之自 月 述 翰 集 蘊 已 , 刋 瓊 其爲 濂之所 方之觀 與 及 苑集凡三 成 前 (唐韓宋) 其 不 又列 自 風 0 有所 潛 序 稱亡 署 身仕 氣 有 、貝序 三溪集 聽 成 官 其 , , 就 歐陽 若 序 抑 則 元 職 不 明 , 使 廷 揚 宜 可 瓊之所謂 勝 , , , 此 知 尙 而又必引亡元歐陽玄之言以爲重 末 與楊揭二氏之措辭有 相 國 掩 也 , 有所 稱洪 序 大 不署 何爲 比 者 , 0 (明之超 抑 最 此又何耶? 0 0 不及於 武八年 拈此 在 且. 將 而 不 書官 後 揭 以 復以景濂爲能與亡元虞黃相: 不 法之序 新 知 小 , 作於洪 、虞黄 孰爲 階 歲 節 四 序新 方 在 , 豈亦 之觀 其朔 乙卯多十 可 0 , 直書中四 武 槪 試問立言之體當 不同 朝大臣之集 有所 聽 八 推其餘 0 年 然果先署官名 , , 乃誦: 使 有 避 順大夫秘書少監豫章揭法 0 時 矣 忌 知大明之超軼三五 其文, 月既望 乎? 新 0 , 0 正德· 朝 於歐陽玄則又必詳其仕元之官名 而 後先 蓋 必溯 已 如此乎?蓋當時文人崇重亡元 本前 仍有可 確 此 疑後 將佐 其淵 乃 立 若足爲景濂增無上之光榮 列三序 , 士郎 時 恠者 抑 人不爲之削去 源於亡元 代之風 且. , 豈不爲難者 國 瓊 , 0 爲楊 其爲翰 子 亦 , 而 助教 氣 仕 維楨! 論 貝瓊之序 焉 苑集作 携 亦 元之文人 0 曾從 則 揭 李 乃是 負 汯 時 瓊 之初 貝瓊 序 景 瓊 代 又僅 定實情 則 輕 序 人之內 濂 纂修 蔑 則 稿 僅 而 何

新

日

獝

必

在

未署官職 也 。清江集序後 ,不署名籍年月 明是削· 去

貝瓊清江集中又有青 蘿山 房歌 , 應在 文集序之前 0 歌 有 引 謂

公擅 代之文章 , 所著多行於世 , 而 i 貯 於 山 [房者 必有光氣燭天 與 山之寶玉同 不泯

#### 其 歌 白 :

廷一 之意 是亦忽視其所以翊贊新朝者 輩從龍之士視之,殆亦只認其爲乃是一時天意之忽然喜新而厭故 義與價 山 人紫府神 值可言矣 仙 客,身今六十頤 ,而獨致拳拳於其以前青蘿山之隱居生活 尚黑 ° — 朝寘之白玉堂 , 青蘿寂寂 則明之代元而 寒無光 一若乍陰乍晴 起 無甚

當

時

明

在

劉基又有宋景濂學士文集序 一篇 , 大意謂

思飄逸 此 獨 至百餘卷 太史公宋濂先生 國大司徒歐陽文公元贊公之文曰 朝貢京師 存 嗚呼!文公之言,至矣盡矣 其態度多變 如列子御風 皆問· 雖入梓者已久,其門人劉剛復請基擷其精深 安否 ,海內求文者項背相望 , 如晴 , 且. 飄然褰舉 躋終南 以 重價購其潛溪集以歸 設使 衆騶 其氣 不沾 塵土 基 韻 前 , 碑 有 陳 沉 版之鐫 雄 所 , 0 品 應接不 其 如 詞 評 至有重刻以爲楷式者。先生之著述 淮陰 調 暇 照 其能 清 出 耀乎四 雅 , 別 0 師 非才具衆 加毫末於是哉?今用備抄 , 成 如殷卣 方 百戦 編 0 高 長 周彝 百 0 勝 麗 且徵言序之。昔者楚 識 日 志不 本安南之使 邁千 龍紋漫滅 少懾 古, 安能 其 冠於 古意 神 每 與

而 並 繫先生出處之大略 使讀 者有所 考焉

,

文粹後識

云

此

序 據 鄭 來 刻行 右翰 濟 , 世 所著芝園 林學士承旨潛溪 所 者 爲 文粹 , 潛溪集四 後 集 識 尙 實當 一十卷 文粹一十卷, 未分卷 稱 蘿 潛 0 在禁林 溪宋先 Ш 集五 青田 卷 時 生文粹 劉公伯溫丈之所選定也。 , , 龍 見諸語 門子三卷 鄭濟 辭 翰 , 0 多係大著作 其未 刻者 先生平日著述 0 翰 苑 竊意劉 集 四 丈選之或 十 頗 卷 多 歸 , 其 有 田 以 所

是則 釋道 亡, 氏 楨 大 者 矣 其 五 卷 (言之謙) 所 此 可 , 0 處新 序 景 蓋 慨 可 , 在當 '得爲後: 三十年 濂 遺 歎 元 同 集刻版傳 朝 稱三教 僅引亡元歐陽玄之舊序 儒 抑耶?抑 , 而 尙 時 懾 又無可 而 . 俟來者 初未 生 山 稱 於異族治權之積威 成林之文 繼 勝 , 世 如何 國 起之所 固 且 刋 行 續 者 已經 劉序稱昔者楚國大司 編以 之事 **豈宜用昔者二字乎?** , , 0 只是其 而 仰 無限之酸辛與夫不斷之奮鬪 而劉基所選之文粹十卷 附 此後館閣之文, 望 其後 雖宋劉之賢 而 潛 慕 , , 其處身若孱冤之藏草叢 效 溪集 而謂其言 前後 以 徒歐陽文公, 爲道德文章 則 至矣 修辭 續 於此有不免 如鄭齊 別 四 盡 立 , 又只就已刻潛溪集中 十卷 其 矣 誠 所 傳 , , 設 謂 舉其官諡 , 統之所繫 , 而 觀乎劉 或有 而今四部叢 使 論史者亦無所用其深責 , 乃於世道民瘼之外 基有 彼已能逃脫於九儒 所 遺 氏之辭 所 , , 品評 而僅 此乃文化絕 ,未經選錄 刋 選出 所影印 曰 I 昔者 其能 斯可 0 其所 之正 , 以微 加毫 也 續 十丐之賤 則豈 始別 也 0 選亦 德本 線之存 尤 窺其 末於是哉 有 可 不知元之已 內 只 八 異 所 者 是 編 謂 而 心 七 固 人物 上 劉 + 何 是

越後乃有方孝儒續文粹序,其辭曰:

集選定 典 方氏 重 而 一於景濂 景 , 此 叉 而 濂 公文, 可 序 與公同 先王之典 賓禮之。及海 之徒不能 日 者 萬里之外 使 入 朝之所由 名之功 者 明 中 曾同預 嗚 天下 以 又傳爲 國之美永傳 而 呼! 後所 則 門友浦 知也 , 惟 ·陰受其 繕寫 不能 興 , , 多講 **蠻夷異類皆知尊慕之,** 斯文也 衆 謂 景濂之文耳 金華樓璉作 陽鄭楷 記盡得其 記 而 內平定,上方稽古以新一代之耳目 人知之。 。當元之衰, 館 0 惟 行之, 利 閣 追 無極者 之作 此 維德業之盛以 ,公之所爲 而 序收 意 叔度等, 不 難名之功 見其 而太史公實與其事 , , , , 乃亦 始有傳 皇明文衡疑爲方爲樓代筆 且. 亦於方氏之文始見其語 於遜志齋 國朝之始興 功 不 取自仕 能 不 , , 歌詠 雖可: 盡 則 刻 知景濂於世道之有功 君子 使中國之美 觀 知方 集 , 以傳世 而新 國 也 太平之治於無窮 , 也 知之。 氏之所 朝以 決爲方氏手筆· o , 朝 以爲公昔無恙時 。先後二十年, 太祖 來所作 稽古 , 至於不見其功 , 重於景 而不足以盡公之爲人也 傳於無極 , 高皇帝定都 0 正彝: 然方氏又謂公之爲文, 0 ,復選錄爲十 彝倫衣冠禮樂學校 一無疑 濂 據鄭濟文粹後識 ,太史公之功, 倫 者 方氏始爲之揭發 修身於戶庭之間 。此序作於明 , 復衣冠 金陵 嘗擇舊文爲文粹 其功蓋大矣。 而天下陰受其利 乃始大異於 卷, , 獨能聘致太史金華 制禮 庶幾可· 名曰續文粹以 0 , 則 往 太祖 後有賢者 竊嘗歎天下 樂 方 然此 時 不足以 所 以 白於後 而 謂 與樓當文粹前 死 , 姓字播 傳 立 後 亦 而 講 一學校 此 或 矣 盡公之爲 行 往 , 世 考 傳 非 非 蓋 肼 先 於學 乎? 論 聖賢 於千 公而 知愛 之所 王之 至 因 凡 是 復 國

儒 儒 景濂 生時 之於朋儕友好之間乎?要之一時之世態 爲第一人。全謝山宋元學案以景濂與歐陽玄同隸 之行列。黄全二氏之安排品評, 者 之所自己 , , 黄 及景濂返 (氏謂是 負 而 金華 無所 逆 知 歟 師承,得之遺經 ,正學復從之, 0 或 惟 景濂之門 或亦 先後i 也。 不 , 人弟子 而景濂 凡六歲 可 固可 謂之不允愜 於此 始有 北 乃不獲列名於明儒 0 號爲盡 山 而 微窺 四先生 以 微 , 博其學 矣 窺 而 學案。方正學二十遊京 其 0 其意深微矣 師之用 黄梨洲明 0 學案中 然黃氏學案列正學於諸 心 儒 , 學案師 而 , 必待全氏始以歸之元 景 濂 說 固 師 列 未 方正 敢 明 卽 學孝儒 儒 從 白 學 宣 諸 於

也 抑方 余又讀楊守陳重鋟劉誠意伯文集序, 7序措辭 ,亦僅頌揚中國之有新朝 乃曰 ,其於亡元 , 則 亦 止於爲弦外之音 而 己 尚未遽暢 厥

0

來未有力 嗟乎! 自 也 昔夷主華夏 高皇掃百年之胡俗 , 不過 羶 隅 復三代之華 , 腥 數 載 風 耳 0 惟 元 奄 四 海 而 垂 八 紀 , 極 上弊大亂

開

闢

以

又讀 葉式題誠意伯劉公集亦 日

0

,

昔之入主者 皇帝 廣 , 奄 洗 及百年 滌 乾坤 , 頗皆用夏貴儒 , , 爲中 不 知變革。 ·國皇王 當是時 一賢聖復 , 惟 元 也 不然。 讎 纘緒 , 薰蒸融液 此 , 其 所 爲穢 謂 功 , 高 無地非狄 , 萬古而 尤使人涕泗霑臆 莫與 , 若將不可復易者 同 者 0 其胎 禍 0 我 遠 太 而 祖 播 高

至是 四七〇) 上距明祖開國 而 華夷爲防之大 義 中 (一三六八) 國 歷史之正論 亦已七十餘歲 乃始重見於文人之筆端 , 而葉文在嘉靖七年(一五二八) 然守陳之文,已在成 則在明 化 開國 年

自

警

則

所

著文詞

有當

傳不當傳者

,

亦何

敢盡公天下

自

1胎驗脆

0

其藏諸名山者或有之

後 在 百六十章 時 初 載矣 無此 想 0 時移世易, 抑或將增 後人不識前人之心情 其汗慚不安之私焉 , 亦 , 若必以驅除韃胡爲宋劉諸人之功績 未 可 知 也 , 恐宋劉

下之号之。二帝目刀革。(n)乡伦忍,等召之下之则亳川马

下迄清代,上論明初事,更多恍惚。蔣超之序未刻集則曰:

**豈兵燹之餘,此書散失,不則有所忌諱,不敢禦木耶** 

# 張治之序亦曰:

禁網 嚴密 , 舉朝動色 相 戒 ,雖君臣 相得 , 莫如宋文憲公,而深沉 不 洩 , 題溫 樹以

# 四庫提要則曰:

推究當日之意 , 或以 元代功臣諸頌及誌銘諸篇作於前朝 ,至明不免有所諱 0 或以尊崇二氏

不免過當,嫌於耽溺異學而隱之。

之, 其頌 其實 謂 周之弱 中 從漢· (景濂: 則 銘元代 國史上 實 。奈何 高 遠超於漢高光武 入明以 功臣 (者無不稱秦之暴,從光武 得天下之正 明 初 諸 後所謂館閣之作 從龍 篇 , 方廣極 諸臣 , 莫過於明 唐祖宋祖之於其諸臣之上矣 . 乃 獨 流 不 布 ,在其生前並未刋布 然 祖 , 謂 者無不言莽之詐 ٥ , 其遠 又每 其有所忌諱 謂 避若惟恐浼 明 祖 御 而 諸 隱 0 , , 我者: 從唐 而 明 藏 儒嚴烈太過 在元時 祖 不 姑 祖者無不斥隋之淫 敢 日 不 出 | 者 論 所作所謂山林之文則流傳 我爲天下 , 皆推想了 而明 是亦有不盡然者 祖之優 屈 四先 不實之辭耳 ,從宋祖 生 禮 於宋 何 者 其言之坦 劉 無不 平 近 極 葉 章 心 儒 廣 諸 薄 又

然也 字 位 之所 乃 素 祖 自 然 然 以自 立 日 雖 始 若文章道 心 身 狹 慚 , 0 , , [保者 有 則 亦 在 今宋劉皆有文集傳世 蘊 於往日之文章 中之終於諸 而 , 0 , 意氣 以 爲例 宋劉 而 此 未 可 , '徵其陰影之難掩 自完 彼 固 聞 四 尤顯 術 乃不冤歸之於政 不 而 爲之大臣 不 有 傳統 ·專爲 免日 人者 所禁抑 心 , 儒 然 所崇重 0 有不釋 議論 逮於稍後 縮 避 所 而 , 於心乃若 禍 寄 民 , , , 乃以爲 依 則豈得謂明 生 白覺 雖渥厚之已 , 荊 矣 戀 乃胥在焉 而 。是亦諸 , 有所 者 轉 試觀其所 府在上寬厚之德意 病 , 眞有 以 事變漸定 斯文所 , 敎 召禍也 時或不免於在彼 不 屈 安 至, 化 儒自有以助 初禁網之密 , 並 興 指斥於前 在 0 , 則惟 蓋元之儒 衰 m 0 , 可 , 事 即道: 蓋當諸臣 以 猶時 , **旋美唐** 或 態 有 漸顯 未能以 成之 。天下 求退遠避之一途 統 時 朝者究何在 0 所 者 推尊勝國 , 蓋明 寄 宋 初從明祖 , , 心迹與 , 居 雖亂 斯道 元帝遠遁沙漠 , , 紅之起 固不得專以罪 於異 在 而 朝 自 時 , , , 世 (族統) 旣 而 而 在 時 負 , 1運相 , 三其頌揚的 懷想 彼諸儒 野 尚在洪武 流露於文字 0 , 其內、 則明 夷夏之防 治 , 衝 七八十年淫 雖亦學業文章有以 , , 突 明祖之雄猜 ·若情? 心亦 初 明之基業日 前朝之辭 , , 固 建號正位之前 諸臣之情 不能 [未能憬 此 所 , , 有 可 則 不 威之下 知 細 能 不 所 , 然豁 讀當 0 其 在當 切 固 以草澤叛逆 不 己 (未忘: 知 隱 而 , 0 諸 自 然於其 時諸 , 遁 明 則 時 0 ?轉視: 守 心志 其功 無性 於胸 儒 祖之於危 而 , 其 , 品 心 行 業名 區 不 中 若 內 乎 懷 自 所 死 以 所 心 明 , 固 0 恧

其 、過崇二氏之心乎?全謝山宋文憲公畫像記 提要所謂 或以尊崇二氏過當 而 隱之,則 謂 尤 不然 0 卽 正 一德刋本爲景濂所手定者 何嘗· 有 意 隱

遠遜之。 婆中之學至白雲,而所求於道者疑若稍淺 **婺中學統之一** 變也 0 義烏諸公師之,遂成文章之士 ,漸流於章句訓詁 , , 未有深造自得之語 則再變也 0 至公而 漸 , 視仁山 流 於佞

佛者流,則三變也。

蓋景 矣。 多有頌揚過溢之辭,至於事久論定如黃全兩學案之所品評,則又已在易代之後矣 不 寄聲先遣雙飛鳧。又景濂辭元辟命將入仙華山爲道士 風 ·如唐 氣 濂 此二人當日之心志也 初非知有民族大義 誠亦文章之士,又篤好二氏 寬宏仁厚不如宋 ,從龍諸賢亦與有責 0 ,可憑以 適逢 明 自守 祖 ,伯溫則以文章兼權術。二人者,皆漸染浸溺於元治下之時 龍 而 興 , 自 奮 因緣時會 0 0 後儒繼起 基有潛溪圖歌爲景濂賦 , , 殆非其夙所抱負 基作歌速其行 , 盛推祖宗開國之光榮 , 0 , 曰 而 謂先生行 明之開 :何時上疏乞骸骨 , 乃於宋劉 國 , 吾亦從此 局 度恢 皇 代 往

爲未刻集作序者尚有吳偉業,謂

吳氏 此 序 韓本 尋 世 其自所 頗有誤 中晚出 惜乎 會 遭 謂 前 遇之後 采擷詳於勝國 0 潛溪 後續 前後續 蘿山集者 以改 集及蘿· 物 , 僅存元世之一二,附見各體之末,其爲陔華之無詞者多矣 爲 , 大都在元時未仕所作 嫌 山 ,微之而 集,當景濂 不顯 身後 , 使習讀者不備 ,始漸 , 年盛氣壯 隱晦 Ш , 必有 [林臺閣之體 非景濂以改 미 觀 • 物為 亦 因 可 得 嫌 悵 尙 也 微之 ( ) 竊 歟 論 其 0

使不可

顯也

景濂

遭

遇之後

, 館

閣

諸文

,

在其

生

前

轉不

如其

未仕

時

所作

Ш

林

諸

文之流

布

在

111

膾炙

人

口

身後所刊

,

亦僅續文粹十卷

,

至正德時

,

始有八編七十五卷之彙刻

,

則

正當

明之中

本否 謂 此 詞 俱 潛 也 溪前 ? 己 考 **黛能獲見彼邦舊** 據 訂 方 後 **と續集及** 如上 正 寧續 0 文粹序 景濂 蘿 Ш 未仕 刻 集 が均り 及嘉靖 , 所作收 取 已搜羅在 與 (徐韓 雷 禮序韓刻全集皆稱潛溪集曾傳 於韓刻者有二百 兩 內否,要之儻有遺逸 本對校 , 或可更有所發現 -四 題 , , 數量亦 兼之徐 2刻於1 0 不 刻 姑誌於此 ·甚大, 日 , 共三 本 , 非 百 不 , 以待 有所謂 知彼 五. 十七 訪 邦 題 多陔 求 頃 尙 , 華之無 不 保 知 有 所

## 偉業又曰

及韶 俟賢 之爲名世宗工 遂以文章冠天下 善 浙 水東文獻 , (哲起) 卿之門 賡 和於殘 而昌大之, , , , 而 出 婺 Ш 稱 剩 而 0 際會眞 緯 不 水之閒 極 其功焉可 知淵源於宋之逸老 國 盛 典 矣 人 , , 0 司 自 學者多從指授爲文詞 , 帝制 1元移宋] 經 誣 綸 也 黼 , 擅 鼎 黻 制 0 , , 嗚呼 光輔 作之柄 浦 江 ! 们 代稽古右文之治,幾欲 不 , ,若侍講黃公, 華隱者方鳳韶 有山 景濂親受業於三公,承傳遠 澤臞 , 孰爲維 聊與 待制 謝翔阜羽 斯文 柳公, **於**臍之成 , 如帶之緒 Ш 周 而 長吳公,否 9 吳思 家法嚴 , 世皆

以

慕

## 叉曰

授受 貫 元一 以 天下, 集其大 , 並 時 休養 成 Ш 踙 人物七 不 海 可 澨 謂 , 文章理學之懿 八十 非所值之幸也 车 , 號爲 安阜 , 鬱乎 ·富庶 隆 龎 , 故能 0 景濂! 容羣儒 鍾 光嶽之全氣 恬 寢 食而: 甘 , 而 圖 取 書 材 , 落實 以 遺 經 , 兼 轉 條 相

吳氏此文, 實亦自具錯縱複雜之心情 。彼既失身清廷 豈亦欲留其殘生以爲山澤之臞 以 維 斯 文

粗指方嚮

而

0

內容未暇細及

。姑摘錄集中

一篇稍加

申述

,以畢吾文。

消息 夏交迭,政俗民生,與夫士大夫一 如帶之緒耶 , 今綜觀景濂集 豈不 尋其影響, ·亦容羣 。彼幸景濂之所值,謂元一天下,休養人物七八十年, 斯誠治史者所當注意,本文則僅就景濂集前後各刻 儒恬寢食而甘圖書以遺經相授受乎?吳氏 , 以一人之寫作,而 時心情之激盪 五十年桑海之變,山 ,以及學術風尚之轉移 【僅亦 林館閣兼而 文士 使景濂集其大成 , 撮舉各家序文, 有之。又值元明易代 , 處處可 宜其不足與語夫此 於景濂集中 則淸室之在 以爲治斯 ·探其 矣。 夷

## 贈梁建中序

者 出應時 孜孜 源 足,復來問文於余。 虎林梁君建中 而 者之所急,昔之聖賢初不暇於學文,措之於身心,見之於事業,秩然而不紊,粲然而 非 以 俊偉 , 其 卽 明 道爲 須 所謂 近道者則而效之,其害教者闢而絕之,俟心與理涵 日以學文爲事 此 文也 皆迫於勢之不能自已者爾 務 上焉者之事也。優柔於藝文之場 , 妙年嗜伊洛之學,而復有志於文辭。一時大夫士皆稱譽之,建中不 此 。其文之明 中焉者之事 余也, 0 且曰:古之文淡乎其無味 賦質凡庸 由其德之立,其德之立宏深而 也 。其閱書也 ,當何以爲建中告哉?雖然,竊嘗聞之師矣 , 有志弗強,行年六十, ,饜飫於今古之家 搜文而摘 我不可不加機艷焉 句 ,行與心一,然後筆之於書 其執筆也 正大 曾莫能望作者之戶庭 , , 搴英而咀 則其見於言 古之文純乎其 厭常而 華 務 新 遡 自 然光 文非學 ·自以爲 本 晝夜 間 而 可觀 無 明

景 景 影 印 濂 濂 之正德本 内 此 之於屐 文所謂 之。 心 以明道爲務 事 其紛紛 也 文 雖 老之將至 繡 而 有 然 , 自以 自以 非 見之 於庭 我 此 , 天地· 而 不 感 五十 , 雖深自 而 家之文也 爲 爲有得也。至三十時 可 藉 , 得見 ·以後非常 之間 其可乎哉?自此焚毀筆硯 列 不 而 七尺之軀 藉 嚴 ,蓋庶幾無余之失者。而 珠 加 也 同 刋 貝於道 I懲戒 時 中焉者斯可矣 馳 則删 , 0 勝焉 此 有全文焉,具之於五經 惟 。其視遷固 人則未能 悔之 去 無他 , ,時復一 參於三才, 0 佳 由 題記之辭曰 , , 則 是 輒 爲 有此同感也 大悔之 踐之。五十以後 誠 , ,頓覺用心之殊, 人之念宏,爲己之功不切也 , ,幾若大鵬之於鷦鷯耳 好 佳 奈何中焉者亦十百之中不三四見焉 勝之心 而 , 其去道益遠矣,此下焉者之事 與 余猶爲是強聒者,文之華靡 , 而 非 周 0 生 景濂 惟悔之, 公仲尼同 游心於沂泗之濱矣。今吾建中 ,人能於此 , 誇多之習熾 門人爲此文有 , 非惟 微悔之。及踰 輒 悔之, 恒 大恨之者 留 0 神焉 性 建中尚勉之哉,建中尚勉之哉 , 0 余自十· 務 乃溺於文辭 輒大愧之。 , 四十 題記 以 不作則已 決非 悅 , 其溺· 附 七 也 人 , 而淪 八時 漫爾 輒大悔之。 刻 0 嗚 非惟 惟 人 , , , 見於 應酬之辭 也甚易之故 孜 孜 綴 文, 流蕩忘返 於下焉者 呼 日 輒 作則爲天下之 愧之 ! 不 上 四 以 足 然如 部 焉 古 者 縱 輒 文辭 叢 , 又奚 思欲 然在 不 大 猩 吾 刋 也 如

恨

猩

爲

不

張

知

盡 太史公生平以 知之 縱 或知 文章 而尊之 |名天| 下 , 至其立心制 面 其該貫 典 行敦 籍 大和 窮 極 雅 經 史 揆法聖賢之道 蓄積 浩 穰 而 與 古 無媿者 人 争 長者 世固 未必 人 未 必

所

序 也 , 於其大者不之識 其論文如 此 , 則世之不足知公者宜 , 而謂足以知文章 也 , 0 豈果能得其精微之意 ? 今觀贈錢塘梁先生**建**中 彼後生晚學 未能執知 筆 , 輒 掎 撫 疵 病 以 議

足與之言文哉。

洪武二十三年春正月十日門人謹題

0

景濂 景濂 外 初 不謂明之崛興,乃貞下之起元 可 者 卒於洪武十三年,此題距 推 , 則一惟其文耳。其學已所不知 想 而 知也 0 此題記大旨 景濂 , , 與方孝孺續文粹序相近,或亦出方氏之手乎? 乃積晦之復明 卒又 一十年 , 其行更然, 0 可知時人之所稱揚崇重於景濂 丽 則又何論於世運之與治道?當時 抑若文治昌隆轉有虧焉 , 及其 , 此 (所摘 則 於題辭之言 世之人, 摭 疵 心病於

## 諭中原檄

又按皇明文衡卷一代言首篇爲景濂所撰之諭中原檄

,

此文不收於景濂集,

亦附錄於此

0

世 臣 祚 以 有 自 一之大防 |夫婦| 臣 冠 傾 古 一弑君 移 帝 履 長 倒 王 元以 置 臨御 幼之倫 0 天曆 之歎 其所 北 天下 爲 以 狄 0 自是以常 澶 亂 入主中 如彼 中國居內以制夷狄 甚 豊可 後 矣 國 , 至於弟接兄妻,子蒸父妾 0 • , 夫人君者 元之臣子 兀 爲訓於天下 海 內 外 , , , , 不遵 夷狄居外以奉中國 斯民之宗主 罔不 後世哉 証訓 臣 服 。及其後嗣沈荒 , 廢壞網 此豈人· 0 ,上下相習 朝廷者 常 力 ,未聞以夷狄治天下也 天下之根 實乃天授 恬 有如大德廢 ,失君臣之道 不爲怪 本 0 長立 然達人志 。其於父子君 禮義 又加 幼 者 0 泰定 自 以宰 士 御

祖 克 相 戰 逐 運 形 就 地 金陵 之間 之人 嚴肅 威 所 圖 生民之巨害,皆非華夏之主 院兢兢 验之地 儀 胡 主 胡 專 , 權 虜 驗之今日 生者 虜 以安之矣, 奄及南方 , , 0 深用 禽獸之名 慮民人未知 , 有能知禮 無秋毫之犯 , 在至 恢復 骨 處於朝秦暮楚之地 憲台報 ,今十有三年,西抵巴蜀, 肉 疚 正 心 中 不 , , + 信乎不不 華 恕, 相保 夷狄何得而治哉?爾民其體之。 盡爲我有 義 ,以爲美稱 。予恭天 0 , , 年 有 立 歸 反爲我讐, 願爲臣民者, 方 雖囚 謬 司 綱 我者永安於中華 申 毒 陳 成 0 。民稍安 (一三五六) 虐 當此之時 命 也 紀 人事所致,實天厭其德而棄之之時也 , , 誠可矜憫 假元號以 , 0 挈家北 予本淮右 於是· 罔敢自安, 救濟斯民 與 , 中 食稍 東連滄海 ,天運循環 人心 , 濟私 走 國之人撫養無異 。方今河洛關陝 背 至正二十七年丁未 布 足 0 離 , 今一 方欲 陷溺尤深 衣 , 我者自竄於塞外 叛 , 恃有<sup>2</sup> 兵稍 , , 紀于茲 南接閩: 因天下亂 如蒙古色 遣兵北逐羣虜 , 天下兵起 精 衆以要君 中原氣盛 。故先諭告 , 控弦執 越 , , 雖有數 未聞 目 , , 湖湘 (一三六七) 爲衆所推 , 0 , 0 使 蓋我中 阻 億兆之中,當降 矢 有濟世安民者 雖 , 我 雄 漢 兵 拯生民於塗炭,復漢官之 非華 , 兵 至 民 , 0 中 自視 污 據 , 古云 ·國之民 忘中 ·國之民 夏 險 , , 九月執張 族類 率 我 兩 , 淮徐邳 師 互相 7人勿避 中原之民 國祖宗之姓 胡虜 渡江 , 天必 徒使爾 死 然同 吞 生 士誠 室人 噬 無百 者 , 皆 予號 居 肝 命中 , 等戦 年之 久 入 金 反為 腦

版

無

地

國

陵

反

驅

淦

月徐達 明 常遇春等卽率 師 北 伐 此 年即爲元亡之年 明年爲洪武元年戊申(二三六八) 說者謂 檄

背 天必命 其 起 文云 敢 天授 也。於易代之際 下文云居金陵十有三年 分例 自 不 , 敵 居 自 何 我之勢 紀于茲 嗣稱 1渡江 此 中國之人以安之, 獨 非在 自 何也?至云:予恭天成命 天厭 起 明 當時無正 祖 , 算 , 至此 渡 , 卽 0 而 江有 僅 故疑 自 **猶若** 論 正式提出中國夷狄之大辨者,今可考見 明 養嚴 其 金陵之年起算,此決不然。 近句當作二紀于茲 祖 , 仍自 不 命 渡江 應作十二年始是 辭可 能 , 隱 濂 確切自信 未伸吾義 克金陵之年起算 陳 約 人也 謙 , , 實 始自居爲天降以安中國之聖人矣,然又曰:蓋我中國之民 讓 由 , , 。又曰:當降生聖人 量士仕 此乃七八十年來異族統治積威之餘,士大夫內心怯 不 , 0 欲明白以天降之聖自居。 乃自至正七年丁亥 要之此檄文乃作於洪武建號之前 , 明 至爲檄討北 且下文明云,率師渡江今十有三年 , 鮮能深明於夷夏之大義 ,惟此一文。然其於元之統治 , 方之年適 而 (一三四七), 未 聞 氣和辭 有濟世安民者 紀十二年 婉 , 又不深知民心之向 至是踰 , 從來檄 年 也 ,又若是 , 卽 0 十 然天 可 文, 元亡之年 退避不 年 知 , 殆少 既日 上 下兵 文 而

之。 几 丙子 日 今 運 設壇 告終 輿 按 (談遷 地 詔 鍾 日 周 , 帝命 廻二 國 Щ 之陽 自宋 榷 一萬 眞 至 運 地 人 正二十七年十二月甲子明 , 旣 惟 , 來自沙漠 終 帝 臣 祇之簡 下 天命 曰:生民 眞 在 , 百 人于沙漠 0 1有餘 如臣 無 主 年 可 , , 君 必 , 祖 今運 今運亦終云云 推 御新 , 祭日天澄氣 臣 帝 亦終 宮,祭告上帝皇祇 , 臣 , 天下 不敢 和 注曰: 紛爭 辭 0 臣若 , 亦 , 元詔首日 曰 : 不 不 惟 ·敢不告 可 帝賜臣 惟我中国 , 當 日上天眷 示異焉 0 上英賢 是用 國人 民之君 明 命 0 年 翌 逐勘 意稍 年正 Ė 定 月

後

有

此

現象

,

固

不

得責備

於景

墨

雖

食夫今之祿

, 而

視

軒冕猶泥

塗

0 然

Щ

本

·元進士

而

上

總戎詩則日

:大將軍

出

沙漠

萬

雖同乎今之人,

而

以

(聖賢)

矩

北

俶

錢

方之學者

0

洪武中

-雖未仕

,然其典邑校者屢矣。故自賛畫像有云:

當 出 夸 時秉筆之士 , , 至是首 而 日 帝 命眞 日 奉天承運 何爲諂問 人 八於沙漠 媚 0 此兩文乃開 胡元 ,又數元祀百有餘年 ,一至於此 國大典,必自宋及元者 , 諒 可 , 怪 則始 也 自成吉思汗 0 至日 奉天承運 ,顯涵有夷夏之大辨, , 其 (時宋: , 則是 祚 明 固 明 未 斬 承 然終不 元 運 正 統 明白 明 尙

初

諸

非

輿

在

提

臣

之不忘胡元

,

眞屬

不

可思議之尤矣

皆賴: 所以示 談遷國: 情 謙 統 擾 敢以驅撻 不可不顧,乃作此謙退之辭,則景濂檄文,亦必由明祖授意,否則當得明祖默許 益 隱居不 華彝 其養 詩 又按 又按洪武三年,景濂奉命纂大明日錄 四 権 集 小 胡 方 日 , , 仕 明史太 傳 虜光復華夏之功美明祖 然胡元之治 奈何爲此浮薄之言。 :中書省榜應昌之捷,上曰:元雖夷狄,君夏百年,天訖其祿,于朕何與 速改之。談書下元雖夷狄四字,不知果是當時明祖語否,然明 稱 河朔學者多從之 其 父士 祖 紀 瞻 ,豈非亦統 , 明軍 仕元 渡江北伐 亟改之 , , 以師道尊於北 爲翰林學 , 華彝乎?惟一 豈不可異。元臣有李繼 0 , 罪惟錄則云:有擬平定沙漠頌, 奏捷多侈辭 , 七年成 土 承 方 旨 起沙漠 , , 序進 有 封楚國 , 謂 Щ 宰相 , \_\_ , 集 本 稱上度越前王者六。一 公 生南服 曰 0 ,名延興,東安人,占籍 0 朱彝尊靜居志詩話云: :元主中 延興 , 中至正丁酉 斯見其不同 語頗侈大, 國 祖 百年 一縱有此 ,又斷可 進士 耳 日挺 朕 心 0 帝日云云 與 捷音誇 0 , 景濂 卿 北 生 而 Ш 等 中 平 知 羣 南 竟不 矣 父母 原 服 士 , ,

此

解

爾之辭

郭

爲冠 朝 鳴高 意 酒 里 泂 山 豈 或以 一帶 林 岡 Щ 蕕 盡開 , .9 松亡 南 下視 所受感觸 衍 爲 北學者氣 拓 明之餘 景濂 提 0 獲其名王歸 封 諸人, 0 味不 能 或不 未発言之太盡 以 相 直是茆店之雞聲矣 如 北 成三戶光復中興 投 , 人之深 四 逥 未見汲引, 面 凱 , 無復 聲作 , 而 逐 渾 0 其 功成 成 0 , 明 畫像之自賛, 忘夫胡元之非 而  $\equiv$ 初開 姑隱 一戶黍 獻俘 國 詞 蒲 離麥秀之思矣 **屋士**, 萄宮, 以責延興乎?然在明初能有此 殆以 我族類乎? 率多南人, 天清! 南士競以 日白開鴻濛 0 朱氏 山之僅 彼輩殆以生事 不仕爲名高 生値 淸 遂使 一典邑校 初 詩 樓 , 傾之壞 優 其言外之 而 , 未 遊 可 姑 自 仕 , 詩 於 鳳

此 其 固 其 文猶復 治 文 非 史者 其 , 後 乃 而 所 欲 正 婉轉隱約 方正學爲景濂文萃作序 い 藉 當 時 學之所未 宜 注 意 羣士之筆墨 也 , 若 滿 於其 有未能暢 師 餘 者 瀒 竭 , , 其時 其所 亦 , 洗 不 滌出 欲言者 能 已在明祖 明 白 世人心之癥結於隱微藏匿之處 而 0 身後 道 蓋當 0 當其時 時 毫士之所不滿於景濂 大一 統之局不 士羣之心 面 巨 方所可謂 確 立 者 , ,正學盛 若有近於周 深 , 正 痼 難醫 學 推 固 矣 未 其 納 師 能 0 余爲 顯 然 斥

#### 讀劉 文 成 集

榦 濟之懷 言明 初 開 親 仕 國 名臣 於元 , 必 故二人才性不 (無言? 劉 宋。 惟 同 前 景 濂 出 沉 [處亦相] 潛於文章道術 異。錢謙 益 其 列 在 朝 詩 元 時 集 小 , 傳甲: 隱 淪 -集劉誠 自 遁 意 文成 基 抱 謂 緰

攀龍 所能. 其所 以 爲韓之雅志 讀 時 也 其詩 永 0 表其微量 题覆 瓶犂 以 郹: 公集者 新 附 有 ·責備· 與子 於鄉 文 鳳 (為 後世) 文成者 。其事 自 讓同 深 者 眉 , 從藩 惜 故 凝 二集 誠 出 劉 每 永 意伯 之子雲乎 元科目 文 固 嗼 省 衋 , , 亦已苛矣 竊窺 成 不 辟 然傷之。 0 嗟乎子 容相 劉文成公庚子二月應聘以後入 , , 然有: 佐 其所爲歌詩 , 佐 掩 矣 主 0 一帥全普 作 謹 石 讓 近讀永新劉定之呆齋集撰其鄉人王子讓詩集序云: 0 , 雖 抹 操定犂 其義亦各有攸當 , ! 其奇· 然 噫喑 主 庵勘定江 , 帥定婺越,幕 , 鬱伊 眉公詩 悲惋衰颯 史家鋪張佐 氣建 矶 , 捫舌: , 一湖間 胸 居 臆 也 , 命 騂 府 先後異致 國 0 , 國 志弗遂 誦 朝 顏 倡 , **猶若佐全普庵** 論 朝 甲 犂 和 , ·集之首 眉之詩 佐 曩昔氣澌滅 蹙項之殊勛 , 其氣亦將掣 ,歸隱麟原 命垂老之作也 0 其深衷寄託 , 而 時 無餘矣 推 了碧海 永新 見其 終其 以 0 • 有非 余考公事 未 心 留 0 , 呆齋之論 、身弗仕 事 連 弋蒼晏 裸 將 子 幕 國 護當 安 史家 府 周 知 京 略 , 0 惜 後 余 狀 故 ,

# 又甲前集劉誠意基,謂

昔年 之季 公自 佐 知己 命 飛 帷 編其詩文日 , 效馳 沉 揚 幄 淪 硉 驅 矶 列 下 之氣 僚 爵 覆 作 五 , 籌 等 爲 瓿 集者 策齟 歌詩 澌然無有存者 蔚 爲宗 齬 , , 元季 魁 哀 臣 畾 詩 作 頓 , 斯 憤 挫 也 豈古之大人志士義 可 世 0 , 謂 使 日 , 幾欲草 讀者債張 犂 得志大行 眉公集者 一野自! 興 矣 起 屛 , , 心 乃 國 , 0 苦調 其 如 然其 初作 為 欲 奮臂出 詩 在 也 , 有 幕 悲窮 公負命 非 府 其間 與 旂 常竹 歎 石 世之才 老 者 抹 艱 帛 0 答嗟 遭 危 可 以 逢 共 , 丁 事 測 図 聖 有 量 祖 憂 , 遇 其 元

今按 伯溫: 有 集 元時 不 同 仕 殆亦於不獲已之心情中 而以 自 犂眉 者乎

集冠

本

朝之首。

百世

而

下

,

必

有

論

世

而

知公之心

者

嗚

呼

其可.

感也。孟子言誦

詩讀

書

,

必

日

論世

知人。

余故錄覆瓿

集列諸

前

編

遺文藁五卷, 所作爲主。今讀其遺文,想見其終赴 於石抹 伯溫之有覆 可 推想 名曰犂眉公集。 宜孫之幕府 瓿集 0 據行 , 猶景濂之有潛溪諸集也 狀 ,較之景濂之優遊山 稱 其中 , 遺文郁離子十 -惟犂眉台 2金陵出: 集在仕 卷 林而不出 I 仕明廷 明 覆瓿 伯溫之有犂眉集, 以後 集二十四卷 , , , 其影響於二人將來出仕明廷之心情 其心若誠有 非其生前所自定, , 卽 寫情集四卷 所 猶 屈 景濂之有鑾坡諸 而 則伯 不 獲已 溫詩文集實以 長子璉又 者 則 犂 集 集所 涫 也 必 在

今考劉集蘇平仲文集序謂

·而偶

有

撰

寫

,

宜

其

有

如牧齋所云云

也

元承宋統 高文宏辭 由 其土字之最廣 ,未之多見, 子孫! 也。 相 傳 今我國家之興 良由 僅 逾 混一之未遠也 百 載 , 而 , 土宇之大 有劉許姚吳 0 , 虞 上 軼 黃范揭之儔 漢 治無與宋 , , 有詩 而 盡有元之幅 有 文 皆 可 員 垂 後 夫何

如 上文已在洪武時 此 可 謂 乃明 初 諸 前敍漢唐 儒之共同意見 宋諸代之文章 , 而伯溫之言 , 而 謂 元之文運 特爲其 可 與 例 嬔 而 美爭 已 勝 而 致 憾於當 前 之有

又杭 州 富 陽 縣 重 俑 文廟學宮記 謂

惟 國 家以 武定 九 有 而 守 以文 故京有 胄監 郡 縣皆有學 至于海隅日 月之所出 入 罔 不 知

尊孔子之道,皇皇剡剡,照映天地,亘古所未有也

此文作於至正九年, 其推崇有元一代之文教,可謂言過其實 , 抑且 近於不知恥之類矣

伯溫復有感懷詩,其辭曰:

昊天厭秦德,瑞氣生芒碭,入關封府庫 ,約法惟三章。英雄不世出 智勇安可當 叔孫

竪儒 ,綿蕞興 (朝綱 。遂令漢禮樂, 遠媿 周 與 商 0 逝者如飄風 , 盛時安得常。 寤寐增永歎

感慨心內傷。

是伯 識 之開國上 復何得以夷夏大義責之 溫亦知元之規模,不得與吾儒之理想相符,而有其缺憾, 一比漢高 ,而 特以制度禮樂之有媳 , 歸咎於當時之儒 生, 並逆知其盛時之不常矣。然終以元 其殆指許衡之徒乎。 以如是之史

又杭州路重修府治記謂:

國家撫· 有 四 海 , 輿 圖 廣 斥 民物蕃廡 , **猶慮政教有所未被** ,乃大選守令, 舉重臣之才德聞

望者居其職。

載 此文作於至正十二年壬辰三月 較之伯溫此文,豈不儼如在兩 , 時天下已大亂, 個世界乎? 元廷方於是月下詔省台官兼用 南人 若以史籍

所

又諸暨州重脩州學記謂:

國家自混 以來 以仁澤施於民 涵濡養育 蕃衍滋息 , 可謂庶且 富矣。今乃至相率而爲

盜 庸 非典教者失其職耶

此文作於至正十五年七月, 教者之失職 至於元政之仁澤施於民 前 月 刨 明 , 則 祖 (仍揄! 南下之月 揚讚歎先後無異辭 也 0 伯 溫 文中 旣 有 相 率爲 盗之語 而 歸 答於

典

伯溫又有諭甌栝父老文謂

,

告甌! 脩 老目 Ш 涉 括父老 官 水 不睹旌旗 缺 , 不 其 略不類 人 皇朝以武德 , , 耳不聆鉦鼓 偸 惰潛 , 誰之賜歟?帝德寬大 生 , 以 九 , 菇蔬 有 不能宣德化 , 飯稻 服 而 不 哺孫育子, 殺 , , 達壅滯 務在休 , 燠休 滋潤 息 , 咎 早臥晏眠 , 在 , 與百姓安樂太平 有司 罔有荼毒,至今八十 , , 優優坦 非主上意也 坦 故 通 禁網 一餘年 無販 有 矣 漏 加 , 0 蹈 父 弗

期挽回民 六年丙申 此文在帖 心 里帖木耳爲左丞相時 時 0 張士 及元廷受方國珍降 誠入平江 , 明 , 辟伯溫爲行省都事 祖克金 , 伯溫 陵 轉得罪, ,元事已決不 **覊管於紹興** , 伯 溫 可 爲 建議招撫方國珍餘黨 , 而 伯溫 猶一 意宣 揚 。其時當爲 元廷之德政 至正十 以

魄, 其至燕京會試 而憂深思遠 發之歌詩 然元政之黑暗,民生之塗炭 , ,悲憤激昂,使人至今猶有不堪卒讀者 已知世運之亟亟不可終日矣,是誠所謂豪傑之士也。 在文宗至順四年癸酉 伯溫亦非不知 ( | | | | | | | | | | | | | | | 是年以明經登進士第,計其年則僅二十有三耳 。方其早年北上應進 。 伯溫: 生於元武宗至大四年辛亥,(一三一一) 其北上感懷爲五百七十字之長 土 舉 沿途所 見 驚 心動

詩

痛

陳

目

墼

謂

韻有云:

踰 干戈 健馬突封豕 淮 入大河 景物 , 未 0 凄凉 豈惟 作應爾 横山澤 更難視 去年 人 0 , 黄沙渺茫茫 食人 已敢剽城市 ,不識弟與姊 0 ,白骨積荒 勿云疥癬微 0 至今盜賊輩 蓝 ,不足 。哀哉耕食場 人成瘡病 , 嘯聚. 如 盡作 蜂 蟻 狐 0 **爱** 長 戈耀 太平戢 白 雪

其詩結尾則曰:

是非 其詩 在至順癸酉,下距至正七年丁亥沿江兵起 所謂先識之豪傑乎 青徐氣蕭索 , 河濟俱泥滓 。痛哭賈生狂 (二三四七),尚十五年, 長歎漆室裏 。何當天門開 而 伯溫 清問 已欲作賈生之哭, 速下俚

其過東昌有感詩云:

泥聞 良謀 太行東,水旱荐爲虐 乃反恣剽掠 。往者諒難追 , 飢氓與暴客, , 來者猶 表裏相位 可 作 0 歌詩 倚着 附 0 賑衈 里謠 付羣吏 , 大猷 希聖莫 , 所務: 惟 刻削 征 討 乏

此種 無可奈何 而徒抱希冀之心情 ,時在詩中流露 , 然亦有明見其不可爲者 , 如其贈周宗道六十四

慕爵賞 帝閣 軍 安得緘其肮 屬藩萊 披腹 自鬻求薦揚 **阪陳否臧** ,弱水 走有 不 目 可 擊 曰走居海隅 事 航 痛 。螻蟻有微忱 惜休明時 敢布之朝堂 , 詩書傳世芳,感荷帝王恩, 消患無其方 0 ,抑塞無由揚 此下歷 級當 。又不忍鄕里 時地方官吏愚昧兇惡迫民爲盜之情形 。遙遙草茅臣 祿食厠朝行 鞠爲狐冤場 ,怒切· 忠憤膓 0 走身非己 陳 0 披 衣款 走 軀 未及

終 汲 **以西江長** 涕泣下滂滂 0 況有 蛟 。旁觀髮上指 與蛇 ,磨牙塞川梁 側 深 聽 心 0 中傷 九多積玄陰,天色慘以涼 。天路阻且脩 ,不得羽翼 , 衆鳥各自 翔 可憐 飛 涸 孤鸞獨 轍 魚 待

徨。子去愼所適,我亦行歸藏。

# 又感懷三十一首有云:

客有持六經 , 翩 翩 西 入 秦 衣 冠 獨 異狀 , 談舌空輪 困 0 獻 納 竟 何 補 焚坑 禍 誰 因 昻

採

芝士,矯矯蹈海人。龍驤九淵外,豈復歎獲鱗

## 又詠史二十一首有云:

吾愛閔仲叔 ,幽居翳茆 茨 0 應辟思濟 世 , 利祿 豊 其私 0 進當 致 堯舜 , 退 則 老蒿 藜 0 焉 能 犬

馬豢,以爲天下嗤。

不能進 不 水退 而 而 亦不得不退者 致君於堯舜, 則退求自全,采芝蹈 。而求老蒿藜 , 則事復不易。其感遇六首有云: 海 , 老於蒿菜 藜 此 亦 時之志也 0 然事 態之變 有 縱

日復 日 夕復一 朝 **青燈向暗壁**, 光燄坐自消 0 鞘鷹鍛六翮 絕意於雲霄 0

嚴霜隕奧草 蛇 虺去所依 0 可 惜蕙蘭花 與之共頹萎 0 顧 此 悲 世 運 泫然涕

### 又在永嘉作有云:

河流未到海,平陸皆驚湍。旗幟滿山澤,嗚呼

禍亂 方 亟 藏身無所 此種 心 情 誠爲難堪 0 然而 希冀猶未絕 , 則 亦惟 有 6.仮抱此) 希冀以待之而

行

路

難

已。其丙申歲(至正十六年)十月還鄉作七首有云:

五. 載辭家未卜歸 ,歸來如客鬢成絲 0 親 知 過 眼 還 成 夢 , 事 ,勢傷、 示 可 思 0 且 喜松 楸 仍 舊

日,莫嗟閭井異前時。修文偃武君主意,鑄甲銷戈會有期

於斯 時 而得一 機緣可以措手,其內心之喜幸爲何如 。其從軍詩五首送高則誠南征有云:

牧羊必除狼,種穀當去草,凱歌奏大廷,天子長壽考

又曰:

振旅還大藩,歌舞安旄倪,拂衣不受賞,長揖歸蒿藜。

機緣之在他 人,其與奮感發猶 如此 , 何況機緣之在自身,則其內心之與奮感發更可 知 0 至 正 干六

來,凡有所感,輒形諸篇,有唱和集序謂:

年

,

伯溫承省檄

,

起佐石抹宜孫

,

殆爲伯溫生平最喜幸興奮之一機緣

0

自謂與石抹公爲詩相往

古人有言曰:君子居廟堂則憂其民,處江湖則憂其君

蓋至是而平日之處江 湖而憂君者 ,亦得依附於廟堂之貴而預憂其民焉, 其爲躊躇而滿志可想矣

莫驚溝澮盈·雨息當自乾·

今讀覆瓿集諸

詩

,

與

石抹

相

倡

和

者獨

多

, 既

日

叉曰:

將帥如林須發蹤,太平功業望蕭張

叉曰:

既日

卻羨魯陽功德

盛

, 揮

文回

日至今傳

相期共努力 , 共濟艱難 肼

乎?至正十六年復有浙東處州分府元帥石末公德政記及處州分元帥府同 古人言,詩言志,又曰情見乎辭 , 伯溫當時之所志與其情之所發 , 豈不於此等詩辭而躍然可見 主副都元帥 石末公德政時

頌兩篇 0 而無奈於大元盛運之終不可復 ,伯溫復見抑, 乃曰: 臣不敢負國,今無所宣力矣。 逐棄

官歸 0

今綜讀覆瓿集,約述伯溫當日心事之見於詩者,不外如下之三端。其聞鳩鳴有感呈石抹公云:

逝水自流 人自老 , 倚楹長憶至元年。

又曰:

疲氓 战眞可憐 , 忍令飼豺虎 。追憶了 至元年 憂來傷 肺 腑

其終不忘情於大元之盛運, 希其終能重臨者 也 。其感興詩又曰

此

當時玉帳耿羅綺 ,今日絲綸到草萊。傳語疲氓聊忍待,王師早晚日邊來

叉曰

大哉乃祖訓 典章尚流傳 有舉斯可復 庶用康迪 澶

此其二也,時事不可爲,

中與無望,

而感置身之無地

,故曰:

又曰:

摩崖 可勒中興頌,努力諸公佐有唐

蓋伯溫之於元室 , 亦可 謂孤臣孽子, 每飯不忘者矣。

然而舉朝昏聵

,

雖抱忠貞之心,匡濟之姿

而屈在草莽,展布何從,故曰: 盜賊流如水

0

又曰:

樽俎自高廊廟策,經綸不用草茅人。 朝廷竟知否,

天關深虎豹,欲語當因誰 0

叉曰:

又曰:

抑強扶弱須天討 ,可性無人借箸籌

盲

飆正滃勃, 孤鳳將安棲

又曰:

但恐胥及溺,是由懷悲辛

叉曰

觀

於

上之詩篇

,

則

伯溫之仍

不免於一

出

[而從明]

祖

於

(金陵

, 其

内心

甚

不獲已之委曲

,

亦

可

想像

而

得

其三 也 撫 几 0 抱 長歎 此 種 聲出 心 已

酸

此 之心態 感於進退之兩 難 而 復 有 反 《側之士 , 不 能 心 王 室 , 乃 思 乘 時

崛

起

別 有 歸 附 此尤可 悲可憤之尤者。 故其 詠 史有 日

姦雄 盜 竊 幸傾 危 , 只道冥冥便 可 欺 0 想得民 心 思 漢 日 正當 揚 子 劇 秦 時

矣

金華 天下 當 爲 爲 信 陵 輔之 慶 行省考試官 复 吾生平忿方國珍張士誠輩 則覆 伯 擾 行 溫之識 定括蒼 狀 擾 , 將分韻 時 稱 瓿 杭 以公才略 伯 天象 集 城 溫 , , **獨全盛** 言事受沮 賦 先遊 公乃大置酒指乾象曰:此天命也 詩 尤其是伯 能預言 燕 ,公獨縱飲,大言曰: 京 ,諸老大駭以爲狂 據括蒼, 倂金華, , , 遂移文決去。嘗遊 書 溫 肆 與 已成爲當時之神話 **所爲,今用子計** 石 有天文書 抹 倡 和 諸詩 0 明越可折簡而定,因畫江守之, 後從石抹 此天子氣也 帙 西 , 閱之, 湖 豈不皆是虛構 與彼何殊?且天命將有歸 ,豈人力能之。客聞之,遂亡去 抑且流傳迄今不稍衰。 , 有 宜. 孫見 翌日 異雲起西北 應在 抑 卽 背 金陵 , 。孰信孰 棄官居青 誦 如 0 十年 光映 流 偽 0 後爲江 然若如上引行狀之言 畄 後 湖 固 子姑待之。 水 此勾踐之業也 山 , 有 中 中 不 浙 待智者 王 o 者 諸 或說公曰 儒 公決計 起 學 同 會 其 下 遊 副 而 者 辨矣 明 提 0 公笑 皆 趨 舉 祖 以 我 可

朱 竹坨 靜 居志詩話· 有 則 云 : 溫

屈

身明廷之由

來

欲自 身為 公在 周 句 嫠 , 佐 殺 西 不 如 元 湖 時 命 中 恤 , 藉門 者 夜登 雲 緯 耶 氣 有 , 高樓 楚放 語 和 人密 其 坐客云: 王文明絕 題太公釣渭 常 里 , 沙 遙瞻太微 懷闕 抱 後 句 持 0 **芸**: + 卻 , 座 得 圖 年 秦慕魯連 有 夜 云 , 不 凉月白 衆星 帝者 死 , 偶 0 應 起 各 , 明 存齊 飛 參差,威弧何 西 , 初既定婺州 吾當: 熊 湖 兆 想 水 輔 , 田 , 尊爲 帝x 之, 坐看三臺上 單 0 , 此妄也 蓋 時 · 猶佐 者師 正 未嘗終食忘 0 石抹宜孫拒守 鴻 將 0 , 星 則公自 雁 當公羈管紹 西北 , 好 丈 都也 道也 來, 事 者遂 安能: , 興 0 是豈 附 時 卽 從之飛 其 會 感憤 乏 預 陋 和 自 , 負 至

深歎 傳 詩 泉葉子奇三上 不 金 一陵六 邀致 敢 亦 服 私 芸 以 牧 年 之, 齋列 爲 , , 而豈 炎招 劍 封還之。遺基書 日 當 朝 方 基 詩 獻 書 有 略 基 天子 薦 浙 如 集小傳孫炎條 , 基不出 基 行 自 東 狀所云逆知天命之所歸 以 , , 人臣 炎奏聞 爲 基 「數千言 勝公, 在 , 炎使再往 不敢 石 抹 始 , 炎在 私 觀公議論 聘 宜 , 孫幕 基始就見 , 封還之 處州 基 , 基遺以 力 中 辭 , , 浮雲寨 以上 其 乎?談遷國 0 0 0 謝 (何敢 劍 劉 又獻徵錄謂 無以答 炎寶劍 命 0 炎作詩 戰 招致劉誠意 爲公哉?然則伯溫之出仕 敗 卻之, 権引許重 , , 乃逡巡 繆美執送金陵 劉基見孫炎 以爲劍當 作 , | 無辨劉 就見 劉堅不 籫 劍 獻 歌 0 炎與論· 今其詩 ·肯出 基 天子, 勸 放歸 其 西湖 出 明 , 0 孫炎總 彩雲事 廷 古今成 斬 以 具 質劍遺 集 基乃 不 , 乃 中 順 敗之事 制 云: 出 就 命 炎 者 孫炎之強 明 處 0 史孫 高 此 州 , , 炎作 帝 乃 , 龍 伯 基 臣 得

〈錢氏詩: 集 小 傳 劉 仁 本 條 謂 方 氏 盛 時 招 延 士 大夫 折 節 好 文 與 中 奌 分爭勝 文人遺 老 如

處可 裘 好 彬 耳 預 士 濂 良爲學正 名玄眞子。 栝父老亦 識 士 林 0 0 青 先 得 又宋濂條 天 薩 其據 繩 維 命 皆 榯 都 年 有 綰 鱗 七 有 文 刺 吳沉 年 主 今按至正 明 歸 腰 出 可 0 書徐 仕 之謂 明 書 漕 立 至正 其 祖 咸 逢 徐原等爲 0 於江 若 志 初 往 舫 始 乎 世 傳 勝 己丑 己丑 謂 仕 起 難 依 ? 濱 焉 明 國 預 , , 蓋 庚子夏 羣 得 訓 乃至正之九年 知 伯溫之意 , 0 當 貌偉 雄者 導, 在 濂用大臣薦 以荷 天 又章有 時 命 至 草莽 其 全 正 神 7 , , 太祖 事 干 其 無抑沒焉 竦 , , 起義 定條亦云:元末 爲 亦羣 亦與方張 八 尙 , 聘宋劉 揖 伯 在 年 , , 戊戌 即家除於 劉 溫 其 雄之力。 與劉基章溢葉琛 無不心 前 而 0 , 行狀 葉章: 笑 抑爲 , 例視之耳 年 王 翰林院編 , 敬 宗顯爲 於金華 景 又方行條 且 稱 羣士 以語 方 濂 伯溫 張 國 , 土 , 侵之, 同 證之史實 寧越 珍已 修 ,逮計 自 誠 而 舟派! 謂生平忿方張輩所爲 云: 被薦之前 **犁**士 據吳,方谷眞 起 以親老固辭 府 急入 桐江 慶元之父子, 知 兵,下距 無所之, 乃不得 一則多輕 府 , 舟中 亦 而 年 居 延 西 鄙 葉 伯 可 0 , 0 , 草莽 入仙 伯 儀 劉 舫 溫 辨 慶元 淮張之兄弟 戴黄 妬 矣 溫 宋 爲 逡 華 已 舫 濂 帖 此 巡 以 冠 伯 而 爲 里 Ш 於今集 從之, 皆能 隱 帖 爲 溫 不 五 服 道 前 經 亦 放 木 士 其 白 耳 自 師 又豈 中 右 諭

而

景

戴

甌

易

隨

文

數言 高 於 徐 太祖 舫 能 其 後者 招 致之 而 0 愈 伯 自 溫 置 不 ·能完其 不 可 得 前 0 者 蓋 , 元 末羣 故 不免因 士 , 能 慚 出 而 妬 仕 也 , 則 以 忠 報 主 不 仕 則 以 隱 爲 高 鹿 名 皮

流 露 於 伯 詩篇 溫 旣 從 卽 明 祖 所 謂 定 王 犂 業 眉 集者 明 祖 常見爲 尊 異之甚 低 至 沉 衰 颯 稱 爲 老先 回 視 覆 生 瓿 而 集 不 名 中 與 又 石 日 抹 宜孫唱 吾子 房 和 諸 也 开 然 之飛 其 揚 心 情 而 之 熱

烈,奮厲而生動者,遠不侔矣。其夜坐詩有曰:

淺 **釭**背壁翳還明 , 坐擁衾稠閱 五更 0 **雲捲星河垂永夜** ,霜飛鼓角靜嚴城 0 飄搖莫計

事,老病都非舊日情。想像故園憑夢到,愁來轉使夢難成

今按: 瓿 也 集者, 今試看其精神意態爲 今所傳誠 亦以意推定之。 意伯集 , 何 此詩在蔣 覆瓿犂眉不復分別 如 山寺十月桃花 , 然各詩年代 首之前, , · 獨約略 則必在金陵時作 可推尋。上引諸詩以之歸 , 應是犂 一眉集中

入覆

生

又有怨詩一首,其辭曰:

怨泣 妍容 明信 屈原沉汨羅 韜光 遠人禍 情 0 娟娟 河鍾 殉 死 一安所從 、芳蘭花 。文貍處深林 , 不忍 委命安天窮。道得復何怨,老子其猶龍 棄其宗。萇弘志存 。之人豈不賢, , 託根千仞峯 , 無人識其蹤。誰令貪鷄鶩 。下有孤 揆道猶過中 周 飛泉 寧爲 , 0 上 己容 卞 有灌· 和 獨 ,以觸弋 0 奚爲 木叢 申 生 顧 , 0 與罿。 歲晏不改色 父愛 抱玉售瞽聾 , 殺 縻身獻厥 身以 , 0 霜清 為恭 別足實自 皮 香更 爲人作 子 取 車

不 者 箾 此 Ė 死 詩 詠懷 元作 豈不爲今日之失身見縻自悼惜乎?若芳蘭之託根千仞之率,韜光遠禍 亦必在犂眉集中 解脫 而題名怨詩 也 次引卞和 , 爲其在金陵時 知其爲犂眉集中作 則爲己之仕元而無所顯白作譬況 所作 。首舉屈原萇弘諸 品矣 人而 也 日 揆道猶過中 然則幽林文貍之爲人 ,固是最值欣賞 是爲己之未能 0 此詩 姸 抱

又有爲詹同文題浙 聖明天子御宇宙 流 無窮 江月夜觀 威惠與一 (天相: 潮 圖

比隆

0

首丘儻許

謝幾絆

,

猶

有古月光瞳贚

行

當

唱和三百

有

云

首 , 永與 (潮汐 魯陽

揮戈 此 夫牧齋之言曰: 雖 , 時酬 中興勒頭 應之作 此有非國 , 極於拂衣不受賞而 然方其在抹石幕 史家狀所能表其微者。 止爾, 府之時 決 殆不作身受鞿絆之想。 不求以唱和三百首,乃欲與潮汐之流 爰本其意而稍爲闡釋之如此 其爲後日作計 而 , 無窮 夫亦 也 日

集乃 之自表其微意 者 各有 以 自 0 | 喩耳 時 入清以後作 牧齋此編 牧齋又曰 夫亦 0 然伯 已在清時 日 溫 雖失身於清廷 余錄覆瓿 從夷變夏之與從夏變 是猶. 終爲有明一代開國之元勳 如伯溫之覆瓿犂眉分集也 集列諸 而書名列 , 而 前 朝詩集 心終在日 編 夷 , 而以犂眉集冠本朝之首 , 明 其事 , 不 , , 加冠一 而 故其文亦分初學有學兩 難 牧齋名列貳臣傳, 。牧齋欲後人之分別而觀, 可 明字,其所爲小傳 槪 而 論 爾 ,百世而下, 長爲當時後世 集 , 皆直稱本 初學集皆 · 得其用· 必有: 論 所 譏 明 朝 世 心 笑 時 而 , 殆借 是蓋 作 知公之心 0 則 有學 牧齋 伯 所 遇

又按罪 惟錄逸運外臣 列傳, 首秦從龍 次陳遇 , 此 兩人皆仕元 , 明 祖招致之, 加 優禮 , 亦皆

先 (生而) 不名 0 明 祖 以 秦從龍言聘陳遇 其書 曰

予惟 誠 難 獨 胡 理 元 入 馭 此 聞先生世居江左,才兼文武 天厭 其德 豪傑兵興 , 共爭疆: ,儻以生民爲念,須弘恤患之心, 域 黎庶流亡, 天命歸予。 歷思自古創 (此六字據明

增入) 應天順人,敷陳遠略 。與其弢光歛迹以全己,何如濟時行道以成仁。 (與其以下

亦據明書〕拱俟車塵,起展素蘊。

卒 此 帷 遇爲名臣第一。 臣 日 書 幄 士之有志節者,功名不足以介意,其卿之謂乎?朕不強卿 必 已在洪武十七年丙子, 在 。二人皆仕元 奉宋劉 至正十六年丙申 , 功名之際 少及秦陳 , 而其從明祖 明 0 , 祖 厠明廷諸公卿間二十三年,爝然不渝其初,尤爲難能。李卓吾藏 特爲附著於此 洵所難言 初克金陵時 也特早,又皆終身不受職 ,而明祖之始終善視此雨· 。其後屢授以職 以爲討論明 初諸臣出 ,屢辭不受。 ,故皆終其 人 [處心] , 以成卿之名。秦從龍 亦 實可 身蒙禮遇而 迹者參考焉 明祖 稱 嘉歎 0 後世 不 連稱君子 言 衰 i 亦以白· 崩 而 初 開 陳 書稱 遇之 衣 , 或 且

## (三)讀高青丘集

明 初 開 國 諸 儒 籌謀功烈首推劉文成 學術文章首推宋景 濂 , 而 言詩則必推 高 青丘 余讀

丘詩,亦有可說者。其吳中逢王隨朝京使赴燕南歸云:

車 江南 E草長蝴 禁閣 不受書生謁 蝶飛 , 白馬新自燕 ° 杯勸君歌莫哀, Ш 歸 0 燕 川歸 歸時應過黃金臺。不見荒基秋來土花 , 不堪說 , 易 水寒風薊門雪 0 朝 邸 空隨 , 伯 圖已 使

國 事 不 可 歇昭 說 王死 書 生不受謁 ,千載無 人延國士 此與文成集中所詠殆無二致 0 (別有送王孝廉遊京歸錢塘一 0 牧齋歷代詩 首 , 此詩殆自該首改作 集小傳謂季廸身長七尺

有

辭 文武才, , 然何得把漢唐宋諸代 無書不 讀 , 而 尤邃於羣史 筆抹殺 , 其心中筆下,並無夷夏之別,亦從此可證矣 觀此 詩 乃謂燕昭死後 ,無人復延國 士 雖 屬詩 人 嘅歎之

其登金陵雨花臺望大江云:

初平事 六朝 我懷鬱塞何由 ,草生宫闕 休息 0 開 從今四海 河蕭蕭 , 酒酣走上城南臺,坐覺蒼茫萬古意, 永 , 爲家 英雄來時 ,不用 務 割據 長江限南北 , 幾度戰 Ш. 流 寒潮 遠自荒煙落日之中來。 0 我生幸逢聖人起南 前三 國 或 禍亂 後

用 此詩 長江限南 已在召赴金陵纂修元史時 北 , 其心中筆下, 仍不見有華夷觀念之存在,不於此益見乎? , 胡帝北遁, 華夏重光 ,乃季廸所詠 ,僅以三 國六朝相擬 加 曰 示

惟其於古樂府上之回章有曰:

瀚海通漢月,蕭關絕胡煙,願奉千齡樂,皇躬長泰然。

驅 始見用 胡 胡 復中華之重大意義 漢字 o 然細 <sup>|</sup>味詩意 , 則 亦僅 仍未及 日 烽煙永息 也 版 圖 斥 廣 中 國 重 見 統 而 已 0 其於元明之際

其寓感詩二十首有曰·

滄溟

亦沙

塵

已艱 盛衰迭乘運 朝忽胥 天道 淪 果誰 陽和 親 既代序 0 自 古 爭 嚴霜變肅晨 中 原 白骨/ 遍 0 大運有 荆 榛 0 自然 乾坤 動殺機 彼蒼非不仁 , 流禍 及蒸民 0 叫叫 堪 運送 生聚亦 夫以

褐衣不脫

而

見至尊

較之帝閣之不受諸

生謁者爲

何

如

0

季廸又有盒·

余新鄭詩

亦

日

則季 復 中華之心意存 廸 於元末之動亂 在 ,豈不 , 亦 僅 更昭顯乎? 曰 爭 中 原 而 禍 蒸民 , 乃自古常然之事 在其心 中 筆下 斷 未 有

胡

其寓感詩又曰

駑馬放用 田 野 志本 在 豐草 0 偶遇執 策人 , 驅上 干 里 道 0 顧 非 乘 . 黄 姿 , 豈足 唇君早 0 負 重

力

不 住 ,哀鳴望穹昊。奈何相逢者,猶羨騳 絡好

惟 其 、於當時之事變, 僅視爲尋常政權之爭奪 ,故其心澹然泊: 然 , 若 可超 然事外 , 於己 無 預

得 已 洏 出 , 則 如野馬之橫被覊 絡 0 明初諸臣 , 多抱此意態 ,不止 季廸 人 也 0

然而 明祖之思賢若渴,登賢若不及, 則亦歷代開國所未見。青丘有放歌行 , 其 辭

曰

至

雄 端 鶏 天 上 一帝清四 曙 , 春滿咸陽萬家樹 0 諸侯客子盡西來 獻賦還過金馬門。大道易登平若砥 , 只道明 時苦難遇 0 褐衣 始信青雲 不 脫 見

尊 尺咫。共喜嚴徐得寵榮,未容絳灌生讒毀。丹詔 , 立談 刻皆承恩 。賡詩已上柏梁殿, 仍聞訪草萊, 皇心務欲攬羣材 0 **嗟君** 在

新豐邸 , 日暮· 空歌歸 去來 0

,

用材不肯略 疎賤 銖寸盡上天官衡

歷代開 則 明 祖 國 之刻意搜羅 医所少有 牧 齋列 實可 朝詩集小傳魯淵條 謂 遠超於歷代之開 國 王 矣 「逢贈詩」 0 然而 日 諸 儒 相期文苑傳 不慕榮進 , 急求退 獨立義熙年 一避之心 理 0 又劉養嗚 乃 亦

叢論史想思術學國中

志節 所寄也 0 季廸送舒徵 土 一考禮畢 歸四 明 云

元末避亂龍

頭

Ш

中

明興

(返故)

廬

,

堅臥

不

出

,

其詩·

有日

謝安原輔

晉

李密

固

興

唐

此

輩士人

還

寄語問 關 門吏 , 休 輕 尚 布 衣 0 叔 孫聊 應召 , 周 黨竟辭歸 0 赤 日 京城 遠 , 蒼煙海 樹微 О 送君

自歎 老卻故 Щ 薇

是爲又一形態 亦謂暫起從徵 。詩中叔 , 亟歸 就 孫 養 0 聯 進退從容 , 尤可 代表明 , 高風 執尚 初大羣士出處之心 0 **媽雖子乃王彝常宗** 理 及其行實 , 以 (布衣修) 0 鳧藻: 元史, 集有 媽雖 又薦入翰 子 賛

林 乞歸 憶從初蒙使者徵 0 洪武七年, 與季廸同與魏觀之難 , 遠別田 舍來京畿 , 。季廸又有喜家人至京有云: 小臣微賤等蟣蝨 召對上殿瞻天威 0

0

詔從太

欠校

金

匱 思 故 輝 Ш , 遠 每 。草茅被寵已踰分,不才寧莬誚與譏 旦 珥筆趨形闈 歸夢每逐鴻 南飛 。春遊禁苑侍鶴駕 0 何當乞還棄手版 ,多祀泰時隨龍 。海鳥那知享鍾鼓 ,重理吳榜尋漁磯 旂 有時青坊坐陪講 , 野馬終懼遭 。門前親種 籠羈 頃 宮壺滿四 稻 o 江 湖 婢供 浩 賜 霑 井 蕩

臼 妻鳴 機 0 秋來租稅送縣畢 , 秫酒可醉鷄豚肥 0 誰言此願未易遂 ,聖澤甚沛寧終違

天旋 常 心 態論 此 地轉 等意態 以 ,華夏重 文人 我無以名之,將名之曰是時代之風氣,亦時代之心情也 茪 而 任 , 脩 季廸邃於羣史 史陪講之職 , , 何 亦宜無不可安者 以際此盛運 身蒙寵召 。況兼家人初至 , 乃 無踴 , 乃 躍感激之意 轉 增其思歸 0 求退之 且 卽 以

季廸又有京師苦寒詩 謂

有

戀闕之心

也

北 可 見其思歸求退 , 國 難未 鳶蹲 尋常 戍 報 友 朝 西 , 廷恩 已 北 + 在 合信 白不 陌 , , 千里積雪 頭 而 , 0 實是夙志 酒價雖苦貴,一斗三 敢 可 徒恨書生無力可報朝恩 不如早上乞身疏 開 樂 衡 , 連崑 門 牀 頭 0 0 而於當前之世運民 崙 朅來京師 每有松醪存 , 泂 • 冰 簔歸 踏碎 一百誰 每晨 , 0 是豈中 釣江 馬蹄 能 出 Ш 論 , 中 強逐車 生 南 熱 , 炭 急呼取 村 心情實之言乎?洪武三年修史工迄 ,歷史大變 , 賤 夜斫 地地 馬朝 艫 堅壘: V醉徑. 煖 天 , 高臥 , 收 閣 兒女環坐忘卑尊 羌渾 0 若 歸 , 無動 時 布 0 書生只解 顏色黯如 被絮薄終難 於 中 焉 土 弄 0 鳥 溫 雖 口 , 破 頰 飛 日 0 卻 健兒 屋 亦 , 思健兒 瞑 無 斷

作

.飢

況

力

侍

稍

西

郞 此 云: 殆 , 自陳年少不習國計 亦一時由衷之言。 遠水 紅 花 秋艇去 蓋明祖之於諸儒 , , 且孤遠不敢驟膺重任 長河宮柳曉鐘沉 , 恩意禮遇 。還鄉何 , 乃賜內帑白金放還。 事 , 5行猶緩 不 可 謂 不 , 爲有了 優渥 區 , 良使 有辭戶部後東還出 显 戀闕 季 ,迪臨· 心 去 亦 图都門有: 擢戶 不 能 部 戍 不

其 始歸園 田二首有 云

乍歸 意自欣 策杖 頻 覽 遊 0 名宣 誠 足貴 **猥承懼** 愆 尤 0 早 退 非 引年 , 皇恩 未 能 陋 相 逢 初

稱 隱 , 不 是東陵侯

是時 新朝方建 , 需才正 亟 昔漢高初定天下,下詔求賢 ,曰賢士大夫有肯從我遊者 我與共安利

年引退 之, 明 , 祖 此 不 田 實難於自爲解說 謂 無此心 , 且. 其求賢之情 0 觀 此 詩 , 雖曰懼領 實較漢高尤殷切 愆 , 亦可見其內心之歉然矣 , 季廸蒙特達之知 , 受不 次之擢 而

盛

### /有贈薛 相 士 詩云

多言 久藏 非才冒權寵 我 俯 我少喜功名 耕 拾 婦 0 , 妄念吾已 腦 <del></del> 豊敷尚 自 [後骨] 桑 擊木 須臾竟披猖 已隆 書郎 輕事勇且狂 志 野 0 眉間 回頭 田 間 氣初黃 炎幾何年 。鼎食復鼎烹,主父世共傷 0 高歌 顧影每自奇 誦 我起前 突兀漸老蒼 虞 唐 , 0 薛 生遠 謝生 磊落七尺長 , 0 始圖 弛弓懶復張 拏 舟 『竟無成 。安居保常分,爲計豈不良 , 0 訪我 要將二 Ó 南 , 請看近時 **艱**險 嗟 三策 渚旁 诗人 備嘗 爲君致法 自言 解 0 歸來省 躍 時 相 康 馬 人 富 o 公卿 貴場 願 視 昨 企出 子 非

,

口

其 華夷 此 士 丑 作上梁文 言 誠 詩 時 0 入平江 乃至正二十一 始圖 題下附小注 亦於此 已早萌 無成 , 觀得罪 翌年丁酉 遯退之意 而 , 見矣 乃欲於異族統治之下 ,云至正辛丑嘉禾 年 , 。牧齋歷代詩選小傳, 季廸連坐腰斬 〇三六一 0 士誠降元開藩 而鼎食鼎烹,仕明廷者亦屬常事 季廸年二十六歲 ·而高歌· 嶭月鑑過予求詩 時洪武七年, 0 時季廸年二十二歲 季廸仕明, 虞唐 , 季廸 0 前 (一三七四) 季廸年三十九 ,因贈 舊爲魏觀屬官 心中 五 年 , , 0 徒 則宜乎季廸之挈然求去而 則所謂爲君致時康者 避隱於吳淞江之青丘 至正十六年丙申 知有 , 觀守蘇, 時之治亂 改修府 , 上 不 (一三五六) 推元至 知 此詩當· 治 有 宜 更不反顧 指 百 正 季廸 世之 元 張 辛 廷

矣

余又讀季廸扣弦集 , (附鳧藻集後) 有摸魚兒詞自 適一 首 曰

近年 醪 付 後無羞辱 幾多福 且 漉 稍 諳 這後段行藏 時 。三般檢束,莫恃微才, **黛來入手,還須做底用** 事 , 傍人休唉頭 ,從天發付 縮 o 賭棋幾局 何須 莫誇高論 ,看人眉 問 龜 , 目 輸贏 , 莫趁閒 0 聊自 注正 追逐 足。見放着有 似 世 情 0 雖都 翻 覆 道 0 田可種 思算 富貴 烹 人之所欲 , , 有書 向 前 堪讀 去不 天曾 , 村 如 退

0

,

於明 亦即 此 元明之際論世知人之一 詞 同 不知作於何年,其在仕明之前乎, , 則本 時 \_\_\_ 般儒士之共同心情也。彼輩之有志用世 屬意外,並多不獲已而出 助 0 ,固非踴躍以赴者 抑在仕明引退之後乎?今不可知。要之季廸一人之心情 ,率在元之末季 。茲特舉季廸一人爲例 , 經亂 而 萌 退隱之意,其卒仕 , 標而 出之, 以

爲

當時 抑 般儒 余讀 季廸散文鳧藻集 士之共同問 題, 亦元明之際時情世態一 ,雖篇章不多 , 而討論 特殊之點 出 一處進退 也 , 獨占 0 玆 其大 再摘錄敍述 部 分 如 故知 次 此 問 題 實

其送二賈君序云:

治 得代告歸 至正己亥 不治 而 余閲 求贈言 出 , 非瑞矣。二君今歸海隅 江浙行省貢 0 余觀二君之名而 士 目 , 有名祥麟祥鳳者 有感焉 ,益習 Ö 舊業 夫麒 疄 , , 鳳凰 其氏俱賈 不急於其出, ,天下之瑞物也 ,蓋兄弟 則所謂 也 翔浮雲之表,游 0 乙巳春 出必當國 ,二君 家之

士

一處亡元之末葉 野之外 也 無意用 他 日 世 應 時 , 相率遯隱 而 來 和 其 , 聲 如宋景濂尤其皎皎者 耀 其文, 則 (又)為 。季廸之勗二賈 時之瑞 不 特瑞 , 亦此物此 家 矣 志 也

其蜀山書舍記 有日

之遺 閱 蜀山 吾屋在山若干楹 益務於學以 0 也, 吾將於是卒業焉。子幸爲我記之。予惟幼文以方壯之齒,有可用之材, 書舍者 日 水其 事奔走而 ,友人徐君幼文肄學之所也。幼文自吳興以書抵余 所至 , 吾書在屋若干卷 不 ,豈非有志之士哉!而 · 知返 ,宜有處於幼文矣 山雖小而甚美,屋雖朴而粗完 予也 ,北郭之野有土,東里之第有書 日 : 吾 山 書雖不多而 在城 而 不急進 東若 皆 足 干 以 先 取 里

蓋當 統 亦已 政 尙 及於元代之社會情況及其經濟背景,非本文範圍所欲及。要之卽就明初開國諸儒之詩文集觀之, 田 藏 身 可 之見解 猶 實未 )例證 於士爲 耕 時 0 **<sup>2</sup> 基士之**隱退 其物業生活之不足以爲士者,則多去而爲僧道,爲醫,爲風 E 顯然矣 有 能 憑以 近 大有 Ш 可 此 自安自飾 所 藏 作爲 乃中國歷史上士之一 故元代之士,上不 ,元雖 ,非無意於用世 不貴士 亦極於爲吏 景濂集中之所稱道 , 然其時爲士者之物業生活 在廊 而 亦將以有待焉耳。 變相 止 蘭臺省 非 古之所謂儒 其情況可於景濂以下諸家集中見之。 卽元之羣士所共奉以爲楷模者 ,下不在閭 然亦必有可以爲隱退之地 也 閻 ,則超出 畎 故元之儒 畝 水 師 而 於編戶齊氓 別 士 爲相· 自有其淵 乃别· 人業 劉文成於同 有其 甚遠 有 藪 若其 窟穴 如是之類 屋 番學 此 有 當 出 書 可 時 縱 統 而 從 以 有

輩 草野 進 之意氣乎 先亦何嘗 其 心 退 以 中 主張對治當時之羣盜者 饑 自 必 , 亦可 首 盡 氓之羣起 推 不以羣盜視之。終爲其物業生活之自計 。此皆與當時之社會情況與其經濟背景有關 故 景 明其特殊背景與特殊心情之所在 彼輩 濂 而 , 亦 雖 作 是故 上 叛 不 , 亦 , 在 也 未嘗 其大政方針 政 0 惟其當時之爲士 , 而 無同: 於朝廷多崇重之意 情 , , 而 矣 則曰 鄙 者 賤之意態 脅從可無 , , 尙 不得已而 , 有物業生 , 未嘗能 此 亦 不 乃當時羣 , 仕 能 焉 則 以 廓 事 開 自 可 日 , [爲首] 安 土 亦何嘗有 掩 心 宁 胸 0 理癥: |必懲 尙 劉文成最富 厝意於夷夏之辨 有學業文章 結 所 0 謂驅 彼輩之於明 所 在 胡 經綸之抱 , 傳 而 虜 統 於其 而 可 復 祖 , 游 出 中 而 負 ,

其

於

其

華

處

豐 詩 社 有 盈 擅 Щ , 林 場 聘 錢 詩文鼎 牧 江湖可 一二名宿 居首坐 齋列 安 朝 盛 詩 如 , , , 歌詠 贈 元 楊廉夫輩主之,宴賞最厚 集小傳張 黄金 廷雖 觴宴可逃 不 餅 用 簡條引王元美曰 士 0 高季廸白金三斤 , 彼輩 而 士 生活之寬裕 心 理上之不 0 饒介之分守吳中 勝 , 國 楊孟 願驟! 優游 時 見有動 載 法 從容 一鎰 網 寬大, 亂 風 0 自號 此 雅 亦 已在元明之際 , 上 宜 醉 不 一然矣 樵 不 必 在 往 延諸文士 天 宦 , 下 0 9 江 不 淛 浙 在 作 中 社 歌 地 每 會 歲 經 仲 有 而 濟 簡 自

季廸又有水雲居記,其言曰:

以 飛揚 吳陵 無 材不 劉 吾則拏 雨 能 扁 其 備 室 舟以 世 用 曰 水雲居 娛 欲 , 沂 歸 還鄉 迥 瀾 請余爲之記 逐流景 復從二物者遊, 0 與之俯仰而上下, 雨 日 故名吾室以志之。余告之曰:雲之與 吾少家江海之上 心甚樂焉 , 嘗 觀 0 今雖幸 夫洪 波 處轂 東 馳 下 水 浮 顧

孔子 矣 曰 焉 之身, 逢明 加 吾非 與之遊。 。子乃以 時 無所 當 往 奮揚其光英,涵 無事求之,吾悲水遠逝 然不 而

不與之俱

,

又何求於渺

漫杳靄之鄉

乎?

泳其

(德性

,

進用於世

,

使所施

有及於人,

則二物者,皆卽在子

而雲高藍

飛

,

皆將去子而

不

顧

,

尚得 而

與之遊乎?子今遭

非隱者之所宜從也

。子見其滔滔於江湖

悠悠於寥廓

•

岩無事

然

٠,

謂與己適相

類

也

欲

知舒布覆被而

雨

四海者雲也,奔走放

注

而

溉千里者水也

彼皆有澤物之勞

斯人之徒與 而 誰與 0 季廸 此 文, 罕譬而 喻 亦可 ·見季· 廸心 中 固 非 **必歸** 於爲堅 一瓠之隱

季廸又有野潛稿 序 ,其言曰

濯 其道以自樂 常也哉?蓋潛非君子之所欲也 晉陵徐君 而 冠 亂 而 倫 見者 故 , 出其詩 君子不必於潛 0 相 時 屬 可 也 潛 日 野潛 矣而 0 君 獨 稿 欲 , 求乎顯 屏居 亦不 囑 , ·必於顯 不得已焉爾。 田 余序之。夫魚潛 間 , 則將枉 不 應其辟 惟其 道 時泰, 時 以 手淵 而已 徇 可 物 謂 則行其道以 潤 知潛之時矣。然今亂極將治 當張氏擅命東南 時 潛 可 于 顯 數 矣 膏澤於 常 而 欲 也 人民 事 夫 潛 士 士之摳裳 而 時否 潛于 則將 野 而 君懷 故全 趨 潔身 豊

A 所 學 可終潛于野哉

此 亦 又有送徐先生歸嚴陵序 論 進 退顯潛之正 義 而 勉 謂 人 以 進 批

胡 必皆賢 元 腥 穢之治 勞 許者 去 子之仁,又將以風 嚴 先王之爲政 豈不爲司 生之經術 陵 士之用 戀考槃之樂,上之人不違其 於先生蓋有愧 然其賢者實 有 徐 欲圖 垂八 必與之使遂。 議 先 司 , 則又非潔 而 操 具 生 人物之柄者惜哉?余進而 脩 十 不 治 履 禮 大 五. ,莫先於順 车 · 惜 平, 禮 年 傳送以歸其 亦 宜 , 身獨 甚 無 焉 以其所得 厲海內, 在 復留之。 被 |盛舉 拂衣必去之理 旦 矣 所以人之出處皆得 成均爲學者師 召 人情 往 盪 至 京 滌 而 也 鄉 者大也 未 無所 使皆崇退讓而息躁競 廓 師 ,亦莫先於厚民俗。 0 0 幾 故待賈山 淸 有言者曰: 請 補 , , 與 書又成 與 者也 0 解之曰:皇上始踐大寶 。今皆一 0 , 脩 季廸此 蓋將縱之山 民 況先生之歸 元 更始 澤者 , 0 史 吅 示可得 先生之學 , 若余遭逢 文 先生固 廉恥之風作矣。今先生以齒髮非壯 , 書 在上 **羣然** 莲庭 , 成 也 也 林 力有 不從在下之求去言, , 一者望治院 顧令以布 申 0 明時 詔 必能 順人 使 其· 前請 所不任者,不迫之使必爲 宜 擇纂脩之士官之 備 , 情 殷 著書立言以淑 鳥飛魚泳於至化之中 如 顧 , ,大臣知其志, 不能裨益 首下詔徵賢 問 而 而 水 衣老於家。歸雖先 厚民俗 求賢切 赴 , 海, 先生之文, 萬 而 乃從在上之許 , , 實在於是。 雖 諸 隱者之廬 不 先 又責郡 人 宜 時 生 懷恩苟 欲 強 聞 以 詠 掌 生之志 義有 殆空 綸 煩 賦 以 老乞還甚 厭 國以歲 風 例吾天 故 載 綍 以 祿 歌 而 寧失

詩

而

不

矣

0

先

然

所

H

未 者既志在 求去,在上者亦不當堅繁不放,順 人 情 ..9 厚民俗 -9 持義正而所見遠,不啻爲求去者 歸 來 者

. 9

開 至 欲 潔其 坦途 而 身 其 待 ö 而 士也 然季廸之自身乞退 亂 大 亦甚 倫乎 酷 ? 0 在下者相率以求退之大義要其上 而季廸之終以盛年乞退牽累受極刑 則仍不能圓其說 年力尙強 , 乃使在上者積 惜哉惜‡ 又無老 親 哉 忿內蘊 乃必一 意而 , 明 祖 求 之禮 去 是

聲譽既 素 卽 及順 遁 夷 危 危 祥 庫 미 太 太樸 夏 祖 氏 來 以 趨 詔 が 徠 多士・ 言於主 以六十餘齡之殘軀 修 蓋 素猶 自喜以夏變夷 帝 0 所居報恩寺入井,寺僧大梓力挽起之 集云: 逐 謫 明 元史 乃 高 已 祖 北 不 不 帥 之網 惜 和 也 欲 明 徵山林遺逸之士十六人共其事 太祖 帖 危氏之仕於明 州 0 以 , 羅 輦 出其 漢 小傳又云:上一 木兒花監國 0 史亦稱 羣 召之 丽 人為! , 鄙其不 身 出之, 士 胡 , , , 用 復官僅 而 不 明 元 累朝 知時 能 值鼎革之運,豈其有所覬覦也邪?危氏以上書 心 • 祖 召之,復官僅 用 亦良苦 言 **猶草廬之仕於元也** 不 也 實錄 日聞履聲 出 而詆之。黄氏此評 , 0 素元朝 日而明兵已入燕 , 危素之雅志不仕 得無恙 0 而宋潛溪作墓誌云:公春秋已 天下. 老臣 , , 問 日 初平, 0 日 正爲牢籠諸賢設耳。牧齋詩集小傳 入國 爲誰? 而 , ,國史非公莫知, 何 明 0 示 朝 百端待理 兵 危氏序草廬年譜云: ·對曰:: 入燕 · 赴和: 其爲人之無識 可謂無識 ,甚見禮重 特不忘胡廷, 州 , 是其· 老臣危素 看守 , 何 0 暇遽爲勝 草廬· 余闕 人 0 公死, 明祖 可想 高 固 乃不欲仕新朝 0 在 廟 無意爲世 , 屢聘 上不懌 雅 殆有感於此 可 是死國· 0 0 清黄 示 報 朝 志不仕 以 而當時羣士競重之, 死可 修 而 史 (大三 起 用 , , 史也 曰 以 退居房 , 耳 無意爲: 大兵入燕 而 是其 非 無死之間 心知修 居集讀品 我道 洪 虚 兵垂 元酉! 武 語 Ш 心 是文天 矣 四 世 獝 年 年 嚴 國 及 者 用 已北 , 知 0 危 明 刻 史 史 有 明

祖 之羣士, 亦 不 得 不 其 加 心 禮 情 豈不· 反感: 內 亦有所 鬱 , 可諒乎? 時 激發 , 亦 可 見當 時上下心 情之暌隔 爲 何 如 矣 ! 而 明祖 之薄

決 報 累蒙國恩 曰:公小臣 , 已浮屍: 是素之爲人, 又有黄冔殷士 ,爲胄子師 井 , 死社 中 矣 稷耶 ,金溪人, 固不得比文天祥與吳草廬 o ,代言禁林,今縱無我戮 事見傅維璘明書危素傳 ? 冔曰:齊太史兄弟皆死,彼不小臣哉?則紿午還舍取告身 仕元爲翰 林 待制 ,亦復有愧於黃冔 0 素與冔同邑, 兼國 何 面目見天下士。將投居賢坊井中 史編 修官 少同 0 燕京 學 旣 破 相約死難 歎 曰 , 而 我 , 從人午 素卒瞻 以 午喜 儒 致 出之 身 , 還

世之作 之 矣 首 傳 江 四 正 稱其集五 庫 0 , 亦 0 提要補工 然 即 以賦 更十有 余以所記甲子考之,止於乙未之歲,乙未爲元順帝至正十五年, 又按:四庫總目有危素說學齋稿四卷,乃嘉靖三十八年歸有光從吳氏得素手稿 無足深惜耳 。 迨 頭賛記序爲次 如 十卷 身歷承平, 四年而元亡。 正 余所 引吳氏繡谷亭薰習錄有說學齋稿一卷,云:震川歸氏校定本 舉 大 明 初 抵 雖登禁從 諸臣 未 , 此十餘年間,正當南北兵戈俶擾之際,素以史事自任 有 而編不分卷,文不聯牘,每篇自署甲子而已 集 成書 , 其皎皎 ,而亡國之餘 今按 可考者 吳氏 此 , 當時士羣心 項推想 聲華銷樂,卒致觸諱 大非 情 無因 已昭 是歲明太祖 惜 然若揭 , 0 今已 此稿之軼 有光跋 無可 , 凡 則危氏 , 其間 稱 録文一 得其軼 起 , 兵 傳鈔 非 尚有其牛 無 豈無憂 百三 自 集之軼 稿 故 吳 也 和 而 干 時 而 王 0 州

志

憫

渡

軼

豈明 不可 劇 士 乃 鶩 時 一衆望 相 馳 兩 , 謂 率乞去 夫亦多方有以促成之。 者 得官, 祖 非已 所歸 再論 所心 0 余竊 一盡其優厚寬待之意 樂?雖在 當 0 , 乞歸 疑焉 不 則 時 無佐 得已乃重 明 廷之修 , , 皆先有夢, 無乃季廸之故爲遁 季廸亦心存不安 明 祖 反感 史 修 季 禮 , 其意實不重在 書 0 迪亦以修史被召 內鬱之益深 夢皆驗 0 禮 日 書又匆匆修畢 , , 一解以自己 今鳧藻集中乃有志夢一篇 驟擢戶部 , 因謂: 0 修史 歷代 解 得喪之數固皆定於冥冥而 , 開 尋 侍 脱其拂衣求去之無情歟? 0 ·入內府》 修史匆匆既畢 國 郞 • 諸人又復相率 , , 聞誅 季廸乃直 **教**功臣子弟, 功臣 解 矣 , , 謂其 求去 求 廷意方欲官修史諸 , 未 去 聞 與同辭歸者謝 不遽責以吏事 無逃 , 0 而 誅 乃賜內帑白 而 士 此 季廸亦終 , 羣 諸 以戒世之役智 也 人 , 0 微雨· 以 金 明 正 人 , 放還 在 初 是 不 明 此 冤 而 人 時 力 祖 諸 悲 良 此 羣 同 人 而 ,

季廸又有歸養堂記,謂

可

惜

矣

禁林 仕 爲 稽岳王常宗父 養 而 而 者 養 出 常宗解日 任 以 受命 , 未聞 文行 有 日 舍仕 方 吾母老 高 , 峻 王 而 事之靡 養 , 也 以 , 不 布 0 樂去其 余 盬 衣 召 也 日 修 不 0 養 然 鄉 元 雖 史 , , 爲 旁又無他子侍養 常宗之志 , 養 書 成 而 仕 , 同 , , .館之士 歸 抱 關 則 朝 於 , 廷之賜 吾亟 咸得賜金幣 其 鄉 歸 , 不 爾 ·必去其 名堂以 0 有疑 遣 還 親 者 示 , 有 不 日 也 忘 欲 吾聞 薦 不 忠 舍 入

此 又以 朝廷之賜歸 美其上 而 不 悟 賜者之非 出 於眞 誠 上 下 暌隔 情 乖 志離 籍端 誅 鋤之禍 邃

孝之義立

在

矣

此 釀 致 , 此 非 朔 初 開 國 至 可 遺 憾之悲劇 乎 0 其 相 激 相盪之勢 , 治 史者宜平心 過揭發其 底 蘊 , 固 不

得一切歸咎於偏面也。

季廸又有安晚堂記,謂:

子之安其親 之,寬閒 同 里朱君炳文以郡薦就試春官 靜深 宜 無時 可以燕娛,欲吾親之優游於是以樂其老,自題曰 而 不然 , 何獨於其老哉?若夫安之亦有道 ,既雋而將歸 , 日 : 天齊吾家,使二親康強具存 , 安晚, 必也居而 願 脩 爲記之。 諸 身 嘗築堂· 余謂 出 而

其本哉?

於君,皆盡其道,無一

足以貽親之憂,則善矣。不務於是,而惟以口體之養爲安

(,豈未)

知

也 此 論 0 若得季廸此論 辭 婉 而 義正 0 ,上下一心,以安天下而兼安其身與親者爲務,則豈不爲美哉 當時羣士方競以不仕歸臥爲高 固 非所以安天下, 亦非所以安其身與 、親之道

余又按胡維鱗 明書簡 祖英傳 ,祖英嘗仕 完 ,徵赴闕 , 燕勞之, 齊以. 纁帛 不受 0 以爲 建 知

縣,不拜。以母老疏辭。其略曰:

孝之罪難逃 爲 元祿 臣祖英九歲失怙 所 拘 爲何 囚 , 左丞 臣隱忍不能. , 而 真參佐 得以展其區區 , 惟慈親鞠育 卽 適値 死 有愧石苞多矣。茲遇聖朝 羝鳥私情者,  $\equiv$ 0 少長. Щ 強寇 知學, , 剽掠 冀或用: 陛下之賜也 廣 城 世 , , 門妻 維新 酬 0 臣母子離散復完 罔 極 女 , 率 之恩 , - 土效順 死 節者 ,臣之志也 五 臣 人 白 母 骨 老 生還 再 母 向 肉 陳 以 雖 叨 氏 鉊 食 不

英罪 得獲 大 上 從 善終 )其請 惟 錄 感聖 則 經 日 不 入逸運 事 敢 臣 母子 德 拜 終老於家 其來幾何? 苟違親 元 如 此 朝 命 7 雖九 拭目 外臣 之例 者 幸已逃誅 , 以罪 死其 傳 清平 0 , 然則仕元者不 尙 , 戾 何 並 亦 已深 能 謂 多 , 謳 報 其陳情 母 有 而事主, 歌聖德 年 ? , 0 陛下 則 不 逾耄, 宜 ·再出 書稱日 爲幸大矣。 復 陛下安所用之 職 時廷臣之多遭罪 在民牧 孤苦特甚 加 元而 , 以養親爲辭 甄 錄 不云偽朝 0 , 寄 欽惟聖朝 。伏望聖慈 今臣年四十 以 戾 民 , , 社 卓 明 哉不撓之節 固 祖 , 此正 固 以孝道治天下, , 不得盡責之在上 · 有九 矜其愛日之短 不 強挽 臣 , 隕 首思效之秋 老母年八十有 , , 是亦! 亦 不 者 以仁心 同 , 心 俾遂! 可 可 懻 徴明 也 知 0 矣 許 歸 懷

養之願

,

西

山之

以

如

志

明

祖

叉

簡

祖

遠

0

臣

而

臣

逡

季廸又有槎軒記,謂

螘之所: 哉 槎 亦 或泛或止 、槎之流 不 , 知 而 顧 语 槎方: 有 無意於槎 :德怨於 或乘洪濤 同 方此 治寄於水 止 水 , 修彼 其漂然而 幸不爲薪且 也 , 0 而 東入於海, 而 若余 不可期者 徊 i 薄 蕩 汨 行 蠹 , 天 泊 地 , 然而 **茫洋浩汗,莫得知其所** 則是軒者 , 水實使之也。然槎雖寄於水 間 或 滯 淪於泥沙 槎也 隨所遭 其淪棲之地乎? 其 , 行其止 或棲於洲渚 水之勢爾 , 極 往 0 0 者 水 而 , , 既知之矣, 蓋 或爲漁樵之所薪 亦 未嘗 而 有 無求於水 槎 有 焉 愛惡於槎 來者吾何 , 或 , 水 墊 雖 或 或 所 而 能 浮 計 蟲 槎 使

之所云云,相去豈不遠乎?季廸邃於羣史, 此 刑 人 人物 文作於洪武六年之秋 而 季廸何不知人之於世 乃亦 ·奈何方以偶得止而不爲薪且蠹自幸,卒乃遭此 同 陷 於此 時代 , 悲劇中 其身已退,方自幸其一槎之得止而不爲薪且 固 不當以槎之於水相 , 惜哉惜 哉 殆猶未聞 擬 0 夫儒者安身淑世之大道 酷 人不能 毒 , 情哉情 !無求於: 哉 世 !若以此文較之其 蠹 , , 世 亦 而 , 殆 猶 翌年 不 能 ·卽遭 無所 未免爲時 愛惡 腰 水雲居記 斬之慘 於其

季廸又有婁江 一吟稿序 ,其文曰

呼

天下 時焉 以自 忘 靄 之濱以自安其陋 辯者行其說 , 1快其 ·無事時 與 置 爾 夫草木之盛衰 得喪於 今天下 意 ,士有豪邁奇崛之才而. ,莫不有以齊事業而成功名 莫有聞於世也 笑 崩 0 時登高い 離 , 初 · 魚鳥之翔泳 , 征 不 ·計其工 戍 丘 四 。逮天下 , 田 望江水之東馳 示 , 可 無 工 凡可以感心而動目者,一 有事 謂 所 也 用 有 , 蓋非 事之時 , 則相 往往 , 百里 向之田· 也 與 放 於 奮臂而 而 0 注之海 予生是時 夫野老所能 山 林草澤之間 起 , , 發於詩 波濤之所洶 勇者騁其 實無其才 羈留而狎玩者 , 與 , 分 蓋所 田 夫野 歘 故竊 智者效其 以遺愛憤於兩 老 煙雲之所 , 亦各因: 伏 沉 於婁江 酣 謀 歌 其

伏 者 此 以跡於畎 文殆. 是矣 在 N畝 之間 奈何其自處而 張 氏據吳時 眞 可 沒不然 潛之時 季廸避居 也 , 此殆非季廸一 青丘之所作 0 然及洪 武 開 , 人之咎 國 此 即野潛稿 亂 0 極 觀於前引季廸諸文 將 治 序所謂耦耒耜之夫, 君子不當終 潛 , 可見其 於野 謝干旄之使 斟 季 酌 廸之爲 而 未盡 匿 耀

其所以 徘 徊 而莫決之苦 非憑 0 人或一事之所能率爾論· 治史者貴能 論世 以 知 人 定者 我 所謂 。讀者會其前後而觀之,亦庶 時代之風 氣 時代之心 情 可瞭 當博觀 解 此 會通 時 以 深 求

之所 由 形 成 矣

季廸又有送江衖省掾某序, 其 言 日

以 用 重 道 以 不切於事 稱上之所使也。夫儒 近代之取人者有二焉, 凡 相 , 盛衰 二道既分, 律令章程 在上者亦過矣 而 儒 者之非 有 , 其為: 弗及者矣 所以 弊 儒忽吏爲末 儒 也 。既又思之, 八。嗚呼· 從政 久矣 而 不能盡爲古之儒,吏亦豈能盡爲古之吏哉?是但知垂紳獵纓 曰 不 儒 知 0 0 與吏 磨鉛削牘 !豈非其惑歟。亦竊求其故矣。蓋謂今之儒未及於古 ,而謂之不足爲。吏訾儒爲迂,而謂之不足用。各視 不明乎道 國家自失承平,在上者欲其嚴辦以供一切之需 亦儒之過焉。苟不以吏爲不足爲而兼通之, 0 夫吏固儒之一事 , 拘法而不通夫義者之非吏也 則無以知出治之本 , 非可 以並 0 不從乎政 稱 也 0 0 余故嘗感歎 詩 , 則 書 則 無 禮 樂 故任 周 以 夫輔 時之所尚 而 周 , , 空 言 而 ,不足以 思之, 東北 所 輔 治之 治之 以 明 專

用 而其道豈不行乎?

有 此文作於元 而 不 羅 願 致之。然其所以錄用 自屈 為更者 時 元 政 。方其未仕 大弊 之者 端在重吏 則 敬禮之、優渥之,皆所以崇儒也。及其旣仕 (仍未) 而 発循 忽儒 元之弊 0 明 祖 7。蓋以 之起 其敬禮 舊之用吏者用儒 而 羅 致之者固 , 儒 多儒 束縛之、馳驟之, 有不 能 吏事 且 亦 者 以 儒 亦 道

聽

卒忤旨

逮死獄中

貴溪儒士夏伯啓叔姪斷指不仕

,蘇州人才姚潤王謨被徵不至,皆誅而

皆所以馭吏也。在上者心切望治,有其可諒。而 概而 議者 0 此其所以成爲一時代之悲劇 , 而使治史者驟難於評判其是非之所在 在下者之不安不樂 , 寧求隱退以 自 也 全 , 亦 有 可

季廸又有評史六篇,首篇商鞅與范 雎 謂

一人者雖皆不足言,然雎 爲猶勝 。進退禍 福之幾,觀鞅; 雎之事 後之人亦可 以 少鑒矣

然季廸以盛年退隱 務求爲范雎 ,而終不獲其死 ,是亦良可 '嘅矣。

余又讀洪武實錄,十二年十二月,上謂禮部諸臣 目:

朕自臨御

以來,

十有二年,思得賢士以熙庶績,然山林幽遠博學老成之士,

匿

一德藏光

,

甘

於窮處, 非招徠之不肯輕出,宜下有司悉心推訪,禮送於朝,朕將顯用之。

十三年六月召儒士劉仲海, 敕曰

**朕以菲薄** , 深知寡昧 , 夙夜孳孳, 思與海內賢哲之士共底隆平, 雖求之日切, 而至者恒

0

皆至 是時 聞 凌遲梟示種誅者無慮千百, 其賢 抄 剪 剳 祖求賢懇切忍耐之意尙 詔 次年復作續編三編。刑法志:大誥者,患民狃元習,徇私滅公戾日滋 有 司強起之, 遂 棄市以下萬數。林鴻父翰仕元 自 可見。及洪武十八年定大誥 死 , 見獻徵錄 0 許存仁告歸 其十條云:實中 , , 或曰主上方應天順 棄官爲黃冠 棲 永 士夫,不爲君用 泰 Ź 0 山 公宜稍待 中十年 凡三誥所 太祖 列 , 不 罪 ,

辟之士 畏之臣 死後十一 其 風 家 0 身既不可 0 如 年, 焉能! 有司 此 之例 兗 仕 督 勝其 , 而 求 趣 , 激流 亟 任 覼縷 如 去 而 遇 捕 難 衝 , 合乎 盪 既成爲明初士羣之共同 罪 盡 囚 ,一至於是 0 談遷 0 , 仕 於朝 時 國 君 榷 者 臣 引 ,亦季廸所未料 何 乖 多詐 違 喬 遠 , 心 死 相 日 理 激 佯 大 相 狂 , 湿之勢 也 季 誥 · 迪生前 求解 之篇出 職 , 於此 事 又屢發上宜寬放之高 , 人人惴 0 可 自 兑 。 非 剛 慄 大誥之勒 敏博達之士 吏畏] 民馴 論以 定 其 溫 助 在 時 恭 益 季 其 毖 徵 廸

詩 或有之。 殺 夜出深宮 羣 , 云: 又按 士 , 豈在: 父解 然集中又有題畫 女奴扶醉 0 此 季 於詩文筆舌之間, 則不類明 廸嘗賦 ī 踏 蒼 苔 詩 初 |大詩云: 有所 掖庭 , 明月西 諷 事 刺 若余之所闡論 。二詩或是刺 獨兒初長尾茸 園侍宴回 , 帝 0 0 小犬隔花空吠影, 庚申君而作 ,季廸之不保首領以歿,殆決不在 朱彝尊靜居志詩 茸, 行響金鈴細草中 , 好事者因之傅會也 話謂 夜深宮禁有誰來。 世 0 [傳传] 莫向瑤階 郞 賈 0 禍 一吟詠 今按 吠 孝 人 陵猜 影 因 題 明 , 羊 忌 宮 初之誅 車 女圖 情 半

忠 硏 陳 水 面 良 磨 田 , 又明 股 直 明 詩 肱 上 日 九 |長江| 少載 重 紀 而 , 御 日 事 不 訴 朱同 甲 溝 得冤者 月 籤論 有 汨 膽 浮尸 羅 依 坐事 此 久 0 卽 證 云 : 死 , 其 如 帝疑之 , 據覆瓿 以 代 而 宋 |職罪 文章 不 潛溪劉 著其詳 , 制 集 **遂賜死** 見 誅 誠 作 ,有遭誣得罪 意亦僅可 多 • , 而 0 0 蔣 其遭誣· 四 豊 | 発而| 庫 有黄 葵堯山堂外紀云:同 提要有朱同覆瓿 已 亦可見 , 金來暮夜 賦詩見志云: 則季廸縱不乞身而退 0 在當時 , 祇愁白髮老風 集 四十趨朝五 , 以詞翰受知 謂外紀說頗荒 固 亦有不求隱退 波 + 亦寧必保其首領以 過 0 唐 宮 歸 典章 人多乞 魂 未 不 意 事 可 逐 書 東 業 欲 信 作 流 歷 便

**歿?至於世傳其題宮女詩賈禍** 正猶如朱同多爲宮人書便面得罪云云, 是皆不足深辨 也

## (四) 讀蘇平仲集

蘇 伯衡,字平仲。婺之金華人。仕明爲翰林院編修。乞告歸養。 景濂以翰林承旨致仕 薦以

集前有伯溫景濂兩序,伯溫之序曰:

自代

召至

復固辭

,

賜文綺遣歸

0

後起教授處州,

以表箋忤旨坐罪,卒於獄

土宇之最廣也 元承宋統,子孫相傳 ٥ 大明 撫運,土宇之大上軼漢唐 ,僅過百年,而劉許姚閻吳虞范揭歐黃之儔,詩文皆可 **,** ·與元同 而廣於宋 雖混

未

久

而

高

垂後

則

由

其

宏辭,已有若翰林諸公,余故人蘇平仲其一人也

昭然若足 所引, 此文在洪武四年,平仲以翰林編修得告歸金華時作,所引辭與今刋入文成集者有不同。 揭矣 殆是伯溫存稿 , 直道心之所欲言,此引則辭多寬假 ,乃門面語 ,校其異辭 , 丽 伯 溫之內心 前文成篇

亡禪遞 中之元 不及攘夷,其范氏文官花詩序有云:宋德既爽,元入中國 平 仲集中有代翰林院勸 , 與劉宋諸人所存無大異 殆猶夏殷之後有周爾。 進表 其虞文靖公眞讚,謂其接羣儒之統緒,煥一代之人文。則平仲心 有國 子學賀登極 表 , 有代翰: ٥ 元德既 林院賀登極表諸篇 爽 皇明膺運 0 , 共 皆僅 敍三代之興 言開 國

有遂初先生鄭君諡議曰:

赴 放 生 Щ 0 林 入 涵 /國朝 茹六經 無求於世,作爲文章, , 則求賢之使 **羣史之說** , 研究性 , 臨門 勸駕而 有志明道 命道德之蘊 不起 0 在前代 , , 譬如冥鴻翔乎寥廓 考求聖賢行 , 則 、持使節者交章薦舉 識之故 ,弋人雖慕之, 炳 知內外 • 署學校官而 輕重之辨 而 不 ·得羅 0 自

致之。則其爲學之効,又焉可誣也。

則其 日 : 不見集中, 論 其跋涉道塗也 出處進退,亦復情有偏注 <del>豈</del>戴良得罪死 , 類子房之報 而避忌删去乎? 韓 ,可爲當時士羣心理之代表。牧齋列朝詩集小傳引其 0 其徬徨· 山澤也 , 猶正 則之自放 0 其偏向之情更 可 人質戴 見 ٥ 众良畫像 今 此

集中又有南野堂記,謂:

平陽張君子玉 來 命 冒 向使夷夏未一 必天下承平而後遂。今子玉得託於田 進 , , 何地 能無憂思慷慨乎?坡南雖勝 不 不 旋 · 可居 踵 ,甲兵未戢 而 ,家於坡南 傾覆者 ,而世之士率不甘浮湛閭 皆是 居而安焉 , 田里未安, 也 , 於是益知子玉之爲賢 亦豈能獨樂哉!然居之勝如南坡, 夫野老, , 安而樂焉 里有桴鼓之警,門有追呼之及 巷中,慕當世之爵祿 日婆娑坡南 0 余觀在昔君子 非 , 以適其適 他 人所得 求自異於稠衆 獨樂山: 而及 無地 , , 蓋由 子玉縱 林 無之, 也 遭逢聖 與 不 世 ·與齊1 不量· 自 一時 混 相 一力而 民姓 一以 忘 也 0

非太平則不得安隱 此 義易知 然謂 混 即是太平 此則沿自元儒 心 理 , 故外於民 生治制 而 可 以

別自有其道統文統之寄也 0 然亦由 明 祖 以嚴刑御羣下 乃使當時之士 , 益增其求退之情 於此

文

蓋可見。

選 胥此 集中 焉出 -有元故章 又有商· 廣德路平準行 Ш 「舊隱記 用 庫 謂 副使郭君墓誌銘,謂昔有元以吏治撫諸夏,富貴之資,公卿之

善終 情 此 悼惜之意也 言元尚 然在上者求治之心既切,而在下者求退之意亦不免於過迫, 如季廸平仲諸賢,均爲此 化 國 吏治,明之開國亦復不免。倖進之徒多以罹 家興王之初,庶事繁夥 夤緣柄E 用 固 亦多矣 一時代之悲劇人物 0 , 非刀筆簿書 不量力而任 一逾於器 ,則無以記載施行,而吏由此見重 後之讀史者 禍 , 不旋 , 而懷道之士遂益急求退, 踵 而 相激相 觸罪罟以隕其軀者 所由 盪, 低徊往復而不得不深致其 而使心存恬退者不獲 0 此亦當 被選者號幸速 , 其 豊 少 哉 時 實

集中又有送樓生用章赴國學序,謂

必備 之也。 折之也 雖然 於戲! , 諸生生今之世,居今之學,吾見其易成名也 勝國之於諸生也,取之難,進之難,用之難者,無他,不貴之也。不貴之,以故 夫困折之,則其求之也不全,而責之也不備 朝廷待諸生之優 國 |朝之於諸生也,取之易、進之易、用之易者,無他,貴之也。貴之, ,誠前所未 有 。諸生生今之世,居今之學,不謂之厚幸 ,吾知其難爲稱也。吾所爲喜且懼 0 假借之,則其求之也必全 而 以故假借 可 貴之也 乎 也 困

此亦當時一持平之論 0 貴於士 • 求全而 責 備 • 此 亦明祖 用人心理 癥結 也 0

## 解縉之奏日

爲飾詞 方 椎 陛下進人不擇賢否, 所謂用之泥沙 而 埋囂悍之夫 不知皆臣下之少忠良也 亦盍忱詢 。出於吏部者無賢否之分,入於刑部者無枉直之判。天下皆謂陛下任喜怒爲生殺 有德。 0 監生進士 剔履負販之傭 是故賢士羞爲等列 授職不量輕重 , 經 明行 朝捐 修 , 刀鑷 建不爲君用之法 , 而多困 , 關冗習其風流 , 暮擁冠紳 州 縣。 孝廉人才,冥蹈 0 所謂 左棄篋筐,右綰 ,以貪棼苟死爲得計 取 盡 錙 銖 瞽 0 組 趨 置 符 朋 而 奸 雖曰 或布 以 倚法之條 廉 深受刑 立 朝

賢

無

亦可以見明初用人之一

斑

,

與平仲之文互

此

奏談遷國榷錄在洪武二十一年,

#### (五) 讀 貝 清 江 集

年徵 年 亭集貝瓊傳 七| (一三六四) 上推五十一年, 修 錢牧齋列朝詩集小傳 元史 三二八 稱十一 六 年除 今按:清江集甲辰元旦詩,五十今朝過 年九月致仕 國 子助 , 貝 敎 瓊,年四十八始領 應爲仁宗延祐元年 八年遷中 明年卒 都國子學助 0 吳續疑年錄 鄉薦,張士誠 甲寅 敎 o 謂 十年 (一三一四) 談經滯海濱 其 八生年當 致仕 據吳 , , ·隱殳山 明年 在 吳氏 元 甲辰為 延 推誤 記 卒於家 累徵 四 順 五. 帝至正 自此下推四 年 不 朱彝 就 間 。洪 二十四 拿 曝書 武三

八年 下二年張 土 則爲 誠稱吳王。洪武三年(一三七〇) 至 正二十 年 (一三六一) 乃瓊領鄉薦之年 始仕明 ,則瓊年五十七 又其前二年 宋 劉 章 建 康

其

清江集有徐一夔序,謂:

居官以 出 驟 以 意 公廉夫以名進士屛居吳淞江之上 新安程公以文,四三君子者,亦各以宏才碩學,居朝廷製作之任,聯芳而 元季文章鉅 鳴國 奇崛 胸 中之奇 殆若不以臺閣爲泰,江湖爲戚者。一 家太平之盛者 訓廸爲職業 才瞻 家 以泄其 而 氣 如虞揭歐黃相繼物故,而宣城貢公泰甫 雄 , 而長篇短章,亦不過應四方知己之請 無聊不平之思 , 則亦未見 惜其盛年遭 其有數數然者焉 , 時 。及值維 嘯傲煙月, 不偶 時及門之士,先生蓋其傑然者焉。余評其文 新之朝 浮湛田里之間 亦以詩文自豪,有凌轢古今 , 起自布衣 河東張公仲舉 , ,山林之下,念有 而 所以敷張神藻 , 會國家方育 繼 臨川危公太樸 材興治 所屬 響 潤 磅 礴 時 亦 宇 會 稽楊 宙之 第所 時 馳 吐

問國 深惜 自 元之諸鉅公, 蘷 事民 此 則 其 娓 序 不獲大用 生而別有文章之盛者 娓道之,若有餘情 作於貝氏之身後 並有謂其館閣之文不如山林之文者 如元 诗 貢張: o , 其於元明易代大關節 其於淸江 0 危程之居朝廷製 卽 如宋景濂 集 , 亦若同: 作之任 豈不居朝廷製作之任 則何佐 ,平平敍過 情其 焉 於清江 此見當: 在元 Щ , \_\_\_ 時 林田里之文,而於仕 而於元季文章之盛 集 羣 然同時文人亦復羣 , 士心理之狹隘 其仕明以後之作之不足以 若謂 廷臣 明 議其 以 後 師 可 不 以 承 則 如 所 不

厭羣望乎?今之慕西化者 有 其例 矣 , 大有抱歐美月圓 勝過· 中國之感 明 初開 國 羣 臣 大覺新朝 不 如

國

亦

瑰

鼓

清江 集有乾坤淸氣集序 , 謂

吹作 詭 諸 世 有 今 奇 0 元 絕 混 錢 唐金弘 始 袞冕棄而 一天下 視有 可 與言詩之味矣 唐爲 氏 南 無愧 時 精選當代作者凡三十餘人, 冠 出 鴻 生 0 , 或日 固 碩 有非 士 , 李杜而 若劉 劉楊 楊 而 虞范 下, 李杜者也 善詩矣,豈皆李杜乎?則應之曰 題其 出 0 而 (集日乾: 前輩采而輯之曰皇元風雅 鳴國 家之盛 坤 清氣 , 而 , 後 五 峯 生新 鐵崖 進 二公繼 , 亦既 法諸· 韶 濩 院 行 之 於 苦 作 息 而

蓋當 又有隴-元之世 上 ,文人自矜, ·白雲詩章 稿 序 必欲嫓元 謂 於唐 , 羣論: 成俗 , 廷臣亦無以

自

異

也

吳興 復 應 峯 者 余在錢 有蜀虞公伯生 趙公子昻 亦皆卓然可觀 **駸駸然有李杜之**氣骨 會稽楊公鐵崖 唐時 與二三子錄中州詩 浦城楊公仲弘 o , , 若天臺林顯之所著隴上白雲稿則未及見 錢唐張公句曲 西域馬公伯庸 而熈寧元豐諸家爲不足法矣 , ,總若干首 淸 ,江右揭公曼碩 江范公德機 而河東張公仲舉, , 成編 , 務鏟宋之陳腐以復於唐 , , 題曰乾坤 莆田: 0 亦留三吳,以樂府唱酬 下 陳公衆仲 至四 清氣 且. 明黄公伯 欲徧采四方之遺, 。蓋元初文治方興 0 在外 0 成 則永嘉李 其 曲 相 江 繼 一錢公思 金 起 兵變而 公五 春 , 而 朝

輟

然 維 爲新朝掌教職, 杜 元世 此 新 陵 序 , 廷臣亦不敢爲此逆情違衆之言也 作於洪 今以言夫明初 而 其歷數元代 不覺其出言之有慚 公武十年 爲文學之臣,苟非其 詩人,猶若不勝其興奮嚮往之情者 , 距其編乾坤清氣集已三十年 則明雖新邦, 0 若爲此於元之季世,子誠元人也, 心誠謂其若是, 而其情維舊矣 , 朝 0 則何爲言之若是其娓娓乎? 代 。又必欲謂其越宋而攀唐 此雖廷臣一人之言 已易 , 天地 則知元而 已變 , , 已矣, 廷臣! 然使舉: 親 是獨一 周雖 幾乎家太白 仕 世羣士不 明 舊 川 廷 也 邦 , 而 0 · 以 爲 其命 今親 而 心

存

集

其詩有五言書事二十韻 , 謂:

父老 難致 歌延祐 孫吳莫易論 君臣 憶至元。 0 如何輕大業 清光回 , 俱是竊 日月 , 殊恩 喜氣入乾坤 0 飄零從老去 0 不意 經 , 局促偶 淪 喪 , 相 生存 圖 事 0 **并吞** 醉 憶劉 管葛眞 琨 舞

狂興阮籍言。 登臨 只灑淚 , 去住 總 銷 魂

此詩 未入明前之一番抱負 經亂思昔 , **猶之歷天寶而數開** , 亦無以異於明 元 也 初之其他 0 廷 臣 諸 非 士 用 世才 也 然其 於故 國 舊 君 思 欲 有所 獻 則

固

又有送潘 時 雍歸 錢 塘詩 謂

尺箋

盜賊不足笞

子實濟時 具 飛騰 方 在 茲 0 匠 石旣 已遇 , 小 大隨 所施 o 從容宰 相 前 奮舌論 安危 豊 無

-/44-叢論史想思術學國中 是廷臣 感慨 意集, 堂記 與 が期望 .雖不自得志,猶望之友生,而謂盜賊之不足平,中興之猶可冀矣。惟以淸江 則意氣之間

, 面

感慨

亦

不

深

,

期望亦不摯

,惟其

心存昭代

•

則終自

不可掩耳

相去甚遠

0

蓋伯

溫抱濟:

世才氣

,終思牛刀一

割

,

而廷臣乃文士,

則

亦僅

見之於

一集較之劉

然余讀淸江 · 集 , 實亦有超越一 時之見,流露於不自覺者, 此 亦不可不表而出之。集中有復古

謂

夷 孔子生春秋 非 性 , 至變其嗜好 之獨異乎人,出於氣習薰陶之外也 時 , ,變其語言,先王之法,蕩然無復存者,可勝歎哉?有能以復古爲事 往往傷今之不如古,則春秋已非古矣。矧距孔子二千餘年 中 國 胥 淪

於

十七年 謂 此 位 此 文據四 中國胥 文正作於元明易代之際,而稱洪武一年,蓋是洪武建元後改定,已不欲復以至正紀年也 , 定號 , 明祖· 部叢刋本,乃作於洪武一年歲丁己多十月。按丁己應爲洪武十年,丁未乃元順帝至正二 淪 日 於夷 明 定是年爲吳元年 , 建元洪 先王之法蕩 武 0 通觀此文之全體,殆不似作於洪武之十年,疑丁巳當是丁未之誤 然無存 , 是年十月,遣徐達常遇春北定中原。 卽 此 兩語 可 稱朝陽 鳴鳳 矣 翌年 , 明 祖 以吳 王 卽 一。文中 皇帝 則

集中 文 /有東· 八白軒記 謂

季大亂已極 周之遷 歷春 至宋: 秋 戦國 始白 0 , 而 則既昏 禮樂文物爲近於古 而 白於漢 0 自漢之亡, 0 宋訖而中國復淪於夷狄 歷 南 北 六朝 則 旣 君子於此蓋深傷 昏 而 於 唐 0 五. 時

之,必有繼宋之白於百年之後者。越二十年而大明肇興。

是於二十年前而廷臣已有此言。故曰:

余既喜其言之符,嘗欲爲說以著其無往不復之理 , 而 姚江 虞玄佐氏 有讀書之所 題

日東

白,命其從子來謁記,乃書以復之。

今不論二十年前能爲此言者有幾人, 即二十年後肯爲此言者又幾人,後之考文讀史者 獲 覩 江

一集復古堂東白軒兩記,亦庶可稍釋其所遺憾矣。

然廷臣本非幹濟才,情不存於進取,其赴召留別諸友詩云:

用世非拙迂,白首 在 Ш 林 。詩書況 久輟 , 禮樂非 所任 一。王事 忽相 縻 遂令違4 我心

西道, 惻惻辭東岑。中田澤雉 雊,古木鶬鶊吟 0 所親亦胡越 耿 耿辰與參 。愁來

涕下徒霑襟。終當反田里,灌園希漢陰。

已洪武三年,元帝北遁,天下方一 0 朝命初頒 而赴召時之心情! 如此

餘

可

想矣

回

首

迢

迢

適

其四月十日兒子鄒翩· 來鳳陽 , 留 月 ,遺歸 ,因令早營草堂殳山下爲止息之所云 一詩 謂

既非匡世資,庶遂陶阮逸。

其乞告得歸,蓋亦六十五歲矣

集中有古意三首,其一云:

六國多好士,堂上各三千 。所親苟 不 愼 禍 福 恒 相 因 0 李園賊黃歇 0 馮 職復 田 文 種 桃 得

秋實 蒺藜: 徒刺人

時 士 失職者爭走其門, 命之際,一 則士之自處 命貽譏載籍 明祖 更多躁進之徒 既多方求賢 切草創 ,亦非盡在幸不幸之兩邊也 史迹之變 及誅 。惟多不賢之躁進,乃益堅賢者之恬退 ,天下聳動 。五季無士,宋祖乃以不戮士人之家敎傳譽後代 有未可資 連坐死者至三萬餘人。廷臣此詩 朝廷大臣殆亦多務延攬 端以爲論 定者 0 而在明初羣士中 )胡維 0 明初既 殆亦目擊有感 庸 傳稱 用 0 士無制 四 元末多士 方躁 廷臣終亦克保首領以: 0 淮 , 呵 則其 誅 明 祖 土 時 一亦無度 雖多恬 及功 乃以 草菅士 臣 , 退之 武

革

夫

#### か 讀胡 仲子集

潛溪 年七 傳未 有胡 體大思精 國 初大臣交薦其文行 十五 仲子 廣 ,鮮 余讀明初諸臣集, 於此可 集 知 0 仲 潛溪遭時遇主 此六論又收於全謝山宋元學案中 謂 申 見 是 四 編借鈔於應敏齋方伯 。然皇明文衡所收仲子文頗不少,而其 庫 有 提要仲子 上 一閔其老 \_\_ 人焉 時高文典册皆出其手。仲申老於廣文, 集 ,當爲大書特書 , 命 ,稱今印 爲衢 係寫 州 本罕傳 教授 0 則仲子集雖 本 者 0 。文九卷 召修元史成 惟 日 寫 胡 (衡運 不 翰 本猶傳於世 顯 詩 仲 正 申 卷 其爲識者所 紀 賜金帛遣歸 有 尙 賢井牧 與四 位不配望。是以天下但 仲子集 清季胡鳳 |庫書目 珍視 · 婚習皇 0 錢牧 洪武辛酉四 丹印 可 符 濟詩 一初六論 知 金華叢 仲子 集 月 集之流 小 知有 卒 傳 尤爲

茲當摘 述六論 大意 0 其衡運 篇 云

天生仲尼 漢爲晉爲 皇之世 隋 當五 固君子之所深患也 爲唐爲宋, 伯之衰而 垂 不能爲太和之春者何也?時未臻乎革 二千年 猶未臻乎革 也 0 泯泯棼棼,天下之生, 也 0 仲尼沒 欲望其 , 繼 周者爲秦爲 爲王爲

**梦,天下之生望其** 竊疑衡運諸篇殆成於元季,然文中歷數秦漢晉隋唐宋 深識之士矣 有革 , 固 君子所深患 0 嗚呼偉矣! 其 意境殆非當時 上不及拓跋 魏 諸儒 , 下不 所能 數 胡 量 元 0 巨 而 眼 謂

先

曯

田

泯

泯

其正紀篇云:

天紀不正 楊廣弑父與君,天下之首惡也,與天下誅之,天下之大義也 狄治夷狄,勢至順也 與之,春秋之義也。蓋將以正天地之紀也。天地之紀不正, 號天可汗 飾 爲之,始亂天下之大義矣 天子受命於天,義至公也 是以 魏晉自處矣 ,不足以爲君 刻之璽書 。由 ,是以夷狄自處矣。 。虛漠南之境, 0 地紀 漢之後,汨天之紀者,莫曹操若也 。虞夏商周之取與異道 0 何謂 不 庄 地 紀 ,不足以爲國 徙其部落 , 中 以夷狄處者, 國之與夷狄 , 居吾內 o , 人紀 皆推至誠以順天者也 , 示正 以夷狄與之, 地 內外之辨也 , 留其 雖有人紀 ,不足以爲天下 0 0 不 汨地之紀者 君長 知出 0 此 以魏晉處者 以 ,君臣也,父子也 中 備吾屯 。而 而 國 治中 後世 莫劉淵若也 從事於繁文僞 何謂 衞 一欲以 國 ·以魏晉 天紀 而 以 帝 夷 力 加

是知生人之紀未嘗泯也

夫婦 魏晉之初 忠臣孝子, 耿紀之徒 也 朋友之交也 , , 遭時· 毛玠 奮不與之 多難 荀 彧 , o 雖以 淵雖奪漢 未嘗不駢首接迹於當 長幼之序也 操之奉獻 安樂 , 何 帝 , 自謂漢氏之甥 自 爲扶弘義 立 哉?! 世 0 鼎鑊 而 , 示至公,而當 人紀之在天下 在 ,而 前 孔 而 恂逆 不 辟 時之士 知其奸 刀 固 有 鋸 不 在 , 睦 如 可 後 夸 甘 泯焉者· 而 亦 寗 不 仕 顧 周 其 瑜 也 吾以 朝 金緯 0

偉哉 拳拳乎人紀 紀 此 顧 亭林! 論!元明之際諸 日 , 「知錄論」 而 亦豈能明 風 儒知此者又幾人?明末大儒黃梨洲原君能 俗 人紀之大本大原所在乎?仲子之論 能 明 人紀 0 明 其 斯必無明乎其二矣 ,可謂逴乎獨出 別天紀 。明 初 諸 王 矣 臣 船 Щ , 極 噩 其 夢 黄 所 書 至

能

明

地

,

徒

# 其尚賢篇有云:

其 亡國之人 監 盛 連 志 道 遠迹田野海濱之人,皆起而任公卿大臣之責 也 東海 上 伸大義於諸侯之上 则 無曠官 雖千乘之國 , 布 魏之公子枉車騎 非 衣 盡 也 ,下無遺才 不肖 0 居 邯 萬 興王之臣 鍾之粟 鄲 0 漢唐數百 圍城之中 虚左迎之。 , 其君臣遇 , 曾不足以延搢紳游談之士 ,非必皆賢。天之生才, 1年之盛 毛遂 合蓋. 不肯 加此 西 , 趙下 未有肖其 面 (,伊尹傅說太公望之於商周是也 而 0 周 帝 士 德既衰 秦 也 風 , 烈者 人以 而 何代無之。遇之以道 楚烈王願 ,孟軻氏之於齊梁是 , 爲 春秋戰國之際 0 天下 高帝太宗 士也 奉 社 稷 警然負: 解衣輟 歃 侯嬴 Щ 聽之。 也 0 遇之不: 則 哺 其 魏 商 耕 高 周之 傾 門 以 漁 身

有矣 散 財 , 從海 求所謂天下士,果何人哉! 內之士, 舉天下於反掌之間 傳世、 永久。 當是 時 也 日奇士者有矣 日 國

又曰:

此 . 與黃梨洲原臣置相篇所論 至趙宋 也。官之得失,政之隆替所繫也。由君子言之,是猶後世之論相也,未能盡古之道也 人主之心,其精神 不風動而應之於下 而後 ,世之君子,有以此爲任者,而其主不能擇也 念慮, 0 天下至廣,人才至衆,其要莫先於論相 大略相似 與天地 相酬 。謂漢唐數百年之盛,有奇士, 酢 。苟積至誠 東京大公,求天下之賢以寅亮天工 0 0 相之賢否,官之得失所 有國士,而無天下 土 0 蓋 又 孰

皆曠 世偉論 也

謂

相之賢否,爲官之得失政之隆替所繫

,

是猶後世之論相,是仲子心中之所謂

相 ,

猶不

止

此

是

,

其井牧篇有云

者 之風熾。恭儉之化衰 歸於上 年之久不克潰於成 井田之法行 況 使盡棄其私 ,奸與於下,此二也 ,民有 家之產乎?以均 0 十 非大有爲之君 便 ,功利之習勝。 , 其謂 不可爲者 田授農民 ,不能致其決 經久之慮少,僥倖之愀多。 蓋 亦有一 ,猶有不能周之者 ,此一也。中古以降,淳厚之俗薄 一焉 0 窮天下之力, ,又況生齒滋衆之時乎?怨 以限 傾天下之財 田抑富強, **猶有撓之** 非數 澆傷

其愼 習篇· 有 云:

之敝者 後王 易行者爲不可 異哉!夫與世遷徙 王皆聖人也 由 秦以 , 來,天下之變數矣,議者莫不慨然欲追復先王之舊 以其近己而 荀卿子曰法後王 。其所以爲天下者,莫不本之天理,要之人心 行也, 俗變 而 則秦人之敝去矣 偃 仰着 相 類 , 蓋有以啓之也 , , 議 戰國之遺習也 卑而易行 也 0 惟聖爲能 0 0 卿學得 天下有能 %而不醇 盡倫 加其近 0 9 歷漢 春秋譏變法而大復古,豈好 惟 而遂 王爲能 而 唐千 以 相類者爲不可法也 毒天下。 盡制 數 百 年 。三代之興 太史公日 而 卒循乎 秦 卑而

爲

法

其

## 其皇初篇云:

天下 聖人也 心不 於饑 羽革 息蝡 焉 。 者 能盡性 同由之謂 草木 又何紀也?其人果聖而世果治也歟?宜於此有以變而通之矣。何至委其 德 寒而 動之屬不異也 一也 此聖人所以爲萬世開太平也。 不 及於災患 , 而 ,人皆得之而有不得者焉。性一 則 道 不 不能盡德 , 以 同得之謂德, 爲野 , 而不以爲墊。 斯可 0 矣。 瘞 以 矣 不能 積薪 0 同善之謂性 五龍燧人,彼十有七氏者,何氏 盡德 毛食血飲 , 而 鴻荒之世,天地草昧 , 不 則 ·以爲薄 不能 也 ,同靈之謂· , 雖 ,人皆善而有不善者焉 1驚擊獲: 盡道矣 0 約以 結繩 (搏之屬) 心 0 故雖天也,莫與能 0 道 ,民物雜揉 , 而 不異 也,人皆由之而有不 不以爲愚 也 也 ? 0 , 此 九頭 ,穴居野處 而 不以 0 人 凝攝提 人人於 其 民· 焉 也 爲 , 安之, 而 非天 臊 彼 成 由 蒙以 與 能 批 者 趸 紀 蚊 侗

之革命, 之世 賦 以爲 法 之域 羞 化 於 物 所 道 宜 者 而 桴 無事 非 稱之矣 如 無 , , , 老氏 神 庠序之教 鼓 不 與天下共反其朴於太古之時 其要皆所 天地者, 人鶩其私 天下 卒 前 無稽 累 0 已矣 皆天命 之所謂 數十 面 念慮之孚 0 矧漢以下乎 人不 以其 無事 加 易簡 0 以 萬 智異說 愼 , ·與 所當 關 納民 性 故聖人之心,天地之心也。聖人之性,天地之性也。 乏也 年同 道 , 知 也 盡萬物而 市 而 最爲有效 , 7於道也 焉 堅於金石 權 然。重之爲郊廟 已矣。聖人在位 於 0 , 0 禽犢 苟 刑名農墨之家,崇儉質 衡度量之制 0 Ш 聖人之化如天 不 Ш 爲 物無不 , 之風 0 , 而 皇 0 及周之衰 而 故 非五帝三王之所 , ,意在懲周之弊, 氣不同 不 **猶當** 日 成。有生者各一 , 少拯之。豈天生民立君之意乎?必 天地 刑賞之具 社稷之事,公卿大夫賢不肖之黜陟 ,大之爲朝廷之遜禪,父子之繼立,變之爲征 爲 , , ,王降而爲伯, 帝 而 感而萬物 五方之民異俗 神 0 苟 , 不與能焉 ,禮樂之用 不爲帝 尚功實 尙 化生 其性,有知者各一其心 也 而非大公至正之道也 0 聖人之道,譬之天地 0 , , ,而老子貴清淨 伯降而爲戰國 聖人感人心而 , 古今之風氣不同 蕩蕩乎! 猶 ,皆民生之不可 當爲王 平平乎! 降是 聖人以其心 不 , 天下 ,下至閭 0 , 然 ·去者· 將棄· 而 漢用其術 諸子分裂聖人之 。聲氣之同 矣 和平 霸 皇極之道 , 0 也 而 , 歷代之治 井伍 養 溥萬 聖人 天 0 聖 亦 討 地 , , 蔑禮 文景

牧之

君

臣

行

其

而

之所

不言

異

仲子六論大旨, 具如上引。 其學蓋原本宋儒 ,而一於治道焉發之。上下千古, 駿邁恢偉 卽 求之

也

人之

, 捷

年 老 子當元之季世 兩宋 欲 晚生三歲,較之劉誠意, 煩 , 以事 啓多聞於來茲 命爲 二三八二 , 亦少其匹 衢州教授 , 授衢州教授,此獨得之。蓋明祖特憫翰之爲老儒 避地 仲子年七十五 0 ,待一治於後王。又曰:有王者起,將以見諸行事 厥後梨洲著書 此據景濂集 南華山中著書,蓋亦下同黃顧之用心矣。 尚晚生六歲, 其在洪武初元, 應年五十二, 而牧齋詩集小傳謂上 0 ,其然!豈其然乎!余讀傅維鱗明書胡翰傳 是仲子生年當在元延祐丁巳四年,(一三一七)較之貝清江 , 稱明夷待訪錄,亭林爲日知錄 ,非憫翰之老也 仲子卒在洪武辛酉 , 自 , 稱意在撥亂滌汚 以躋斯世於治古之隆 , 謂上 ,是洪武之十 憫翰老儒 古法 閔 0 , 不 其 尙 仲 用 加

仲子集有與孔元夫按察書,謂:

近廢 疾 僕委巷之人也 文, 之職授之 之,始知僕誠羸 君臣之義無所逃於天地之間 移文見徵 , 人。 仕宦及閑良人才殘疾老病者,容其乞身,不覺喜形於色。 如是又數年。平生迂拙 如是者 特不欲以儒見棄耳 有司敦迫就道,及至金陵,入覲主上, ,非有高蹈遠引之志以偃蹇傲俗 十餘年 疾 人也 。比罹兵變 留省署兩月,察其學與才,又益知其迂濶不及事者也 0 , 顧惟] 百事墮人後。今五十有九矣,往歲朝廷急求才 承乏既久, , 孱弱多病, 鼠身山 谷 虚糜廩 中年屢更憂患 ,又非有良田 , 自 腰及 食,無補名敎 退謁今相國李公於中 髀 , 逐 廣宅優遊卒歲以自足 (成重) 頣 閣下乃欲以不肖之名舉 領額發 , 今年士人家見錄至公 膇 癰 倉卒弗治 書 , 支綴? 過聽 0 遂以學校 省之屬 視 循至足 豈不 息 , 已 知 見

之,不採其榮獨衰病有大不可者乎?

此 仲 子固 書雖極道衰病 深知其於時爲不偶矣。且自五十九下至七十五 ,然辭裏行間 固 不專以衰病乞退 , 故曰察其學與 ,尚十六年,則豈誠衰病難友乎 才, 又益 一知其迂 濶 不 及 是

余考蘇平仲集,有送胡先生還金華序,又有祭胡先生文。其祭文曰

嗚呼仲申 良金美玉,庶足以方公學術之精純 商鼎 周彝 , 庶足以擬公述作之古雅 0 惟 嚴

毅以自持,曾毀譽之不假。故不合者甚多而合者恒寡。

又曰:

寶懷 而 不售 ,材蓄而 不試 0 代言顧問 , 上雖 注意於柄用 0 引年乞歸 公則必行其素志

又按潛溪集有胡仲子文集序此亦見仲子之不以衰病退。

謂

往與退之角。濂嘗以爲習之識高志偉不在退之下,遇可畏如退之而不屈 者,則求古人之賢者而師友之。苟有得於心矣,當時知否不衈也,身之賤貴勿論 韓退之抗顔師 視千載以上之人,若同堂接膝而 爲事功,宣之爲言論 古之君子, 其自處也高,其自期也遠,自視也尊,其擇師與友也審 一世,自李習之以下,皆欲弟子臨之,而習之謇然不甚相下,崇言正 ,一致也。其心廓然會天地之全而游乎萬物之表,視古今如 與之語,何暇以凡近者累其心乎?吾友胡先生 , 舉天下無足慊吾意 ,眞豪傑之士 也 同 郡 論 日 ,行之 哉 暮 , 往

講 外 業 唐太宗能 不 觀 宋儒 景 名 , 遺書招之, 李文忠 濂 0 之所言 性 而 禿 歸 行 修 生 若 初 優容 潛溪與 齒 理 諸 吳 , 諫之 德愈邵 豁 文 或謂: 上 輒 貞文公立 , 亦 魏 矣 憫 , , 延致共語 亦可約 兒罪: 徴 (仲子) 仲子意境洵爲卓越矣 有習之之辭 先生 其老 , 明 見世之士多矣, , 爲同 惟 祖 未展 而 夫 明 , 文愈雄 錄 略推見仲子之所以不見用於當時之所在 不 日 , 祖 英 學 所以 先 欲 0 似無此識量 (所學, 生嘗 如文忠尚 此 重 , 又年長 儒生 而 期待者甚隆 煩 。大江之南稱賢者 所得 以 師 而 家 心之所仰 政 事 之, 不 言 者非習之所及 先生澹如也 0 , , ,竊恐仲子亦不以汲魏自限。 明祖: 其稱 命爲 能 容 何得出: 吳公 , 求賢如 衢 而 , 仲子爲先生 而 則 州 服 先生不爲之屈 亟 仲子 者惟 卿 稱 敎 0 , 必曰 也 授 其 先生嘗慕邵子程子之爲人, 口 不及,然用賢果何如乎?昔漢 ? 何 才 在 o o 不置 論 文忠病悸不治 濂 會脩 先 先生。今天下有國之初 , 更非 矣 生 與先生同師於吳公, 元史, 也 0 0 , 則 偶 一矣。又潛溪平仲於仲子皆 則先生之文,豈獨今之所難 黄文獻公晉卿以文學名天下 。諸公旣亡, 然 如 傅 復薦入史館 0 胡 罪 維 維庸之死 惟 鱗之所謂 年四十六 錄載 先生之學益成 相友五十 仲 其 ,大臣交薦先 公武能敬 子憫潛 (所著衡 史成 憫 0 文忠 其 明 (老儒: 祖 , 僤 賜 溪 餘 嘗 稱 運 欲 先 興 汲 攻 遇 年 井 者 金 師 舉子 牧 帛 生 見先 乎? 師 生 行 仲 ,

皇

髮

面

始 並 論 牧 此 齌 兩 詩 **汽** 集 小 則仲子之不爲人知也久矣 傳又謂 :::天下! 但 知 有 潛 溪 蓋仲子之於明代 鮮 知 仲 申 仲 申 沒後二百 其人在若存若亡間 四 十 餘 军 , 吳郡 仲子著· 朱 良 育 叔

英

其

豊

海

不

宜乎

心未嘗欲用於元 ,而全氏學案亦終以仲子入元儒 ,此余所以作爲此篇,而尤深致慨於仲子之一集

也。

# (七)讀九靈山房集

之後 引 無鯁避 首 焉 死 歸元拒明 正 矣 主老陳琳 也 , 中有河清頌,爲張氏畫策,使降元以拒明,故其遊崑山懷舊傷今之詩,於張楚公之亡,有餘恫 0 逢籍! 其人則以甲乙爲目,其年則以犬羊爲紀,庾辭讔語, 傷庚申之北遁,皇孫之見俘,故國舊君之思,可謂極矣。謝皐羽之於宋,西臺之記,冬青之 而至於吳城之破,元都之亡,則唇齒之憂,黍離之泣,激昂愾歎 王逢有梧溪集,戴良有九靈山房集,四庫皆以入元代。錢牧齋列朝詩集小傳王逢條 有立志不仕明廷者 詩篇 也 然老於有明之世二十餘年矣,不可謂非明世之逸民也 江陰 殆狂而比於誖矣。或言犂眉公之在元,籌慶元,佐石抹, 戊申元日則云:月明山怨鶴,天黑道橫蛇 據王逢梧溪集, 寂寥 祖 , 世華裔 彼其志之所存 , 此 亦不可以不誌 遠自百世以前 乃逢之謀。此事亦見明史逢傳 ,與元吉何以異乎?嗚呼 0 烏得爲元遺民乎? 明史載戴良王逢不忘故主,每形於歌詩 。丙寅築城則云:孺子成名狂阮籍 ?!臯羽之於宋,原吉之於元 暗啞相向, 0 。余按潘聖樟國史考異 而牧齋以逢比謝皐羽 誓死馳驅,幾用 未有如原吉之發攄指斥,一 ,情見乎詞 。前後無題十三 ,故卒不 亦謂張 自 則擬不於倫 , 其 爲 遺 殺 伯才 稱逢 。佐 土 無 命

今按九靈集附趙友同所爲墓誌銘有日

之, 討 四 等處行中書省儒學提舉。 先 明 論 生詩名 濂洛 國朝洪 日感微疾 性 雄視 理之微言 、武壬戌 東 , 遂端坐卒於寓 南 , 居無何 以禮幣徵 家居遠城邑 然時事 , 已不靖 舍, 起爲月泉書院 , 至京師 , 實癸亥四月 朋游講習頗艱 ,乃浮海至中州 , 上欲用先生 山 長 。享年六十有七 0 , 即買 至正 ,以老病固 (地縣 辛丑 欲與豪傑交而卒無 西 , 擢 結屋 授 辭 中 上數十楹 , 順 頗忤旨 大 所 夫 遇 淮 日 0 待罪久 遂 南 與 同 南 江 北

又按全祖望結埼亭集外編有九靈先生山房記,謂

聞 韋 命 獄 達 五 曾見太祖公云 明兵定浙東 世 布 0 。久之,浮海至寧 0 即令以 而 明年暴卒, 而 皆能 未斬 其亡 也 礪 瘐 , 於以爲天地扶 死亦爲元也。古來喪亂人才之盛莫如季宋 不仕二姓之節。此宋人三百年尊賢養士之報也。元之立國甚淺,崇儒之政 九靈避地於吳中,依張氏。久之,挈家浮海至膠 乃世 錢尚書受之以爲自裁 行傳 俗流傳誣善之詞 ,時洪武六年矣 中 人 物 元氣 、纍纍相 敷 0 0 (按曝書亭集亦謂卒於獄) 望 九靈以不肯屈身 又十年而被徵 , 是豈元之有以致之, , 而 太祖欲官之, 被繋 不必有軍師國邑之人 0 , 或云, 州 抑亦宋人之流 使其出於自 欲投擴 九靈不可 明兵入金華 裁 廓 風善俗 軍 卽 固 前 作旨 爲 以 九靈 下 不 元畢 無 僚 得 歷 下

今按全氏發明九靈心事, 較之趙氏 其辭遠爲顯白 以趙 氏當時 猶有 所避忍也 0 至以 宋 元 兩 季

又本之錢牧 物 並 論 , 齋 皆 目 牧齋屈 以 爲天 (地之元) 節 淸 廷, 氣 更無足 , 其 論 本之黄 (梨洲 則 民 族 正 氣 梨洲 亦 有 所 不 瞭 , 梨洲·

之待元 尚不: 乃具 京 所 死 不忘: 徒 以 毌 伍 涕泗之横 且 虧 Щ , , 9 則 能 狀 夕 藁 過 慚負皇帝 太 故 尙 鮎埼亭集九靈 知者 聞 聞 國 臣 街 祖 而 辱 遠 如蔡子英 流 起居 北 令置 戴 o , , , 亦 尠矣。 上 以 謂之愛國 庚 王 帥 。此在鶴年 一歎曰 投瘴海 外舍沐 死後 。臣有 申 可謂仁義備至矣。其失節仕明如危素輩 知 ,毋令天下謂 薦 北 , 此亦有明一代文士大夫之恥也。猶幸此後建州入主 尙 遁 山 , , 其姓字聲名, 未 吾何苦一蔡子英,彼喋喋泉下訾我哉 後 , 禦魍; 痼 房 仕 ,欲官之,子英退而因舍人上書,曰:皇帝恢廓宏度, , 猶可。如王逢戴良,豈亦所謂子誠元人也 疾, 則 記 真 底七 何 備 飲泣賦詩,戴良爲之序,謂其 後 顏之厚。 放之去漠北之資格 我有殺義士名。 魅無人之境,臣若茹薺。 迷於心志, 命 又繼之以海巢記 , 躍馬食肉, 尙 明祖 猶 流傳不 藥石 有放元官還塞北之舉, 自是每年 匪解 十有五 歇 , , 然亦所謂 論 0 夜深號 及丁 較之胡翰陳謨輩 年,一 (痼疾兩句見罪惟錄) 臣竊惟 帝太祖益重之,陰戒舍人 , 固 鶴 篇一 使 不止 痼 ! 年 遘 板 蕩 り明 ·縱出 疾迷 0 句 祖 , 丁 , 意輕 , 塞 傅維鱗明書蔡子英傳 心 舍人問之, 鶴 知有元君而已乎。然謂之憂君, 者 ,靦顏失節 皆寓憂君愛國之心 年 , 追元故主於和 ·乃色目· 不服 0 轉若 明臣忠烈接踵 明 祖 , 顯焕 隱忍 至如戴王之流 日 曲宥亡國之臣 人, 业少本書: 不發 謹事子英亡恙 皇帝幸哀憐臣 自以家世 我自念故 林 而 生 ,子英逮 ,讀之不 如蔡子英之 然則 可 亦 奪志! 以 有 主耳 ,不自 仕 實 其 相爲 明 元 示 亦 知 祖 至 0 ,

掩 蓋 然戴王諸人之遺羞國史,則終亦無可洗滌 也

沼

集 基 入 多見誅戮 , 預修 然夷白齋集乃由戴良編次,復有良序,茲節錄如次:其文曰: 何啻魏 牧 之。 盛 世道有升降 齋列朝詩 以深仁厚澤涵 自天曆以來 義之言起而 元 0 漢興 我朝 而 史 武之不殺陳 基以 賜 [集小傳] 闽 麾之, 金加 、地之廣 董生司 廉謹得免。今所傳夷白集,指斥之詞 風氣有盛衰 養天下垂五六十年, 擅名於海 琳 還 甲前集陳 然後斯文幾於漢。宋廬陵歐陽氏又起而麾之,而天下文章復侔於漢唐之 馬遷揚雄劉向之徒出 0 基在藩府 **曠古所未有** 聖朝寬大垂三百年,語言文字一無忌諱 內, 基條 , 惟蜀郡虞公, 而文運隨之。周衰,聖人之遺言旣熄 , , 飛書走檄 謂基參張士信軍 學士大夫乘其雄渾之氣以爲文者 , 豫章揭公,金華柳公黃公而已 而斯文始近於古。至唐之久,昌黎韓子 ,皆出其手 ,嚴然臚列 事 敵國分爭,語多指 杬 ,相與鼓舞於里巷之間 來吳 , 後人亦不加塗竄 於乎休哉 參太 , 諸子雜家並 固未易以 尉 。蓋方是時 府 ! 斥 軍 余未獲見梧溪 事 吳亡 一二數 ,太祖之容 0 起 以道德仁 吳平 晏然無 而 吳臣 祖 汨

亂

潔

臨川·

危公之浩博

彬彬

郁

郁

何可及哉!

Πij

得先生以紹其聲光,

我吳王聞其學

卽以

唐

說

理

則

本諸宋氏

,

而學問則優柔於周之未衰,學者咸宗尚之,並稱之曰

本

朝之盛

極

矣

繼是

而

起

以文名家者

猶不下數人

如

情

田

陳公之俊邁

新安程

| 虞揭

柳

黄

而

以異於漢

唐宋之盛時

故

時

作

者

率皆涵淳茹

和

,

以

鳴太平之盛治

, 其 摛 辭

則

擬

諸

漢

然

宗

而戴白之老,童兒幼穉

習

其

惟

我

朝

乎?

我朝

輿

、地之廣

曠

古

所

未

有

0

學士大夫

乘其

雄

渾之氣以

爲詩

者

固

未

易

數

然自:

姚盧劉趙諸先達以來

若范公德機

虞公伯生,

揭公曼碩

楊公仲弘

以及

亦皆

視

唐

爲

無媳

0

詩

主

議

論

,

去

遠

0

聲

以

掃

宋

人之積

爲

志節之士

0

嗚

呼

!

良可

吁

矣

,

上

,

0

而

降

三光五

嶽之氣

0

宋歐

蘇

王

一黄之徒

卓卓 樞 至 府 於 都 町 稱者 事 今幾二千年 起 於家 , 又常 不 不 , 斯文能 數 過 數 年 間 人 活 自 而 振 長 其 何 拔 世 以 省 之不 幕 追 於 其 數 古者 後 而 由 人之難得若 惟漢 奓 軍 陞 唐 及 內 宋 史 是 歟 , 迹 及 愈顯 我 朝 而 , 文愈 而 几 世 工 之中 . 9 自 周 衰 以

張士 翌年 名 虞揭 號 此 隱 文收 日 匹 誠 吳 柳 克元 黄之徒上 明 九 , 漢主 靈 知其 Ш 都 Ш , 陳友諒 + 不足與謀 房 比董 ·五 年 集 元 帝 , 三馬韓歐 不見寫 徵 已先 北 入 遁 , 京 挈家浮海 , 年卒 作年 距 , 猶 而 良 謂 爲 月 不 , 至是漢 至膠 是國 屈 此 , 文前 而 0 家深 夷白 州 爲 降 後 , 欲間 四 胡 **齋集有之,爲至正二十四年** 仁厚澤涵 , 再三年 年 臣 道歸 , 0 矢死 而 王保保 , 養之所致 良 吳王張· 不二, 方以! 元之盛 , 以 會 士 0 視劉誠 道梗不 讀 誠 被 其文 運 執 上 達 中 意之自致於功 擬 , , 徐達 可 辰 周 0 洪 '徴其無識 漢 五. \ 武 式 六 唐宋 等率 月 是 年 師 , 名者 北 南 以 年 史 元之作 還 定 尙 稱良 中 明 變 原 不 祖 失 姓 者 依 建

九 靈 氣運 分 山 房 而 有 浮原 升降 集復 有 卑弱之辭遂 皇 人物 元 然宋 有 風 盛 雅序 不 衰 能 以復 漢 可 法古未 與 古 則 引 0 唐 其 遠 文 相 風 風 函 證 雅 夏 雅 茲 遺 , 文運 矣 音 再節 , 能 重 猶 錄 興 得 有 如 夫風 所徵 次 , 李 其 杜 雅 魏晉 之正 出 文曰 焉

度者 優 以 馬公伯 情之正,基之德澤之深 童 山 有 不信然歟 新學 鳴太平之盛治 以 入乎周德之未退,蓋至是而 , 0 數計 我朝 相與歡 , 固 庸 ,薩公天錫,余公廷心, 何其 爲政 已烜 。此皇元風雅之書所爲輯 。蓋方是時 呼鼓舞於閭 耀衆 盛 爲敎之大, 也 0 其格! 目, 明往聖之心法 調固擬 祖宗以深仁厚德涵養天下, 巷間 而隱人羈客 , 流風遺俗 與夫流風遺俗之可槩見者 諸漢 熙熙然有非漢唐宋之所可及 本朝之盛極矣 皆其卓卓然者也 也。良嘗受而伏讀 珠捐壁棄於當年者 ,播昭代之治音 班班 其 八理趣固 而 0 在 繼此 資諸宋氏 0 劉 。至於岩穴之隱人,江湖之覊客 禹錫謂 而後 垂五六十年之久,而戴白之老, , 庶 舍是書何 , 於凡學士大夫之詠歌帝 展 ,亦皆兼收並蓄,如武庫之無物不 , 後而 至於陳政之大 以詩名世者猶累累焉。皆本之性 。故一時作者 八音與政通 以 盡得 哉? 0 其有 文章與時 悉皆餐淳茹 施教之遠 關 於世 載 教 高 垂髫之 殆又不 黼 則能 和 有功

之自 報韓 此文與夷白齋集序陳義相同 讚 讚 洪 不 ·慨斯· 武 其徬徨 謂歌 朝文字禁網 文之將 黍離 山 澤 喪 麥秀之詩 **猶正則之自放** 0 誠爲寬大, 時 良死已八年,洪武十六年良死 詠剩 即遣辭亦有重複 水殘 而斯文將喪之歎 。世今若山斗之共仰 山之句 ,知兩文寫作年代必相 , 而蘇伯 則宜古今同之矣 衡贊其遺像有曰 ,公遽駕風霆而長往 至是當爲洪 接 武之二十四年 , 其跋涉道途 殆 同 0 後死者之瞻遺像 出 元之將亡 0 類子 讀 蘇 也 氏之 房之 0 良

於

0

,

葉子奇草木子言,元自混一以來,大抵皆內本國 而外中國 內北人而 外南人, 以至深

閉 如 極 豆 向 背背 戴 者 江 固 良 南 拒 王 亦復悍然無動於其 而 一逢皆 富 曲爲防護 戴 王 稱 乃 南 塞 憑此 北 人 ,自以爲得親疏之道 其 見於偽 立 節 耿 中 耿 , 於胡元 長爲同 詔之所 , 而天理之往復乘除 云也 時 , 至死不變,一身利 及後 。是以王澤之施 0 迄今天祿之遷 人之所想慕 , 彼亦盲焉若不知 , 斯尤可 害固 盡歸 少及于南 不 計 恠 于 也 , 南 0 天下是非 ,滲漉之恩, 此 古今詩文之士, 可 以 亦不辨 (見乘) 悉歸于北 除 勝復之理 , 不乏眼· 或 人之好 0 故 如 然 貧

者

景

濂迄 略 入 爲 士羣之盛 不 甲集 ·見於牧齋詩集小傳,殆是絳雲樓未有此 例 論 宋劉 僧宗泐 牧齋列朝詩集小傳, 可 ,凡二百二十九人,附見八人。 見風氣之大歸。今就提要一人姑舉其 高蘇貝戴六集 ,文風之暢, ,得五十五人,六百二十四卷,張宇以下年輩 實歷代革命之際所未見 及胡仲子 分元季作者入甲前集,凡一百 集 而 兩 已 集合計之, 書 0 此 也 (集爲 諸 。卽檢淸四 0 人皆當 余所想見而 共得三百八十六人。 時 一十六人,又附見者三十三人 土 稍晚者不計 庫全書總目 羣 之翹楚 法未見者 , , 亦 此文僅就四部叢 明初詩文集作 厥爲陳謨之海桑集 雖有 代詩文之冠 重 出 , 0 者 爲 國 冕 刋 數 自 初 所 殊 作 舉 收 宋 少

此

人

提要海桑集十卷,陳謨撰。提要之文曰

蹟 謨字 永 樂 具 明 七 史儒 德 年 作海桑集序 , 泰 林傳 和 人 0 是集有謨家傳 0 生於元成宗時。 稱謨卒後二十年, 稱卒年· 洪武 則卒於洪武二十 中召赴 九十 六 闕 0 考 集 以 疾 中 年 解 年戊辰 月 歸 止 後屢聘爲江 也 於 洪 0 謨 武 書 十 劉 浙 七 氏 年 考試 西 晏壁: 齌 官 事 於 和

是 去國 就 不 微 年 卷 年 子 後 道 仕 , , 0 · 箕子 其 元尚 云云 或晏 也 0 在 未亡 明 時 璧 生大 雖 老師 則 初 稱 反 所 與 以 復 , 稱 柴 已爲衞· 固 俗 老 申 乃 間 病解 渢 桑東籬之志 儒 明 約 渢 成 曲 數 平 官 前 謂革代之時 學附 然孫 雅 作 朝 音 賀 其 太平幸民六十 表 詩 會先 仲 批 , 集文: 亨跋 固 0 生之論 有 而 , 其墨 《集各 殊 集中 不必死 矣 五卷 餘年 迹 頌 0 明 動 至於文體 節 輒 功 稱 , 矛盾 德 太 爲 由 最爲害理 祖 其 洪 , 不 武 簡 龍 甥 戊戊辰· 是以所 潔 興 楊 而 , 士 , 0 詩 弓 足 奇 F 故 格春 如 旌 所 推大德元 0 其客韶 不 首 編 無 容 合 至 語故君舊國 集 州 年丁 則 遂命 中 先 時 東 生 通 駕還 里 雖 酉 塞 淵 老 爲 論 一之思 僅 源 山 太 篇 實 祖 猶 九 吳 十二 拂 輿 出 於 其 元 引 衣 曳

之士 逢 景濂 舊國 亦僅 迷 亟 提要之言如 於 心 乃得 拂 蘇平 乏人 知感 之思流 在 衣 遠 爲 淸 求 仲 時 雅 之四 露於 貝 此 去 矣 變 清 儒 者 不 惜 正 庫 惟 未 江 學 自 此 諸 戴 未 館 能 歟 後王 能 掩 集 辨 臣 等 見其 文字 則 夷 , 其所爲 是可 在 夏也 一逢之徒 盡 集 此 目 見一 以 種 雖 而 0 爲 時 詳 出 傳狀 然謂 時之心 既受一 論之。 俗 代 洪 碑誌 儒 風 武 易代之際 氣中 曲 以 據其謂領 聲 壆 後 時之尊譽 , 風 有爲 更無 習 則 諸 不 元守節 矣 惟 爲前 必 人 恠 雖 死 如 代 危 陳 親 則 節 **滨之所** 素 仕 而 亦 太平幸民六十 (趙
) 又頌 洪 死者 無怪 武 之朝 乃得爲 如 於陳謨之所 明 不 有 功 合 堅 德 隱不 餘年 雅 而字 不 其 儒 出 裏 願 如 正 而 學 者 又其 獻 而 行 足 - 歟? 蕳 身 不 , 有不? 集稱 新 合矣 此 亦 朝 若 其 惟 得已 有 時 海 與 抑 異 如 時 戴 民 有 應 於 余 良 聘 讀 故 則 痼 而 宋 疾 似

矣

余又讀方希古祭宋景濂先生文,謂:

公之量可 。世鳥足以知之, 以包天下, 而天下不能容公之一身 徒傳誦其雄文。執其詞者惑其意,得其似者失其眞 公之識 可 以 鑑 世 而 趣 0 世 彼 不 好慕者且 能 知公之爲

此,又何怪乎臧倉與叔孫。

光 實有此內藏之隱耶?余又按罪惟錄, 此 目 其窺作者之心志矣。且元明易代,豈晉宋之比,又烏得以淵明之出處相繩?惜乎海桑一 新朝之功德 人並列, 睹 文辭旨 ,爲興明 他 隱約 日若見此書 明史則入儒林傳,謂其隱居 7.吐氣 , 而豈阿譽希寵 **唏慨言外**, ,此余所以深致其想見之意也 競進無恥者之所爲乎?四庫館臣謂其與柴桑東籬之志有殊 殆潛溪生時 ,能一 不求仕 陳謨入逸運外臣列傳,與秦從龍陳遇楊維楨趙汸徐舫 ,亦復有所如不合之感耶?抑其迹雖不然 洗此 , 而 究心經世之務。然則海桑 時代羣士拘墟不忘胡元之惡習,亦足爲國 集, 雖違 ,而羣士之內心 時 集,未獲 誠淺之乎 好 高明諸 史生 獨頸

子 云 灑 道德宗前 又按朱竹垞靜居志詩話云:徵君大德遺民 落邵堯夫 代 , 詩書啓後人 0 粱不移詩云:立志希濂洛 0 胡光大詩云:文章漢彝鼎 ,研精續考亭 雖應弓招 。諸公之推許若是 聲價魯瑶璵 未縻好爵 0 其沒也 楊東里詩云: ,是亦可見其 蘇平 純明 仲 輓 程伯 以詩

余爲斯又逾十餘年 乃獲讀四庫全書之海桑集, 陳義平平 無足稱述 較之上舉諸人 所距

遠矣 命 。是則明初開國諸臣 ,人物皎然 , 能以文采自顯者 , 乃無不繫心胡元 ,情存彼此 是誠

運

所 大堪驚詫與慨歎之一 事 也

#### (八) 讀方 正 學集

晚 相 肩 隨者 非茲篇所當詳論 余於明初開 得一 人焉 國 諸 儒 , 姑舉皇明文衡所錄兩篇,稍闡其意,以殿吾文。 日 , 必推胡 : 方正學孝孺 仲子爲巨擘焉 0 史稱孝孺先輩胡翰蘇伯 0 然仲 子未獲向用 衡 未 , 能 稍有 亦 自謂 所 弗及 展 布 , 惟其. 求 能 年 與 稍

正學有釋統三篇 其上篇 云

僞 立 者 統 秦隋也。篡弑以得之,無術以守之,而子孫受其禍者 取 <del>邪</del>? , 義 幾乎三代,然其主皆有恤民之心 而 , 王莽 傳道統 則不 而王 取之不 ·苟欲假: 也 , 宜 道德而治者,三代也。智力而取,法術而守者,漢唐宋也。強致而暴失之者 ·以正 無辨 也 。苟以全有天下號令行乎海內者爲正統邪 此以寓褒貶,正大分,申君臣之義 。嘗試論之,天下有正統一 故謂 如晉宋齊梁之君,使全有天下, 周 秦漢晉隋 唐宋均爲 , 附之以正統 ,變統三。三代,正統也 正統 , , ,亦孔子與齊桓仁管仲之意敷 **猶謂孔子墨翟** 明仁暴之別, 亦不可爲正矣。守之不以仁義 ,則此皆其人矣 , 晉也。其取之也 莊 內夏外夷, 周 0 李聃 如漢如 。正統之說 同 孟 扶天理 一軻揚雄 而 唐如 身爲天下 ? 宋 , 0 、戕虐乎 奚爲 何爲 而 俱 雖 爲 誅 聖 不 而

堅 生民 才 如 如 秦與隋 武氏 , 亦不可繼統矣 使傳數百年 , 亦不可爲正矣 。夷狄而僣中國 女后而據夫位 治

如

符

### 其中篇云:

非 又以非正爲正 唐 正 可以爲正統。正統之君,非吾貴之。變統之君,非吾賤之也。賢者得民心 其 統之說立,而後人君之位尊,變統之名立 ,皆全有天下矣 類 , 無其德,民必惡之,故不得不賤之也。如是而後奸邪息 ,而可乎?所貴乎爲君者,以其建道德之中,立仁義之極 , 固 不得 不與之以 正統 。芍 ,而後正統之說明。朱子之意曰 如是 , 則仁者徒仁而暴者徒暴 , 夷狄懼 ,操政教之原 ,民斯尊之矣 · 周秦漢晉 以 正爲 正 隋 斯

## 其下篇云:

郡 世 所謂變統之制者何也 兵 絕 書之,以致喜之之意。正統亂亡,則詳書而屢見之,以致惜之之意 中至正之道 者義也。勢行於一時 。 正 以 則書甲子,而分注其下曰:是爲某帝某元年。其主用兵不曰討 (地降者) |統之臣降於夷狄則夷狄之,死不曰卒而曰死。凡力能爲正統之患者, , 質諸天地,參諸鬼神而不惑也。得中國之地 日來歸 ,異於天子之禮也 。不爲中國 ,義定於後世。義之所在,臣不敢私愛於君,子不敢私尊於父 而反者 )。冒爲| ·,彼亦| 不得而盜賊之也 而 異其禮 , 蓋其所可 ,其民有思中國而 亦曰 致者勢也 。變統始 , 起兵 不曰征伐 0 滅亡,則 得郡則曰 天下 不 叛之者曰 刑其 可 '僭乎後 而 漢文 人不 取 正 大 起

立變 不尊 後世 故 日 誅 不得以君道 統 則 也 0 書 天下怨而 , 所以扶· 斷斷乎其嚴 有愈貴而 臨之也 人極 起兵 愈賤者 也 , 0 惡 能言抑變統者 士之在變統者 , 閔閔乎恐其久也,望望乎欲正 而 起兵 , 有愈賤 , 不 ,君子之所取 而 曰 , 愈貴者 能安中國 反 0 惡乎篡 0 図則書 故 也 君子之於變統 弑 , , 能 非 統之復也 惡乎 止 暴衆除! 君 0 也 , 是何也 外之而 民 0 く害則 恶乎 不 書 女主 爲天下 親 能 也 非 明 ·慮也 微之而 道 其 術 君 於

歷 史正統· 之辨,今之學者多疑焉 , 然實有不得已而不可不辨者 , 而 尤於夷夏之大防爲 然 0 貝

至正初 統 於世 祖 混一之日 ,

清江

集有鐵崖先生大全集序

謂:

天子詔脩遼金宋三史, 不當急於繼遼繼金 先生乃著 , 正大剴! 正 統 論 切 , 凡二千六百餘 , 觀者韙之。 言 其言以 爲我 續宋

又有鐵崖先 生傳 , 備 錄其正統論全文著於篇,大意謂

欲以 觀 論 朝 正 今之君子 治統· 之, 許文正公。 ,華統之大屬之我元, 荒夷 道統者 之所 非統之統屬之我 , 昧 在 於 此 矣 春秋 治統之所在 歷代道統之源委也 大 承乎有宋,如宋之承唐,唐之承隋承晉承漢 統之旨 元。吾不知今之君子, 也 0 孟子沒 。道統不在遼金而 而急於我元開國之年, ,千有2 餘 年而 待今日爲何 在宋 濂洛 周 遂欲接遼以 時 子傳焉 在宋而後及於我朝 待今聖人爲何 朱子沒 , 爲統 而妄分閏 , 君 不 而 代之承 君子可 其傳 也 以 天 0 製之 抑又 及 以 我

過乎 統 秋 廷臣 此 亦 義 大 田 謂 謂 爲 統之義 縱 論 道 不 明 統 初羣 謂 辯 可 所 及 此 出 可 在即治統所在,此固似矣,然朱子上書孝宗,極申攘夷之大論 士 見者 以爲元儒恕, 對正統觀之共同意見也。 能 而不 承 「 韙之 仲 知孔子春秋雖 子 而 , 謂 重 然豈終不爲中國之道統惜乎?觀乎鐵崖之正統 申 其 正 正大光明 統大義於天下者, 百大 當元之時,有主張以元 統 雖百世之下 , 猶尙 有夷夏之辨焉 則正學也 無以 易 0 廷臣 接遼金爲正 0 鐵崖又以元儒 此 傳 , 統者 作 論 , 丽 於洪武之三年 而 惜 , 益見胡 乎元儒之終失 上 鐵崖折之以 一承朱 子之道 , 是

末 則無 之有天下 爲元 身膺 忠不 其政 高之興 於 ,一在 是 天命 義以及 不 而 正學之言正統 切 心尊元室爲正統 死 名 不 明初 者皆 創 (從叛附) 則惟有 ·正則 自 盏 制 忠臣 可 立 日 而 生殺予奪惟其意,而爲之下者, 言 暴秦當亡 法 歸之於天命 同 , 不 逆之大罪 凡拒 主元之不得爲 猶仲子之言天紀。正學之言變統 順 興 禮 , , 抑且 前而] 當明 樂 0 而 0 明教化 無不有故君舊國之思焉, 不仕者皆義 明之崛起 如是言之 祖之廢相 而 正 凡屬 統 , 選賢擇相 而 0 , ,爲之下者不欲 則 士 時 在當時則皆爲正人 殺羣士, 天 佐 О 凡起義於民間 命 命協運之士 將見爲牛馬雞豚之不若 與 , (人道 **羣士惟有** 與民更始之大政宏綱 , 則猶仲子之言地 言暴元 乃莫不謂明祖之登帝 兩 相 , 則 心伸大義之正 俯 離 如方國珍張士誠輩皆羣盜 首聽命 惟有識天命三字可 , 抑 又不忍言胡 且 天命 雖欲 紀 。方明之開 乃舉無 也 惟 論 ·隱退· 位 元 在 0 0 惟 否 0 , 自全 乃 人 則 此 以爲之解脫 生於其心 本 原 國 兩 元 一叛逆 居 可 出 ,羣士 則 儒 言 於天 彼 而 正 終 統 害於 大夫 人者 在 當 命 其 無逃 而 , 漢 不 凡 元 明

嚮往

也

乎?豈不以夫道統之失而不振乎?此所以余讀明初諸臣之詩文而獨於仲子正學兩集深致其拳拳之 於天地之間 始稍傳於世 不 獲 顯 用 , 0 `天命所· 遂使 正 學又晚起 明代之治不能稍復於古 在 ,又寧有人道之可言 , 靖難之變 , 以 身殉之, 不惟不 ,此豈非元明之際成此悲劇之一主因乎?不幸 丽 逮漢唐,抑且 文禁又嚴 視宋而有媿焉 其門人藏其遺文, , 則豈不 至宣德 由 其 以 而 無儒 仲子

正學又有與趙伯欽書,大意謂:

近代道程 人多謂 得 徜 求 士 唐 恕 發明損 百 宋而之 除年間 者 或 術於三代之後 以 遠 雖 言乎文 欲庶乎古 有 有 宋 益以表著於世 術 雖 法而 不 取 不 及 恒 於 風 明 唐 (僕 言 俗 , 才不足有爲 固 卑論 汙壞 士居位則以法律爲治 , , 不 唐 未 僕無能之辭,足下安取乎。 ,宋爲上, 能也 不 必 ,上惰下乖,以至於願危而不救者,豈無自也哉?私誠 · 及 漢 盡過乎唐 亦可爲後世法 而習俗卑下,學者梏於舊聞,不復知有學術 。聖賢之文辭,非有大過於今人,其所以 ,或才高而 此 漢次之, 自 ,然其文之所載 其文而言耳 沉溺不返 0 , 唐爲下 爲學則以文辭爲業 唐之諸儒 且近世所以不古若者, 。足下書之所陳 近代 非 ,三代以下未之有 ,惟韓子爲近道 所謂考道德之會 有媲焉 聖賢· o 斯道之盛衰 , 謂近世之文辭 宏經 不可及者 通 , 0 其他俱 以文辭爲業而 而 而漢何足 要 竊竊 (典 揆 其 , 其端微 詡 擯 實 不 恨 · 若宋 造道 之 詡 也 以方之。今 不 棄 能 而 , 僕嘗謂 苟 矣 深 欲 不 比 不 宋之 隆 知 有 講 且 而 非 道 自 於 所

明識睿達者何足以知之。

當有 吳康齋 隻眼 不免 僅 學則 文辭 則必 時 遠 拘礙 尤 然則 者 慮 ( 師漢 四十有六,未 而 , **羣知鄙** 也 以漢 元之一 則 仍 而 0 可 天雖生正學於明 , 又遑: 知 唐 終明之世未見其有繼 有 求能考道德之會通而揆其實者 0 不 此 當其 狹 擴 然此兩人,似皆偏於遯退 唐 矣 我所 代 論 爲 薄胡元, 小拘礙之迹, 於是有詩必李杜文必盛唐之說。蓋其時,明之正位旣久 0 乎其 時 此 榘 以 求 而 可 到 後 矱 讀明 如 有 謂 他 五十也。而其學亦及身而 求能振起一世之文辭道術者 , 正學 而 不復欲齒及之,而宋爲元亡,乃連類而不受重視 有 明一 0 初諸家之集而 , 文辭 若 而 不知 代之儒學 欲 未能大通於人紀之全以上達於天紀。此觀於王門後學之意態抱. 有 如梨洲學案師說所云: 其誤也 ,無道 會通文辭道 明一代卒未得正學之用!天之生大 。待夫明之既亡,在野諸大儒如亭林梨洲 術 於仲子正學兩家尤不勝其低徊悱惻之情 , , o 亦僅 乃終不免於此 下及唐順之歸有光 0 , 流 術 則仍如河漢之相遠。言明代之學術 爲 風 絕 則宋爲首 所 知有 被 0 , 捨正 其後 人 , 以生民爲慮 迄於明之開 紀 導其誰同 途 明之爲文者 而 ,漢次之, 。白 不 ,始起而 知 屬 沙無論矣 有天紀 ,王道爲心 國 儒旣 0 : 矯其 做 而 而 , 漸知鄙 唐爲下 此 惜乎靖難之變 不 0 乃亦 雖 易 船山 , ,以爲欲張大一時之文運 羣 士 正 即陽明以事 , 於人紀 學 然其去正學心中之所 而 薄 , 也 所 欲伊周 學術 心理 正學此書 完 則必溯源於曹月川 世之獲大儒之用 儒 親受業之師 爲狹 , 途徑庶乎近之。 已大異於明初之 卒以 乃欲. 功顯 孔 1 孟 身殉 上祕 誠千古之 合爲 負經 而 , 而 不 景 綸 濂 其 宋 也 年 計 而 則 與

其聲

一螳鞳,

誠不媲爲皇明一代開國之雅

頌

0

紳

**緯子**,

緯使雲南

,抗節

死

紳 僅

十三歲

,

從學於

余又讀皇明文衡有王紳仲縉擬大明鐃歌鼓吹曲十二首並序 ,其序曰

伏覩太祖 皇帝 , 手提三尺 , 取 胡 元 ,平僭 亂 , 以肇造區 夏 所以雪近代之恥 其 功 誠 不

湯武下。

其定關陝一首云:

元德昏,政棼棼。氓戚憔,籲于旻

其蕩胡穴一首云: 元氏有天下,腥膻 我中原 ,垂髮裂冠冕,士效咿憂言, 聖人受天命 遠續 皇王 傳

情上

格

,

命

明

君

能想, 景濂 者 者 貴爲天子 我中國之故有 ,而不能大肆其心之所能至以招來一世之大謗,幸而有 及明 罪惟錄播 其爲此樂章,則已在洪武以後,明初諸臣 口 頭所能說 祖 其亦何能爲力 見甦 匿諸臣傳載元幼主死 。汝之失, 語 而 大喜 而 棄其沙漠之本無 , 0 時翰林諸臣顧不然,羣手所撰,均不能稱明祖之意, 斯其內心之不慊於當時諸臣者可知矣 惟景濂巍然爲明初文臣之首 , 翰林撰祭文不稱旨 。明祖得之大喜 ,決不能有此吐 , , 懸購 如 。此語眞切平實 方正學王仲縉者出 然亦不免限於羣士心習之所同以爲 能文者 屬 。然亦無可奈何 也 0 。錢甦擬E , 應爲當時人人心 撰 其 闸 云:朕之得 而至於懸購能 時 斯亦 風 ス衆勢 可 中 , 復 所 然 雖 文

無罪

於後世

矣

則景濂其誠不媲爲一代文臣之首哉!

余故特以仲縉樂章附之正學一

集之後

而

以

復明焉。世有知道君子,其將有同感於吾文。

殿吾篇 。此亦猶之曲終之奏雅,以見夫天命之終於不絕,人心之終於不死,而大道之終於久晦而

#### 讀 明 初 開 國 諸臣詩文集續篇

#### 讀 楊 維 楨 東 維 子 集

草讀 明 初開國 諸臣 一詩文集 未及楊維楨之東維子集 0 然念明史文苑傳 楊維楨褒然居

首 0

是亦當爲補

列

傳

略

百

植誦: 誠 西 至正三年 維楨字廉夫 儒 學提舉 告以 讀 機上者不 順 逆成敗之說 。會兵亂, 維楨著正統辨千餘言 五年 山陰人。 因 父宏, 避地富春山 自號鐵崖 士 誠不 築樓鐵崖山中 能 0 ,總裁官歐陽元功讀 用 , 元泰定四 徙錢 徙居! 塘 年 松江之上 。張士誠累書招之,不赴 繞樓植梅百株, 成 進士 。洪武二年 且歎曰: 會修遼金宋三史成 聚書數萬卷, 百年後公論定於此矣 召諸! 0 撰五論 儒纂禮樂書 去其梯 (詔修三史, 具書復 俾 遣翰 擢

江

維

林

詹同

奉幣詣門

維楨

謝曰:豈有老婦將就木而再理嫁者邪

。明年

復遣有司敦促

賦

客婦謠 章 進御 0 日 皇帝竭吾之能 ,不強吾所不能 則 可 0 否 則 有 蹈 海 死耳 帝 許 之, 賜

安車 , 闕 廷 0 留 百有 十 日 , 所纂敍 例 略 定 , 即乞 一骸骨 , 仍給安車 還 山 0 宋 濂 贈 日

不受君 王 五. 色詔 , 白衣 宣 至白 衣 還 0 抵家卒 , 年 七 十 五

新 元史文苑傳亦收楊維 楨 0 謂

晚 年, 築蓬臺於松江 , 東南才俊士投贄 求 文者 無 虚 日 0 當 疾 亟 撰歸 全堂 記 頃

0

集三十卷, 瓊臺曲 洞庭雪閒 雜吟二十 卷

擲筆而

逝

。著有四書

貫錄

,

五.

經鑰

鍵

,

春秋

透

天關

,

禮

經

約

,

歷代史鉞二百卷

東維子

刻

立

就

全祖望宋元學案列楊維楨於艮 齋學案中 謂

先 生初遊甬東, 得黄氏 日鈔歸 , 學業日常 進 0 所著諸集通數

百

卷

王 梓 材馮雲濠宋元學案補遺王案有 曰

見清 江 作傳 言所著 有 春秋大意 , 左氏 君子議 0 又先 生序春日 秋 左氏傳統 類 編 有 云: 予於春秋

家 , 有定是之錄凡十有二卷 。是先生之於春秋 , 不獨 透天關 書 也 0

馮案: 據文集 虞隱 君 墓誌銘 , 曰 : 先生道園門人

維 楨 所 爲正統辨 不 見於文集 , 而 見 於陶宗儀之輟耕 錄 0 及清廷修 四 庫 , 奉乾 隆渝 旨 補 入

宋元學案加 以删 節 0 茲撮錄其要旨 如次

正 統 之說 何 自 面 起乎? 起於夏后 傳 國 湯 武 革 世 皆 出 於天命人心之公也 0 故正統之

先 大 義 當 議 始 者 左 與 以 有 而 統 曲 法於 蜀 者謂 於降 作 正 春 唐 而 秋 明宗之祝天 兩 論 統 立於聖人之經 也 則 元 必 陋 春 魏之名不正而 以 秦 秦 經 統 必 也 者 遼 吳魏爲 外之, 亦 韶 於漢之後者 也 祖 秋之大一統 五 自 比 晉始於平吳 襄 0 漢之匈 謂 伯之 時 宋 唐 不 角立 分繋 适 法 前 權 使 自 興 春 氏 以扶 言 借 非 秋者 以 , 奴 五 0 也 , 十餘 不以蜀漢之祚促 此 示 夷狄 不 不 然則今日之遼金宋三史者,宜莫嚴於元統與大一 而 , 0 強於 萬世之綱常 順者 相 而 統 唐之突厥, 以 至不得已, 年 蜀 統 不 О , 而 然則 為正 始於泰始 王 不任 攝 , 又帝 而 者 , 大正於宋朱氏之綱目 社 也 宋嘗遣使結 統之所在 而 綱 北 稷 不皆與於漢唐之前乎, 以始皇之廿六年 春 0 魏 聖人之經 秋 而 0 何 生靈之主 , , 與其 唐始於羣盜既夷之後 必 秉 也 黜江 <sup>2</sup>黜之 火生 • 0 八地之偏 爲兄弟 不得以割 天理人心之公 左 , , , 不 春秋是也 願 , 其失與志三國者等爾 必以 使 天早生 而 0 0 晚年 而奪其統之正者, 據之地僭僞之名而 奸 始 故綱目之緊統者在蜀 此 匈 繼 聖人 遼爲 統 周 奴 而漢唐又與之通 0 , 首 閱 突厥 , , 漢始於字 書 吳越之號 而 萬 翁 王正於魯史之元 自是天人交感 爲紀 而 不 世 宋爲孫 始於武德之元 而 統之辨 高 不 傳 春 論之也 可 帝之五年 非 尊 ·秋之義· 泯者· 矣 和 而 昭 不 矣 矣 以 , , 烈 此 尙 竊 漢 也 吳魏之 年者 於 而 而 唐 其 也 矣 說 又所 宋 爲 抑 續 而

統

不

江

復

芝

以

接

唐

統之正

矣

0

又何

計其受周

禪

與否乎?

中遭陽

九之厄

而

天

%循不

- 泯其社

穆

瓜

祖

生

矣

朱氏

綱

F

於

五代之年

皆

細

注

於歲之下

其

遺意固

有

待

於

宋矣

有

待於

則

太

IE

烈在 系 子 遂 斥紹 在江之南 蜀 則 興爲 泰 和 ,子孫享國 爲宋。 之議 , **吁!吾不忍道** <u>,</u> च ,又凡百五十有五年。金泰和之議 知宋有遺統在江之左矣。而 矣 金欲承其未絕爲 ,以靖康爲游魂餘魄 %得統 , 可 乎 ? 比之昭 好

我元之大統 革 則我元又豈急於太祖 遂誕受天命 春秋大一統之義 而大統: 亦一 始集焉。蓋革命之事,一日之命未絕 以 撫 ,請復以成周之大統明之。文王在諸侯位凡五十年。至三分天下有其二, 方夏 日而未集也。成周不急於文王五十年,武王十三年,而集天下之大統 開國 , 然猶 五十年 九年而· , 及世祖· 大統 未集 十有七年而集天下之大統哉 0 必至武 ,則一日之統未集。宋命 王十有三年 0 伐紂· 有天下 日而 未革 ,商命始 則

周 抑又論之。道統者 氏 統 IIII 濂洛周 公孔子。 不 延平 在 遼 李氏 金而 程諸子傳焉。及乎中立楊氏 孔子沒 在 及於新安朱子沒,而其傳及我朝許文正公。此歷代道統之源委也 宋 ,治統之所在也。堯以是傳之舜,舜以是傳之禹湯,禹湯以是傳之文武 0 幾不得其傳 在宋而後及於 0 次我朝 百有餘年而 ,而吾道南矣。旣而宋亦南渡矣。楊氏之傳爲豫章 , 君子可 孟子傳焉。 以觀治統之所在 孟子沒,幾不得其傳 矣 千有餘

今以此 厥 正 統 皆 魏 窺 起於唐前 維楨之學,乃一 吳不得干 亦皆不得干唐之統 故南 本於孔孟與程朱。其論史,亦一本之孔子春秋與朱子綱目 宋爲 正 統 金不得干 0 遼起宋前 推論其所以,乃出於天理人心之公 亦不得干宋之統 。五代以夷狄主中國 綱 目 故 並 囪 以 蜀 不 奴 爲

爲統 , 則 當以宋 接 唐 統 爲正 0 維 植之言 如 此 , 可 謂 大 義朗

然

矣

得預 突厥 見在當時 元 正 統 , 爲道 五代遼金微見其意, 維 所爭僅 此 楨 卽 統 又分道統與 尙不 觀於維楨之辨而 所 在 在 遽奉爲公論 元太祖之五十年, 則 就元儒 治 統 而 , 謂道統一 可 於元則絕 之見也。 , 尚有主以 知 矣 與世祖 乃治統 孔子春秋尊 不辨夷夏。 遼接五代, 金接遼, 域宗以 所在 0 然同時 王攘夷 前之十六年, 然其於元 如歐陽玄, , 代 維 植僅 元接金,爲中國史之正統 , 不得遽奉爲 則與漢唐兩宋 取其尊一 亦且認爲百年後公論所定 王 正 0 統而 攘夷之旨 例 己。 得爲吾國 又以許 , , 而 雖於: 兩 史之 匈 衡 宋

奴

可

不

仕

堂記 學人 廷開 強吾所 修宋遼金三史 或 然維楨既視元爲 今按陶宗儀輟耕錄謂維楨言終不見用,又宋元學案補遺引吉水縣志 尚有南: 諸 今其文不 不 能 臣 爲條 北之分 亦 , 內尊 當事皆遼金故 收於文集 件 , 其 始允 IF. 0 統 人 維楨聞孫皆南人 , , , 蓋仕: 自 又視爲元 出 臣子孫 愧不 0 於元 宋濂之詩曰: 如 亦得道統之傳, , ,亦全其身歸於元,較之危素之不能全節 不肯以一 ,故心不忘宋。 故宋濂之詩云云 不受君 正 統予宋, 而 王 也 Ŧ. 此亦治史者所不 維楨又親仕於元 色詔 聞 孫 具疏 , 白衣宣至 爭 , 可不 不 , , 故塗拒 有周 白 報 衣 知 『聞孫字』 還 遂 也 自謂 棄職 明 和之聘 其 勝之 臨率爲 以立 歸 0 是其 以 亦預 而 時 不 明 全

玄閣 維 楨 日 藉景軒 幼 年 其父爲築萬 曰 挂 頰 樓 卷 樓鐵 日 小 蓬臺 崖 Щ 中 後 使讀書其上。 止臺上不復下 及其老 且榜於門 隱居 三吳 日 屢遷其! 客至不下樓 居 有 恕老 日 草

謂學 嬾 元之末 0 統道 見客 不答禮 統 ,天下雖亂 所 在 , 恕老病 則宜乎其忘夷夏之大防 , 而 諸儒 。問事不對 尚得晏安自娛於山 ,恕老默。發言無所避 ,置生民疾苦於不問 林間 以著述歌 ,恕老迂。飲酒不輟樂, , 詠度 而 三如吳王 日 又得羣從影 明祖之召 附 則 響 避之若 狂 集 自

舁 元 其 官副 、棺與維楨同葬 又按朱彝尊曝書亭集有楊 提舉 張士誠據吳,遂不仕 , 人目爲三高士墓 維楨 傳 。亦可徵 0 , 居仁泰定三年鄉試 謂其徙松江 般人在洪武初仍高尚爲元不出之風氣矣 與錢唐錢維善里人陸居仁相 ,隱居教授 0 兩人既歿 唱 知府 和 事 林 維 善仕

浼

惟

恐其沾染及之矣

又按清乾隆詔補正統辨入東維子集有曰:

於劇秦美新 維楨身爲元臣 , 其進退無據 ,入明雖不仕 , 較之錢謙益託言不忘故 , 而應明太祖之召,且 第 君 者 上饒歌鼓吹曲美頌新朝 鄙倍: 尤甚 0 而 正 統 , 之辨 非 刺 故 則 國 不 幾 田

以人廢言。

是乾 元史而 心而 廷視之, 時 誠 已 隆正爲維楨尊元爲正統 難乎: **斥其** 其 東 其爲士 維子 固 進退無據 爲 可嘉抑可鄙乎?處鼎革之際 集先 矣 刋 於明. 謂較之錢謙益尚 余今乃以不明孔子春秋攘夷之旨譏維楨 بر • 初 可爲滿 , 故 此 辨 州入關作護辭 更鄙: 亦 不 倍 敢 , 不删 而 , 則 値 夷夏之分, 去也 不知明遺民應清廷之召預修明史諸 , 故特旨追補 而乾隆詔 非我族類 關 0 其實亦猶雍 心 旨 民族文化之傳與夫國 尚以 。 其心 維 楨 必 正大義覺迷 K應明: 冥 太 人,當 士之生於當 祖 足錄之用 |史正 召 時 預 清

之所寄者 已著於此文之正學篇 其於此 可 茲不贅 不惕 , 然思 菴集 • 而 憬 然悟乎 卷 , 與維楨東維子集同收清 0 後乎 維 楨 , 有 明 指 元代不得爲中國 代所編 四庫 史之正

統

又按 維 植門人宋 完禧 有 庸 + 应 全書中 o 同 入元

代別 集類 幅 初 0 提要· 名元禧 有 日

今按 元禧以 我亦涛! 亦有 憶賀 同 徴 知章 麥秀歌殘已白頭 行邁 主考 維楨 弟子 老病 福 南閩 建 後改名禧 游子簡 新 , , 同 故明史列之文苑中 涉 受明 Щ ,逢人猶自說東周之句 書趣 Ш ,字元逸 祖之召 0 考藝非所任 0 又寄宋景濂云:當時 , 0 又同 洪武中召修元史, , 附見趙壎 不受官而 , 冒往誰舍旃 , 則亦沈夢麟趙汸之流 退 傳 十八 末 0 書成 然其寄宋景濂詩 0 然集中 士 知己諒興閔 , ,不受職 去留· 題桐 各 有緣 ,乞還 , 江 釣 疲駑 有 非 危素諸 隱圖 云 山 詎 而 有 戴 勝 0 (良贈 後與 鞭 人比 云 黄冠 鬢髮日 桂 以 也 詩 彦

漫

良

此皆 忘憂澗 是元 於 書稽古之事之不易爲矣 明 所不 廷 禧 雖不 泉也 其 知 意亦 樂主考福 而 抑 且 必 諒 欲 明 可 悲 史禧傳 達之徵 曲 一說其 矣 0 非 而 固已 然固 馮雲濠宋元學案補遺 危素諸人之比 明著其徵爲福建主考 已赴之, 故有行 此 行邁涉 乃 曲 乃引據提要語 體清廷帝皇之意 Ш 並不有拒不受徵之語 川之云 0 殆 , 以 自 心志操懶: 必強誣 福 建 返 然稱 其 又獲策 四 心 庫 元禧 忠元 館 臣 杖 亦 山 豈於 見讀 野 不屈

已短

貧病

無

由

痊

0

策

杖

山

野間

,

靜

曠

庶

相

便

0

撃壌

或歌

詠

,

亦憂臨澗

泉

然元禧之存心 則 仍 與 維 楨 無殊 , 蓋其本衷 , 固 亦 無意於出 仕 0 故 原 字 無逸 後改 元 逸 乃

有 意爲 元代之逸民 也 庸 菴 集 卷十 送倪叔懌序有曰

考亭師友 固嘗仕進矣 0 當其時 ,不以仕進爲樂, 而 以 授徒爲安 0 以今觀之, 則 授

安 , IE 未 可 以仕 進易之, 況未始仕 進者乎?

當 元之世 諸 儒 不 以 仕 進爲 樂 , 而 以 授徒為 安。 其 風 旣 成 , 而 南士尤甚 , 維 植之與元禧 也

文集又有題倪元鎭平遠圖 有 小序 日

此

畫吳

郡

倪翁

元

鎭

所

作

0

予

聞

張氏

入吳時

聞

翁

名

欲官之。

翁

作

漁

人

, 乘

扁

舟

遁

太

湖

萑 苻 中 0 猶 焚香自动 適 0 張氏竟以此 得 翁 , 然終不能 奪其志

其詩 日

菰 蒲 深 處恨 焚香 笠澤 扁 舟 不 可 藏 0 誰 倚 疎 林 看 Ш 水 , 太平 無事 得清 狂

以漁 人 遁 水 澤 而 猶不忘焚香 , 此亦見當時之士習 0 倚 林 看 Ш , 無 事 淸 狂 則當時· 士 一氣所法 湊 0 而

當時 **建**土 心 中 猶不忘 \_\_\_ 道統 0 忠於 朝 , 當 時 羣 士 亦 認 爲 卽 道 統 所 在 0 倪雲林: 以 書 家 名 此

後 意亦 , 乃 留 或 着 朝洪 胸 中 公武之歲 故拒 張 , 而雲林爲書甲子 氏 之邀 復卻 明 祖 , 之聘 其意欲效陶 婧 節 耶 0 近人容庚 爲倪瓚畫之著錄 及 其 僞

0

吳寬匏

養家藏女

集

題倪雲林

畫竹

石圖

謂

作

於

亂

,

作 書 自 洪 武 元年 戊 申 至七 年甲寅 共 得 畫四 + 五 幅 皆只 、書甲子 不 著 年 號 惟 樹 石 小 景

幅 款 云: 洪 公武壬子 李 日華謂 其不 -類平日 所作 斷其爲僞 0 余嘗 徧 讀其四十 五 幅之題詩

想

像者

,

特以附著於斯篇

狂 記 , 亦 何 絕 爲又效 不見 有滄桑與亡之變 陶靖節之不忘故晉乎?雲林亦與 , 而 夷夏之辨 、鐵崖爲好友 更所 不論 0 , 雲林固· 時羣士心情 高 土 , 然既太平無事 ,實有爲後代人所難 , 得其

## □ 讀趙污東山存稿

韃庭 舊統 前 未見趙汸之東山存稿 奮迅之致 文相脗合, 曩 , , 或則意蔑新朝 余在 光華夏之文物 , 九 若不得 龍 然大意固 沙 田 已 和 0 , , 雖經 後 無異, 而 迄今始從四 風 人重其爲民族革命 有 台 明 浼 庽 者 祖 可 廬 多方敦迫 相 0 , ]庫中 其 曾 證 成 草 時文臣 **|**爲讀| 閱 , 以 讀 , 大率怯於進而勇於退 見此 明 0 , 然在當時文學從龍諸臣 儒 前 初 開 後已隔 士之風 國 時 土 諸 **一風之梗** 十 , 臣 集 觀於其文集之遺留者 年矣。續草斯篇 篇 概 也 0 , 備 實乏同仇敵愾之忱 述 , 意想似了 明 祖 辭氣詳 開 而 殊 國 不然 可 雖 略 知 日 , 更無 或則 然當 復漢 容不 唐之 能 時 踴 宁 獨 躍 與

### 茲先錄其詩,病士云·

忘療 不忘擊 , 焉知! 民 , 病驥 未 康 不 0 - 忘驤 多 謝 遊 0 病鶴 談者 俛 勉 不 啄 旃 思自 , 仰 睇 強 霄漢長 0 惟 有 病 土 心 死 灰不復 颺 0

且

### 又浮邱祠有云:

浮邱說詩秦漢間 , 龎眉鶴髮映朱顏 0 適 逢偶語幾棄市 又見慢儒 來溺! 冠 0 飄 然長往 知

處 , 遺迹宛在軒轅 Щ 0 年穀常豐物無厲 **,**石泉一 琖薦甘寒。

其讀阮嗣宗詩有云:

種 瓜 寂寞青門外 ,采薇悵 望 西 Щ 址 0

其古津渡夜談贈金 元忠有 云

坑外竟逃眞學士 , 浮邱 雅頌 濟 南

其觀輿圖有感云:

皓首陳王道,時君孰可 匡。艱難思 稷契,

容易託齊梁

0

越豈資冠冕

,

秦方

用

虎狼

0

空聞

歸

大老 ,不復見鷹揚

其偃 蹇無用世意 可謂情見乎辭矣。

存 壬辰兵興 稿附錄詹烜星源爲行狀, 壬寅春歸 東 山 有日 0 時大明龍興, 創業金陵,吾邑已附屬六年矣。有司奉命徵辟

繼以 議禮召, 皆以疾得辭。 己酉,起山林遺士共修元史,先生在召中 0 暨竣事 , 得請還

,

未幾疾復作 捐世, 得年僅五十 有 0

是子常東山 並不指元廷言 I 著述 0 ,尚在盛年 明史儒林傳子常褒然在焉,然迹其存心似不 屢徵不起,雖以疾辭,讀其詩,以浮邱伏生自況 在明 0 此 則讀其東 ,而坑外之逃 山全 稿 而 可 確 , 似 證

也

存稿卷三送操公琬先生歸番陽序有云

其說 聖天子既平海 子 諫 秋 鬼責 代 契濶之餘 矣 誤 情 於先生日 師 焉 識 在 ·厚苦辭迫之, 書 0 下 予日 選中 也 吟詠 使窮鄉晚 未 聞 凡文儒之在官者 亦 今乃得相見於此 迄 何 必 番陽操公琬 一瞬 盡 丽 有 風 事 趾 先生歸矣 汸 後 焉 月 合於聖人 不得終辭 衰病 世 進謏聞淺見之士 固 內 其序高· 非有偶然 以爲謗 此皆 或以 曾不少動 日增 先 盡輦 單辭 Ш 0 生 , 士之在 然者 舟過 非素業與之相出入者不敢議 帝創業 林之士所得爲也 無與於是 勝國圖史典籍歸於京師 非可以 豈非 在 韓退之未遇時 , 僅以 或以 書 嚴 。蓋予與宋公 出者 館臥 陵 Ш 向 ,文景守成 , 偶句 · 所謂: 職 林與在朝廷異, , 。在廷之臣,各舉 目動神聳 事成順宗實錄數卷 適前太史金華宋公景濂亦 病 , 縦出 非偶然者乎 爲 旦 。若夫朝廷之士則不然 欲作 人所稱 夕以 ,至今使人如親見之。 ,不相見者數載 ,不敢出聲以誦,自揆終身不能爲 亦無補於事 唐 聞 其於述作也亦然 0 乃詔: ,皆足以名世 俄 卽 所知 經 。崇古學,貴文章,凌厲漢唐 而以 可 以 修元史 卒困於讒 歸 。所幸者, 垂 以應 一無窮 得旨爲別 自 而子克則十有餘年矣 部 至 0 1念自弱 。雖或無取於作者 , 書封禪平 旣 太史公網羅舊 起 口 曰 汸 0 平生故 纂釋羣經 Щ ,予辱知 以 入 鼠走. / 史館 有詔 冠則. 衰 林遺逸之士 病 準 無完篇 知 人 召 屢謝 不敢. 先 , 有 王子克於 重得一 傳 折衷 所 聞 生 又陶 有爲 貨殖 徴命 。旣至京 司 上 上 使 於 逐進 而 百 冶性 見於 執 馬文 接春 人非 擬 氏 未 柳 皆 獲 言 亦

孚 筆 則 正公受知 以 如 計制悉取 於上 其茫然自失 也 0 下 先生日 , 神宗 亦得 睿 斷 以 著書 ·子姑遲之,吾待子於番 以 凛然不可 作資 不以其所 預 爲 聞 大業 (治通 纂修自詭 敢自: 所不能爲諸 鑑 者 □ 放 者 也 垂十 , , 豈非其 猶 , 生罪 **豈無所懼** 或所 九 年 遭若 始 幸 , 蒙德 歟 就 是 , 0 而 然則 而 至渥 然哉 不 0 遠 今吾人挾 小人出鄙 矣 汸 也 0 尚賴 於先生之行 0 於是先生得 其 天子明聖, 句 Ш 以訾之。 [林之學 , 獨 以 有旨 此 病 不能 , 以 皆 辭 登 無所 歸 卽 鉅 舊 於 人 朝廷之上 碩 感者 而 志爲 德 支 書 離 , 名 良 , 昏 凡 實 眜

難遘 來者 臨 汲 此 篇 Ш 顯然可 如 虞 備 東濕 院道 園 機 述 當 會 以 家 時 , 代 如 而 心 , 驅 事 於 表 明 初 羊 春 0 時 蓋 秋 諸 • 與 士 儒 元 易皆有四 人之心 儒 似 時 無此 朝 以 隱淪 土 聲 想 撰 , 居 述 不 , 0 [則惴] 固 出 子常此 爲 亦以 非子常一 常 惴 經術自然 , , 序 去則忻忻 出 人如: 仕 身在 娛 轉 此 屬 0 朝 其變 明 也 0 廷 所謂 祖 , 起 0 意在 子常遊 草澤 民 族 Ш 大 , 林 義 知 九 , 慕 江 , 光復 黃 於此 士 、楚望之門 , 漢 則 而 未必. 唐 懨 舊 懨 統 知 , 又客館 禮 於 , 彼 誠 士 則 千 0 馭 於 載

存稿卷五題吳君儀教授植芸軒卷後有云:

蓋 用 於 嘗 聞之 時 則 當 四 鬼業: 海 旣 農圃 , 風 , 聲 或 隱於醫 氣 習 , 非 -復 0 不 南 州之舊 然 , 寧 小 0 作 勝 國 商 遺老 販 自 資 每 , 戒其子 愼 毋 倚 權 孫 勢 , 以 習 儒 刀 術 筆 苟 不 以

壞心術,僨家聲,而貽後禍。

此 箾 文字 殆自 元騎 入 主以 來 南 宋 遺民 相 戒 相 苧 以 延往日文化學術風 俗生活之傳統

遺 講 絕 元 之老所以 學之風 之 初 民間 線之精 胄子 出 理之當然 初 成子孫 處進退之間 種不 較之南宋 國 , 家既收 而 神 者亦 合作 命 后 發於人心 脈 王 中原 降 精 漸 ,高風振 所 , 變 其盛乃猶有 在 德之道復明 神 , 。一方則書院講學山 殆已 許文正公首得宋大儒朱子之書而尊信之。及事 以 而不容己者。故其辨異端 今 於天下,而未嘗決意於長往, 澌 日 滅垂 0 過 語 容城劉公,又得以上求 而 釋 之, 無不 盡 矣 及 미 0 謂 存稿卷二滋溪文藁序有云 林自守之風 0 然此 是 乃值 種 , 闢邪 不 尙 合 元治之初年 周邵 說 盛 則得之朱子者深矣 作 , , 另 皆眞有所據 程張所嘗 神 \_\_ 面 朝 迄 則 廷 論 世 出 於子常之時 Ш 著 仕用: 祖 林 , 皇帝 而 雙 o , 當是時 世之心· 始超 非掇拾於前 方 距 , 2然有見: 遂以

,

其

先

勝

國

亦漸

萌

其

於

義

聞

隔

而

見其 往 往 是子常之意 事若已過去, 則乃後期 尤 儒 婉轉 士 出 , 殆若謂] 元儒所爲之解釋 不復在念慮間 而 足以 用世之心已 元治已 覘 世 變 矣 無異於先 躍 0 蓋靜 然 。又同 。元代儒士心情意氣之前後相異 0 至其言劉靜 修之高 卷治世龜鑑序 王 , 而 風 人振天下 俊選 修出 並 興 處 , 謂蘇氏編爲此書 乃由 進退之間 , 往昔勝國遺老之戒儒 前 期 ,大可於此 元儒之仰敬 , 高風 振於天下 ,蓋學本先 窺之 而 術 謂 不 王而 而未 用 而如吳草廬 其未 於 / 管決意 世之虞 志存當 嘗決意 於長 於 世 , 其 長

備

o 蓋

代文獻莫盛於斯

0

而俊選並

興,殆無以異於先王之世矣

賢下學上達之旨,

縷析毫分之義

,禮儀樂節名物之數

,修辭游藝之方,

本

末精

粗

粲然大

者

各以

(所學教)

3授鄉

里

,

而

臨

川

吳公

,

雍郡

虞公

,

大

名齊公,

相

繼

入教

成

均

0

然後六

經

聖

,

海

內儒

出仕,其影響於此一轉變者,亦可推知,不煩深論

存稿卷二送江浙參政蘇公赴大都路總管序有曰

今天下承平, 朝 廷閒 暇 , 聖天子將登用 眞 儒 , 上 一稽唐 虞 近鑒今古 , 建久安長治之策

極

維持鞏固之方,以垂無窮。

是子常雖蟄居山 能之聖治 , 此 因隨時 林 , 流 耽玩經籍以自 露於文字間 娛 , 有不自 , 然亦常以天下爲己 知而 然者 憂 , 時欲賢 (者之出 以 助 成當: 代 理

存稿卷二送鄭徵君應詔入翰林詩序有曰:

關 裝 職 門生子弟進言曰 至正十五年冬, 視 前 0 休陽 朝不謀夕,每恨民間利害不得上聞 代中世鉅寇 起先生於山林,先生不出,如朝廷何。先生翻然曰:欲報朝廷者 詔以新安鄭子美先生爲翰林待制 , 言 不能什一,疑若不足平。羣盜散據 日 今聖天子舉羣策以淸海內,大丞相集衆彥以圖治功 **:今**爲天下患有 ,盜賊而已。 是以於鄉先 自淮蔡發患 先生堅辭不拜· 生之行 , 非有漢七國唐藩鎭之強。 而竊致其畎畝之思焉 ,延於江湖 命 憲使 , , 吾素志也 不 周 所 公親勸 惜禁苑次對之 在 **汸避** 蠭 乃命趣 起 駕 地 , 其 然 間

子 報 此 亦分言· 朝 興起在十二年, 廷爲辭 Ш 林 促其行 朝 廷 , 而 。惟沿江兵起至正七 張士誠起在十三年。 固主士之出 Ш 林而 年, 當其時 上報朝廷也 方國珍起在八年, ,天下固已大亂 。存稿卷三有賀鄭師山先生受詔命 劉 福 下距: 通 徐達兵定中原 徐壽輝等起在十一 先後1 書 年 亦以 郭

之想像 賊 年 9 0 今 下 已嚴 至子 則宜 常 然爲吾之朝 其 應 明 心 祖 懷之惶 召 廷 , 入 惑 、史館 往 H 而 所 , 進退之無據 又送操公琬 欲報之朝 廷 矣 , 前 今已爲塞外之亡虜 後亦僅二十二年 。 天 0 往 地之變 日 所 鄙 視 , 遠 以 爲 出 「於當· 不足平之盜 時 儒

與

容就 然揆 謂 秋 而 擬之危素 固 卽 書 心 山 稱 實 其 也 復 有 師 特 公諸吾心· 意 仕 死 未 地 山 , 余又案明史及 其 君茍 以 於仕 而 明 出 構 不 而 爲又一 - 受元爵 全 視 實 師 揭 未獲 則 節 未 死 明 元者 + 说出之者· Ш 似 ,吾其 書院 祖 七 義 知 等 所 辨 爲 年 耳 0 自當: 王梓: 亦 賢耳 安 夷夏 以處 宋元學案 , 忧 (相從地 明 如 此 日 , 敗 仕 可 趙 先哲論殷三仁胥獲本心 兵入徽州 材學案補遺引其爲書喩諸生曰 0 o 謂拘 當 至正· 明 則 東 汪克寬環谷集 下矣 爲 Щ 時 0 寇 之仕 君臣之小 謂師 然豈既受元 士 + 人 0 四年,除翰林待制 , 成 明 明 守將要致之, Ш 則 似可 日 絕意仕進 乃不 節 爲 師 , '分三等 具衣冠: 王 爵 山 得已 昧 行 , 民 卽 如是而已 狀 **,吾初欲** 而 師 族 北 不 0 勤 公大義 當仕 出 於教 如 面再 師 Ш 遣使者以御酒名幣浮海徵之,辭 日: 師 Щ 爲 曾再 明 慷 拜 山之未仕 食人之食 0 ,學者門人受業者衆, 乎 慨殺 此 又 吾豈事二姓者邪 , 自縊 距 應進 元明之際歷史上 0 是亦 等 孔 身以 子 土 元 而 要之 敦風 而 卒 春秋之意 則死其事 舉 同爲未明夷夏之大防 死之爲 不 0 師 化 利 皆未嘗有夷夏之防 山 , , 0 因被 既不 實 乃 元末大 0 絕大節 等 遠 棄 所居 未 -獲遂死 食其 辈: 拘 危素之既 鄓 子 儒 囚 疾 不能 業 食 不 瑛 目 起 者 七 以邃 其 容 , 今將當 奚 所 是 妻 修 當大 關 宛 於春 使 仕 類 師 則 抑 相

元

以

從

Ш

今復據 宋 元 學案摘 錄 數 事 如 次

應之 不可 死 不 新 夷夏之辨 ·撫綏 心 安再 , 奉公 時 冤 鮑深 陷 時 之, 伯 師 原 人 , 則百 猶 而 元軍復至 稱 字 而 山 終遭 尙 乃挺身出 鄭門 伯 反殲之乎? 原 在 口 疑 無以自 0 0 是伯原亦終不能 鮑 忌乎 師 , 伯 山 0 0 原 帥 伯 被 解 明 0 被執 則無可 師 召 乃釋之 原朝夕在獄 0 下 , 徽 伯 , 深論? 州 。其子 其帥欲殺之。 原 攝行! 承其 復 矣 , 購 師 視 潁 師 0 師 要之 以其飲食 志 Ш , 山 書院 洪 , 公武中 伯原從容言曰 , 戒子弗出 伯 當喪亂之際 Щ 0 原先 長 以薦起 是伯原固 。元兵復新安, 令 通去,使己子 類代入獄,榜掠 0 <del></del> 豈其子亦 , 亦忠於元廷, 歷官翰林 士之出 山 I 林 遺 民 Ш 伯原與其叔父仲安以 處 林 修 , 朝 撰 , **捍禦鄉**: 並起 良 廷 , 難 同 , 遲 善 義兵助平 知 擇 回 耀 井 瞻 州 , , 將 而 顧 百 盜 軍 其 以 奈 未能 義 非 賊 不 ,

罪

何

明

度

0

兵

諄諄 年 勉 方正 在 0 寧黨 豊終<sup>1</sup> 元兵來 鮑元 爲 師 , 臣 猶 Щ . 虚 日 康 死 族 無逃於不忠不孝之罪 復新 忠 人 殺 八鄭忠 賊 字仲· 師 爲子 安 Ш 0 竟卒 有 安 , 鄭潛 盡 仲 遺 0 安與 師 孝 戒 0 與 是仲安亦 Ш , (其從子 當 以 忠 皆隨事 厄 不辱 那 , , 日 謀於諸: 爲親爲族足矣 師 伯原 元之忠民 Ш 我之死 及 , 而終仕 師 生 0 Ш , 日 雖 弟 所 於明 曰 璉 以爲天下 志 家破 何必區 , 衞 皆起義兵應之, 0 潛子 鄉 可 显 里, 以再營 立 些悲慕耶 桓 節 要之不. , 義 與唐 師 , 0 爲萬 出 死 然則忠之仕 仲實等 知朝廷之非吾族 不 入 世 可 Щ 再得 立 同 谷 沼對 綱 賜 常 積 0 勞 傾家救之 , 亦 類 成 節 汝 雚 仕 疾 義 也 綱 所 明 , 囈 常 宜 0 是 自 坐 何

家 廷 , , 希 乃 鄭 貢泣 終不 璉 應之。 字 知 有 希 民 貢 終其 族 , 師 大 身不 義 山 弟 也 仕 0 嘗仕 0 是 師 元 山之敎其弟子與 , 又與 鮑仲安同 家人 起義 , 兵 亦 0 師 日 當 Щ 知有 之卒 郷里 , 謂 ` 璉 宗 日 族 汝當 , 亦 當 屈 身 知

以

保

有

朝

學諭 寬固 喜 卽 生 攝 紫陽 爲失身失節 , 觀之白馬 賜 亦 南 桂 唐 膺 書 墫. 雄 仲 彥 學正 院 良 明 酒 實 祖 雲 粟 Щ 長 帛 名桂 名 聘 , 皆不 修 德 而 可 0 , 芳 其 撫慰 稱 元 證 和 史 矣 集 就 風 , 學者稱, 以字 中 所 而 , 0 0 又汪 列 扇 明 去 有 名明 龍 祖 行 0 , 或於明 今 按 克寬 幸 白 鳳 0 代之儒 雲先 慈谿 紀 歙 與 年 , 延訪 生 初君 師 仲 人 , 林 實 仍 Ш 0 臣間 韓林 有白 元 早 耆 與 0 鄭 若 鄉 歲 碩 雲 貢 師 兒 師 相 , 稍有 年 集七 召見 進 山 山 知 士 號 亦 ` 卷 羹梅之助 危太樸講學於歙之三峯精 如 同 , 0 0 嘗爲 書院 稱大丞 白 治 首問 , I雲環谷 朱 四 治天下 子學 庫提要謂明 院 相 0 惜乎師: 卽 山 0 , 要道 屈 師 明 長 身 祖 Ш , 及平江 山之智 死 祖 0 , 以不嗜 郎瑛 命之仕 出 克寬 , 路 介謂 進 不 舍 學 及 明 爲 殺 師 0 教 此 作 以 元 祖 人 Ш 時 對 瞽 授 也 以 行 H 薦除 善 狀 以 廢 生 解 明 罷 崇文 歸 , 而 而 , 祖 豊 大 克 尋

不

爲之師 張 盆 古 者 士 不 0 通 並 誠 不 親 如 0 彦良 若 方 謂 卿 國 彦 彦 良 良 彥 知 珍 良 無 交辟 曰 上 日 不 謂 萬 江 言 世 不 南 逋 , 太平治要十二策 明 就 儒 儒 矣 者 祖 書其 洪 0 , 武 請告歸 惟 間 語 卿 揭 徴詣<sup>1</sup> 便殿 人 0 彦良仕於元 0 帝曰 公車 , 對日 謂 諸 0 時 彦良 大臣 臣不如 選國子 所陳 日 ; 叉臣 宋濂 此 生爲給事 , 於明 通邃 彦良與朕 劉 事體 乃特 基 中 0 論 , 爲 命彦良 有 帝 至於 明 裨 日 祖 治 此 所 與 道 濂 喜 宋 汝等 文 世 濂 謂 耳 宜 明 親 孔 祖 儒 克夷 基 炙 者 評 儒 泥 峻

不

肯

屈

身

0

如文昭之於國珍

,

亦其例

也

濂 , 劉基 亦非 真能 亦有 泥 古 分寸 0 明 初 О 而 君臣 獨稱 1 事之向 彦良爲儒 背 離 亦證 合 明 誠 有難 7祖非 言者 不喜 儒 , 亦 0 時譏 不 當專責明 《儒者泥· 古不 祖 方 通 也 , 苟其 心

講 吾不 室 冠服 欲 不 拒 屈 學 欲 死 陳 , , 凡 使民 歎曰 治 麟 0 汽 拘 海 上 元儒 田 字文昭 塗炭 葺 :吾不忍危其民 園 在當 + 年 種 故隻身來 時 溫 と牧自給 , 移 州 皆以書院講學爲大事 入鄭 人 0 , 0 , 殺我非 國珍時 單騎入謁 爲元進士 , 又三年而 時遣人偵之, 勇 也 勸以勤一 仕於元 國 0 國珍媳 珍亡。 , 亦 以自· 王 0 文昭 謝 以爲眞廢 亦以助平盜賊爲 0 安其身 國珍留之不遣 , 南遊閩· 置之海上。文昭自稱足疾 ,乃不 , 而 中 於 而 事 卒 加害。重興書院 , 時起事 意欲脅臣之 0 方國 全謝 珍入 者 Ш 勾 , 皆 餘 鄞 扶杖 文昭 以 土 與 要之相 盜 音 間文昭 Ш 正色 賊視之, 著道 中子 見 曰 終 弟 士 0

後 非 爲 忘 窓令 行 行 , 中 非 道之時也 趙 國 以 偕 , 執經 聖賢時 元爲 字子永, 胡 請 業, 然嘗謂孔子以道設教 務於元廷 虜 故 慈谿. 行弟子禮。 不 住 人。 0 0 其不屈於方國珍 嘗寄聲危素於大都 學者稱寶峰 方國 珍據浙東 而未嘗 先生 , 非爲忠於元 0 , 曰:: 日忘天下 自謂吾故宋宗子 逼之仕 疇昔所言聖賢時務 , 0 , 不起 故雖是 亦鄙 0 處 國 , 是寶峯之不仕元 非不 1珍爲盜 Ш 林 欲仕 , , 可行 時 賊 革 有憂時之色 但 否耶 示 ? 可 是寶峯 特自 仕 陳文昭 且 以 爲宋 今亦

朶歹所疾 吳當 構 字 爲飛語 伯 尙 草 解兵柄 廬 孫 , 仕 並 元 除 0 名 順 帝至 0 陳 元 **友諒陷江西** 中 江 南 盜 起 伯 尙 戴黄冠 特 授江 西 服 廉 道士服 訪 使 屢有 杜門不出 功 爲 函 H

元, 以著書爲事 則宜其孫之忠元矣。其不屈於友諒 0 友 諒 遣· 人辟之,以死自誓 , , 更無足怪 拘留江州 年 • 得歸! 隱廬陵 草廬生爲宋民 , 卒仕於

黎 仲基 名載 , 臨川 人 0 嘗謁草廬於郡學 湖 廣左丞章 伯 顔 徴 爲 太平路儒 學教 授 0 蘄 黄

盜

起 常以奇策助伯顏取勝 歸築室瓜園 。洪武初 , 再薦不起

敢愛生乎?遂公服 今但有一死報國耳 趙宏毅 王 彰 字伯遠 字仁卿 向 0 金溪人 | 闕拜 乃與妻解氏皆自縊 **,晉縣人** 而 縊 。少從草廬學 死 0 嘗從吳草廬遊 。其子恭 , 登 進 士 0 仕元爲國史編 ,爲中書管勾 , 除國子監 博 修 , 官 亦與妻訣 士 。元亡, 0 元亡 , , 歸 曰:吾父母已死 明兵入城 隱故 Ш 0 歎 日

尙

我

累蒙國恩, 而 忠於元者 余前 黄冔 論 爲胄子師 字殷士 0 明初 如殷士 開 金谿人 國 所爲 ,代言禁林, 諸 臣 , 更當使危素娘見於地下 集 0 仕元 , 今縱無我戮 如宋潛溪 , 爲翰林待制兼國史院編修官 劉誠意 何面目見天下士?遂赴井死 0 鄭師· 、高青丘 Ш 趙 、貝清江諸人 宏毅、黄厚 0 元京破 , 歎曰: 。此皆從遊草廬 , 元史皆入忠義傳 皆文人也 我以儒 致身 門

,

夏大統 功 常 (君之非我 0 惟 則入儒 中絕 初 則 族類 處畎畝以樂堯舜之道,繼則欲其君爲堯舜之君, 林 諸儒 上之所 僻 孔子被髮左衽之歎 處山 錄 林 前之如吳草廬 , 講學書院 ,不復存於諸儒之心 , 朋徒廣集 後之如鄭師 經籍 Щ , 義理 。反之六經大義 而身進其道 皆歸然一代儒宗。 猶存兩宋之一 以與天下共樂之, 兩宋理 蓋自元騎入 脈 , 學 此 不能謂 固 主 而 趙子 如 華 是 無

蓋莫不 乎? 孝孺 襲 興 以 夫是 相 相 里之初望 元 理 率 自 互. , 一錯 儒 非之申辨 罹 漢 學大統自居 元政既亂 解 出 弛 + 知敬禮儒 差 成書塞責 唐之衣冠 族之禍 其 至 而 終亦 斯 卽歸 助 暴 , , 0 吾華夏小民揭竿呼 固 此 重 如夢之醒 生 抑民之罪 0 , 明代儒 尤爲 光 亦治 丽 可 斯其久覊 欲引與 無所用之也 不 , 史者所當 明初蔑視儒臣之慘酷表現 華夏之大統 明古今之變 學復興 , , 乃不得已 並 而 被禍 不 悟 致以 , 尚遠 斯復 孏 此 , , 深 民族之大義 固 盜賊之亦 丽 , 而 勉就 起 嘅 在 亦 加 , 後 而 非 諸儒率避之若浼 , , 乃諸 有元 可 繼以深思 明 。當其時 ?祖之辟 ? 出 以專罪明祖之草菅諸 自 儒率鄙之爲盜 0 , 代羣 逮及永樂間 吾鄉 與夫時務之當先 召 , , 政治 儒 而 里 0 然亦站 愼 也 Ш 。及元運已 學術 加之以 林講學之風 0 自 賊 , 詔 , \_\_\_ 爾 方 , 必 修 儒 審 國 , 論者 興於上 五經 難挽 亦 出 珍 欲 , 痛 不 而 , , 張 乃亦隨一 懲嚴 非 四 得辭其咎 諸儒之過於自尊其 0 , 書大全 諸儒 有 士 至於意氣之阿 ,一衰於下 忠憤 誠 削之 元 欲 運 助 陳 自 0 羣 然而 一發之忱 而 而 友 元 平 諒 以 臣 , 凘 之徒 斥 明之崛 亂 保 其 惟 滅 事 道 衞 衞 以 0 0 方 旣 賏 乃 鈔 鄉 鄉

功德 存 有曰 稿卷五有 克復 休寧 縣 碑 , 敍至正十二年盜犯休 寧 翌 年 克定 , 爲碑 頌 省宣 使巴特尼 瑪

天子大聖 , **羣公至** 明 , 相 臣凱 還 , 大 齊 是 經 0 朱芾彤弓 , 三 一錫爾 光 0 爲國 虎臣 0 以 守 匹

誦 其文, 若當軼漢唐 而 焰 雅 瀕 0 然曾不幾年,天子聖,羣公明 古 已延殘息於大漠之外 而 虎 臣

方

-192-之守四方者 則宜其有 存 幸以 文, 願 稿卷六邵庵先生虞公行狀,記一 0 番不能 ,亦渺不復在

自安不可告人之心

情

0

東 Ш

稿

,

不

啻正爲此心情寫照

也

事

自

。明初諸臣

,

既屢招

而不至

,又暫止而求去

,

其闇:

於時勢,

忘其祖父所事者,必忠孝之士也,臣不足以及此。能爲陛下言此者,必忠孝人矣。今臣 嘗被旨撰 (疎庸 適美前事爾 故臣以爲非忠孝之人不能爲是言。上目一 際遇聖時 佛寺記,其處有前代遺迹 0 公對曰:前代遠矣。其臣庶子孫不忘本初者,已鮮有能思其祖父 , 致位通顯 澤流 0 後嗣 適進對,上問曰:人言汝前代相臣子孫 侍臣歎異之。 庶幾子孫世世不忘朝廷厚恩 0 則誠犬馬 今爲是 而 . 等 不

夷夏之見乎? 道園元代鴻儒,亦子常所嚴事, 嫗嫗道其事如此 , 口頰宛然,在當時讀書人心中, 更何敢存

存稿卷二有送高則誠歸永嘉序 謂:

禮義 文書 君亦庶幾因得自效。浙東帥達公,以除兇爲己任,一 行 高君登進士 中 書聞 以時 秩 其名, 滿 第 遊赤城雁蕩諸 卽 辟丞相掾 日 調官括蒼郡錄事 [還省] 垣 一告歸 Ш 。俄台民弄兵城邑, , **頫澗泉而仰雲木** 設俎豆 。郡守前憲副: 觴 客 , 有旨行省臣總諸郡兵平之,省臣擇君 徐公, , 猶不失吾故也 日 余方解吏 見君, 即學宮設 歡然 事 終帳 歸 0 有起 。既以論 得 , 席末 與 身率子弟迎 鄉 事不合 而言者 人子弟 君 自從 避 曰:今 論 請 不 治 0

中 Ш 原 林 多故 亦 將 , 聖天子賢宰相 不 可得 0 然則入踐廷宁,陪老成之讜議 , 旦 懲膏梁刀筆之弊 盡 , 出 取 臨 才 郡邑 進士 用之, , 布 恩德於罷 如 吾 高 氓 君 使 雖 殊 欲 功茂 決 豚

績炳然一時,以答清朝設科盛意,豈非君乎?

報 暇筆 記 是 王 著 高 , o 謂 雖 則 嘗禁元之劇 元 0 人呼 何 誠 託之他人之口 明 江祖嘗云 元朗 亦欲助元平亂 4 謂 曲 曲 論 , 不 花 五 , 經 謂高善王四 , 豈亦惡於如 , 其與慫恿鄭師 故謂之牛太師 四書爲五穀, , 及其 (退歸) 則誠輩之不屈而然乎? , 勸之仕 鄉 山之意 不 里 0 則 可缺。琵琶記如珍羞百 , ·, 登第 誠 而子常之意 亦膺 , 固 無異 明 , 即棄妻贅於不花太史家 祖 微而 也 , ·惜無可 尚 望 其 0 是豈非昧於事機之甚者 拒不赴召 深論 出 味,富貴家豈可 建 殊功 矣 , 是亦忠於元者 0 , 立茂績 。琵琶者 無 , 0 , 高則 以爲 不 也 , 取 知 0 聖君 信 姚 其 誠 否? 以 福 頭 青 琵 賢 上 相 匹 溪

存稿卷二華川文集序有曰:

而以子克佐之。 金華王君子克以文學進用已久,聖天子旣混 有志於復古, 書將成 以周秦先漢之文辭 ,宋公入翰林爲學士,子克爲待制 , 相與鳴國家之盛, 華夏 卽即 使來者有所興起 詔 修 , 此 元史,乃起宋公景濂 文運將開之候也 其不在茲乎? 。二公者 總 其 事 ,

此 也 不 復出。卒於至正六年 始爲子常頌揚明廷文運將開 0 子 常從學於虞道園 黃楚望 0 道園亦宋遺民,入元在幼歳 , 楚望入元已年十六,曾受元書院 於東山集中爲僅見,然時 , 仕元貴達,卒於至正八年 已晚,又汲汲抽身求去 山長祿 既則閉! 0 門 此兩 授徒 , 蓋 人,一 意終不 以 養 親 隱 屬

復辟. 明之迹 避秦而 道自 自居 臣 比 朝 Щ 明 其所以潛 /史儒: [傳道自] 沙浮邱: 廷 地 顯 (為歸 乃柯 近通 之役 晦之遺風 ,子常之屛迹窮經 則 逃 伯 林 聲氣 伏生 更不 氏 此 傳 尊 極 與退者 於傳 此 而子常心中,終若依戀元廷,冀其猶可有爲 猶 0 蓋 識闇 則 足與元末諸儒 可 而 , 2中略-猶知: 師 與 說 論 不知秦滅漢起與元亡明 元之季世 ,乃無 (趙東 其 Щ 如 0 大體 仰慕 此 去不提 以 至柯 八山之治 不 , , 其風近於楚望, 則試問: 出 明白之義理可據 紹 , 0 , 儒士跼! 忠元 然如吳澄虞汲之輩,終不免於一 則終是一元儒也 相 ,著史之體豈宜有此例乎?民國肇造 **恣新元史**, 提並論 春秋 其學爲何學,其書爲何書 ,子常當· 促 , 更不 , 。至於如南海康氏 其淺衷狹識 興 移子常入儒林傳 亦受其感染 而心存朝廷 , ,乃不免以講學著書傳道自尊自 知 相 其間情勢大不同 0 清代四庫全書以東山 距 幾 何 , 有無地 。綜觀 , 矣 不忘用世 , , , 以能治公羊春秋名,乃與張勳同 而 , 則子常明膺明 出 而其道又爲何道乎?故子常雖列名於 使我仍得苟安於鄉里 諸 自容之可悲者如 豈容相 人 , 則成爲或潛 , , 其意則近道園 於元 亦有所謂清室遺民 存稿列歸元代 擬 初 0 勝國 祖之召 抑浮邱之與伏公 解 此 或躍 , 遺 而 0 亦無可 老堅貞 如子常 。子常又與鄭師 , , 猶 可 爲 而提要著其入 進 明 可 初開 以 亦 亦 可 不 意欲 講 ·以忠戴 出 退 復 創 宣 以 國之 學著 尙 , 講 而 知 自

## □ 讀業子奇草木子

葉子 奇 明 定無傳 而 朱舜尊 **赐書亭集有之**, 何 以爲明史最後所不采 則不 知 О 朱傳

此 言

殊有理

0

後

人辨朱子理氣論

,

必歸之唯

氣

二元

,

,則其極

非

幻妄無歸

矣

0

又曰

子奇 時 下之儀 一年, 魚龍之恠。旁及釋老之書,而歸於六籍 , 以木記 字世 以株連就逮獄中 ,星躔之軌 一歲,以自況其生也 傑 龍泉人 律曆 , 0 推步 以瓦磨墨, 用薦 、陰陽 、授巴陵主簿。嘗作太玄本旨究,通衍皇極之說 有得輙書 五 行 0 兼記時事失得,兵荒災異。曰草木子者 海嶽浸瀆戎貊稀有之物 。事釋家居 , 續成之,號草木子。 神伸 鬼屈土 一石之變 其 八書究上 以草記 洪

武

### 又曰

主 里人王毅從許謙游 故自號曰 靜 齋 ,受理一分殊之旨,子奇學於毅,日 : 聖賢之學, 不貴多聞 以 

則子

奇亦儒學而鶩於博雜者

,草木子,清四庫有其書

0

其言]

日

天道不以理言 ,則歸於幻妄

儒佛言性之旨,譬之明珠, 均之爲蚌生也 0 儒謂: 珠 由 內 出 , 生於蚌 胎 0 佛謂 珠 由 外 入

在 蚌胎 儒本 諸天, 佛由 諸 己。 此學者當辨 其 理

傳 竊謂 儒者又曰 若 此 謂 辨亦有 性即 理在 外 理 深致 。盈天地 寄於氣 珠 唯 由 故佛 內出 \_\_\_ 氣 家 , 亦唯 重此 生於蚌胎 性 理 而 輕於天 而已 所以儒者主天人合一。 0 凡氣必歸之理 天地爲幻妄 , 而 此 蚌胎 切天道皆是理 性 唯 生珠 可 **清歸於** 其 中 浬 槃矣 此 必有 爲 程 理 故 朱 嫡 故

引草 木子 兩 條 , 買一 義 相 發 , 而子奇於儒家傳統要旨 宜 非 無 所 窺 見 也

草木子又曰

化國之日舒以 長 ,由其事簡也 。亂國之日短以促 , 由其事繁 也

此 言亦甚扼要。 孔子論治 而 日 大哉堯之爲君也,巍巍乎唯天爲大, 唯堯則之,蕩蕩乎民無能名

焉 0 又曰:: 巍巍乎舜禹之有天下也 , 而不與焉。又許仲弓可使南面 仲弓論子桑伯子, 日 居敬

而 行簡以臨其民 ,不亦可乎。居簡 而 行簡 **殆明初能具深識之人,較之當時以詩文擅名者** , 無乃太簡乎。孔子然之。子奇似亦能窺見其 深意 應 無多

而其書又多言元事 ,應亦非無見之言。其言有曰

然則子奇能言性理

,又能言治道

,

遜

元朝自世祖混 之後,天下治平者六七十 年 0 輕刑 薄 賦 , 兵革 空用

葬 行旅萬里 , 宿泊 如家 0 誠所謂盛也夫

如子奇之言,誠可代表明 初諸臣 心不忘元之一般心 理 固 不當輕

北人性 簡直 類 能 傾 心以聽於人,故世 祖既得天下, 卒賴姚樞 牧菴先生 , 許 衡 魯齋 先生諸

忽視之。

又

日

0

生者·

有

養

死

有

,

賢啓沃之力 及施治於天下,深仁厚澤,浹於元元 0 惜乎 , 王以道文統 行吏道以雜之,

以文案牽制 雖足 以 防恣肆之姦 , 而 眞儒之效, 遂有所窒而 不 暢 矣

是謂 元治雜以吏道 儒 效 示 暢 亦中肯綮 叉曰

元末有危素大樸 ,江西人,游京師 專以倡鳴科舉無人才爲說, 人多信之。彼固 以文章德

行 Щ 自居也。至正辛卯天下之亂 皆舉 人也 0 危是時已累位至參政 , 能死節者惟彭城張樞,安慶余闕,江州李黻 ,獨首鼠皈降 ,上以其失節屢辱之,決以夏楚 燕京陳子

滁 州 而

此 危素之失節 , 固 非 ;助獎爲| 元而死節 也 0 叉 日

,

元朝天下長官 皆其國人是用 至於風紀之司,又杜絕不用漢人南人。宥密之機

,

又絕不

預聞矣。其海宇雖在混一之天,而肝 膽實有胡越之間

此 處顯 以分別 種族界線論元治 。當子奇之世 ,應人人知之,然立 論及此者 似惟子奇一 人 是子

,而非我族類其心必異之古訓,則舉世受之,

而惟子奇能言之,子

奇之在當時 ,洵如孤鶴之在騖羣矣。又曰 奇雖未以種族之見肆撻伐之意

元朝 末 年,官貪吏汚,始因蒙古色目人,罔 然不. 知廉恥之爲何物

持論 至此 ,乃可爲言人人之所不能言,而又其事昭然,固當人人知之而人人能言之者。此尤見子

奇之卓。又曰

元朝混一六合,百有餘年 , 而後江南得國 。蓋自朱邪正心始盛 至於元亡, 首尾 將 五.

年 0 孟子曰:五百年必有王者與 ,其間必有名世者,此之謂也 。豈徒然哉

之時乎。要之言舉世之所不能言, 子奇之爲此書 乃 在 獄 中 及其 事釋居家而: 可以雪舉世羣儒之恥矣。子奇之得罪 續 成之,不知其爲此 條 , 乃 ,乃因有司 在獄 中乎 , 祭神隍 抑 在 事 城 釋居 羣

吏竊 之而又置 眞 遽受逮下 不 儒通 樂爲 飮 豬 明 用 憾焉 治道 獄 腦 酒 故 , 及其事 屈 , , 則羣 縣 (意自· 堪於大用 學生發其 釋 卑下 儒之見幾而 , 亦 以 待羣 事 未 而 亦 聞朝廷有致歉疚重處用之意 。子奇適至 未嘗拒 作 儒 , 不 而 · 俟終日 不受用如子奇者, 又 時 , 時 不吝嚴 其情· 連 0 亦未 明 刑 祖蓋 峻 乃明 可厚 0 法 然則羣儒之拒聘 能 7祖竟不. 責 知治 使諸 也 國 儒 知之 不 不 得不 得 苯 元出: 卽 委屈 用 飮 儒 者 豬 爲 , 腦 己 而 , 明 用 酒 祖 時 乃 亦 然 羣 始 儒 何 亦 重 致 皆 有

以爲 二十 此 寥 焉 0 明 八 時 不 元治 , 惟 祖 及 餘 亦 姚 獎起之是也 縱不足言 方正學孝孺 遺其子 應 有 趙 召 撝謙 · 遂從游 以 , 年 謙 , , 然歷代開國 冠冕一 而必欲鞭笞驅策之,則 少 朱彛尊曝書亭集有傳 0 方正學亦 衆易之, 代 , , 而不免於靖難之變 儒士之盛, 與善 然撝 謙 0 及罷 不爲 固 , 明代爲首。此皆羣儒在元代 亦詳! 貴顯 大非 歸 , 築博古臺讀 所 明 , 0 尤遭極 逮於 儒 奪 學案 , 以是不 明祖之殁, 刑 。洪 書 , 儒統遂絕 其上 見錄 武十二年徵修 儒士之僅 , 0 著書三 授國子院 , 意存 監 存 百 正 餘卷 典 堪 遁 韻 大 隱 簿 , 撝 用 後皆 故 宋 謙 者 得

時

年

有

寥

濂

獨

散

博覽以 神之情 知之, 狀 致 廣 近 大 而 人物賢 窮究 以 否邪 盡 知 精 微 正 之分 凡 大而! 遠而· 天 古今興 地之理 衰治亂之迹 微 而 事 物之故 , 無 不當致. 明 而 禮樂之文 知 0 疑 事 無質 図 而 鬼 佚

其爲造化

經

緬

圖

有

日

斯 H 謂 有 法於爲 通儒之學者矣 又越十二 年 又因 「薦 , 召 I 爲瓊 Ш 教諭 卒於 廣 城 時 爲洪武二十八

知之爲.

不

知

爲

不

未嘗 生及 則崇視 召 州 起 儒 卒 謙 年 明 史與究明學者所值 風 , 0 , 然黨禍日 始積極 知崇道 前 卽 翰 年 年 , 林院 僅 則非 江 輩 焉 靟 右 皆 凋 四 , 十五耳 又嫉! 門下 從政 較 庶吉士 其道 反覆 謝 0 故 晚 , 視 儒 而 ,卒與明 , 0 道之與 一等諸 後繼 然先之以龍場驛之貶 此後儒學復興 非早顯名於當世 。是明 亦多隱淪是尚 焉 深切 0 新 者 俊秀之較後起而可有大成就者,每不拒聘 祚同終 更治 制 祖之徵羣儒 研討 , 朝廷乃若有無儒可用之阨 , 其用 , 其在· 問 。蓋明祖之崇儒 , 0 及至東京 心用 如吳康齋胡敬 題 , 有明 眀 也 祖 特以其名,非能眞知其人而善養善用之也 , 力 林起 繼之以平宸濠後之遭讒謗 一代, , 則處以微吏卑職 已遠勝於北宋之初 , 終 乃正式以不尙 · 齋 婁 一 , 其志終是偏重於吏治 無沆瀣相得之美,較之兩漢唐宋皆遜 0 齋陳白: 明祖雖竭意興學校,廣薦舉 , 何嘗. 沙 Ш 0 林 然以之振 知護掖而 , 皆 跡 近 隱 淪 , 而 , 而朝廷不能 必 此後王學之徒 以朝廷政 , 飭吏治可 而微忽於尊賢 成就之。 , 用 務爲 近於元 0 ; 不 故 如葉世 也 , 又創 故及 念 前 , 以之宏 僅 儒 輩 傑趙 此 以 浙 歷 明 高 知 陽 用 亦 相 中 事 祖 名 泰 號 監 之 臣 撝 明

又按明史及曝書亭集分載

0

王 冕 當元之季多逸民 冕其 也 0 (明史本: 傳

劉 永之 清江· 人。 長春秋 嘗一 至 京 師 宋 濂 欲留之, 以耳 **聲**辭 歸 0 後以子獲罪 當 徙 卒於

途 0 (曝書亭集卷六十四)

王 翰 仕 完 爲潮 州 路總管 ,元亡浮海 入閩 0 太祖 聞 其賢 強起之, 翰 自 刎 死 0 明 史 文陳友

定傳林鴻傳)

右四人,亦足證見明初士人心理之一斑,特附於此,其他不備列。陳 亮 長樂人。自以故元儒生,明興,累詔不出。(明史林鴻 長樂人。自以故元儒生,明興,累詔不出。(明史林鴻傳) 0

然亦多二陳所未及也

# 金元統治下之新道教

大道、太一。正一天師乃宋以前道教舊統 之保存。蓋幾於西方羅馬覆亡後之基督教會也。元史釋老傳,分道家爲四派,曰全眞 有長春道教源流 0 當宋明新儒學時代,北方金元統治下,有新道敎之崛興 當時已有李道謙之祖庭內傳與七眞年譜甘水仙源錄諸書記其梗概 ,近人新會陳垣 (援菴) 有南宋初河北新道教考, 全真等三派,則爲宋南渡後北方所新創 , 此事頗有關於北方社會經濟及文化 兩書鉤稽益詳。 清末東莞陳銘珪 茲文特撮述大 ,而全眞特 、正一、眞 (友珊)

又隸名武選。核其年代 金大定十年 全真教創始於金之王嘉 方咸陽淪陷 ,當屬宋建炎初。麻九疇鄧州重陽觀記謂 重陽年已弱冠 所謂重陽眞人也 ,劉祖謙終南山 0 重陽 , 陝之咸陽人 重陽祖師 仙 生於宋徽宗政 迹記稱其少讀書,係學籍 和 二年,卒於

重陽 有 文武 藝 , 當 廢 齊阜 菖 間 脫落 功名 , 日 酣 於酒 0 則 其 人蓋宋之忠義逸民 抱亡國之

捅 加 憤 激自 放 者

劉 祖 謙. 重 陽 仙 迹記 又稱

箕子 狂 九 嚋 叙 接興 狂 , 鳳歌 出 師 掘 地 爲隧 , 封 高 數尺 榜日 活 死 人墓 又於四

隅 各 植 海棠 株 , 曰 吾 將 來使四海教風 爲 家耳 0

則其 (為隱) 遁 洋狂 可 知 0 商 挺題 甘 河 遇 仙 宮詩 謂

子房志亡秦 曾進 橋下 屨 0 佐漢 ) 奠鴻基 , 花然天 一 柱 0 要伴赤松遊 功成拂 次去去

異

人與

異 書 造物 示輕付 0 重陽 起全真, 高視 仍 **活局步。** 矯矯英雄姿, 乘時 或 割 據 0 妄 心 知 復 非

收心活死 墓 0 (元詩選)

孝經 教金蓮· 生前 玉陽 是重陽當: 古錄 東寧海州 所謂豪傑之士, 會 郝大 初 一教歸 時 不 0 三教三光會 自標其教爲道家 通 其徒著者 實曾糾 號 之說 廣 寧 衆起義 佯狂玩世 , , , 有馬鈺 明儒頗 等 又馬妻孫不二號淸 , 。商挺元時人,乃敢揭其大節見於詩篇 凡 , 號 唱之, 立 在登州有三教玉華會 , 會必 丹陽 志之所存, 實已 以三教名 , 譚 導源於此 淨散人,謂之七賢。 處端號長眞 求返其眞 不 獨 矣 在萊州有三教平等會 居 , 0 劉處玄號長 謂之全眞是也 而 敎 重陽之自名其敎則 0 故常勸, 而 邱 也 劉譚馬尤著, 生 人讀 。其後重陽 , 其敎旨 邱 處機 道 ,又有三教七 德經 日 號 全眞 謂之四 東遊 長 般岩 春 **虞集道** 寶 講 哲 王 Ę, 道 會 處 經 於 園 重 及 陽 號 Ш 蓋

故其

錦月觀記

涉世制行 行殊有可喜 0 其遜讓似儒 · 其勤苦似墨 , 其慈愛似佛。至於塊守質朴

大概務以安恬冲澹,合於自然,含垢忍辱,苦身勵行,持之久而行之力,

斯爲得之。

完

張起巖勞山聚仙宮記)

其學首以耐勞苦,力耕作

0

故凡居處服食

,

非其所自爲不敢啖。蓬垢疏糲

人所不堪者能安之。

調伏攝持

,

將以復其性

0

死生壽夭,

泊然無繫念。

(元袁桷清容居士集

絕憂患慕羨

其修持大略,以識心見性

,除情去欲,忍恥含垢,苦己利人為之宗。(元徐享郝宗師道行碑)

則又類夫修混沌者。(金辛愿陝州靈虛觀記) 全真道有取於老佛兩家之間,故其寒餓憔悴

無異 小鳥 ,竹木瓦石之所感觸, 0 (金元好問遺山文集離峯子墓銘 則能頴脫 , 縛律自解 ,痛自黔劓 心光曄 然, 若枯寂頭陀然 普照六合 0 及有得也 亦 與 頭陀 得道者 樹 林

蟬脫泥滓 其教始以修眞絕俗 以 兼善濟物爲日用之方。 ,遠引高蹈 ,滅景山林 豈以道真治身 如標枝野鹿 , 以緒餘爲國 漠然不與 , 以土苴治天下乎?(元

(世接

終之混迹人間

王惲秋澗集徽州昨城縣靈虛觀碑

靜

靜

而

生陰

,陰陽變合而生水火木金土

。 L

重陽

以

五行不到說道

,

亦其

義

也

,

其

曰

父母

未

生

大率當; 時 所 以 稱全眞敎者具 如 此 0 論 其 大體 , 誠爲兼綜儒釋道三家之一 種 教 義也 0 又據 元 利 用

無爲眞 人馬宗師 道 行 碑

丹陽 問 重陽 何名曰道 , 重陽日 • 「五行不到處 ,父母未 生 時 0

此 卽 老子 有物混成 先天地: 生之說也 0 濂溪太極 圖 說 云: 「無 極 而 太極 太 極 動 而 生 鬺 動 極 復

則 繟 家舊說也。又尹淸和 (丘長春弟子) 北遊語錄云:

後 妙 長 春 0 塵勞事畢, 師 日 父言 , 閉 戶 俺與丹陽 力行所聞之法 , **俺竊聽之**, 同遇祖与 正傳谷神 師 學道 , 不死調息之法。久之,推戶入 祖 師 令俺重作 - 塵勞, 不容少息 卽 止 而 其說 與 八丹陽默 俺

自

叉云

,

事 春 祖 曰 師 師 爾 性 父默自4 將有歸期, 曾 上 有 不 念日 知 再無所 不干事 於四 從 處即 師 言 師 極 以 是道 後 來 加鍛 祖 , 鍊 師 不 臨昇 知 何者是道 日之工如往者百千日,錯 , 謂長 春 , 日 凡所教者皆不干 , 爾往日嘗有念云 事 行倒 0 施 , 凡 日 動 所 乘 敎 間 作 我者 進問 無有是處 皆 祖 不 師 0 長 答

干

處卽 據此 是道 知全 眞 傳 此 授亦 **殖莊子云道在螻** 極 有禪 門 風 蟻稊稗瓦 趣 重陽 告 **甓**屎溺也 長春  $\Xi$ 性 0 知道之無不在 上 有 , 此 卽 運 水擔柴莫 即知道之未始有在 非 神 通 也 又 至是而: 日 不 干 性 事

切救 理 求淑 與 が道 蚁 始通爲 逸民 世 難 明 朗 亦豈忍謂之一切空。又所以爲非老莊者,老莊淡漠,全眞懇摯 德 故彼輩之制行 丁陽九之厄,苟全性命, 用之於修身齊家治國平天下。今全真教旨非儒非釋 此又佛家六行萬度不染不著之宗旨也 ;,乃似 墨 徒 , 本不作治平之想。 如邱長春之於王重陽 0 所以爲非釋者,全眞諸祖師 惟禪宗歸之一切空 ,恰似禽滑釐之師 。所以爲非儒 。老莊玩 , 墨子 宋儒 者 世 |則轉 驚心 其 全眞諸 全眞 刻實篤行之 世 而 則 亂 爲存 祖 轉 志 而 天

風 , 捨墨徒殆無與擬 。尹淸和北遊語錄云

於實

其意態之不

此 同 0 實字 北 遊語錄又云 長春師父至謙至下, 大可注意 。全眞之實, 大悲大慈, 近於儒家之誠 所出之言, , 而遠於老莊之所謂 未嘗 毫過 I 撲 與 眞 此 則. 由

嘗記 笑 , 曰 : 有人勸長春 俺五十年學得 師 父少 施 個實字 手 段 , 必得當時 未肯 世 旦 信 棄去 重 0 師 父不 顧 0 至於再三, 勸者 益 甚 師 父大

陳秀玉嘗 謂 人曰 :吾所 以 心 服 邱 長 春者 以其 實 而 已 0 嘗與論 敎 , 有 云: 道 釋雜 用 權 , 惟

儒家 不用 非深明理者不 能有 此 語

觀此 則志在下行, 知全眞諸 深入社會下層 師 制 行 涉 世 宣最 , 與貧苦民衆交接 近 儒 0 惟 儒者 志 , 故其風 求 上 達 格又似墨 常期 君行道 耳 治國平天下 全眞 師

重陽之學一傳爲邱劉譚馬 , 而 邱馬之道行又各自有別 0 以禪· 家 相 擬 重陽如五 祖 弘忍 邱 馬

則惠能神秀之分宗矣 。北遊語錄云:

几 師眞成道有遲速 0 丹陽二年半 • 長眞五 年 , 長生七 年 , 長 春師 父至十八九

年

叉云:

長春 虚 幻 師 所以 **父嘗言:** 遲 我與 丹陽悟道有淺深 是以得道有遲速 0 丹陽 便悟 死 , 故 速 0 我悟 萬

叉云:

,

**棲雲子** 王志謹盤山 丹陽 師 父以無爲 語錄論此甚詳 主教 古道 , 其言曰 也 0 至 長 春 師 父則教人積 功行 存無爲 而 行 有 爲

此 念 來 道速 無 有此 或問 身亦捨 , 0 識得一 事 卻不 故祖 其旨 事 卽 無也 割 師云:抱玄守一是功夫,地久天長一也無。這箇「一也無」 墮於數 棄 ,萬物畢,又云抱玄守一,一是甚麼。 如何 何 況其 雖有聲色 故經云: 0 ,則不能一矣。一便生二,二便生三,三生萬 答云:修行之人,當觀此身如一 他 知空不空,知色不色,名爲照了。…… ,境物紛華 以此 辣心 , 故見功疾 周 गि 圍 繞 師云乃混然之性 死囚 目 無所見 修行人若玄關不通 ,牽挽入市 , , 或問丹陽眞 耳無所聞 如何守得 無分別之時 處,卻明出自己本分 步步近死 當於有爲 , 念念盡 人以 不若 悟 也 以 死 和 0 忘 處用 死爲 旣 而 也 知

之所近 此 眞之北 兼善之意尤切 自異於五 處 見
労陽長 宗耳 長 萬 。二子者 境 春 物 祖 請 · 功立 眞 不 , 養二人 人云: 而 生 不 自思之, 0 - 遇物 加 禪 , 亦如佛學之分 兩 不 宗之盛 (道行不 能 心 人之學皆出 是何 此 地下 八久緣熟 自 則端は 利 心 人也 同 利 如何見得成壞 功 他 處 始 , , 空有 惠能 重陽 全抛 自有 丹陽之學似多參佛理 有 何 0 , 0 透處 世 昔在· 全眞教之確立 蓋重陽宗老子而 禪宗之別頓漸 功行。故長春眞 事 , 便是空過時光 山東十有餘年, 教門 勝 如 用力 兩 頭 , 也 (空擔 人云:動則安人利 兼通 亦當以邱 , 0 大 惠能出 獨善之意爲多。 0 起 終日杜門 儒釋 夫天不利物 塵勞 不能無爲 長春爲之主 弘 , 忍門 ٥ 而 若 丹 , 以靜 則四 無心 陽長春則學焉而 不能 物,與天地之道 而 長春之學似多參儒 時 與 爲 地 0 不行 惟 心 有爲 神 功 夫 秀 長春 , 無 不 人觸 又不 地 因 同 實 各得 當 循 不 相 著 敎 然未嘗 利 稱 度 門 其 日 物 , 也 性 則 不 用

其悲憫 堯舜 積累 詩 云 馬邱 見透 為懷 其 「天蒼蒼兮臨 诗 異 與宋 小 行 地 不得不以 其間 通 下 好 學上 亦有時 息兵 下 有爲爲敎者亦時 上 達 9 , 世因 胡 北 爲 方 以貫之 緣 不 粗 救 安 0 丹陽 漢 , 故丹陽 靈 也 , 學道在 苦 洵 0 不 至其於塵勞中 ° \_\_ 得 媿 又曰 此 金世宗大定八年, 以無爲立 教之龍象 「皇天后 悟 教 無爲 0 0 長 北 遊語 春晚年則值蒙古崛 土皆 其化在二十三年 於 有神 至實 錄 云 處 見死 悟 萬有 不 皆 救 起 0 金世宗 虚 知 長 何 春 於 因 愍物 號

丹 陽 以 無爲 主教長生 無爲有 爲相 半 0 長春 有爲十 之九 無爲雖有 其 尙 存 而 勿用

道同 "時異也

有人問 道於長春師父 , 答曰 外修陰德 , 內固 [精神 0 (按此即 答元太祖 語

同

此 二留。 在,早教身命得消憂。」(金蓮正宗記丘長春條)長春遂面見元太祖 時蒙古亦使劉仲祿來, 八字極平實 去歲幸逢慈詔下,今春須索冒寒遊 極淺近,然已道出畢生之功行與修持矣。時兵革滿河朔間 人皆謂其當南行,處機乃北邁。有詩云:「十年兵火萬民愁,千萬 0 不辭嶺北三千里,仍念山東二百州 太祖 問以長生之藥, 宋金各遣使來召 0 窮急漏; 對 誅殘喘 中 曰 無 ,

0

人西

但有 衞 生之道 無長 .生之藥。太祖愛其誠,屢召見, 卽 勸以勿嗜殺 人。 (同上) 今傳長春眞

誌其行迹。玄風慶會錄 (見道藏) 誌其問答。陳銘珪云:

使之回車 邱長春當殺運方熾之時 , 此 則幾於禹稷之己溺己飢,而同符於孔席不 , 以七十餘歲之老翁 ,行萬數千里之絕域 ·暇暖, 墨突不得黔之義 斷斷然以止 殺勸 其

元史釋老傳亦言:

復爲良 北尤甚 太祖時 以敬天愛民爲 方西 民罹俘戮, 與濱 征 本 死而得更生者 日 事攻戦 太祖深契其言, 無所逃命 處機 0 毋慮二三萬人 協 毎 言 欲 處機還燕, 命左右書之, 一天下者 使其徒持牒招求於戰伐之餘 且. 中州 , 以訓 必在乎不 人至今稱道之 諸子 - 嗜殺 。又其時 人。 及問爲治之方 國兵踐蹂 由是爲人奴者得 中原 河 則 南 對

元商挺大都淸逸觀碑有云:

長 春 每語 衆 · 今大兵之後,人民塗炭 , 居 無室 , 行 無食者皆是 , 立觀 度人 時 不 可 失 此

修行之先務,人人當銘之心。

故全眞. 精誠貫徹 初 創 , 所爲 由於遺民忠憤 **與往日** 黄冠羽 , 祥狂! 士神仙方伎者流異趣 避世 0 及其全盛 , 則 而 轉 彼輩之所以仍必託於黃冠 爲敎 文主慈悲 , 圓宏教 度 羽 士間 此 自 者 別 有 因 段

召祥 禍 眞家 會也 入, 力支 七眞本爲王重陽 重陽之道統上接呂洞賓鍾離權劉海蟾, 道家之統緒 此 0 其時 漳 和 其於經濟文化保育護全之力 蓋嘗論 而 彌縫 刋 此 , 爲社 行道 乃 則士族門第已不存在 之, 全眞教在當時之大貢 0 使社 藏 及馬譚劉丘王郝六子, 但因此而全眞教乃終不得不爲傳統道教大流所吞淹 會經濟保存一線生機, 中 會經 國 如 北 元 方黄河 太宗時 濟於破毀中 流域 , , 獻 社會無可屏蔽,全眞教諸祖師乃借宗教爲掩護 有全真道士宋披雲等重刋之藏經於平陽 , 因以重陽上 復甦,傳統文化亦藉以保留。 當 0 則實在當時大門第之下。至金元時代 爲傳統文化保存一 然正亦因此 而 五胡北魏時代膺受第一次大災禍 有所謂了 列五祖 , 五祖七眞之說者 遂使彼輩仍與道教舊統發生繫聯 故增孫不二爲七眞 脈生命 , 佛教雖在 正猶西方羅馬覆亡以後之基督 • 故全眞教雖爲創教 (五祖謂東華子鍾呂劉及王重陽 0 見金蓮正宗記 0 , 其 是爲元 此 (時則賴· 北 時 ?傳播 , 方又受第二次大災 其所以弭殺 藏 土 一族大家 於是有· 於是有的 然乃 以自 而 乘 接 仍 以 將 庭 虚 由 也 敎 創 全 勢 而

教 雖 與 以 往 舊 道 敎 不 同 , 而 仍 無 以 與 (舊道) 教 割席 分坐 0 無以名之, 則名之日 新 道

敎

相

當 全眞 亦宋之逸民也 教以 外 , 尙 0 有眞大道教 虞集道園學古錄論之云 , 始自金道士劉德仁, 生宋宣 和 , 卒金大定 , 與 王 重陽: 年 代 略

所謂 **虞氏**將 各立名號 海 其 大 道 、 之說 耕作 時 眞大道以苦節危行爲要, 不肯嬰世故 勸諸人 師友道 , **多對當** 治廬· , 並無二致也 喪 舍 0 時州里 時 , 蹈亂離 聖賢之學,澌滅殆盡 聯絡表樹 社 會經濟與文化傳統之影響描 田 。又宋濂宋學士文集有書劉眞人事,記劉德仁創敎大義 ,輒革衣木食, 野 不妄求於人,不苟侈於己。……金有 , , 各以所近而從之。受其敎義者 以相保守, 0 或祥狂獨往,各立名號 久而未之變也。(眞大道教第八代崇玄廣化眞人岳公碑) 惟是爲道家者,多能自異於流俗 述已盡, 眞大道教如此 , 風 (靡水流 , 中 以自放 原 豪傑奇偉之士 , ·散於郡 於山 全眞敎亦可 , 而又以去惡復善 澤之間 縣 皆 推 , 當 能 往 是 往 力

聲 毋習盜竊 寡 欲 日 ° <u>≕</u> 視物猶己 強梁 日 謙 除邪 卑 。六 自守 謙 曰毋飲酒茹葷 尊 淫 , 而 毋萌戕害凶嗔之心。<br />
二曰忠於君,孝於親,誠於人, 守清靜 光 力 作 0 九日 而 食 。四曰遠勢力,安賤貧 知足不辱 ,衣食取足 , 無求於人 , 知 ,毋爲驕盈 止不殆 實與天理合。 , 0 .... ・七日 力耕而食 天理· 傳其道者幾遍 虚 人 心 ,量入爲用 心 而弱志, 所同 灵 辭 無 綺 不 固 和 中 0 光 五 足 以 而 日 語 感召 毋 同 蓋 塵 事 , 博 其 口 0 清 無惡 弈 日

此文可見當時創敎者之身世

與其苦心

。蓋其時之新道教

,

大抵皆陽道而

陰儒

非儒

術不足救

世

謂之有體

**有用** 

較之宋代

新儒

學

,

未

必

不

爲

有

異

、曲同

工之妙

矣

意下 不 而 備 儒 術 行 未可 非 此 掌握政治教育之權勢位望則其道扞格 深論: 當 時 也 新 道教之共 0 眞大道教之衰微 同 精 神 0 所 , 亦與全真教相似, 以 不之釋不 , 故改修老子之道 而 之道者 蓋在有元中葉之後 或者其 以 猶 自 有 晦 種 0 儒 姓之見存 術 期於上 歟 達 3 此 , 今 則 剘

料多見秋澗集,三代度師 金大定六年 全真教眞大道教之外 早於全眞 王 重陽 ,復有 先考王君墓表謂 者 太一 辺 年 敎 , 則 0 始祖蕭 亦宋之逸民 • 抱 珍 也 , 據王惲秋澗 0 河北之亡 集二 , 抱 一祖蕭道 珍蓋 亦 熙 弱 冠 行 矣 狀 0 太 抱 珍 教史 卒

於

理 則 論著 太 敎 述 道家者流 亦爲 , 以視宋明理學諸儒 種陽道陰儒之教 , 雖崇尚 玄默, , 則謹 0 呵 是知全眞眞大道太 太一 **| 嚴深博** 教法 , , 專 顯見不如 以 篤 一三教大體 人 (倫翊 0 然其宏教衞族之苦心 世 教爲 , 無甚出入也 本

0

今若論:

此

諸

教之

曲

折

以

赴

亦

可

元憲宗 崇佛: 友如閒 談三 眞諸 一教合 教 敎 又按金有李純 雖 閒老人趙秉文之類 與全 不 遽 年戊午,遂有道 ·眞眞· 辽 始 是 無軋 大道太 甫 而 轢 熠 著屏 之禍 , 然 , 遙遙 路徑大致 Щ 釋大辯 帶宗教 鳴道集說 此 相 亦 對 論及焚毀道藏之事 可 附 相 面 ٥ 耶 似 記 目 , 以老莊孔 者 律 0 至元. 則 楚材終與邱 相 初湛 互 衝 孟 突自 然居士耶 釋迦爲五 0 長春成 嗣 不 至元十八年辛巳 能 隙 律楚 聖人 発 , 0 而 直 材 , 待明 亦深 此 萬松弟子少林福 亦一三教合 推 , 儒 道藏又二次遭 繼起 屏 山之學 以 也 裕 訟全 此 家 0 地 焚 同 眞 派 位 時 0 全 m

# 理學與藝術

是 生亦 生 0 0 有不同 卽 藝術 人生不同 **這專就中** 從人生中流 國言,古今遞傳 於是各時代之藝術亦隨之有不同 , 斯藝術亦不同 出 , 成爲 。東西文化不同,人生不同 人生中重要一 , 垂四千年,文化雖同一傳統 部分 0 故貴能從 , 人生來不 而東西雙方之藝術亦有 ,然因時代社會不 看 ·藝術 亦 同 貴能從藝術 而 不 各時代之人 同 0 不僅惟 來 看

漸 人生 代 合流 南 如商周 碑書則多以刻石 方擅 而 南方風格占優勢,至宋 帖 有鐘鼎彛器,而後代無之 書 以新興行草爲主 用於名山勝地佛道大寺院 益然。此何故, 北方長碑書,帶古代隸體 。 宋以後磁器盛行,亦非前代所有 亦惟時代不同,社會人生不同 ,以及名臣貴族死後之墓地 ,爲較老之傳統 0 如論書法 0 帖書 下及唐代 , 而藝術亦隨之 多用的 , 南北 於 碑帖 朝 日 時

異宜。

政 臣 社 內 會不同 府 圖 Q 有 大 中 再 典 四 論 唐 一次 。 以 0 繪 人生不 至 畫 前 其 於 , 他 仍 在 Ш 沿 同 水 如貞觀時代之王會圖 前 花 南 亦 , 而 鳥民 北朝 以 藝術 壁 畫刻 間 舊 軌 亦隨之而 日常之觀賞 石 , 以宗教道釋畫爲盛 爲 主 ,玄宗封泰山之金槁圖 不 0 其應E 同 畫 , 則 用 在 範 中 圍 ·唐以前 0 政 亦 治 多在王室宮廷 方面 , 可 , 謂 貞元畫漢名臣之屛風圖 ,十八學士圖 尚未興 , 起 貴族 0 此何故 門第 有 兩 次 道 凌煙! 佛宗 亦 皆關 惟 閣 敎

涉

功

卷

階 存 國 可 級外 稱爲是古代變相的貴族社會 秦 論 前 中 國 其昇入政治上層者,皆由白衣秀才平地拔起 古今社会 乃封建貴 會之變 族社會。 ,最要在 東漢以下, 。宋以下,始是純粹的平民社會。除卻蒙古滿洲異族入主 宋代 0 士族門弟興起。 宋以 前 , 大體 可稱爲古代中國 更無古代封建貴族及此 魏晉南北朝迄於隋 0 唐 宋以 皆 後門第傳 後 屬門第社會 乃爲 ,爲特權 後代 統 中

文專拈 不 同 而 變 0 故就宋代言之, 宋 但 0 若 代爲 就時代之先後言,一 通就 亦復與之相應。 例 每一時代之橫斷面言之,則若時代中之一切 理學 政治經濟 亦稱 宋學 故本文以理學與藝術爲題 濟 時 , 代有 社 乃當 會人生, 時之新 時代之學術思想 較之前的 儒學 代 在 , 發揮: 中 莫不 , 亦 國 如一 有變 此 學術思想史上 ,又莫不有其 意 時代有 0 0 學術! 關於藝 思 術 心想乃. 相 時代之藝術 , 其 爲 方面 互近似之共通性 如 變尤著 藝 添 則 論 固 亦 皆 而 均 書 隨 隨 宋 本 以 時 時

項 舉一反三,事在讀者。本文竊願爲治中國藝術史者之大輅惟輪 , 導此

先路

唐代張彥遠歷代名畫記,備敍古今南北畫風相異,而曰

有 胡服靴衫,豈可施於古象,衣冠組綬 。詳辨古今之物,商較土風之宜,指事繪形 , 不宜長 用於今人 ,可驗時代。 /。芒屬: 帰非塞北 所宜 , 牛車 非嶺 南所

宋郭若虛圖畫見聞志則曰:

遠爲開 術 此皆就畫論畫, 通之於學術思想方面 ,皆僅屬人生之一方面,一部分。 濶 佛道人物,士女牛馬,近不及古。水石山林,花竹禽魚,古不及近 此爲本文之作意 由於各時代社會人生之變,而繪畫上之題材與作風亦隨而變。今爲推廣深求 , 而發明其內在相互之關係 我所謂就藝術觀人生,就人生觀藝術 ,則所可闡述者 , 當 決 不 止此 其用心措意所在 0 繪畫與其 他

旁

藝

爲禪學時 不論 今論宋代理學之與繪畫藝術 ,姑分兩漢爲經學時期 期 。宋元明三代爲理學時期。 魏晉南北朝迄於唐初 當先逆溯 相應於此四時期學術思想之遞變,而中國之繪畫史, 而 上 , 略 , 論 爲老莊玄學與佛學時期 宋 以 前之演變 0 就學術思想言 唐以下迄於五代 略 去秦前 適亦

有

此四時期可

分

而在 存乎鑒戒 兩 中國古人心目 此層爲研討中國文化史者一極值注意之事項。蓋中國文化發展 寒 直至東漢始有文苑傳,可證其先如詩三百,如楚辭,如漢賦 畫 也 烛 , 0 可 蓋 舉 在 中 張 當 , 則文學尚未達成一獨立觀念。而繪畫之達成一獨立觀念 尨 時 速歴 , 尚未有 一代名畫 切藝術與繪畫之獨立觀念 記 助 人倫成教化之六字爲之標宗 ,繪畫僅是政 , 先 從 一 純文學之發展 ,此卽三國曹子建所云 中心逐漸展開 治教育上 , 則猶在文學之 , 久已 之一 可 觀 繪 卽 應 用 如 圖

畫家所稱重 骨法用筆 其次是魏晉南北 。三曰應物象形 。郭若虛圖畫見聞 朝 , 可 0 舉 四 志有日 日 南齊謝赫古 隨 類賦 彩 畫品錄所舉之六法爲例 0 五日經營位置 。六日傳移模寫 。六法者 0 謝赫六法 曰氣韻: 生動 ,極爲後代

後

**六法精論,萬古不移。** 

後 其時 新觀 重要步 , 繪畫已 就中國 念 始再 乃再各自回向 伐 此 口 〕成獨立 所謂 畫史進展言 向 値 中 得 道 心 中心會 注意 觀念 而 乃指整體人生之中心所在 創 , 合調整 文道合 中國文化 而繪畫在整個 則謝赫六法 0 之新觀念 進展 如文學直到東漢始成獨立觀念,及唐代 , 僅涉畫藝,僅論作畫方法。畫之爲技 , 人生中之地 先由整體一 0 畫學亦然 , 亦即中國文化之主要精神所在也 位 中心出發,其次逐漸向 , 則猶未必 惟其事須待至宋代 鮮明 0 此處又見中國文化 詩有李杜 四圍分別展開 ,乃猶離人而 乃始有畫 0 故 中國文化 , 進 道 文有韓 展之另 合 外 又其 一之 在 爲對 張璪 是王 貫 繪畫在 乃云: 維始以 0 此尤見中國文化之至高價值 味摩詰之詩 外師造化 詩境入畫 唐代禪學時期, ,中得心源 , 詩中有畫 ,遂開中國繪畫之新生面 首當以王維爲代 0 觀摩詰之畫 , 而卽可以繪畫史爲證 表 , 0

與時 俱新 立之代興,更不見有破壞之攻擊。故中國文化 而後之與 前 仍 屬 體 0 後代之開 新 縣亘 僅 對前 數千年 代之成就作 0 , 雖亦富有日新 更深更廣更高厚之發展 而不失其傳統之 , 不

'。宋蘇: 戴 云

畫中有 詩

以今語闡之, 即是以 整體人生渗入繪畫之中 及

化 此 有 兩 創 0 語 闢 今乃舉張氏兩語 , 0 可舉爲禪學時期論畫之綱宗 新論特出 爲禪學時期論畫之劃時代語者, 而不害其有淵源。畫學分期,本是方便立說,未可拘泥以求 0 在先南朝陳 姚最續畫品已云:梁元帝學窮: 此亦見中國文化特質 0 師 承有 性 自 表 , 而 不 心 ·害其 師

指 羣 源 水 兩 類 出 可 語 以 均當 悟其 前 吟詩之與作畫,文學之與藝術 始將外物與 謝赫六法 八中消息 融歸 體 。又有不同者,謝赫六法,僅限於畫品,而不及於畫家 內 畫家作畫 心 其對外物之看法,輕重不同。李思訓之金碧山水 , 畫品與 , 主於對外物形象 、畫家 既已歸根復源 兼融合 ,一一分別爲之描繪模寫 0 此爲兩時期畫論之主要相歧 滙融 於人生實體中 , 0 , 張璪 經王 今日 , 而禪宗時期之人生 維 師 外 更有 師造 造化 而 變爲 化 義須爲 破 中 則 萬 墨 得 物 Ш 心

果落蟲 蟲 畫 觀 心 蟲之各別 鳴果落 0 此卽 然 則 鳴之際 此 外 存在 禪家之所謂 無 雨 ,於此乃見禪味。 物 中 燈 , 乃不見有人, 與夫雨中燈下果落蟲鳴之各別境界 內 下 無 , 悟。王維論 山果之落,草蟲之鳴 我 , \_\_\_ 是歸: 故張璪所謂 卽 畫亦 於涅槃 是不見有我。 日 外 0 師造化 , 王 則 一維詩 明 已融 明 , , 中 在 成 0 雨中 得 雨中燈下 只此卽是一 心 片天機 山果落 源 , 乃指其心之融於造 , , 有此 造化 不當復爲分別 燈下草蟲 人, 0 而更要者 有此我 鳴 化 此 有 , 而 在 誠 雨 , 詩 可謂 而 此 有 中 亦 雨 燈 剘 詩 中 不 有 見有 只有 燈 果 中

下

有

有

雲峰 右迹 迥 出 天機 0 筆意縱橫 , 參乎造: 化

物外 家 使 主 此 人僅 所謂 , 亦猶 乃能 , 心 重畫中之物, 天機 與物 成此 禪 家 , 畫品 卽 融 由 我 **猶張璪之云心源也** , 生 丽 0 悟 而 於畫中見造化 作畫之能事,乃先在於其人未畫之前 不重畫者其人。最多亦是人以畫重, , 但悟了卽無我。 0 0 故謝 於是先貴有心中之天機 則是所悟亦在外也 赫論六法, 有畫品 0 無此畫卽 , 然其所畫 , 無畫 乃能有筆下之造化 家 無此 0 內容 主於形象 人。王 則終是以 維張 , 偏 璪 必 傾 在外 (先有 則欲 在 外 者爲 此 超 乎 書 遂

生 若論· 禪 學 人生 至於唐 於人生中亦終不能抹殺了有我 末 五代 前 大盛 , 然生民災禍 , 亦至此 。此下 **遂開有** 而 極 0 若論造: 宋之新儒學 化 , 於造 , 而 化 理 中終不 學 由 能 興 抹

今姑舉程 明道詩 句 有 日

物靜 觀皆自 得 , 四時佳興 (與人同

叢論史想思術學國中 至於 此乃自造化 化 我 故 此 卽 卽 日 此 與 人而 在我方寸中 **猶張璪之所謂** 朱 人 爲與禪家 晦 半畝方塘 同 獨 菴 無所 觀重返到萬物觀 也 詩 有 0 物 也 不 自 鑑開 各自 外師 同 得 0 處 萬物皆有自得 0 佳 造 得 ,天光雲影共徘 化中 興 , 是 與 0 造化中 得心 人同 造化 物 源 , 太極 不僅 有此 正爲得此造化 而 。如是則造化在我 寓 徊 義 萬物 指 0 0 問渠 大不同 我與 天與 萬 那 人同 (人同 物在 得清 0 0 造

,

造化

中亦各有

所

自

得

0

人居萬:

?物之一

豈

,

乃亦指天與

人

同

0

四

時

佳興

在天亦在

是萬物一

太極

0

理學家乃於造化

學時代之畫境,必至於無我 論 達於自得之境界 而 本 可 此 知 而 0 言繪畫 此下 略引乐人畫 自 0 我之此 1得即有6 心投進外面自然界, 我 0 我心澄然豁然 故理學時代之畫境 以證 我說 外面 沒入融化 自 , 必然主於有我 然界投進 • 此 心釋然 我 心 0 沒入 此 , 乃達無我涅槃境界 分別 融 化 斯則造: 刨 觀於宋人之畫 化 0 在 故禪 心

學

與理學之疆界所

在

而

此

心源活水之本身

,

實即是

,

何

煩別立無我一

義

0

有我無我

,

正

禪

天光雲影

, 徘

徊

於水

塘

鑑之上

, 是

猶

謂

造

如許

,

爲有源

頭活

水來

化能

入吾心

,

亦正爲我心之有源

頭

活

水

0

最先當引歐陽修文集試筆中鑒畫 則 , 其言 曰

蕭條 靜趣遠之心難形。若乃高下嚮背,遠近重複 淡泊 此難畫之意。畫者得之, 覽者未必識也 ,此畫 工之藝爾,非精鑒之事也 0 故飛走遲速意淺之物易見 , 而閑( 和嚴

是畫中 處 意 永叔 有新要求。其謂飛走遲速, 此屬自然造化, 而特謂其意淺易見。 閑和嚴靜 0 永叔特先得之也 蓋 非畫家 而 有意, 言畫意 其趣遠難尋 , 其時亦尚未有理學, 畫中有我 , 則作畫之心 。永叔此條 0 若以合之東坡之評摩詰 ,更重於所畫之物。故又輕視畫工之藝,此非輕視於畫,乃是於畫藝 此條所言 ,乃見其時繪畫界新風氣肇始 ,乃在 ,則詩中有畫易 理學成立之前 0 此乃時代人心之所共同追 而畫中有詩難 然特提出畫意兩字 ,則正畫家內心自得 0 畫中有詩 , 則 大可

卽

注

郭若虛圖畫見聞志則曰

遂成 高 以 學佛學以及禪學時 其能畫 0 《爲論 明代文徵明題畫則曰:人品不高 此 始是就畫 人品既已高矣,氣韻不得不高 畫首 始目爲畫家 要一 論畫 重點 期 , 而特提出 皆不曾在畫中有人品一觀念之產生 謝赫六法首言氣韻 今則謂當先具畫家之水準, 人品 。氣韻既已高矣,生動不得不至 用墨無法。可見藝術中有人品一 觀念駕於氣韻之上, 所重 在 畫 始能作畫 。今言人品 0 則不得不謂是宋代人之新觀 南宋姜夔白石論書則曰 0 畫之高下 , 則所重 。所謂神之又神而 觀念 在 ,已爲後人承襲 更要在作畫者之人 作畫之人 , 念。 能 前 人品 在玄 人乃 ,

品 , 此 不得不謂是在中國畫史上先後觀念 大轉: 變

0

蘇 ※軾亦! 曰

觀士 人 畫 , 如 閱天下馬 , 取其意氣所 到 0 乃若 畫工, 往往只取鞭策皮毛槽櫪芻 秣 無

點

俊發 , 看數尺許便卷

東坡此三 言, 亦如永叔 。對於畫之鑒賞 , 亦屬 人生一 藝術 , 而主要皆在意境

方 面

南宋鄧椿畫記 亦 曰

畫者 ,文之極也 。張彥遠所次歷代畫人, 冠裳大半。其爲人也多文,雖有不曉畫者寡矣

其爲人也無文,雖有曉畫者寡矣

亦皆言人品。鑒賞者與作畫者乃成爲

亦兼鑒賞言。士人之與畫工,多文之與無文

,

種

人格

0

之共鳴 , 此等見解 , 皆前人所未及也 0

曉畫.

鄭剛中北山集畫說亦言之,曰

唐 人能畫者鄭虔 窺造化而見天性 0 雖片紙點墨 自然可喜 0 立本幼事丹青 而 人 /物關

茸 0 雖能: 模寫窮盡 ,亦無佳 處 0 故胸中有氣味者 , 所作必不凡 而畫工之筆 終 無 神 觀

於鄭虔與閻 立 一本兩人 軒輊甚至 0 立本之於畫,負一 代美譽,今剛中下儕之於畫工 , 可證時代

觀 念之變矣 此

畫家辨人品 主要在論 其心 胸 0 郭若 虚 圖 畫 見聞志又 日

趨

得自天機,出於靈府

此與 、張璪所云外師造化中得心 源 義又不同 0 張意謂· 由 我此 心外師 造化而有畫 , 郭意則謂畫出靈

府 • 乃由我心天機所得 0 而 所畫外面 , 轉置不論

蘇軾亦言之,曰

畫竹必先得成竹在胸中 , 執筆熟視 , 乃見其所欲畫者 急起從之, 振筆 直逐

以追其所

見。 如冤起鶻落 ,少縱卽逝矣

條 正可爲郭若虛得自天機出於靈府八字作注脚

此

,

董逌廣川畫跋亦曰 明皇思嘉陵江山水,命吳道玄往圖,及索其本,曰:寓之心矣。詔大同殿圖本以進,

江三百里,一

日而盡

,遠近可尺寸計

0

論者謂

丘壑成於胸中,

既寤則發之於畫,

故物

無留

嘉陵

迹,累隨見生,殆以天合天者耶

此謂 0 叉曰 丘壑成於胸中, 燕仲穆以畫自嬉, 即猶東坡云成竹在胸也。雖引吳道玄爲證,然此等意見,不害其爲一代之新 山水猶妙於眞形。登臨探索,遇物興懷 胸中磊落 自成丘壑

,

,

,

然後發

其書李成畫後又曰

之。

也 煙 忘 咸熙於山 0 故能 與一 則 磊 【水泉石 盡其道 落奇蟠於胸 而 下上 。後世按圖求之,謂其筆墨有蹊轍,可隨其位置求之。 , 巖棲而谷隱 , 中 漫然放乎外而不可收。蓋心術之變,化有而 , 不得遁不 , 而 蓋生而! 藏也 0 好也。積好在心 他日忽見羣山橫於前者纍纍相負 ,久則化之 出 0 舉天機 彼其胸· 凝 念不 而 出 中自 而 釋 矣 見者皆 , 嵐光 論 無 與 丘 山 物

山水,入我心中 壑 , 若 o 其謂得之此 ,與入他人心中者自不同 ,復有眞畫者耶?

皆

同一 畫花 宋代人意見也 鳥 葉 無心於畫者,求於造物之先 亦曰 , 分布了 蓋畫中 而 出 矣,然後發之於外,假之手而寄色焉, 丘壑 ,乃畫家心中之丘壑 0 賦形出象,發於生意,得之自然。待見於胸中者 ,故曰心術之變,化 ,故曰 山水猶妙於眞形也 未嘗求其似 有而出 而託意也。 。論畫 0 此 皆 論 而 畫 及 李元本學於徐 心 Ш 術 水 若 又論 此 花若

熈 , 而微見用意求似者,既遁天機,不若熙之進乎技矣

化 似 用 意求似 有 , 乃謂 在成物之先者。此乃一種哲理 意 有在 則意在外 求似之外耳 0 未爲求其似 。又曰 , ,而姑以託意。意有高下, 非徒觀於物而 求於造物之先 可 。此語更具深意 知 也 斯畫 0 有高下矣 張璪 日 0 外師: 然 造 亦 化 非 謂 0 不 畫 知造 可 求

#### 羅大經 鶴 林 王 露論畫 馬 亦 日

畫馬者必先有全馬在 胸 中 0 若能積精儲神 賞其 /神駿 久久則胸中有全馬矣。 山谷詩云

李侯 畫骨亦重 肉 下筆生馬如破竹, 生字下得最妙。 蓋胸中有全馬 故由 筆端 而生, 初非

想像 模 畫 也

此 謂 畫 中之馬 , 乃由 畫家心中生出 ,非模擬而 成 。則亦可謂畫中之馬,乃一 種人文馬 而非自然 然

馬 惟 人文亦 從自然來 , 而 非自然之可盡 0 鐵 網 珊 瑚 趙孟 堅梅竹譜有

願君

種取潤

川一千畝

, 飽

飽飯

,

逍遙步捫腹

0

風晴!

煙雨

,

盡入君心胸

,

吐出毫端自

森

肅

曰

可見宋以後人論畫,亦皆主胸羅造化 ,然後筆而出之,抒寫由我 , 不限於外物 0 然則 繪 畫 事

豈不成爲非畫物 , 乃畫、 心乎?故米友仁有心畫之說 , 見鐵網珊 瑚 其言 日

子雲以字爲心畫,非窮理,其語不能至是。 畫之爲說 , 亦心 畫也 。自古莫非一世之英,乃

悉爲此 。豈市井庸工所能 曉

所畫者是物

,

作畫者是心

,

此與作字同理

,

於是而有輕視

形似之畫

論

,

蘇

**淡**棋詩之

有

曰

繪畫以形似 , 見與兒童鄰。 作詩必此詩,定知非詩 人

董追 謂 燕 仲 :穆畫: 山 水猶妙 於真形 , 又曰: 李元本學畫花 鳥於徐熙 , 而 微 見用立 意於求似 乃不若

熙之進乎技 皆與東坡說 同 意。 然則 畫亦當有技而進乎道之一 境 也

又如米友仁畫史云

大抵牛馬人物 模 便似 0 Щ 水> 不成 0 Щ 水 心 近 自得 處 高 也

造化 自然 亦有深淺 0 牛馬人物易模 , 乃其淺處 Щ 「水難模 始是造化之深處。 人心亦出造化

鄰 而更是造化之深處 兒童於人生爲淺涉 0 故曰 , 作畫 山水心近自得處高,此亦就畫窮理之語 一求形似亦淺涉 也 0 然孟子曰:大人者不失其赤子之心 0 故曰繪畫以形似 , 故謝: 見與兒童

法 終自千古不廢耳

劉道醇聖朝名畫評則曰

此處提出氣象二字,又與謝赫言氣韻不同 觀畫之法, 先觀其氣象 後定其去就 0 氣韻在用筆 , 次根 其意 , 尤爲宋代理學家所愛用 終求其理 而氣象乃在畫面全體之格局 , 此 乃定畫之鈐 鍵 也 0 人當觀其氣 氣韻

所畫之外物,而氣象乃涉作畫者內在之心胸。氣象二字,

象

觀畫亦然

0

而劉道醇又特標出一

理字

大可注意

0 觀

仍屬

蘇軾亦言之, 日

人禽宮室器用,皆有常形 0 Ш 石竹木水波煙雲 雖 無常 形 而 有 常 理

又曰:

寓新意於法度之中。寄妙理於豪放之外

畫求 之變 乃跋 形似 吳道玄之人物畫。 面 仍不害其於前時代爲有所承襲也 自有法度 ,理則在形之上 畫在唐代,而發揮此 ,則有脫 等畫理者則屬宋人, 略 形似 超越法式 度 此亦 , 而 見其爲豪放 種新意 可謂是時代觀念 者 東坡 此

叉曰

世之工人,或能曲盡其形。而至於其理,非高人逸才不能辨。

求形 與求理之高下, 其背後又通於畫家人品之衡評 , 則作畫必先貴其人品之意亦見矣

董逌廣川畫跋亦曰:

則 知畫 家之主求理 大抵畫以得其形似為難,而又以神明爲勝。苟求其理,物各有神 , 非 推 翻 求形以求理 乃是於求形之上更進 層以求平 理也 明 也 0 0 賞畫 但未 者不 知 求 於 知賞作 此 耳 o

者之心,作畫者不知畫所畫物之各有其神明,是背不知求理,而其品斯下矣。

畫苑補益張懷論畫有曰:

塵坌 妙。 造乎理者 心會神 , 擾於利役 融 能盡物之妙。 默契動靜,察於 ,徒爲筆墨之所使,安足以語天地之眞哉 ,昧乎理 ,則失物之眞。惟畫造其理者 毫,投乎萬象。昧於理者,心爲緒使,性爲物遷 ,能因性之自然 ,究物之微

物 各 有理 , 亦各有性 求物理卽是求物性 也。此論格物窮理, 盡性知天,乃幾乎全似理學家言

沈括夢溪筆談有曰:

便成 己。 桃杏芙蓉蓮花同畫一 霊之妙, 至於奧理冥造者,罕見其人。如彥遠畫評言,王維畫物 故造理入神 當 以 神 會 迥得天意 景。予家所藏摩詰畫袁安臥 難 可 以形器求。世之觀畫者 , 難可 與俗人論也 雪圖 , , 多能指摘其間形象位置彩色瑕 有雪中芭蕉 ,多不 問 ,此乃得心 四時 如畫花 應手 往 意到 往以 疵

語 學時期與禪學時期之不 言畫家心 雪中有芭蕉,桃杏芙蓉蓮花同入一景 0 然要之畫物卽以畫心 宋代人論 中之神 畫 理 , 重人品 非言性理物 同 0 心 , 胸 存中未 則唐代禪家已先有此意 ,又深涉性理 理矣 加 0 , 細 自然無此 摩詰宗於禪 辨 0 , 蓋存中雖 乃亦. 事狀 學 矣 知重日常人生之修養 , , 在理學時代 亦復違 乃 可 有此 )於物理 0 , 宋 亦不得爲理學中 人作 , 乃 0 郭思林 畫 以謂之超理 , 未 泉 必 承襲 雨 致 入 神 載 故 此

有

此

此

則

乃

理

其

## 熙之言日

積惰 氣 而 強之者 , 其迹軟 儒 而 不 決 0 積昏. 氣 而 汨之者 , 其 (狀黯猥) 而 不 爽 , 以 輕 心 挑之者

惰 氣昏 氣 其 形 輕心 脫 略 慢 而 不圓 心 , 從理學家 以慢心 忽之者 口中說出 , 其 , 體 疑若爲太重道德意味, 疏 率 而 不齊 不知藝術家固亦力戒此

等也

### 郭思又自· 申 其 說 日

意定, 氣者乎 又每乘興 思乎昔見先子作 之再之又復之,每一圖 然後爲之,豈非所謂不敢以輕心挑之者乎?已瑩之,又徹之。 0 得意而: 凡落筆之日 作, | | | | | | | | 則萬 , 必明 , , 有 事俱忘 必重複終始, 诗委下 窗 淨 。及事况 几 · 不顧 , 焚香· 如戒嚴敵 汨 動經 志擾 左右 一二十日 , 精筆妙墨 外物有 然後畢 , 是意不欲 , , 此豈非 鹽手滌硯 則 亦 委而 所謂不敢以慢心忽之者 已增之,又潤之。一 <del></del> 豈非所謂 如見大賓 不 顧 , 豈非 惰氣者 必 所 神 謂 乎? 崩

乎?

日

之心 是則養其氣,修 分別求之, 也 此 又可 其心 證時: 則猶是皮相之見也 代同 ,畫家之日常修養 , 則文學家藝術家理學家所 ,乃與理學家. 言 無二 , 致 亦 自 0 此又 無 不 卽 同 歐 0 若 陽 永叔 必 以 繪 所 畫 謂 與 閑 理 和 | 學與 嚴

趣

遠

韓拙 Щ 水純全集有 日

之子可學。 贈歌曰:十日畫一水 顧愷之夏月登樓 天之所賦 已者也。 反以之爲圖利勞心之苦。古之學者爲己,今之學者爲人。 古人以務學而開其性 於我者性 不精之由 , 家 性之所資於人者學。 人罕見其面 , , 五. 良 以 日畫一石 此 也 ,今人以天性 0 風 , 能事不受相促逼。 雨 晦 能 明 因 而 ,饑寒喜怒 其性之所悟 耻於學。此所以去古逾遠 前 , 人用 皆不 唐張彦遠云: , 求其學之所資 -操筆。 此 以爲銷 唐有 書畫之術 日養神之術 , 王右丞 而業逾 未有不業精 不 非 杜員 精 今人 閭 也

外

於

0

韓拙 內基: 事非 行異。: 則 於性,外資於學,務學以開其性,理學家之精修道德 (已屬: 於理學: 韓拙此條 時 期 , 言及顧愷之,今以屬於玄學佛學 , 即韓拙河 所論 , 可 證變中自有 不 變 時 期 0 ,與畫家之沈潛於藝術者 且 言及王摩詰 其 論 , 張 彦遠歴代名畫記 , 今 以 屬 於 , 同 禪 中 條 學 共 時 貫 期

陰慘 宋朝 顧 則不操筆。 駿之,常結 今之畫人, 構 高樓以爲畫 筆墨混於塵埃 所 0 每登樓 去梯 丹青和其墨滓 , 家人 罕 見 0 徒 時 汙絹: 景 融 素 朗 豈日 然後 繪畫 含毫 自 天 地

善 畫 者 莫匪 衣 冠 貴胄 逸 土 高 人 , 振 妙 時 , 傅 一芳千祀 , 非 閭 閻鄙 一賤之所 能 爲 也 0

當 知 彦 遠 此 論 , 非 辨 社 會 貴賤 所 重在 日 常人生之各異 0 唐符載觀 張員 外畫 松石序 亦 日

觀夫張公之勢, 非 畫也 直 道 也 0 當其· 有 事 , 已 知夫遺去機 药 , 意冥玄化 , 而 物 在 靈 府

不 在 耳 自 , 故得: 於心 而 應 於手 0 孤 **淡姿絕狀** , 觸毫 而 出 , 氣交沖漠 ,與神爲 徒 若忖 短 長於

隘 度 , 算妍蚩於陋 目 , 凝觚 吮毫 , 依違 良久 , 乃繪物之贅疣也 , 寧置於齒牙 間 哉

觀於 此 • 則宋 人 論 畫 所 重 人品 心 胸 修 養 諸 端 豈不昔人皆已及之。 卽 如 沈 括神 理之說 , 南 朝 宋人

宗炳 畫 山 水 序亦先言之, 有 日

求 夫以應目會心爲理者,類之成巧 网 巖 何 以 加 焉 0 又神 本無端 , 則 棲形感類 目 亦 同 應 , 理 , 心 入 、影迹 亦 俱 會 , 誠 0 能 應 會 妙 寫 感感 神 , 亦 , 誠 神 盡 超 理 矣 得 於是 雖 閒 復 虚

理 森 渺 氣 0 聖賢暎於絕代 拂 觴 鳴琴 披圖 , 緻 萬 對 趣 融 坐究四 其 神 思 余復 何 爲哉 , 暢 神 而 已 0 神之所 暢 孰 有 先 焉

,

,

荒

0

不違天勵之叢

,

獨應無人之野

, 峰

岫

嶢

嶷

,

雲林

此 所 標 日 神 而 理 , 而 人 品 心 胸 修 養諸端 亦靡 不 兼 備 0 凡宋代· 人之所論 , 求之前 代 似 乎罔 不 先

有 然終不害其爲宋 人之新論 , 此正見· 中國文化之深厚 0 注意其傳統者 , 往 往忽於 時 代之遞

注 意其 時代者, 又往: 往 |忽於傳: 統之直 承 0 兩 不相 礙 , 斯 得之矣

其 人之重要性 宋人論 人品 , 毋寧更重要過於其畫 心 胸 修 養諸端 會合言之, o 故宋人論畫又每言寄託 主要在發 揮 繪畫之背後有畫家其 0 郭若 虚圖畫見聞志又曰 (人之存) 在 而 且 家

古奇蹟 ,多是軒冕才賢,巖穴上士 ,依仁遊藝 , 探 靧 鈎深 0 高雅之情 寄於畫 0

鐵網珊瑚趙孟瀅論畫亦曰:

畫謂之無聲詩,乃賢哲寄興。

此

畫 中有寄 , 所寄者卽其人,卽是畫家之我也 0 米元暉自題其雲山得意卷謂

世人知 世 海 中一 余喜畫 毛髮事,泊然無着染。每靜室僧寮,忘懷萬 , 競欲得之, 鮮有曉余所以爲畫 者 0 非具頂門上慧眼者 慮 , 與碧虛寥廓 同其流 , 不足. 以 蕩 識 0 焚 0 老境 生 折

腰爲米,大非得已,此卷愼勿與人。

術 此 以 之新思 跋 有寄託爲高 言所以爲畫 潮 , 其出現容 o 惟詩至初唐 雖不明顯提出寄託字 有 前 後參差,不足怪 ,陳子昻李太白已高 ,而畫中 也 0 談比興 有寄託之意固已躍然言外。詩以有比 、,而畫至宋代,始有人提及寄託 興爲 ,文學藝 貴 , 畫

書 在 克恭以及元四 宣 款 言 0 王 書款自 外 此 亦僅· 維 種 0 惟 繪畫上之新觀念 云:妙悟者不在多言,善學者還從規矩 不占 在 亦 家 有 石 其他事 I隙樹: 重要: 每畫莫不有題識 地 身 **予實具體** 位 , 0 , 書以蠅頭小楷,或竟書於背面 遠至宋代,米芾蘇 必然會影響其所畫 可 證 者 , 或系跋 , \_\_ 則爲畫上 , 或題詩 軾文同遂開 , o 就規矩言之,則 此則待精鑒賞者之自加領會 題款之革新 以補畫之不足 。因其時 題識之端 0 在 , (自古, 先作 , 其事 觀念主要在 。於是書畫與詩之三者 如 畫 多不 至元 0 就妙 書款 而 , 大盛 畫 非筆墨言辭 悟言之, , , 更無題 不 在作 趙 孟 畫之 則 所 頫 記 能 合 事 高

要求

道

德藝術

合流

特點

0

 - 230 —

 統
 其本

嚴 若 同 體 0 此 事 實 寓甚 深意 義 , 亦 爲 甚 大之進 展

統觀 念 次 下 八乃爲: , 皆以象徵 梅蘭竹 菊四 人之德性與品格 君子 畫 , 亦 至 宋 故 **以稱之日** 而 始 備 君子。四 0 南宋盛畫梅竹 君子畫之盛行 元人 、畫竹尤 亦爲理學時 盛 , 此 期之繪 四 者 在 傳

明湯屋有日·

畫梅 謂之寫梅 畫竹謂之寫竹 畫蘭謂之寫蘭, 何哉 0 蓋花之至淸, 畫者當以意寫之,不

在形似耳。

新名辭 當以 合一 此 謂 書 心 心物合 意通 此 0 寫意二字誤 諸 寫意非不 物 0 畫者 , , 不爲其形狀,乃爲其德性。謂花之至清 求 多 有 描 形似 畫其 少 妙理存焉 事 形狀 0 , 欺 惟 人關 作畫· 0 , 前引人品心 寫者抒寫 自 |有更超於求形似之上者。清代鄭爕喜畫蘭 己, 我心意 再不求進 胸性 理修養寄託諸端 0 而我之心意 皆坐: , 乃謂: 此 病 此 0 , 必極 則 諸物德性之可貴,不 齊於此備 乃發自天性 工 而 後能 竹 0 於是乃有寫意畫之 寫意 其 題 通於 ·以目 物 畫 非 有 不 理 工 視 日 , 天人 而 得 遂

評 後 能 人對寫意二字之誤解 寫意也 則是 , 至於前常 代 人提倡寫意 二字之眞義 則 殊 未見闡 明 故 日 必 極 工 而

後能 此 寫 別有 意 則 番用意 仍着 眼 在畫之技巧上 然後能別有一 番境界。 其 能 事 亦 自花鳥寫生進而至於蘭竹寫意 止 於模古 不 ·知宋明· 入 注重寫 蘭竹 , 在中 乃是別 國 繪畫史上 有

此 進展 別有 番哲理, 主要在 畫中之有 我與 無 我 0 清代理學已 衰 , 板 橋 自 見 不 到 此

(四)

此下 當 再略 引 元明以 下人論 畫語 , 以殿

元代蒙古入主,社會大變 ,然理學傳統 , 則 仍因襲兩宋 0 趙孟 **頫以宋代宗室,屈仕虜廷** ,

が新篇

, 必曰元] 四家 0 明 陳 衎槎上 老舌有日 品節

可

言,

故其論畫

,

率主復古,

斯乃逃遁隱藏

,

不得已而

云然,

其心

可 諒

,

其論無足

取

0 論

無

,凡人

時之畫

元逸人黄大癡 , 教人畫法, 最忌曰甜 0 甜者 , 穠 郁 不 而輭熟之謂也。夫爲俗爲腐爲板

亭集序 大癡號爲經史九流無不通曉 皆知之。甜則不但不之忌, 而 其数 人畫法 卻特 , 而乃以畫人終其身。其爲富春山莊圖 地提出忌甜 且羣然喜之矣。 語 。 果使大癡在當時 從大癡拈 書,大是妙諦 處世 ,後人擬之書法中之王右軍 爲 人, 0 亦具一 品甜:

,

味

則

蘭

尙 何 人品 心 胸修養可 言 0 則 只 此 語 , 足可欣賞其爲人, 並 進而 :欣賞其: 作 畫 矣

董其昌容臺集畫旨有曰

0

,

仇英趙子昻雖品 格不同 , 皆習者之流,非以畫爲寄 , 以畫爲樂者也 。寄樂於畫 , 自黄

始開 此門庭

以畫爲寄, 以畫爲樂 , 非 曰古人無之,而必謂是黃公望開此門庭者 此乃香光就後世人物言 , 而

若公望之在元世,則見更以畫爲寄以畫爲樂之高

趣

倪鹭謂:

僕之所謂畫,不過逸筆草草,不求形似,聊以自娛

又曰:

余之竹,聊以寫胸中逸氣耳。

探宋人畫論, 亦 玄唐朝名畫錄 妙能三品之上, 曰 逸筆 田 卽 i舉忌甜! 日逸氣 不能明其義 與能逸兩語爲 , 後世遂莫能易 分神妙能三品, 特提 出 。雲林以逸自負,夫豈偶然。今論 逸字。惟逸者能擺 例 。若使其人甜 0 蓋神妙的 又有逸品 能三品皆 , 則 而 不 在三品之外。宋黄休 脱牢籠,不受拘束 逸 在畫之中, , 則不能在元代於藝術 惟逸品 元四家 0 復益州 I 則有越 陳 , 可卽 衎 亦 林中卓领 學大 名畫錄 出 稱大癡爲逸人 於畫之外者 一凝雲林雨 ·然有建 , 始躋 逸品 樹 此 唐 於 例 非 神

明人論畫,主要當舉董其昌之論文人畫與南北分宗。其言曰

文人之畫,自王右丞始 衣 從董巨得來 缽 0 若馬夏及李唐劉松年,又是大李將軍之派 0 直 至元四大家黄子久王叔明倪元鎭吳仲 。其後董源巨然李成范寬爲嫡子。李龍眠王晉卿米 , 非吾曹當學 圭 , 皆其正常 也 傳 0 吾朝· 文沈 南宮及虎兒 則 又

又曰:

禪 家有 南 北 二宗 唐 時始 分 0 畫之南北二宗 • 亦唐時日 分也 0 但 . 其 人非 南 北 耳 0 北宗則 李思

0

訓父子着色山水, 抅 . 析之法,其傳爲張璪荆關董巨郭忠恕米家父子, 流傳而爲宋之趙幹趙伯駒伯 驌以至馬夏輩 以至元之四大家 。南宗則王摩詰始用 。亦 如六祖· 之後 染 有

馬 駒雲門臨濟兒孫之盛 , 而北宗微矣

來 董氏 即是文人畫 ,早已在畫人中作此分別 在中國繪畫史上劃分宗派 薛岡天爵堂筆餘有日 其所謂文人者, , 香光之分南北宗, 亦如東坡言士人 , 持借禪家語而稱之曰南宗北宗, , 亦不過承其意而稍變其辭耳。文人畫則尤必 鄧椿言其爲人也多文而 非以地域分南北也 已 0 此 自 張彦遠郭若 0 其謂南宗 虚 Ш 以

畫中 惟 Ш 水 義理深遠而 意趣 無窮 0 故文人之筆 , Щ 水常多 0 若文物命 禽蟲花 草 , 多出

工 , 雖至精妙,一 覽易盡 水

0

此 亦 以文人與畫工爲分 今人見畫之簡潔高逸者 , 惟論 畫 , 日 而 士夫畫也 必言義理意趣 以爲無實詣 , 此亦自宋 0 實詣指行家法耳 以下始然 0 又沈顥 0 不 畫 知王 麈 有

米氏父子蘇子瞻晁無咎李伯時輩 ,士夫也 0 無實詣乎 , 行家乎?

此 亦 分士夫與行家 繪 事 不必 之求奇, 惟 不必循 必士· | 夫而 格 兼 要在 行 胸中實有吐出 乃始當得稱文人畫 便是

家

0

又李日華六研齋二筆

有

曰

維李

日

畫

繪 事若僅· 止於 向 外取形 , 今必 日 要自 胸 中 吐 出 其論 始於宋人,而非文人士人則無以 語此 而 畫

中 有我之意 ,亦自此見矣 0 又如屠隆云

象卽

形

似

,

韻

卽

氣韻

0

巧則

畫匠

之技巧

,

意則

畫家之心

胸

0

杜

瓊

云

人能以 畫 寓意 , 胸 中便生景象 , 筆端妙合天趣 。若不 以天生活潑爲法,徒竊紙上形似 終

爲 俗 品

以 畫 寓 意與 胸 中 吐 出 「乃異辭」 同 意 0 岳 正 云

在 意 不 在 象 , 在 韻 不 在 巧 0 巧 則 工 , 象 則 俗

繪 畫之事 , 胸 中造化 , 吐露於筆端

立萬 象於胸懷 , 傳千祀於毫 翰 0

胸

中

造

化

即朱晦命

翁半畝方

塘

一詩之所咏

也

0

唐志

契云

,

必 於畫 此始是技 一中寓意 , 有義理 ,有意趣,造化 萬象皆從胸中吐 出 , 作畫不 不 盡於作畫 人生 , 畫家 亦 限 是 畫

0

,

上

中

0

凡

所

僅

止 論 家 此 仍從兩家 而 宋來 進乎道, , 同 始是畫藝不朽 爲理學時期中之繪畫觀 外於此則是畫工俗品 念 。重人品 , 重 談 心 胸 , 於 重 性 理 , 重 有 修 不 養 朽 , 畫 示

乎 技 , 而 必上 進於道 , 大率如是 。董香光南北宗派之分, 殆亦以: 此為區 别 也

淸 初 有 明 遺 民 , 其 、志節 **路類** 於 元 四 家 , 多有 逃入方外 而 以畫 自 造 者 0 今舉 道 )濟苦瓜 和 尙 畫

語 錄 則 o 其言曰

古者 識之具 也 化 者 識 其 具 而 沸爲: 也 0 識 拘於 似 則 不 廣 故 第子: 惟借古以開 今 0 有 法

必 有 化 知其法 , 卽 工 一於化 0 夫畫 , 天下變通之大法也 0 借筆墨以寫 天地萬物 而 陶 詠 乎

我 面 目 。今人不明乎此,知有古而不知有我,我之爲我,自有我在。古之鬚眉,不能生在我之 0 古之肺腑 ,不能安入我之腹腸。我自發我之肺腑, 揭我之鬚眉,我於古何 師 而 不化

之有

民精神 此則 古而 只暢發畫必出我之意。我在畫中,而畫中必有我 不 同 時有煇 · 知我 , 確猶是元四家精神 0 於古得識 壽平論畫,亦有妙詣 ,卽是得其規矩,得其技巧 ,亦卽是宋代理學精神 。壽平推崇同時交友王翬 , 0 卻非 借古開今,乃是開其在我。 此卽畫之化也。若必求我畫似某家 山林方外禪悟精神 ,遂以山水畫讓之, , 此 今從道濟看 而自畫花 處不可不辨 , 則 卉 是知 明

0

其

遺

言 日

心處 墨不到處觀古人用心 宋人謂能到古人不用心處寫意,兩語最微 0 不知 如 何用意 , , 庶幾擬議神明, 乃爲寫意 0 今人用心 進乎技矣 ,而又最能深入 在 有筆墨處 , 古人用心 0 不 知如何用心 在無筆墨處 , 方到古人不用 0 **儻能於筆** 

其論寫生有日

寫生先歛浮氣 ,待意思靜專 ,然後落筆,方能洗脫塵俗 , 發新趣

理學亦衰 之統治中 壽平之畫,見稱爲不食人間 國 , 亦不如兩漢之經學 , 與蒙古 示同 。清代學術 煙火。上引論畫語 0 其學乃在博古一途。故論清代畫家 固 不 與 、魏晉南北朝之玄學佛學 , 亦可謂窺見宋明人之堂奥 , , 唐 夥頤沉沉 人之禪學相 。然此皆在淸初 而大率模 同 而 滿洲 古做 宋 明

能

自

外

0

求爲中國藝術繪畫史開新頁,

尚待後起之努力

。縱筆至此

,不勝惘然

,

人心

方之

亦未

惶惑 新異 趣者 術史者所當 文學藝術皆見不 舊 , 求 晚 , 清 要自 學者不競騖西方之新軌 正可返認自己之本眞 以來 拔 渺 知 趙 然 幟 也 百年 振 0 清代學者 立 0 語其 漢 , 西學東漸。東西文化不同,社 幟 優者 , 繼 。又當時代大變,正可 , 雖亦高 往 , 卽墨守清代之故轍 不過爲前代之後勁, 開 來 自位置 如道 濟之所謂 , 然既乏幹濟 推 0 徒成 陳出 借古開· 無可分庭抗禮者 會人生又不同 新 , 期 之 市 復缺 0 今, 而惜乎此百年 性 靈 南 田 斯藝術· 之所謂: 未窺千古之秘 0 ,徒於故紙堆 繪畫亦然 亦不同 來 於 古 政 , 人 事 此亦治中國 中 不 。觀於彼 0 騁 藝術界 翻 用 覆 心力 心

處

一發新

,

故

藝

### 滄海叢刊已刊行書目(一)

	書				×	, 1	作		者	类	<b>頁</b>		罗门
中國	學很	肯思	想想	史詞	<b>命叢</b> (	一)(四) 二)(五) 三)(六)	錢		穆	國			學
兩	漢名	經	學人	今古	文平	議	錢		穆	國			學
中	西	兩	百	位丰	丘學	家		昆建	如球	哲			學
比	較	哲	學	典	文	化	吳		森	哲		and the second s	學
哲		學		淺		論	張	康	E譯	哲			學
哲	學	_	t	大	問	題	鄔	昆	如	哲			學
孔		學		漫		談	余	家	菊	中	國	哲	學
中	庸	畒	戊	的	哲	學	吳		怡	r‡1	國	哲	學
哲	导	县	演		講	錄	吳		怡	中	國	哲	學
墨	家	的	哲	學	方	法	鐘	友	聯	中	國	哲	學
韓	尹		子	•	哲	學	王	邦	雄	中	國	哲	學
墨		家		哲		學	蔡	仁	厚	中	國	哲	學
希	臘	ŧ	厅	學	趣	談	鄔	昆	如	西	洋	哲	學
中	世	#	红	學	趣	談	鄔	昆	如	西	洋	哲	學
近	代	‡	红	學	趣	談	鄔	昆	如	西	洋	哲	學
現	代	ŧ	红	學	趣	談	鄔	昆	如	西	洋	哲	學
佛		學		研		究	周	中		佛			學
佛		學		論		著	周	中		佛			學
禪						話	周	中		佛			學

#### 滄海叢刊已刊行書目(二)


書名		作者		別
不 疑 不	懼	王洪鈞	教	<b>"育</b>
文 化 與 教	育	錢穆	教	育
教育叢	談	上官業佑	敎	育
印度文化十八	篇	庭 文 開	社	會
清 代 科	擧	劉兆瑄	社	會
世界局勢與中國文	化	錢 穆	社	會
國家	論	薩孟武譯	社	會
紅樓夢與中國舊家	庭	産孟武	社	會
財 經 文	存	王作榮	經	濟
中國歷代政治得	失	錢穆	政	治
黄	帝	錢 穆	歷	史
歷史與人	物	吳相湘	歷	史
中國歷史精	神	錢穆	史	學
中國文字	學	潘重規	部	言
中國聲韻	學	潘重規陳紹棠	話	言
文 學 與 音	律	謝雲飛	語	言
還鄉夢的幻	滅	賴景瑚	文	學
趙蘆・再	見	鄭明頻	文	學
大 地 之	歌	大地詩社	文	學
青	春	葉 峄 貞	文	學

#### 滄海叢利已刊行書目(三)

書	名	作		者	粦	į	另	门
比較文學的墾拓在	臺灣	古陳	添慧	洪樺	文			學
從比較神話到	文學	古陳	添慧	洪樺	文			學
牧場的情	一思	張	煖	媛	文			學
萍 踪 憶	語	賴	景	瑚	文			學
讀書與生	活	琦		君	文			學
中西文學關係	研究	王	润	華	文			學
文 開 隨	筆	糜	文	開	文			學
知 讃 之	劍	陳	鼎	環	文			學
野草	词	幸	注	章	文			學
現代散文)	饮 賞	鄭	明	娴	文			學
藍天白雲	集	梁	容	岩	文			學
寫作是臺	首	張	秀	亞	文			學
陶淵明言	子 論	李	辰	冬	中	國	文	學
文 學 新	論	李	辰	冬	中	國	文	學
離騷九歌九章	淺釋	繆	天	華	中	國	文	學
景 廬 聲 氛	集	姜	超	嶽	中	國	文	學
苕華詞與人間詞言	话述評	王	泉	樂	中	國	文	學
杜甫作品	繋年		辰		中	國	文	學
元曲六力	こ家	應王	裕忠	康林	中	國	文	學
林下生	涯	姜	超	嶽	中	國	文	學

## 滄海叢刊已刊行書目(四)

書			名			作者			类	Ą	別	
詩	經	研	讀	指	導	裘	普	賢	中	國	文	學
莊	子	及	其	文	學	黄	錦	宏	rþ	國	文	學
清	眞	亩		研	究	王	支	洪	中	國	文	學
浮	土	德		研	究	李	辰多	/譯	西	洋	文	學
蘇	忍	尼:	辛	選	集	劉	安雪	学	西	洋	文	學
文	學质	次 賞	的	靈	魂	劉	述	先	酉	洋	文	學
音	当	ž	人		生	黄	友	棣	音			樂
音	丝	K.	與		我	趙		琴	豆.			樂
爐	12	艺	閒	-	話	李	抱	忧	舀			樂
琴	岩		碎		語	黄	友	棣	音			樂
音	绉	K	隨		筆	趙		琴	音			樂
樂	村	k	華		露	黄	友	棣	音	-		樂
水	彩艺	步巧	與	創	作	劉	其	件	美			術
繪	畫	圭	隨		筆	隙	다 沃	常	美			循
都	市	計	劃	槪	論	王	紅	I.l.	建			築
建	築	設	計	方	法				建			築
建	築	基		本	畫	陳楊	榮麗	美黛_	建			築
現	代	I	藝	概	論	張	長	傑	雕			刻
戲劇	藝術	之發	展及	<b>支其</b>	原理	趙	如	琳	戲			劇
戲	劇	編	,	寫	法	方	<b></b>	ব	戲		Provide had regulated production	劇



、國史大綱、史記地名考。有關子部者,有孔子傳、論語新解、莊子纂箋、莊老通辨、先秦諸子繁年、 民國五十六年,來臺定居。 。曹任燕京北大清華師大西南聯大齊魯華西川大江南大學各校歌職。大陸陷匪後,在香港創辦新亞書院 先生為學,兼涉四部。著述數十種,有關經部者,有兩漢經學今古文平議。有關史部者,有秦漢史 **錢穆字賓四,江蘇無錫人。民前十七年(一八九五)生。民元即在鄉村任小學教師,歷中學至大學** 

